


國學基
本叢書
明詩紀事
十



書叢本基學國

事 紀 詩 明

(十)

輯 田 陳

行發館書印務商

中華民國二十五年十二月初版

(86026)

國學基明詩紀事十冊

每部實價國幣

外埠酌加運費匯費

編輯者 陳 田

發行人 王 雲 五
上海河南路

印刷所 商 務 印 書 館
上海河南路

發行所 商 務 印 書 館
上海及各埠

D六五一六平

嚴翁朱

明詩紀事卷十八

辛籤

黃學謙五首

學謙字又謙一字天益善化人天啓辛酉副榜除樂昌教諭遷興平知縣有紫巖集照杯亭遺草
沅湘耆舊集又謙晚遭世亂出入山谷樵斧間棲窳無定所遺草凡八卷其曰登甲餘言焚餘草大抵多亂離中作沖和平澹絕少嘯殺之音兼精書法晚病痺右手廢以左手作小楷行草更遒逸有致

酌別昌江諸子

瓠落吾何用蹉跎付積薪獨憐萍梗聚五見荔支新山水娛遊子文章愧古人清貧無不可黑髮白綸巾
清遠峽

鳥道枕長河籃輿渡薜蘿野蜂巢廢壑餓雀啄枯禾村市炊煙少山城瘴雨多青楓丹欲盡客鬢近如何
別林工宰

日落大湖濱扁舟一問津山川舊遊地風雨獨行人枹鼓村墟急徵求澤國貧荒年兼薄俗白髮尙謀身
別沈茂陵南還入都有約重遊

邱壑吾將老。肝腸君可憐。書籤聊假日。藥裹動經年。世路艱虞裏。交情涕淚邊。長途春草綠。臨別卻悽然。

秋思

南國微霜冷。芰荷洞庭木。落水生波。湘靈月下怨瑤瑟。山鬼風前衣女蘿。青鳥飛飛空碧海。黃姑眇眇隔銀河。流雲一夕生涼翠。欲採蘋花奈晚何。

吳馴一首

馴字□□新會人。天啓辛酉舉人。

村居

園林綠水簇琅玕。夜色蕭蕭滿石闌。睡足暑銷楠瘿几。髮疏涼到竹皮冠。短筇長鑿閒生計。老菊衰蘭舊歲寒。日日雞豚養村社。酒杯常得小團圓。一作張賞詩。

文震孟二首

震孟字文起。長州人。待詔徵明曾孫。天啓壬戌第一人。及第授修撰。以言事貶秩調外。斥爲民。崇禎初起侍讀。歷中允。諭德。庶子。少詹事。擢禮部侍郎。兼東閣大學士。參預政務。尋落職。閒住。卒。詔復故官。贈禮部尚書。福王時。追諡文肅。有藥圃詩藁。

徐枋居易堂集。文公每侍講。烈皇嘗目迎而送之。講筵多忌諱。置春秋弗講。時上命輔臣選春秋專經者進講。首輔溫體仁故

以春秋起家。而講臣中則公以春秋名天下。烏程枝。幾見阨。久之始進講。至宰啗歸。顯凶禮當缺。上命補牘。公乃言。啗以六卿之長。而壞法亂紀。自王朝始。焉用彼相。烏程銜之。既入相。以公爭言。許鑿駟不當削。即露章入告。詆公爲指斥。以次輔。何公吾驍持正不憚。遂并斥之。柄鑿一言。并罷兩相。即擅政如分宜。江陵。未之有也。

叢林雜俎。經筵對御案設几。列講章其上。講官易爲口。直講從御案傍敷陳。即自撰講章也。蓋講章先期呈閣臣閱定。中書舍人錄置御前。往時講官第闡本義。未規數語。不繁引也。崇禎時。好衍時事。輒千百言。如豫章禮部右侍郎羅喻義講尚書布昭聖武。泛引國朝三大營志。烏程屢刪之。不受。忤去。錢鑿菴曰。講官致規。不過篇末。今累牘連章。烏程坐是與詞林不協。予所見講官文。馭持倪鴻寶學問該洽。聲容閑雅。真其選也。姚孟嘗次之。姜巖勝有儀度。其學不逮。姜燕及氣粗。許石門語冗。

題漱松堂

禪關窈窕鎖煙霞。時有松風漱齒牙。翠蓋亭亭懸物外。清陰密密蔭溪涯。濤聲入戶偏隨枕。香粉沾衣是雨花。茂苑於今成鹿苑。何妨竟日演三車。

田家

土牆茅屋幽棲。修竹疏花滿隄。彭澤人來送酒。山陰客過留題。

陳仁錫一首

仁錫字明卿。長洲人。天啓壬戌第二人。及第授編修。以忤魏忠賢削籍歸。崇禎改元。復故官。歷中允。諭德。拜南國子祭酒。福王時。贈詹事。諡文莊。有無夢園集四十卷。

百城煙水。無夢園。陳太史芝臺別墅。其自署齋聯云。流水之間。心自得。浮雲以外。夢俱無。中有息浪。見龍峰諸勝。

靜志居詩話。吳中甲第之盛。前數嘉靖壬戌。申文定。王文肅同郡人。後則天啟壬戌。文文肅。陳文莊同縣人。兩公皆老於公車。晚始登第。文莊以不肯撰魏璫鐵券文落職。可謂不貢科名。

贈袁重其

孝哉袁子。弱冠形穠。室既如罄。甕亦無儲。以硯作田。以管作鋤。朝種暮割。一米一珠。背負手炊。時慰倚閭。歲宴相過。雪滿吾廬。豈惜呵凍。喜爲爾書。

蔣德璟二首

德璟。字若椰。一字八公。晉江人。天啓壬戌進士。選庶吉士。授編修。歷侍講。諭德。庶子。少詹。拜禮部侍郎。進本部尚書。兼東閣大學士。參預機務。加太子少保。甲申三月。忤帝意。辭朝。移虜外城。亡去。福王時。召入閣。固辭。唐王立。再召。以足疾辭歸。病卒。有敬日草二卷。

漳浦集。僕始創爲詩篇法。大則十餘。小則數首。以錯綜事物。酌於情理。今古之間。其流連風月。泛濫觴綵者。概不得與。惟吾鄉蔣八公。獨信其說。此道關才關識。才識又生於學。而嚴滄浪以爲詩有別才。非關學也。此真警說。以欺誑天下後生。歸於白戰。打油釘鉸而已。八公云。必欲登峰造巔。刊皮抉髓。則人不數章。章不數句。安得盡如烝民。大東。而後得其正變乎。僕亦深以爲然。

東南嶠外詩話。公於國計最精。凡九邊十六鎮兵食之數。及屯鹽民運。漕糧馬價。無不了然於胸。吾鄉先哲。自馬恭敏外。未見其匹。而朱竹垞但稱其典禮治歷。條奏詳明。此與周延儒薦公文章華瞻何異。亦淺之乎。知公者矣。十五國風高言集。董蒼水曰。爲詩者雕繪不難。而難於自然。自然之中。雋味出焉。此先生之詩乎。

舟過海珠

初日浮波似鏡中。捲簾樹色繞珠宮。僊人鮑葛知何在。應在菖蒲碧澗東。

雷州上元竹枝詞

花期常似春三月。海錯未輸值一錢。十斛檳榔田萬頃。徑來陸地作神仙。

郭都賢一首

都賢字天門。益陽人。天啓壬戌進士。除行人。遷吏部主事。歷員外郎中。出爲四川參議。遷江西副使。以右僉都御史巡撫江西。福王時。拜南京操江。桂王立。以兵部尙書召。俱不赴。入國朝。削髮爲僧。號頑石。又號些庵。以詩累死江陵承天寺。有衡嶽集、止庵集、湘恨、秋聲吟等集。

陶汝兼福玉堂集。些公以故老流離。瞻懷宗社。所作詩文。居然得九歌之遺。

沅湘耆舊集。先生負經世才。思匡屯難。及遭時多故。知事不可爲。銷聲晦迹。至於祝髮空門。流離轉徙。客死荒寺。故國之戚。一飯不忘。遠則鄭憶翁。謝皋羽。近則藥庵。青原。晦山。大錯諸公。心事一徹。先生詩。雄篇鉅章。往往淩厲一世。矢口成音。間乏蘊藉。倪文正公所云。愛他風骨耐他粗。良非虛語。

錦湖早發

曉月樹猶白。放舟身與輕。日長添午夢。蘆暗束江聲。雲影天在水。郵籤浪是程。錦湖深幾許。得似送余情。

文安之一首

安之字汝止。夷陵人。天啓壬戌進士。改庶吉士。授檢討。遷南司業。就遷祭酒。削籍歸。福王時起。詹事。唐王立。召拜禮部尙書。皆不赴。桂王立。拜東閣大學士。加太子太保。兼吏兵二部尙書。總督川湖諸處軍務。爲孫可望所阨。桂王入緬甸。鬱鬱而卒。有鐵菴集。

山居漫興

斜陽倒影上莓苔。烏鳥相呼客未來。怪石但逢閒處有。好花剛揀勝時開。關山曉角猶悲壯。鞏洛名城半草萊。欲寄牢騷愁鹵莽。暗中搗鼓作輕雷。

馮元颯一首

元颯字爾敬。慈溪人。天啓壬戌進士。除澄海知縣。改揭揚。擢戶科給事中。歷禮科。刑科。遷太常少卿。歷南太僕卿。通政使。召拜兵部侍郎。進尙書。

首善書院感舊作

維貞皇帝神授符。詔出明光徵大儒。有臣元標首應詔。誰竝進者臣從吾。一時諸儒相繼入。王道蕩蕩民所趨。貞皇雖逝嗣皇少。譬之日出時未晡。諸儒謂可睹上治。力崇正學開榛蕪。請爲天子建書院。揭以首善天之衢。漢唐宋代何足數。升堂入室泗與洙。當使亂臣賊子懼。如陸有軌水有桴。豈無賈鼎相錯列。能由是路亦吾徒。越歲壬戌策進士。臣颯蒙與諸臣俱。二十爲學志方壯。晨起盥漱遵修塗。少焉諸儒次第

入鳴鐘擊鼓聲。鐔于衣冠肅對寂未語。森若披古賢聖徒。儒者甯盡闕世務。憂天往往多訐謨。乃知名教自足樂。照耀萬古焉可誣。彼譖人者亦太甚。曰宋之敗由程朱。封疆在今多事日。褻衣博帶何其迂。輔臣向高爲此懼。手自伏疏陳青蒲。誰爲此言告陛下。當付之吏法當誅。天子寬仁置勿問。忍見白日舞妖狐。嗚呼諸儒死不恨。宜尼栗主誠何辜。乙丙之際不可說。故老欲哭徒嗟吁。丁卯八月聖人出。讒者慄慄憂頭顱。臣颯再入問書院。門外細草翔唳鳥。聖人豈不重經術。時危未暇陳蒼瑚。竊見京師富梵室。口語以唄拜以膜。亦有高閣祀天主。譚兵治歷喧齟壺。獨使書院屏勿事。臣颯敢復惜微軀。卿雲縵縵天子都。諸儒靈爽應未徂。大道經天終有孚。幸甚爲念臣區區。此詩從詩錄改本。

劉侗帝京景物略。都門講學。始首善書院。起天啟二年十一月。閏月二十。至天啟四年六月罷講。罷逐主講者。都察院都御史吉水鄒先生元標。副都御史三原馮先生從吾兩先生。萬歷初。各以建言予杖去。里居講學四十年。泰昌初。徵入京。尋總副臺憲。公暇輒會講城隍廟百子堂。自紳衿氓隸聽者數百人。始議建書院宣武門內城下。御史周公宗建董之。講堂三楹。後堂三楹。供先聖。陳經史典律。院碑一。大學士葉公向高文。禮部尙書董公其昌書也。講未幾。崔魏盛黨禍深。御史倪文煥等詆爲僞學。斥逐。請碎其碑。有疏曰。聚不三不四之人。說不痛不癢之語。作不深不淺之揖。噉不冷不熱之餅。乃碎碑。暴其石於門外。毀先聖主。焚棄經史典律於堂中。院且折矣。會今上改元。倪等伏法。院遂以存。後禮部尙書徐公光啟率西洋人湯如望等借院修歷。暫署曰歷局。

靜志居詩話。徐宮保光啟借院修歷。久之。西洋人踞其中。更爲天主堂。至今不改。馮公是詩。毋忝詩史。

蕭士瑋五首

明詩紀事 辛籤 卷十八

士瑋字伯玉吉安泰和人天啓壬戌進士除行人謫光祿典簿遷南大理評事就遷禮部主事改吏部歷員外郎中福王時遷光祿少卿拜太常卿移疾歸有春浮園集

有學集伯玉詩體氣清拔取法涪州今體偶然與法翁合

李元鼎石園集伯玉惜墨如金未嘗輒下一字以故著述精而不博

田按伯玉論詩取律細格老故不輕落筆力矯王李之弊時入尖新與公安同趣其獨到之處瘦削清冷儼然宋人佳境

贈蘊公

亦習毘尼戒偏饒物外情攢眉入白社沽酒破愁城疏柳低殘月流螢照定僧焚香深夜坐靜對長靈明

初夏幽居

爲愛松風偶結廬日長山靜閉門初柳眠水滿低過舫梅潤天陰浸及書竹聘夫人沾體滑葛裁野老稱身如雨餘土溽肥新甲荷鋤相隨小摘蔬

園居二首

偶然謫墮向人間博得清閒任福慳輒飽經行時宴坐醉餘睡起一登山壯心無賴隨年減幽事相關到老頑茆屋數椽深竹裏湖光澹宕樹灣環

南湖遙與北菴連纔下籃輿便上船得計學閒先學懶無才爲鬼可爲仙因精茗事泉能細誤翦鄰樊山

放全歸晚斷橋逢野衲。清言共爾亦妨禪。

蕭齋讀楞伽

翳然水木湛清華。高寄蕭條處士家。課罷楞伽無個事。閒窗小立嗅梅花。

金肇元一首

肇元字木公。一字司杓。東陽人。天啓壬戌進士。除徽州推官。入爲工部主事。改兵部。遷員外郎。出爲江西參議。進副使。遷福建參政。有陽春館集。

遊水竹隴

秋光出郭好。此地有叢林。陟岫雲生足。穿松翠染襟。茅龕天竺佛。梵唄海潮音。蒼鶻知留客。氤氳谷口深。

倪嘉慶一首

嘉慶字篤之。江甯人。天啓壬戌進士。除戶部主事。遷員外。以事繫獄。放歸。起吏部員外。遷戶科給事中。甲申後。爲僧名函潛。又名大然。字笑峰。有靈潭集。

靜志居詩話。倪公治賦之才。崇禎戊辰在樞部。上言國計入不敷出。歲額缺至二百三十餘萬。何以支持。其言瞭若指掌。假令思陵此時聽公之言。網繆區畫。則後此雖有水旱盜賊。尙可緩於危亡。而惜乎不見納也。旣而兵科給事中劉儼疏請裁驛遞。有旨裁十之三。省郵傳銀六十萬。公獨昌言曰。驛遞之設。貧民不能自食者賴之。裁之太過。將鋌而走險。此盜生之源也。俄而李自成果以驛卒被裁。走入高迎祥隊中。後遂以亡明。朝野咸服公慮之遠云。

遠客

淒風吹遠客。極目盡蕭森。山閣含秋氣。江城起暮陰。天晴空翠隱。日薄瘦寒侵。漫把他時淚。孤舟繫此心。

黃宗昌二首

宗昌字長倩。卽墨人。天啓壬戌進士。除雄縣知縣。改清苑。徵授山西道御史。有恆山游草於斯堂集。

全楚臣憇寒汀館中。見鍛羽雁賦詩傷之。

雲中自可羨。籬下亦無妨。物化齊溟滓。鱗潛等羽翔。甯須假六翮。刷羽凌八荒。所以蝸與鶯。欣然搶榆枋。故園

新葺茅齋木板扉。尋常高臥到斜暉。遙憐舊植青桐樹。久貯清陰待我歸。

喬可聘一首

可聘字君徵。一字聖任。寶應人。天啓壬戌進士。除中書舍人。遷河南道御史。有醉陶齋詩。

生日

病骨殘生付冷煙。掩扉蕭寂子雲玄。山中日月無心記。開到黃花又一年。

何萬化一首

萬化字宗元上海人天啓壬戌進士授南兵部主事歷員外郎中改禮部出爲福建副使進參政擢廣東按察使不赴。

靜志居詩話宗元仕國爲制府畫策平劉香入楚同諸君協力擒張普薇是亦開濟之才不徒以雕篆見長者

遊玉華洞

奇物有萬族誰羅一穴中造化作兒戲巨靈殫鬼工赤松厭雕刻白鶴返洪濛千載此人去寥寥洞府空

梁元柱一首

元柱字仲玉廣州順德人天啓壬戌進士選庶吉士改陝西道御史以劾魏忠賢削職崇禎初起福建道御史以憂歸起陝西參議未上卒有偶然堂集

送人從軍榆關

少年負俠骨悲歌志不平偶探黃石卷欲赴白登城錦瑟壘頭醉雕戈馬上橫功成報天子當作魯書生

姚孫築一首

孫築字心甫桐城人天啓壬戌進士除龍遊知縣改晉江擢江西道御史謫上林典簿遷吏部主事歷員外郎中出爲福建□□改尙寶卿有石嶺集

車中漫紀

稍覺霜威解。郊原靜不風。平蕪嘶倦馬。古戍掠征鴻。帆影寒流外。人煙落照中。徐滕雖異壤。艱食恐相同。
齊心孝一首

心孝字君求。桐城人。天啓壬戌進士。選庶吉士。授編修。

宿益堂

閒邀明月過仙家。網戶沈沈暗碧紗。去日濃陰渾不改。可憐新發斷腸花。

王鳴玉一首

鳴玉字六瑞。竟陵人。天啓壬戌進士。歷給事中。出爲陝西參政。有環草。

韋公寺

左安門外繞長汀。畏友頻邀過水亭。一片塵羞溪面照。十分酒入客脾醒。荷含秋意多相向。蟬作鄉音乍可聽。花落燈殘鐘定後。今宵旅夢各惺惺。

秦壩五首

壩字器新。無錫人。天啓壬戌進士。除澤州知州。改福甯。擢戶部員外。有靜遠堂集。

栖隱園十景錄五

溪上架層樓。登樓遊畫裏。陰晴朝暮閒。與山俱臥起。溪山樓

曲曲疏籬轉。寒林別有春。孤吟時索笑。不見詠花人。香雪林

日日對青山。青山看不足。東風何處來。又皺平疇綠。青未了關

名取鄭生注。山川若綺分。登臺欲有望。青山多白雲。綺望臺

繞廬碧一灣。濯纓者誰子。望望青山近。桃花自流水。瀟碧廊

黃景昉五首

景昉字太穉。晉江人。天啓乙丑進士。改庶吉士。授編修。歷中允。諭德。庶子。少詹。進詹事。擢禮部尚書。兼東閣大學士。參預機務。加太子少保。改戶部尚書。進文淵閣大學士。引歸。唐王時起原官。復告歸。國變後。家居十餘年卒。有甌安館集三十卷。

國史唯疑。文皇求張三。丰愈切而張愈固。白匿。學道宜秉宿根。秦皇漢武空囊囊。瀟足。况別有所假借求之乎。卽復謬頌輝煌。何足動神仙一盼。予嘗過之詩云。金碧酬初願。龍池動殺機。當年方外客。也護首陽薇。頗自淡中。

十五國風高言集。田鬻淵曰。東厓先生詩。取境不一軌。選材不一家。曾讀其戊子六月五日紀事詩。後之尙論者。并可以原先生之心事矣。

靜志居詩話。相君務。去陳言。專尙新警。具近體尤雕繪。如侍楚王宴云。隆準衣冠高帝後。夥頤宮闕大江濱。登太和絕頂云。天野星躔包兩戒。國朝嶽瀆祝三公。南臺燕集云。仙家閭苑琉璃浦。禹貢揚州篠簜田。贈友云。少從魯國稱男子。家近茅山得異人。壽樂叟云。公餘釋子燒松液。酒半材官舞蔗竿。集北郭草堂云。誰邀玉佩神仙客。自唱清歌警薩蠻。答友云。枚叔賦遊梁上。

苑伏生書重漢西京寄友云以吾一日長乎爾如此三星燦者何要不作沿襲語

龍性堂詩話東厓先生當革代時有感限韻詩八十二首中如有淚銅人甘戀漢無情玉馬苦朝周疊尊醉益看花感絃管淒增落葉哀元亮詩成題甲子伯仁宴罷泣山河春去尙憐望帝魂信來誰答子卿書雁橫塞北昭君恨花發江南庾信哀嗚鳥也知亡國恨汗牛空信古人書逢宜虛負白馬恨狂客實含朱鳥哀枯魚此日將書至旅雁何年繫帛回哀聲險韻不堪多讀和敬堂集追維辛巳壬午時涕如蝸蟻天子疑於上黨與成乎下溫陵二相同日入政府嘗遇巷之時正人獲罪如石齋公禍幾難測東厓先生經筵申救必齟而後已於是不自安不旋踵謝歸所留連往復於本朝之故一切寄意於單詞寸牘中名曰國史唯疑其文約其旨該顯甚惜不以示人獨留其副於高雲客氏雲客公之高足弟子也滄桑之後雲客以授林同人吉人兄弟同人又授鄭公允幾亭及予於是三山始有鈔本凡四家先是公林居余小子曾趨侍甌安館累晨夕貽詩有聲名轉大憂方始文網多繁夢未安之語蓋猶有疊山對客之恨焉韜光以來更歷二十餘載山川如故夢若隔塵手捧遺編撫臂酒涕榕城詩話晉江黃太穉景昉天啟進士後登槐鼎著有甌安館詩及鹿鳩詠其自序云徒以身叨禁從出言有章意欲斟酌情文謬附於昔人和合朝野之誼此言可以爲館閣言詩之法

田按太穉博通當代掌故所著國史唯疑持論具有條理爰立如此可謂得人乃不久而罷思陵之不足與有爲可知矣甌安館詩取法晚唐輕俊鮮妍於閩人成派別開生面

題李孝伯花隱別業

巷避車窮處誰期宛委通
入門驚竹翠隨地見花紅
白壁邗關使青樽綺里翁
酒行觴政肅知未損家風
立秋日同傅子詡王何稱
林爲盤郭關生穿蓮東湖分得蓮字

曲水旁城好放顛。荷香十里葉田田。爲驚鳥夢停歌扇。故拂花鬢落酒船。詩思清如秋乍起。湖光雅與客相憐。紅裙白紵尋常唱。我愛峯頭玉井蓮。

武林宿昭慶寺

宋家宮殿佛爲壇。廊下波斯十字欄。薄暮青絲邀客醉。重湖白紵映人寒。暑逢再閩涼非遠。歸及中途夢未安。仍被信來催轡發。許多幽壑不曾看。

同李曉湘給諫過郭仲常吉士宅分賦

閩山潮海未殊鄉。密坐深杯況夜長。莫怪市聲催響築。同將風景憶檳榔。吹笙緱嶺神仙相。烙馬黃門羽獵裝。君自投驍稱絕技。滑稽誰更似東方。

邢州詢李于鱗先生遺蹟

先朝西署盛風流。白雪縱橫不待秋。三輔年年驅五馬。只今人說李邢州。

何楷一首

楷字元子。漳州鎮海衛人。天啓乙丑進士。崇禎初授戶部主事。歷員外。改刑科給事中。屢遷工部都給事中。以劾楊嗣昌忤旨。左遷南國子監丞。福王時擢戶部侍郎。唐王立。進戶部尚書。

田按。元子立朝。嶽嶽懷方。尤邃於經學。惜詩不多見。

吳門與諸子夜集賦呈辟疆社兄

乘槎渾未倦。載酒喜相過。玄探圖前易。情生別後歌。雨聲侵棹冷。香燼拂杯多。積想聊堪豁。分襟復奈何。

孫晉一首

晉字明卿。桐城人。天啓乙丑進士。除將樂知縣。擢給事中。歷大理卿。以□□總督宣大。有黃山遊草。

再宿南陽

二月水漫漫。無端春色闌。深杯嫌夜短。久客怯衣單。未見干戈滿。誰知道路難。憂時多少淚。不敢向人彈。

熊開元一首

開元字玄年。嘉魚人。天啓乙丑進士。除崇明知縣。改吳江。徵授吏科給事中。貶二秩調外。起山西。按察司照磨。歷光祿監事。遷行人司副。以言事廷杖。削籍遣戍。福王時。起吏科給事中。不赴。唐王立。起工科給事中。擢太常卿。左僉都御史。隨征東閣大學士。汀州破。棄家爲僧。名正志。字槩菴。有華山紀勝集。

靜志居詩話。魚山欲劾宜興。適思陵許奏事。於弘政門召對。及入見。宜興侍側。因言軍事而出。既而召見德政殿。輔臣亦入。乃言曰。易傳有云。君不密則失臣。臣不密則失身。臣所云。願輔臣暫退。思陵諭曰。輔臣管密勿。熊開元前所奏。卿等皆與聞。可以不退。是日不敢盡言。思陵命草疏入。仍有茶果餅餌之賜。迨疏入。遂被收。思陵怒且不測矣。會姜公如農疏有皇上何所見而

云然乎等語。怒益甚。兩公受杖之苦。用刑之慘。其不死者幸也。爰書旣上。思陵一曰。讒譖輔弼。再曰。讒譖陰狡。三曰。謗毀校肆。人皆疑思陵曲護宜興。獨尹樞部宣子謂思陵時已恚宜興。命魚山具疏者。度必列款。欲據之便按問。及見疏。乃曰。如此不痛不癢。思兩邊做好人邪。蓋實怒其不力參。而反以誹謗大臣爲罪。非思陵本意也。斯言得之。

吳門與金正希夜哭

碧血何曾灑。丹心不可砭。誰人呼馬角。與子泣龍髯。半壁留吳越。羣奸布網箝。吾將披髮去。長向海山潛。

陸澄原一首

澄原字嗣端。平湖人。天啓乙丑進士。除工部主事。遷員外。謫順天照磨。歷大理寺副。遷兵部員外。被察閒住。有芝房集。

橋李詩繫嗣端爲詩。秀逸尖新。雕香刻翠。有佛宕自喜之致。

寄王修微

女兒溪淺亦生紋。巾子峰低也出雲。水定山空何處所。合歡花底拜茅君。

郭紹儀一首

紹儀字汾仲。一字丹葵。平湖人。天啓乙丑進士。除當塗知縣。擢南湖廣道御史。有青蒲草。

擬郭弘農遊仙詩

弱齡寡塵累。燕想出殊廷。手翦碧桐葉。好寫烏跡經。束髮理冠劍。歎息勞我形。每思凌景風。駕彼朱鶴翎。

玉妃名婉羅。翡翠列雲屏。贈我刻竹杖。飲我瓊綠醞。養生不愛道。毋乃非仙靈。

陸錫明一首

錫明字幼輿。平湖人。天啓乙丑進士。除工部主事。遷員外。出爲常州知府。改徽州。遷江西副使。

郡齋坐雪

招飲今堪詠。吾將問澤蘭。美人不知處。蕭瑟耐春寒。風杵春雲腳。花鬢碾月團。翻疑山郡裏。僵臥似袁安。

劉在朝六首

在朝字廣乘。監利人。天啓乙丑進士。除福清知縣。徵授戶部主事。歷員外郎中。出爲易州兵備副

使。有蘭心堂。喚蜨齋等集。

田按廣乘詩。取意幽婉。雖爲鍾譚所染。亦彼法之錚錚者。

聞雞有懷

鐘澀知霜滿。雞頻省曙分。人天開夜旦。佛業現聲聞。落葉埽殘夢。寒衾思早曛。不知湖上覺。猶戀幾峯雲。

客去

客去自成睡。村幽天屢陰。湖風吹夢闌。茅屋受秋深。裝薄居頻換。衣單寒轉侵。故人在天末。槭槭想遙音。

村居風雪。畏齋先生老病遠顧。留宿祗園。賦贈。

茆屋雨聲近。中宵風更號。愁君同瘦鶴。無友贈綈袍。梵唄了今夕。瘖聾薄雅騷。蕭然禪榻畔。塵夢付霜毫。

花朝日有感

甲申除日

詎忍言除日。君親諱所臨。色開鍾阜迴。淚灑鼎湖深。一壑謀昕夕。三朝愧履簪。祝年同野老。敢後草臣心。

秋泛

蓼花兩岸映波紅。短葦輕橈夕照中。不信綠楊憔悴畔。更無顏色領春風。

黃文煥一首

文煥字維章。一字坤五。永福人。天啓乙丑進士。除海陽知縣。改番禺。山陽。召試。擢編修。以事下獄。釋歸。有赭留集。

福建通志。黃道周以論楊嗣昌。陳新甲得罪逮問。詞連文煥。遂同下詔獄。獄中箋注楚詞聽直八卷。陶詩析義二卷。既釋。獄乞身歸里。別道周詩云。自聞鉤黨獨行憂。痛哭批鱗淚未休。欲格君心甘瀝血。不教漢胙付清流。雷霆怒盡天回笑。生死移時我掉頭。今日全軀同去國。莫將厨俊傲林邱。

和俞邵弟白秋海棠

明詩紀事 辛籤 卷十八

癖畏陽驕暑氣侵。尋常棲止擇多陰。近來別有迴天力。占得飛霜早滿襟。

李模一首

模字子木。太倉州人。天啓乙丑進士。除東莞知縣。徵授御史。以忤閣謫南國子典籍。福王時起御史。有碧幢集。

百城煙水。密菴舊築在閨門後板廠。爲李侍御灌溪宅。後園內有桃鵝草堂及芥閣諸勝。

徐枋居易堂集。昔宋室旣亡。故相家鉉翁隱居教授。不涉世事。十有九年而逝。史稱爲宋遺臣。前侍御李灌溪先生。遭世變。潛節固守。確乎不拔。自鼎革時。年未五十。乃自五十而六十七。八十八。守益固。節益高。三十餘年如一日。嶠然不滓。聿稱完人。史冊所希有也。

初埽密菴舊築

昔日深深意。今依幻住身。蓬蒿迷若醒。竹柏故猶新。小得蜘蛛隱。居惟鐘磬鄰。埽苔迎古佛。竺國備遺民。

賀鼎二首

鼎字公調。丹陽人。天啓乙丑進士。除尉氏知縣。改永城。武康。入爲兵部郎中。累遷山西參政。

讀孟東野集

寒香嚼彌出。標格何清孤。冰雪空山裏。吟魂或可呼。

塞上曲

河冰初泮春風多。沙深水急流成渦。中有老冰不可觸。行人相喚無渡河。

區懷瑞二首

懷瑞字啓圖。高明人。太僕丞大相子。天啓丁卯舉人。除當陽知縣。改平山。有趨庭游燕游滌諸草。
廣東新語。區太史海自有子啟圖。論詩云。國朝之詞章。自北地以還。歷下繼之。盛於嘉隆。而卽衰於嘉隆。其病在夸大。而不本之性情。率意獨創。而不師古。啟圖能承家學。與李煙客羅季作。歐子建。鄭鴻若四五公者唱和。其雄才絕力。皆兢兢先正典型。弗敢隕越。絕不爲新聲野體。

初至玉陽

踐玉作名城。乃介荆郢間。西稱湯沐邑。北列价人藩。蠶叢復東路。設險抗雲關。宰牧苦郵傳。束帶無時閒。晨起理訟牒。日旰不得還。臞瘁道固然。甯有冰雪顏。撫茲鋒鏑餘。徒思物力殫。頽垣隱草莽。暴骨如邱山。何事豺虎噪。四郊行且艱。

雨後待寇信

屹屹孤城夜。淒淒風雨心。輕師偵未返。重地寇能深。遠火多飄舉。高奮遂陸沈。吹笳知未散。橫槊愧長吟。

黃光一首

光字若木。莆田人。天啓丁卯舉人。官來安知縣。有十一洲詩草。

闕陔詩話。若木工駢體文。奇篇麗句。枕藉齊梁。

明詩紀事 辛籤 卷十八

溫陵旅宿

寒夜一何長。鳴雞催不曙。秣馬促晨炊。暗逐霜光去。

明詩紀事卷十九

辛籤

呂大器四首

大器字儼若，遂甯人。崇禎戊辰進士。除行人，擢吏部主事，假歸以守城功增秩一等。出爲關南道參議，遷固原副使，擢右僉都御史，巡撫甘肅，拜兵部添注侍郎，兼右僉都御史，總督保定山東河，北軍務，改江西湖廣應天安慶總督，再改南兵部侍郎，福王時，遷吏部侍郎，以事削籍。唐王立，召拜兵部尚書，兼東閣大學士，桂王立，以原官兼兵部事，進少傅，督江南諸軍，贈太保，諡文肅。有東川詩集，塞上草。

黎士宏仁恕堂筆記：閣部呂公大器，丙戌，隆武稱號福州，公亦入閩，見時事不可爲，遂辭去。至臨汀，予得見之，每一談時事，言與淚俱，其贈予詩有細雨霏霏已浹旬，豈疑天日久沈淪，又曰：會看君文成鳳彩，漫云我技已龍馴，感慨之旨可見。時有以口舌得官者，舊屬公薦拔，卽貴顯，十及門終不一見，行李半肩，扁舟東下，予送之河干，執手太息曰：異日相逢，想是麻衣草履矣。揮淚哽咽，不能出聲，風規舉止，真大臣也。

靜志居詩話：呂公驅馳南北，盡瘁行間，五言如野寺依巖立，官衙傍水開，孤燈寒殿壁，落日映山城，精衛悲銜石，鷓鴣嘯滿山，雲煙春尚在，烽火晝相連，淚盡銅駝棘，歌殘玉樹花，豈無丹闕戀，終抱白雲思，忠孝之誠，溢於言表。

詩觀初集東川詩思精而語麗

李調元蜀雅文齋詩音旨凄壯逼似少陵

泊略陽下灘

祇爭一帶水。尙枕小溪眠。漁火穿江出。村烽帶月傳。孤城還屹爾。白叟半蕭然。回憶垂陰處。森森俯大川。

蘧江

孤身行萬里。驛路怯星軺。樹密煙村小。沙平水岸遙。野狐衝馬立。山鬼向人驕。漸喜南州地。猶看聚晚潮。

雪山

光搖旌旆五涼平。天外羣峰玉削成。瀚海欲空青見月。燕支未染白如瓊。飛鴻已度長城窟。勒馬還歌出塞行。朱夏重裘猶不解。崆峒倚劍自崢嶸。

靖邊作

鳴沙萬里憶芙蓉。午夢猶酣客思慵。戊卒秋新思飲馬。將軍歲久不傳烽。停車無計綢繆戶。乘傳頻勞進午饔。獨坐帳中驚白髮。何堪砌下響秋蛩。

高斗樞二首

斗樞字象先。鄞人。崇禎戊辰進士。授刑部主事。以事下獄。旋復官。進員外。出爲荊州知府。遷湖廣

副使歷參政進按察使守鄖陽加太僕卿以右僉都御史巡撫漢中未赴福王立進右副都御史改撫湖廣道阻不得往國變後歸家卒有蚤齏集十六卷

全祖望續甬上書齋集高公守城之暇橫槊賦詩不減劉越石一流

壬午臘日與李賊大戰三日夜賊退賦示羣僚

刺聞傳警息登堞下軍符前隊靈鉦舉雙甄曠騎驅摧鋒擐巨纛摩壘馘封狐午夜纒休甲遙聞幕上烏萬騎指孤城腰間寶劍鳴乘風飛羽箭帶雪引霓旌旛動朝酣陣枚啣夜襲營凱旋笳吹滿梅柳正相迎

于穎一首

穎字長公金壇人崇禎戊辰進士除工部主事歷員外出爲西安知府以事削籍起工部郎中出知順德府改紹興遷浙江按察副使

偕無殊過虎邱遇雙白出新茗次韻

爲赴尊前約乘流漾淺沙新晴開疊嶂積雨贍疏花坐覺班荆久行看落照斜登臨興未盡還乞遠公茶

周鑣一首

鑣字仲馭金壇人崇禎戊辰進士除南戶部主事改禮部以言事斥爲民起原官進郎中旋罷歸福王立以阮大鍼構陷逮治賜自盡有十四哀詩

陳鼎東林列傳。福王立。馬士英當國。特薦起從逆賊臣阮大鍼。大鍼素惡東林諸賢。作正續螻蛄錄。有十八羅漢。五十三參善才童子。七十二賢聖菩薩。又蠅蝻錄。有八十八活佛。三百六十五天王。五百尊阿羅漢。共千有餘人。皆海內賢良。欲盡殺之。以空天下。遂首逮周鏞及雷縝。祚下獄。燔旨賜死。

陳貞慧書事。崇禎戊寅。吳次尾有留都防亂一揭。公討阮大鍼。大鍼以黨崔魏論城旦。罪暴於天下。其時氣魄。尙能奔走四方。士次尾憤其附逆也。而鳴騶坐輿。偃蹇如故。士大夫繾綣爭寄腹。以爲良心道喪。言於顧子方果。子方果曰。果也不惜斧鑕。爲南都除此大慙。兩人先後過余。言所以。余曰。鍼罪無藉揭。士大夫與交通者。雖未盡不肖。特未有逆案二字提醒之。使一點破。如贅癭。薰潤爭思決之爲快。次尾燈下削一藁。子方毅然首唱。飛馳數函。毘陵爲張二無。金沙爲周仲馭。雲間爲陳臥子。吳門爲楊維斗。浙則二馮司馬。魏子一。上江左氏兄弟。方密之爾止。阮心此事。仲馭主之。而鍼以書來。書且哀。仲馭不啟視。就使者焚之。鍼銜之刻骨。揭發而南中始知有逆案二字。發出惡語曰。逆某逆某。鍼氣阻。潛迹南門之牛首。向之裘馬馳突。鷹兒崽子。煨燼通衢。至此奄奄氣盡矣。甲申。弘光事起。鍼曰。此奇貨可居也。黃綠官兵部尙書。以迎立首謀。福邸舊案。將盡殺天下。酬所不快。下周公鏞。雷公演祚於獄。發其端。時語所親曰。吾五六年來。三尺童子。見阮大鍼名姓。輒詈而唾者。非若若耶。若知有今日。以揭中最切齒者十人列之上。曰。此擁戴潞藩以圖不逞者。又造爲十八羅漢。七十二金剛之目。曰。此其羽翼者。如王紹徽。點將錄故事。以網殺之。貴陽馬相曰。大事方定。如此人心不安。姑緩之。乙酉四月。左帥良玉衷甲東下。意清君側。至九江。南都驚恐。鍼以爲雷周所構。不除之。爲內應不已。詎貴陽暴指。薄暮往語。至達旦。飛片紙賜死矣。

懷京口讀書示長人

三山草色十年寒。此日何當報酒闌。昨夜潮聲東去急。望江樓上有人看。

龔士驤八首

士驥字季良。義烏人。崇禎戊辰進士。除溧水知縣。

藝書。季良詩精苦沈細。

金華詩錄。季良自謂其詩降格爭奇。亦有玄勝。起結往往微遜。亦自知之。而不肯措意改作。故多以句勝。七言如鳥外斷虹山寺雨。浦邊斜燕石橋風。炊煙隱樹遠邨暮。暝色渡江春浪深。孤枕幾年愁暮笛。一燈初夜隔春紗。愁中草色偏嫌雨。夢裏花枝獨背春。五言如秋嶂宜筵月。春林足緒風。燕領差池雨。花標次第春。芳樹和風綠。幽蘿逼雨青。樹納初晴日。花爭欲盡春。上者神秀。次者幽婉。皆一代之逸唱也。

田按。季良詩才絕麗。崇禎時。楚音靡靡。此真軼塵之選。

塞上曲

鷹騎乘秋牧。連營殺氣新。隴雲朝出塞。邊月夜歸秦。白草金羈色。黃沙鐵甲塵。將軍猶蹴踘。只領醉中春。

過顧將軍

朱戶王孫弟。青萍俠客家。濃雲連斷岫。急雨定飛花。寶劍雙鸞舞。金丸獨鳥斜。夜窗飄細響。知是教琵琶。

春興四首

枕郭灘聲拂岸斜。環江山色抱城賒。門當流水鍾期調。徑繞煙霞綺季家。雙燕到春宜畫棟。一鶯出曙隔深花。閉關卽是棲真宅。不用尋幽躡彩霞。

女牆薜荔綠翻空。靜室平開密樹中。疏檻曲通花徑月。小山幽背竹林風。仙人洞壑藏松赤。少婦筵篔倚

袖紅學道徵歌皆勝事。池臺未許習家同。
山擁錢塘翠作屏。浮圖高處有藏經。曉花鳥亂迷秦隴。呪食僧閒漱晚汀。寒雨乍收江月黑。春潮欲上浦
風腥。叩關乍解無生偈。不用臨流歎獨醒。
湖上千峯鎖翠微。兩隄新水澹忘歸。秦箏舊譜朱樓曲。楚客新裁綠芰衣。堞隱江雲時隱見。林藏海雨半
依稀。何人駐屐攀蘿月。碧樹陰中半啓扉。

津亭

驛路明霜葉。津亭急浪花。不須悲遠道。只此是天涯。

秋閨

寒雨侵階欲暮秋。鐙沈月黑夜悠悠。更深獨背紗窗立。怕有疏螢點闌愁。

吳承燧一首

承燧字伯昭。莆田人。崇禎戊辰進士。除懷甯知縣。

楊柳枝詞

二月纖枝三月花。緣隄綠岸簇香車。紫騮慣識西陵路。直向高樓蘇小家。

曹荃一首

荃字元宰。無錫人。崇禎戊辰進士。除南刑部主事。歷郎中。出爲漳州知府。累遷福建副使。

山中獨行

山石太嶮嶢。孤行疑鮑焦。疏鐘雲外聞。細草澗邊橋。立馬欲相問。前村去已遙。響輿颯忽影。碧落夜聞簫。

林銘球一首

銘球字紫濤。漳浦人。崇禎戊辰進士。官御史。有鐵厓集。

塢寺小樓和壁間韻

爲拾天中月。來分祇樹林。樓空冷梵語。塢靜冥伽音。一瓢雲足飯。半偈雨開心。得句秋初爽。鳴蛩入夜吟。

謝宗一首

宗字伯彝。龍溪人。崇禎戊辰進士。累官山東參議。有許山遺稿。

瑄溪登舟寓張有民山房

小舟逼岸入山家。竹屋穹窿望遠沙。煙雨微茫揮淡墨。溪山混沌掃青霞。烹茶對客水爲活。酌酒談心天作涯。漁火黃昏紅一點。柴扉半掩落燈花。

姚思孝一首

思孝字永言。江都籍。歙人。崇禎戊辰進士。改庶吉士。授戶科給事中。改兵科。工科。謫江西布政司。

照磨遷南國子助教。歷太僕丞。光祿少卿。福王時。改大理少卿。後削髮爲僧。有康山草堂集。遊筍草。

詩觀二集。廷尉詩。新琢秀逸。

得吳梅村書卻寄

征邁今如昔。危瀾尙未平。莫嗟同輩盡。翻詫兩人生。筆怨曾焚草。書成好遁名。一瓢雖勺水。日月寄孤情。

詩觀二集。廷尉與宮詹同被徵召。而出處之際。有數存焉。此詩獨是昔年胸臆間語。

冒起宗一首

起宗字宗起。如皋人。崇禎戊辰進士。除行人。遷南吏部主事。歷郎中。出爲山東僉事。改廣東。湖廣。進參議。有得全堂集。七遊草。

望九華

昨夜南風送客舲。朝來池口雨冥冥。忽看天際飛濤白。失卻蓮花九朵青。

李奇玉一首

奇玉字元美。嘉善人。天啓壬戌會試中式。崇禎戊辰進士。除武學教授。歷國子博士。遷南工部主事。改兵部。歷員外郎中。出爲汝甯知府。有雪園遺稿。

閒居

柴桑深閉寂無譁。讀罷遺經靜煮茶。風雪滿庭黃葉落。冷香清韻在梅花。

薛案十一首

案字諸孟武進人。崇禎辛未進士。除武學教授。遷國子助教。再遷南刑部主事。歷郎中。出爲開封知府。晚爲僧。號米堆和尚。

尤侗良齋雜說。薛進士案嘗爲開封知府。亂後薙髮依山僧以居。自更其名曰米。玄墓有米堆山。因以自號。飲酒吟詩。伴狂以終。

卓氏緘園圖和詩十六章錄十一

卓氏緘園十六區。張君旣各爲圖。而楊龍友復寫此冊。張則亂頭粗服。龍章鳳姿。楊則雅人修士。楚楚焚香掃地時也。蓮句居士父子題詠足千古。而使予得廁其閒。願寶此園。更寶此圖。庶予得與裴迪俱不朽乎。

虎踞石城在。六朝何往哉。不如君先人。江干駕虎來。馭虎巖

鶴影夜臨澌。澌鱗亦起舞。老龍聽法罷。欲與胎仙語。鶴澌

君以蓮爲宮。鬢葯自寬廣。盍觀恆沙國。盡託錐刀上。蓮句

明詩紀事 辛籤 卷十九

三〇九三

琉璃爲胸次。中復現五嶽。何忽自云無。無無乃真覺。無山堂
生長笠澤旁。夢魂在其中。支雨欹箬冠。吾與樵青同。笠厂
昔聞景純言。凡山生於浪。亦有浪同生。巾裾骨肉相。沙山
唯俗不可醫。爲有醫俗意。我自田舍翁。桔槔昨已治。鋤月灣
潭爲有龍跡。瞥來或青鳥。不然卽麻姑。愛此爬背爪。呼龍解
已甘入林深。眼闊復如此。胡不任蒙茸。潑墨澄心紙。寒江樹
有一轆轤因。拾草立權喻。我以命聽藥。藥以命聽雨。藥草畦
吳越古湯社。請君爲署領。不知是何曹。但解日茗芋。茗柯坪

田按。祇園在石頭城清涼山下。卓左車之別業也。楊龍友爲作圖。董香光跋曰。祇園圖十六景。龍友爲無量居士作。昔盧鴻乙
草堂圖。李公麟龍眠山莊圖。流傳世間。皆稱神品。鴻乙自有嵩山十志楚詞。而山莊圖題詠具蘇黃門集。五言絕句。頗類摩詰
輞川詩。伯時獨以畫名。意當時必有首倡。但無傳耳。無量居士於此十六景。已有詩中畫。而龍友礧礧。氣韻生動。著意微茫。滅
沒間。有鴻乙之蒼秀。伯時之幽邃。爲十六景傳神寫照。無復遺恨。如置身輞口。椒園鹿柴。居然王裴唱和勝情。信可傳也。

陳天定一首

天定字慧生。龍溪人。崇禎辛未進士。累官太常少卿。國變後爲僧。名圓慧。有慧山集。

大峰山佛祖岩

寺古多荒瓦。僧貧只薦茶。谷鳴千樹響。人定一香斜。鑑水形憐影。安心客是家。可將生滅理。悟取佛前花。

李世奇一首

世奇字亮先。漳浦人。崇禎辛未進士。選庶吉士。以母老歸。再召不起。加左庶子。有澹甯居草。暮年無歡。門多索字者。因用自悼。

焚硯拋書案。滿埃扣門便。覺擾生涯。只應絹到留爲襪。聞道篇成欲覆醅。筆墨從人猶是累。文章媚世亦非才。小窗且適羲皇夢。莫遣奚僮報客來。

許豸一首

豸字玉斧。侯官人。崇禎辛未進士。除戶部主事。歷員外。出爲浙江僉事。進參議。有春及堂詩。

東南嶠外詩話。玉斧詩格調平穩。本朝甌香。月溪。鐵堂。雪村諸詩人。皆衍其門風。累世擅三絕之譽。

與張天如吳駿公楊維斗泛舟西湖

十里晴明嫩柳斜。同登孤棹賞春華。蒼茫野色餘殘靄。迴合山光到暮霞。曲岸驚風翻荇帶。平隄新水繡桃花。芳辰尋樂須拚醉。更向橋西覓酒家。

黎崇宣一首

崇宣字孺旬。番禺人。崇禎辛未進士。官廣德知州。有貽清集。

春別曲

春風一夜雨瀟瀟。曉來已滿春江潮。乘潮相送出江上。我但躊躇君獨往。渡口垂楊映綠波。隔浦茫茫煙霧多。望君不見將如何。

吳國琦一首

國琦字公良。桐城人。崇禎辛未進士。除漳州推官。改兵部主事。有水香閣懷茲堂集。

趙澱陽蒼漪閣

高亭敞木末。涼意與秋生。當戶一峯出。雙江夾月明。藤蘿封洞壑。河漢接檐楹。坐久絺衣薄。懷人已二更。

楊士聰四首

士聰字朝徹。濟甯州人。崇禎辛未進士。改庶吉士。授檢討。遷諭德。有靜遠堂集。

棗林雜俎。聊城進士白楹。治園於臨清。瑩一石。致自章邱。頗幽麗。德州謝太宰陞求之不得。謝方典銓。補楹盧氏令。被寇死。濟甯楊士聰詩。與寄煙巒聊適意。福胎花甸杳歸魂。

田按。朝徹凶年四吟。如讀大東諸詩。可以告哀。

凶年四吟

累年皆赤地。無怪民窮蹙。釜飢既生塵。爨煙絕比屋。三旬鮮九食。餅空那得穀。漉槐收澀實。剝榆露槁木。

楊柎罄寒林。草根殫遂谷。已分作捐瘠。曷辭委溝瀆。所恨息未絕。同類糜其肉。死饑尋常井閭中。每憂逢不若。小竊類螟螣。大奸乃鯨鱷。遠鎮既攻陷。近村恣驅掠。奮擒或抵罪。強撫先頒爵。脇膚黨日繁。狂騁力寧薄。生齒累百萬。狼藉就鋒鏑。何堪縱虎翼。乃至恬魚鱖。徒薪空多算。誰肯受良藥。
死寇

名將重威信。過師從枕席。平日少撫練。臨戎增嘆噴。賊燄既以熾。調發雜主客。強者太猙獰。弱者不任革。緣村掠民蓄。執操自完策。貧民無立錐。更復遭奇阨。談笑借汝頭。聊以充斬馘。死兵殺運殄生人。輕細如螻蟻。兵荒已半死。豈堪罹病孽。春來漸多疫。什九劇綿憊。蠢兇既草萎。良謹或蘭折。道路續新鬼。親屬累死別。貧民無棺斂。委棄空痛結。橫屍陳道衢。端爲烏鳶設。死疫

汪國士一首

國士字君酬。桐城人。崇禎辛未進士。累官山東參議。有簡軒集。

飲吳中承園林

鎮蜀嚴公去。征蠻馬援還。家園繫舊侶。花竹是新刪。市徑添闌好。邊池養鶴閒。更堆山一座。城裏日躋攀。
陶汝籍十首

汝籍字仲調。一字燮友。甯鄉人。崇禎癸酉舉人。除新會教諭。福王時。授翰林待詔。遷兵部郎中。五

省監軍改檢討有廣西涯樂府噓古集寄雪樓集褐玉堂集

郭都賢止菴集余與仲調生同里長同學出處患難同時同志年來杖策以規江左垂涕而搜拾遺哀時命弔戰場尙有不盡於詩者文者晚復以凌霜嚼雪之肝腸赴笈鳳弋鴻之羅罟西臺之髮自晞湘水之魂復返皆仲調詩文登峯造極時也

黃周星噓古集序雙友噓古之作非忠孝廉節之型即奇詭靈秘之蹟大之可以干城名教小之亦可以博物洽聞是編出皇天后土可鑒野老之心五嶽九洲共聽空山之哭其以噓古名篇蓋取詩人願言則噓之義悼今人之不古處也

靜志居詩話先生壯歲好遊自吳入越與先人訂儒札之分嘗留橋李度歲晚際此離出監軍事捍禦鄉邦著力暨章堵兩公靈粹略同讀哀湖南賦悽展過於闕成詩雖未脫竟陵之派然覺爽氣殊倫

田按仲調詩有異才惜爲竟陵所染當其合作如金鐘大鏞不作錚錚細響

銅佛崖

九月霜氣深煙寒霽亭午曲折登層崖臨江不可頽岸屈趾乃窮雲斷路前杵紺殿嵌山腰豁然開淨土僧去門不扃空泉散微雨終日漱巖花泠泠答鐘鼓

舟入虎邱

破曉入吳門不泊良有意欲及清晨光入山發山寐舟行二里餘人煙雜遙翠峻嶒立平楚塔影落無地迴舸畫橋東及門恐容易浴溪竹樹幽舟繞出山背綠陰濃到天小鳥一聲墜艤棹從此登晴雪洗高寺

擬古贈高彙旃學使兼寄懷王昆華宗伯

衆山不讓嶽。及嶽意自平。列星不作月。傅月光始盈。文章接元化。日月風會生。假令古學蕪。何以勸高明。鉅公抗經史。五緯天上橫。春風吹岫嶺。赤綠成雲英。一吹玉瑄發。再吹洞庭清。雕蟲二三子。激作金鏞聲。鼎鼎朱張後。敢獨求微名。今夜嶽麓下。森寒唯玉衡。

軒轅臺懷古二首

軒轅非貴壽。天地難鴻濛。雲英化金石。物命趨五銅。騎龍下寶山。乃在湖水中。張樂滿洞庭。託言師崆峒。千載鼎湖上。元氣翔八風。

青天互湖水。白日凌丹臺。至人非羽翰。黃龍自天來。悠悠萬乘跡。徒令攀者哀。上有寶鼎雲。下有蛟宮雷。當時十六相。豈無神仙才。庸哉秦始皇。赭湘求蓬萊。

還家

新飯盛滿盃。新酒酌滿卮。諸孫競相勸。幼者掬我髭。出門雪壓屋。手抱初生兒。歸聞掩袂泣。始悟殤子悲。百年苦情累。哀樂集一時。乃翁幸生還。理遣聊自持。假使魂歸來。此哭當爲誰。達人齊彭殤。莊叟眞吾師。

初冬舟中作

霜吹徐徐來。沿舟入蘋蓼。好山迢遞青。一鏡窺飛鳥。白鳥差池穿野菱。天寒水落陰棱棱。澹雲到地無一影。紅樹圍村知幾層。一作李世熊詩

秋夜同尹洞庭汪涵夫諸子索觀楚王孫伎劇卽席戲爲艷體

小山叢桂裏一隊錦鴛鴦。欺雪花俱艷。迴波曲自長。清微湘女瑟。蹀躞洛神璫。慣與王孫見。新妝但夕陽。

雙江逢船叟話舊

遙識墟煙處。雙江照白鷗。幾家疏莽住。孤寺劫灰留。隱隱但樵路。潭潭無釣舟。聊逢舊船子。悲難話餘愁。

晚春廿七日與曹叔方劉衍蓀洪象先諸子自三湖過帥君卜草堂夜集

十里踏莎青未青。到門日落煙柳暝。欣然解衣索秉燭。愛此草堂遙帶星。過客光陰春宴序。雅人文酒尙玄亭。餘生好會不再得。淹我黃鸝湖上聽。

張明弼二首

明弼字公亮。金壇人。崇禎癸酉舉人。除揭陽知縣。有螢芝。榕城二集。

同翁裴郎許班王春夕飲宋喜公先生郭外別業。夜午而別。

檀板催酣子夜情。紅衫猶自進瑤箏。歌聲愛向梅邊落。燭影偏穿水底明。隔澗叢花疑正睡。依林宿鳥未傳驚。棉衙煙閣恒來往。忘卻秦淮是故京。

送張少尹往贛州

韓江北去是歸途。水意山情欲向吳。君入吳西爲候吏。願槭鄉夢到姑蘇。

明詩紀事卷二十

辛籤

文德翼二首

德翼字用昭。德化人。崇禎甲戌進士。除嘉興推官。擢吏部主事。有雅似堂文集十卷。詩集三卷。

四庫總目。德翼人品清逸。而學問未能精邃。所作傭吹錄之類。大抵以餽飭爲工。

陳子龍安雅堂集。豫章文子詩。微而章。直而和。痛而不亂。瑰麗詰曲。而不詭於正。其遠者刺當時之失。抒忠愛之旨。其近者追於憂讒畏譏之懷。而其要曰不失於和平婉順。

西江詩話。用昭屢徵不出。徜徉於五老二林之間者三十餘年。工詩文。

田按。用昭知權變。左良玉跋扈。不禮督師。呂大器用昭說。鄖撫王某。文武固宜調和。制府尤當尊崇。公宜先折節致禮。以存朝廷之體。王從之。左乃修進謁督師之儀。時以爲善於應變。

湧鉢寺

我聞古佛鉢。數里以爲邊。阿難拜其上。笑如小蟲旋。又聞如來鉢。四際光層層。羅什心計較。極力不能勝。復聞祖師鉢。絕無佗繆巧。龍大鉢亦大。龍小鉢亦小。三鉢具神通。也知色卽空。恨不與其會。散花滿鉢中。盆城普潤菴。一鉢從地起。雙龍擎爪飛。捧出法王子。法王法非法。王子法亦塵。法尙不足慕。而況此鉢真。

似陶且似冶。非金亦非鎗。浩劫久沈埋。頓爲開士收。開士者阿誰。朽木道人是。此刹建一竿。禪和獲安止。晦山大師來。歎爲大奇特。題詩表章之。壁上懸精墨。酬和何紛紛。辟支共聲聞。十方一應器。勒此曇花文。鐘鼓尙未響。此鉢幸勿持。如或喫粥了。洗鉢更何疑。

嚴子餐招飲湖舫。同子問張晉侯。梁景衡孫子。操陸梯霞拒石。

夢裏西湖老更來。畫船那放故人杯。鱗鱗細浪隨鳧浴。鬣鬣層松促燕迴。五月楊梅纔半熟。六橋柳色未全開。清音不復憐絲竹。座上況多作賦才。

朱芾煌五首

芾煌字玉璫。無爲州人。崇禎甲戌進士。除餘姚知縣。改樂安。入爲戶部主事。謫順天教授。遷國子博士。歷兵部主事。進郎中。有文嘯堂詩集二卷。

四庫總目。芾煌詩大都蒿日時艱。詩多感慨。如春愁秋懷諸篇。紀明末朝政紛紜。亂亡之象。亦可見其大概。
田按。玉璫詩。七言流利。情致動人。

偶過湯光祿伯衡城南舊園。園後屬曹孝廉環。應亦復作古感而賦此。

楊柳隄邊去馬遲。芙蓉江上憶當時。每從窈窕傾君酒。多遣玲瓏唱我詞。碧榭又更亭館額。青山尙欠墓門詩。湯休化去東阿死。斜月荒原一段思。

季本之外弟過姚江夜話

官舍鐘聲起麗譙。烽煙何幸阻寒宵。可憐海國晴看月。猶記江門夜聽潮。鄉夢欲隨雲共遠。春愁未許酒能消。朱家俠氣今全滅。把手燈前慰寂寥。

邀汪友仙權部飲南湖煙水亭

孤嶼亭間秋氣疏。山川指點到來初。遊人草坐皆宜酒。傲吏江樓好著書。蘭芷遠尋通楚畹。芙蓉高臥接匡廬。金錢少府供輸急。合向磯頭伴老漁。

乙酉元旦

癸未甲申兩元旦。聖駕親朝。早於常期。朝鐘久鳴。諸臣鞭馬長安街上。趨朝不及。又忽退朝。移時復出。此事兩年如一。當時人憂不祥之兆。今因夢記此。真不禁泣然也。

弓劍攀號恨未明。天街走馬憶縱橫。可憐昨夢朝元淚。都入東風作雨聲。

江洲

長江夜靜起濤聲。無限傷心對月明。芳草春風隨處徧。如今只不到江城。

劉侗一首

侗字同人。麻城人。崇禎甲戌進士。除吳縣知縣。未任卒。

曹溶靜惕堂集。同人以文體矜奇。爲學使置下等。憤懣入太學。連舉鄉會試。留都亭日。與子司直共輯帝京景物略。文筆詭異。蓋亦服習竟陵派者。

燈下竹枝詞

貂裘胡馬象裝車。不是勳家是戚家。笑上街樓簾盡捲。遊人圍定候琵琶。

凌世韶一首

世韶字官球。歙人。崇禎甲戌進士。除福清知縣。謫汀州經歷。遷嚴州推官。擢戶部主事。進郎中。有
泃沙草。

沙頭呂貞婦龔氏

明月不在天。下爲貞女心。清寒入花骨。夢向冰霜尋。寥落殘燈影。沈吟破鏡陰。苦辛嗚謝豹。碧血染空林。

張允掄一首

允掄字并叔。萊陽人。崇禎甲戌進士。官饒州知府。有希范堂集。

勸惰

有男不知耕。有女不知織。昏昏惰廢人。仰屋空歎息。斯民生於天。自養各有力。壯盛時幾何。崦嵫景將逼。君看原上霜。坐變芳草色。

關士琦二首

士琦字褐公。常德桃源人。崇禎甲戌進士。除南安知縣。福王時起編修。不赴。有螿蜩館。關山。郎當。

等集。

劉子驥

名士耽奇僻。桃花信有無。白雲丹竈古。莫問武陵漁。

崔婆泉

天風環珮杳。何處度霓裳。石髓無須吸。崔家泉自香。

潘世澄一首

世澄保山人。崇禎丙子舉人。官萍鄉知縣。

送吳山人

黃菊故人杯。青山遊子路。匹馬向垂楊。回首燕雲暮。

黃日乾一首

日乾字聖因。江甯人。崇禎丙子舉人。

書齋

小齋晝靜坐。如年閒撥爐灰。裊篆煙。一尺綠陰蕉半展。雨餘窗紙上。蝸涎。

余巖十首

明詩紀事 辛鏡 卷二十

颺字廣之。莆田人。崇禎丁丑進士。除宣城知縣。改寶應。上虞。徵授吏部主事。歷員外郎。中出爲廣東副使。有蘆中集。

蘭陔詩話。季蘆從朱李岡起兵。被執禁獄中。踰年得釋歸。晚製鐵笛。自稱老鐵。蓋以楊廉夫自況也。陳伯璣稱其詩可與少谷石倉三分鼎峙。

田按。賽之近體。音節悲壯。多故宮禾黍之思。

獄中夜坐贈林小眉二首

老被微名誤。君方十倍才。乾坤逢格鬪。鳥雀任疑猜。濁酒談無賴。荒雞聽可哀。長歌徒自損。一笑落燈煤。無力支天地。飄零委壯心。何人堪說盡。爲爾獨長吟。老馬疲關嶺。窮猿望木陰。角聲隨雨到。雙鬢畏燈侵。

懷方爾止

社鼠城鴉哭帝都。臨江東望孝陵枯。相韓五世悲公子。哭楚三閭憶大夫。鴻雁離魂銷皖口。鵲鴿淒羽銜南湖。舊詩覓寄遊鱗斷。水國茫茫歲欲徂。

銷夏灣

夫差宮館迴吳關。銷夏沈沈水一灣。蘭槳風移香水沸。杜梨雨溼錦帆斑。館娃人去秋煙寂。響屨廊空暮鳥還。夜半江頭歌舞歇。千年月冷見愁顏。

拜戚少保祠

當年一旅下閩疆。殲絕倭酋罷戰場。父老今猶談事蹟。春秋時復奠蒸嘗。銅龍鱗甲蒼苔落。畫壁蟲蛇碧草荒。幾度嘯鴉飛繞樹。峒嶠古廟煥山陽。

贈楊仁叔

兼山先生子

先公嶽嶽舊詞臣。上第京華謬結鄰。抗疏名曾齊四諫。捐軀事復比三仁。秋江明月思公子。春草他年望故人。欲解只餘雙短劍。未堪持贈爲防身。

喜逢周遠害

帝京昔歲曾交臂。馬首匆匆拂後塵。垂老相憐難閉戶。立談未盡覺傷神。兵戈閩楚頻年似。詩賦窮愁逐字真。君尙黑頭吾白首。不堪相對客中身。

聞鄰人弦歌

淒涼野館晝長扃。響亮歌聲隔巷聽。鶴引雕筵臨玉宇。鸞迎碧管入紗櫺。詞人慣調河魚泣。樂府新編白雀翎。莫使更翻天寶曲。江州司馬淚如零。

可歎二首

湖草青青綴野橋。鳩鵲漠漠出迎潮。水碧簾外花如錦。複道行宮久寂寥。南樓花鳥北樓煙。沸地歌聲動管弦。十載江南多恨事。筵中莫遇李龜年。

許承欽一首

承欽字漱石。漢陽人。崇禎丁丑進士。官主事。

德州渡浮梁

古驛紆山左。長川抱海西。土風兼漢魏。河勢割燕齊。鹿角關前樹。平原嶺外雞。轉漕疲萬里。雨雪看輪蹄。

秦鏞一首

鏞字大晉。無錫人。崇禎丁丑進士。除清江知縣。福王時。擢監察御史。有參同閣集。

和唐人惠山詩

探泉古亭下。杉徑何青蒼。傍有碧山社。上有尊賢堂。先澤半宿莽。林鳥徒飛翔。雙井貯空碧。羣柏栖幽光。飲泉有真味。啜茗雜花香。千載共遙企。懷此不能忘。

莊元宸一首

元宸字起貞。鄞人。崇禎丁丑進士。授南太常博士。福王時。遷刑部主事。魯王監國。擢吏科都給事中。遷太常少卿。進本寺卿。有因園集。

續甬上書舊集。魯王監國。召莊公入朝。公疏言。殿下大仇未雪。舉兵以來。將士宣勞於外。炎威寒凍。沐雨櫛風。編氓殫藏於內。敲骨吸髓。重以昔年秋潦。今茲亢旱。臥薪嘗膽之不遑。而數月以來。頗安逸樂。釜魚幕燕。撫時增憂。則晏安何可懷也。敵在門

庭不及旦夕。有深宮養優之心。安得有前日借箸之事。則蒙蔽何可滋也。天下安危。託命宰相。今左右之人。頗能內承色笑。則事權何可移也。五等崇封。有如探囊。有爲昔時佐命元臣。所不能得者。則恩賞何可濫也。殿下試念兩都三殿。禾黍麥秀。則居處必不安。試念孝陵長陵。銅駝荆棘之慘。則對越必不樂。試念二王青宮之辱。則撫王子。何以爲情。試念江干列邦。生民之慘。則衣食可以俱廢。疏入報聞而已。公又言。中旨用人之非。乃樞王批政。臣叨居科長。斷不敢隨手奉詔。王不能用。自是公累有封駁。謝三寶皆納。內侍力阻之。而馬士英又至。王詹事思任等移檄拒之。又廷爭之不得。公言。士英不斬。國事必不可爲。不報。於是公貽書同官林公時對言。葦爾氣象。似惟恐其不速盡者。區區憂憤。無時不痛心疾首。以致形容骨立。願得以微罪成其山野舉朝共留之。公意決竟去。疽發於背死。

絕命辭

故人唐魯公。顛沛勿遽死。事至不可爲。終須一決耳。苦心透層霄。幽恨及沒齒。而我同蹉跎。下泉慚君子。

錢朝彥一首

朝彥字殷求。錢唐人。崇禎丁丑進士。除句容知縣。改旌德。

過功德坊

在西湖錢王祠

百戰瞻烏日。中原逐鹿時。鯨鯢方建節。虎豹敢交綏。風雨侵車轍。江淮照戟枝。土人嚴伏臘。猶自望旌旗。

倪長圩一首

長圩字伯屏。平湖人。崇禎丁丑進士。除蘇州推官。遷兵部主事。

橋李詩繫伯屏博學好古善書法

次曹秋岳年兄韻

守約安貧賤。良朋辱過存。吾衰誰與怨。疑義幸逢論。草上雨珠碎。天邊弦月昏。坐來更漏轉。香滅酒卮痕。

康范生一首

范生字小范。安福人。崇禎己卯舉人。

梅村詩話。榜機部殉節後。云已無子。有康小范。孝廉來吳門。攜機部在贛州詩十餘首。并言其子尙在小范與機部同事。兵敗被縛下獄。瀕死而免。吳門葉聖野贈之詩曰。盧諶流落劉公死。回首章門一惘然。亦俠烈士也。

嘉定寓舍感賦

野寺門臨官教場。荒郊日落客心傷。書來異地傳新語。人到衰年憶故鄉。有盡繁華頻看鏡。無端寂寞強浮觴。與君試上高臺望。幾處朱門變白楊。

費經虞一首

經虞字仲若。新繁人。崇禎己卯舉人。除昆明知縣。歷通判。改桂林知縣。有荷衣集。

李調元蜀雅。仲若當蜀亂之後。獨能以詩學世其家。子密。孫錫琮。錫瓊。俱馳名藝苑。再傳不替。可謂有鳳毛矣。

歸田吟

家破猶餘半畝塘。杜鵑嘯處柳絲長。騎牛不到人間去。白髮蕭蕭晒夕陽。

張琚一首

琚字居玉程鄉人崇禎己卯舉人。

送陳醴源父子旋里

春辭五嶺去公向八閩歸。明月照官路。梅花飄素衣。風塵終不染。宦海早知幾。自買三間屋。雲深鶴護扉。

羅策一首

策字元升上元人崇禎己卯舉人。

獻花巖

古寺依林麓。穿雲石徑斜。高僧今不見。山鳥自銜花。

曾異撰一首

異撰字弗人侯官人崇禎己卯舉人有紡授堂集。

靜志居詩話弗人異才詩太近詭。

一五國風高言集田髡淵曰弗人詩抒寫性靈獨有奇氣。

續叩帖背寒夜懷寄李元仲

十月葭深霜近人。杳然懷望百憂親。獨醒一榻五更雨。半世無家有病身。老至著書傳未得。交多求友認

明詩紀事 辛籤 卷二十

雞真暗中搔首商知己不覺雞聲動四鄰。

三二二

明詩紀事卷二十一

辛籤

湯來賀一首

來賀字佐平南豐人崇禎庚辰進士除揚州推官擢刑科給事中福王時改禮部主事出爲廣東僉事遷布政使桂王立晉總制加兵部尙書有內省齋集三十二卷

西江詩話先生分憲粵東過大庾嶺題壁云誓告山靈去不持一硯回此與積清獻詩馬尋舊路如歸去龜放長淮不再來之意何異其廉德如此

懷孔登小卓左車龍文許師六

動息無所營蕭然似孤鶴幽棲疑踟躕曠懷仍廓落深林濯微雨寒泉鳴澗壑洗耳謝沈冥于焉守耕鑿

萬曰吉六首

曰吉字元康黃岡人崇禎庚辰進士除崑山知縣有東有堂詩四集

嘉禾次黃甫及韻二首

萬里來戎馬孤帆泝水濱亂同天寶日饑似杜陵人蘭芷夷蕭艾鷓鴣薄鳳麟不知湖海氣蕭索向誰論

昔年同放逐，載酒入鴛湖。卓帽嘗爲客，青袍已誤儒。饑寒堅晚節，兵火送窮途。不見如花女，空林啼鷓鴣。

贈陳交仲

其兄道逢子同門友，令萊陽殉節。

十年京闕憶同游，亂後驚逢嘆敝裘。天上故人星嶽列，湘中逋客杜蘅愁。淚侵蒿里無乾土，薇種陽山有舊邱。攜手送君荆枳路，沈寥風雨正悲秋。

弔傅寄菴相公卻寄令郎司理練

巧遲拙速定兵機，秉鉞當時事已非。廟貌生前五夜建，

公方治室，有馬生夢公舍旁建忠臣廟，事在己卯八月。

嶽靈事後九天歸。歌

成正氣，星河爛。魂返閒關雨雪霏。莫怪誅求貧徹骨，前賢遺得故山薇。

深柳堂偶集

漫勞仲舉掃階蕪，鸞鳳何年集帝梧。處士疏荒彭澤縣，騷人怨落洞庭湖。黃巾白馬關心切，碧海青天望眼枯。濁酒數升潦倒後，不堪衰柳夜啼烏。

考叔出關阻雨留宿

十里城隅若遠游，隔關未許汎歸舟。圖時管葛人何在，失路機雲我獨愁。夜雨匡床連一被，春燈草具泣雙囚。饑驅日久商行役，應識陽山是菟裘。

來集之一首

集之字元成。蕭山人。崇禎庚辰進士。除安慶推官。遷兵部主事。

春日雜詠

紫蔓乘春風。一夕長數尺。嫣然滿架花。取之餉賓客。樽酒開綺筵。歡呼動華陌。經年不成寸。南山見松柏。匪復競短長。聊以俟匠石。寥寥百載間。棟樑燬金碧。

單恂二首

恂字質生。松江華亭人。崇禎庚辰進士。除麻城知縣。有竹香庵。瓶庵。枯樹齋三集。

陳繼儒眉公集。質生函慧根。食靈氣。從作者機杼外。別搆出清肥新聲。

松風遺韻。陳臥子云。質生爲人。風調雨澤。舉止疏拔。溫度雅論。宜於人倫。詩篇明瞻。動以朗潔。至其寓意。雅尚西崑。故綺閣之愁習。香奩之頹遇。一音俾怨。絲竹成灰。數言觸懷。脂粉遙斷。思婦聞之。掩心。羈人過而疾首矣。

靜志居詩話。質生詩力埒陳言。澁而不膩。

田按。雪間幾社詩。派競尙積韻。質生才華跌宕。可與三子分席。臥子作質生竹香庵詩序。本集不載。當爲王蘭泉搜輯所遺耳。

避跡友人溪舍自遣

睡起持頤住野塘。燕墟楚堞思茫茫。釣輪傍客咿啞晚。碁篋留僧膈膊涼。陰砌沙雞吟尙澀。斷畦蒲鴿摘來香。比鄰衾燕愁新秣。省我秋時茂世忙。

新夏郊居

新荷貼渚細田田。白蜨參差白鳥眠。釣艇繫時蒲颺水。縵車聲外麥籠煙。閒來茗椀留僧鬪。老去詩筒畏客傳。睡起刺桐花畔立。繡韞金絡紀當年。

徐芳三首

芳字仲光。南城人。崇禎庚辰進士。除澤州知州。有松明閣詩選。懸榻編。

今世說徐仲光曰。吾儕如鳥中子規。自是天地間愁種。

西江志。仲光官澤州。以治行第一。徵入國朝。與友人鄧廷彬入山偕隱。或出游以資食。則操技術以往。不輕謁公卿。平生著述甚多。縣令苗蕃選刻其十之一。名曰懸榻編。

龍性堂詩話。徐仲光云。詩之道。以氣格爲上。而結構亦不可遂輕。以性情爲先。而聲響亦不可遂廢。詞莫陋於縛贅。而徑率之句。亦不可謂之自然。境莫妙於目前。而凡俚之言。亦不可名爲真至。韻而不靡。朴而不龕。淡而不枯。工而不說。使事而不流於雜。談理而不墜於腐。模古而不傷於痕。蹈空而不病於鑿。亦作家之言也。

灘舟吟

閩溪十九皆灘。險絕天下。跡其阻峭。宜同弱海。而乃有舟以相凌抗。始作俑者。誰氏之子哉。卽類而推。天下之大。何所不有。因度燕子巖。走筆識此。

梭梭齒石攙舟立。舟子蕩舟刺石入。石來搏水水搏舟。短棹輕翻去何急。風濤出沒虬螭奔。光怪驅馳雷電熠。咫尺分明隔生死。浮沈何處費呼吸。老人搖目誠無譁。縱客乾唇不暇泣。吁嗟行險理宜然。巧與危

鄰慎所習。

上河晚眺

不踐龍津道。於今二十年。蔣山空遠岫。江浦自蒼煙。晚綠餘隄柳。寒香賸渚蓮。後庭花莫唱。容我暫流連。

秋日同林孔碩登鼓山宿白雲堂卽事

蠟屐兜輿互換行。石門深去可憐生。幽溪古樹濤無恙。凍壁寒泉雪有聲。嵐氣半江秋水合。毫光千佛夜燈明。蹉跎未是茅蓬料。愧殺名山處處情。

高承鈺五首

承鈺字寓公。一字澤外。嘉興人。郎中道素子。崇禎庚辰進士。除遷安知縣。改寶坻。涇縣。福王立。遷工部主事。有稽古堂集。

靜志居詩話。先生表忠裏孝。以父死不幸。伏闕訟冤。絲綸奪者駭錫。三宰雷封。各著循績。而危邦墨守。尤文吏所難。惜乎功多不賞。至今寶坻父老有遺憾焉。家藏書八十櫃。與項氏萬卷樓爭富。雖干戈擾攘。不輟吟哦。其病中述志云。惟將前進士。慘澹表孤墳。讀者比之澤畔行吟。西臺慟哭。

秋夜卽事

細雨洗秋色。薄衾增夜涼。清吟銷暗火。幽夢過殘香。風靜鳥棲樹。溪喧魚跳梁。殷勤念籬菊。開到幾枝黃。

寄懷徐春門

細雨黃花徑。空山白板扉。貧嫌生事拙。病覺世情違。獨釣尋鷗夢。相思數雁飛。何時竹葉酒。坐對薜蘿衣。
同年盧牧洲陸鯤庭吳歲青陳澹玄方懷怙劉漪若楊杏園張雷溪張翊明姚有僕先後殉難詩以哀之

數載同憂患。一朝分死生。殺身不再計。全節有餘榮。挂劍輕千里。悲笳動五更。可憐李黼榜。偃蹇老維楨。
春除日洪慶之過飲

憐君臥病已經旬。出郭尋春卻送春。歸路只應乘醉眼。楊花如雪倍愁人。

沙上人家

酒帘漁網繞蘋花。矮屋茅茨住淺沙。歸客春來休更問。滿江煙水又移家。

吳中蕃十二首

中蕃字滋大。一字大身。貴陽人。崇禎壬午舉人。桂王立。除遵義知縣。擢重慶知府。改吏部郎中。有敵帚集。斷硯集。

黔詩紀略。滋大少年遊迹徧吳越。多與其韻人崎士縞紵往來。故學行皆有根柢。甫薦賢書。遽遭陽九。殘朝薄宦。抗志西山。忠義文章。推吾黔有明一代後勁。其爲詩。直抒所見。粗服亂頭。不屑屑句。採字鍊以爲工。而質厚氣蒼。自然瑰異。

田按：滋大古詩，深心妙理，古趣今情，桑海之際，苦節能貞，可以激頽風，挽薄俗，集名敝帚，可識其宏旨矣。

縉雲寺湯池

寺廢亦已久，池乃故湯湯。萬松寺幽映，百靈司泄藏。遠自沃焦山，虛通嶠谷陽。雙持日月精，吐滋沐浴光。煙霧噴潮汐，薪盡誰爲揚。燥溼互根柢，因之變燠涼。冰雪具春溫，柳下而首陽。游鱗盡潑潑，苔蘚亦蒼蒼。造化恣神奇，物理安可詳。

別友

彭澤八十日，余今四十辰。心褊志不遐，以斯愧古人。知交惜離別，祖帳紛具陳。座中誰最密，心友與周親。塞默各垂頭，蓄意難具申。豈不憂貧賤，未肯易其身。得歸即可歸，何必因鱸尊。海氣吹寒霰，酒至一再巡。揮手辭金馬，暮色促征輪。

早春田園二首

邇來視稼穡，頗識寒暑情。百物置於後，天地無能爭。東林日欲曙，羣動乃多驚。已飯闔雙扉，緩步逐牛行。牛旣羨草短，子亦快風清。微暄醒雪氣，泉心汨汨生。一道淨練光，去作溝澁聲。聽之遂忘夕，日與桑煙平。候至物難靜，高人亦未閒。晨疏畎畝道，夕飲犢牛還。卽事賴區區，庶免終歲艱。置身在天地，苟食誠何顏。昨者經前陂，枝頭色亦殷。沈魚上新浪，清鏡飛白鷗。顧惟物我懷，幽興未嘗慳。長歌散遙慮，孤雲方在山。

題許子儀所書悶應圖

蟄蟲百中勇難程。坐立鞢縉氣尙橫。飢飽隨人良可恥。久居鬱鬱若爲情。側眼長空自梳翅。翎生蟣蝨神如醉。縱橫狐兔惱人腸。幕南一擊何時當。人生最苦不得意。從來偏屬雄豪輩。鐵椎枉擊副車驚。玉斗空擲鴻門碎。山人有觸涕滂沱。爲爾含毫費揣摩。不寫皮毛寫神趣。聊將筆墨代悲歌。霜原草短剛風曙。破壁焉能留爾住。還視山人尺幅中。俄驚變化通靈去。

茅屋爲春風所破

野情未已雷羣逐。舞茆挂樹如無屋。癡妻失計牢閉門。稚子登床蒙頭哭。旋石如斗狂呼颺。驅波塞竇勞箕箒。由來苦樂事莫同。草木猶道春風惠。廢椽零落只如許。抬頭忽見天倚杵。憎教罄室列缺見。輾然一笑流青電。爲賀先生自此升。不然拔宅冲霄騰。未盡床頭三斗麥。更向山椒覓葛籐。

題高楚芸所贈巫山圖

峽裏巫峰吾不見。壁上巫峰今識面。誰能移置此堂中。高子楚芸心所變。傳聞巫山少一峰。多年飛去大江東。今日盡飛來我壁。攢雲聳翠驚鴻濛。一峰未了一峰起。遠近低昂不相似。就中一峯直上天。峻筆窮追得半耳。漫言鴿鑽與鬼愁。卽今猶令滿堂秋。耳邊嘒後三聲淚。瞿唐中斷無行舟。何人拄杖尋絕壁。似置西枝草堂地。數椽臨麓不曾關。中夜得無防虎至。桃源巫嶺事相同。雲雨知他第幾峰。莫因宋玉荒唐

說不使襄王出夢中。畫圖指似良。有以世上山川幾類此。甯教尺寸礙人行。未肯陂陀隨衆址。洪濤巨浪激其根。窟宅虛無意鬼神。萬古長江誰鎖鑰。徒仗雙崖鎖北門。

重陽夜坐

重陽見月能有幾。昨日猶愁雨不止。忽然菊影自塗窗。涼氣充庭天若水。苦寒人失苦寒心。花畔添衣夜已沈。露重梧桐隨葉墜。暗貽清響答蛩吟。

癸丑立春後二日

殘歷尙餘旬。空傳已是春。雪風方得意。衣被不憐人。老覺朋儕盡。愁聞歲事新。韶光能有幾。漫擲苦寒晨。

落花

轉盼已殊前。空勞泣斷煙。過時俱腐朽。多事是春天。著地猶成錦。登枝又隔年。茫茫今古恨。試問樹頭鶻。

秦淮月下

秦淮絲管最多情。夜夜鳴鳴傍耳鳴。有客抱愁階下立。何人擁棹月中行。烏飛更向誰之屋。駝臥行看汝在荆。遙望孝陵深一拜。如聞天語念神京。

弔方正學先生

木末荒亭伴冷祠。何人到此不生悲。要爭一字千秋是。那顧全家十族。且浩氣豈隨藏血化。存孤猶賴老

天知大書史策能無諱。直待於今論定時。

張璠二首

璠字韞仲。寶應人。崇禎壬午舉人。有木侍樓詩集。

送何子歸京口

黃農無夢向人間。刺滅懷中灑涕還。寒荻白生江浦霧。孤帆青入海門山。道塗變色多談虎。風雪侵衣善閉關。憶昔題詩弔焦隱。松岩爲覓薜花斑。

焦山

瓦礫消沈古塔燈。活人仙井蔓荒藤。深山亦有興衰理。來問繩床百歲僧。

郭萬完一首

萬完字鞏侯。龍溪人。崇禎壬午舉人。有旅聲詩集。

壬子初度

週庚如石火。拋擲果堪憐。白髮療無藥。青山到有緣。蹉跎將壽補。衰腐冀言傳。可似龍鍾竹。平安又一年。

趙炳龍一首

炳龍字文成。劍川州人。崇禎壬午舉人。桂王時。用薦授吏部主事。遷戶部員外。有居易軒詩文八

卷。

劍川州志文成以楊畏知薦桂王除吏部文選司主事遷戶部員外隨蹕至貴州安隆所孫可望殺畏知文成歸隱向湖村之嶽園吳三桂反脅以僞命避石寶山中不出。

小樓

小樓久不下。一年春又深。落花悄無語。老樹自冬心。酒熱偶看劍。牀空還抱琴。小兒強解事。也學和陶吟。

王倣通一首

倣通字龍門海門人崇禎壬午特用進士授刑部主事以事謫福建布政司知事稍遷虔州推官福王立擢刑部郎中有且園雜詠武陵遊集秋香園集

田按武陵奪情黃石齋論之帝怒甚南臺成公勇疏救石齋并下之理時宵人進主使之說欲以危長洲相國舉朝驚駭龍門治是獄謂綱常名教三尺童子皆知何用主使卒從勇輕擬人皆嚙指謂帝意且不測會帝怒稍解成降五級龍門亦降三級去時人祖道國門賦詩章以贈其行士論榮之

三元山

夙抱林壑姿。每懷林壑癖。維舟藉清陰。登陟有深意。雲來孤嶼青。雨散大江碧。醉吟聊自娛。胡爲苦行役。

周嬰一首

嬰字方叔莆田人崇禎壬午特用進士除上猶知縣有遠遊編

蘭陔詩話方叔詩華整之中自饒流逸

豔歌行

暮春三月氣妍和。神夷案晷鼓春歌。陽林密葉生青葢。陰澗新流起綠波。綺陌三條芳草合。金隄一望落花多。從風弱質名絳樹。奔月妖姿字素娥。玫瑰樹下鬪連枝。桃花水上攀可離。淩波未覺污羅襪。涉露甯知溼履絲。同心綵結長不解。合歡錦帶復相貽。徘徊河間數錢日。徒倚邯鄲鼓瑟時。玉柱朱絃送嚴客。珠鞍繡軸催行役。垂楊旖旎含情朝。藁星流亂可憐夕。漢皋已失入懷珠。成都空問支機石。榮華逝水不可留。惆悵浮雲徒共積。

劉道開三首

道開字非眼。巴人崇禎壬午舉人。有各夢草。自怡軒集。擬寒山詩。

蜀詩非眼入國朝。總督李國英重其爲人。欲官之。走耕於野。晚搜徒漢中。注楞嚴經。自號了菴居士。

山居

結茆亂山中。古松覆茅屋。松子屋上落。白雲屋下宿。三冬不出門。地爐燒榑柸。一卷黃庭經。卓帽蒙頭讀。

所居

何物清人耳。綿蠻鶯有聲。曉山雲外市。春樹雨中城。小艇堪垂釣。平疇足耦耕。獨憐車馬客。役役爲浮名。

與桂白石奕

長日手談意自閒。主人忘客客忘還。局當清簟疏簾裏。聲出古松流水間。雅集只須烹茗茗。草堂還喜對秋山。何勞局促爭成敗。好鳥時聞一破顏。

李國相一首

國相字敬公。號芋巖。富平人。僑居衡陽。崇禎壬午舉人。有逸齋費詞。

沅湘書舊集。張賊陷衡。徧索薦紳。強以僞職。不赴者死。芋巖引刀封兩臂。示不可用。得免。鼎革初。自南嶽轉徙山谷。歲更其處。晚築小室。植桃數株。稱桃隴老人。

哭夏叔直九疑

孤棚淪荒域。生離一夢愜。問天孤雁字。無地釣魚灣。挂劍情誰寄。焚琴憾未刪。蒼梧有舜蹟。君志寄其間。

姚宗典一首

宗典字文初。長洲人。崇禎壬午舉人。

寓雲泉菴同澹游賦

老寺空村裏。窮秋落葉深。飄蕭淒暮色。歷亂送歸禽。落葉人誰埽。斜陽僧自吟。氣寒風戚戚。天地肅爲心。

錢默一首

明詩紀事 辛籤 卷二十一

三一二五

默字不識嘉善人舉人旃子崇禎癸未進士除光澤知縣改嘉定國變後爲僧更名咸回字無華道人有仲子集吹簫草

魏塘詩陳道人生而癯削隆準明眸顙插入鬢望之絕似深山道流爲童子卽卻血肉好蔬食留心內典八九歲開口爲詩古文凡做不可一世世所傳錢仲子集也

別長人居士

深山千萬重傾蓋得相逢習定空房月招魂霜夜鐘孤筇迎客到破衲倩僧縫揮手煙霄外寒雲第幾峯

宮偉鏐一首

偉鏐字紫玄秦州籍靜海人崇禎癸未進士有采山外紀入燕集

廣陵懷古

順昌旗幟大儀同阜角林邊將略雄可是撼山資野戰卻將堅壁佐庸功荒郊古樹殘陽外督陣元戎列騎中虎旅六軍新駐蹕肯教浮馬下江東

張若羲一首

若羲字昊東松江華亭人崇禎癸未進士

董含三岡識略張帶三先生性高潔隱居菜花涇不入城布緇衣禪笠蕭然世外喜飲酒每從相知浮白縱談意氣甚壯然外雖頑唐而內實沈照隱約玩世人莫能窺其際也予上已以新蕪貽之先生答以一絕云臆問猶記老狂生翠釀春燈眼倍明

世事悠悠交態變緣楊深處儘埋名。

靜志居詩話吳東爲余中表兄甲申以後潛身家巷躬自灌園余嘗訪之郊西適荷鉏帶笠相揖於紫瓜白苧之間破屋數椽下一榻以留吳處士騏暇相酬和詩思清厲有亮節而無儒響。

杏壇

杏壇一席地尼山百世師。大道久鴻濛。顯晦在此時。心齋而坐忘。子淵名沈思。忠恕本一貫。參也魯得之。中庸明性教。千載未可期。苟非私淑人。仁義將安施。淵源固有自。今古常若斯。所以能自信。抗言文在茲。包壯行一首

壯行字釋修南通州人崇禎癸未進士除南工部主事有石圃老人集

僧來復楞伽寺

荷花蕩西湖水深。上有蘭若當高岑。客吟時見山鳥下。僧定不聞鐘磬音。雨香秋林橘子熟。雲落空山棠梨陰。閒來埽石坐竹裏。靜與山人論素心。

祝之至二首

之至字一。生洪雅人。崇禎癸未進士。有嚶談集。墨戲堂集。

蜀詩。一生蜀亂後。入峨眉山爲僧。

雨後蒲亭道中

明詩紀事 辛籤 卷二十一

十曲蒲亭水。春煙帶溼生。泥侵雙屐滑。雲漏一峰晴。雨過天如沐。花香鳥自鳴。短衣隨野客。盡日畫中行。

金陵

東南形勝帝王州。幕府維揚鎮上游。人物衣冠三楚麗。秣陵風雨六朝秋。又傳簫鼓歌瓊樹。重見烽煙滿石頭。往事陳隋飄忽盡。新朝天子正無愁。

李實一首

實字如石。遂甯人。崇禎癸未進士。除吳縣知縣。

李調元蜀雅如石於書無不讀。鼎革後寓於吳市。隱居三十年。著述甚富。

春閨曲

碧玉堂前柳絮飛。白狼河外信音稀。征夫不及營巢燕。歲歲春風一度歸。

吳驥二首

驥字既閑。竟陵人。崇禎庚午舉人。有浮園集。

蠶尾文。竟陵既閑吳先生行履高潔。終身隱居東湖之上。煙波晴雨。水鳥樹林。漁歌樵唱之變態。當其會心。則以五七字寫之。此亦東湖之幸也。

湖北詩徵傳略。驥雅慕陸鴻漸之爲人。淡泊踈涼。不求榮。王阮亭爲作集序。直以桑苧西湖千載相匹。可謂擬得其倫矣。田按。既閑與胡君信居相近。時共唱和其詩品之高潔。亦略相似。不染譚友夏餘習。豪俊之士。固不囿於鄉曲也。

方伯徐公寄詩約於瀟濱舟次就晤

晴翠天門外。江邊一老翁。開扉看去鳥。倚棹聽歸鴻。舊夢留雲社。新吟憶渚宮。東風吹酒醒。爲報小桃紅。

九日集浮香閣

煖翠澄嵐侵水涯。柳隄香閣俯蒹葭。新萸試酌重陽酒。舊井同嘗陸子茶。風雨淩晨吹皂帽。煙霜晚節護黃花。詞人清讌資遊賞。猶向荊州憶孟嘉。

周損五首

損字遠害。麻城人。崇禎己卯舉人。官饒州推官。國變後。薙髮爲僧。

月夜送客過惠上人故廬

經年過爾梵。猶爲送人來。山下月無恙。林中磬莫哀。松存支岸骨。竹養出籬胎。寂寂繩床外。一枝燈自開。

寄李大山中

江夏無苛政。陂湖恆宴如。有人家野艇。許我訪秋蕖。減慮親加飯。開顏兒弄書。報君上山月。南望莫欸歎。

魏華齋看耿子維篆石

齋冷酒無力。對床通曉風。新桐支瓦綠。小杏立牆紅。胸不到冰炭。手能爲鳥蟲。從君覓古法。一月住城中。

崇禎乙亥春同家四兄若臨從子仲龍攜家避賊武昌之葛山

焚盡鄉園夢已曾。過江來者說相仍。良朋先失生何仗。老母猶存死未能。清酒滿村無我酌。好山到處讓人登。典衣日日憂風雨。閒殺漁家柳下罾。

繫皖除夕憶劉雲密舟發

羈囚人語接霜鷄。獄吏崢嶸亦歲華。黃面白頭吾舊物。青鋒碧血世生涯。得稱僧臘猶慙愧。莫數王春動嘆嗟。昨夜良朋舟似鳥。羨他不聽皖城笳。

米元侗四首

元侗字吉人辰溪人。明末舉於鄉。有羅峯詩文集十三卷。

田按吉人詩有妙悟。竟陵派之佳者。

復從瀨溪歸作

三年常作客。幾日暫開顏。野步不隨路。秋愁多向山。遠明溪自動。虛響樹常閒。爲惜高雲意。蹉跎未擬還。

激浦道中

城已多時破。村鄰幾處存。荒蹊春雨冷。舊院野花繁。白骨經霜雪。烏鴉長子孫。故鄉戎馬徧。對此哭黃昏。

遊九崖

虛谷少人迹。半山崩石聲。無根藤自活。應候鳥殊鳴。疏樹雲微出。荒田虎數行。歸途愁日暮。秋色帶孤城。

晚坐西園有懷

坐愛西園晚。寥天過片雲。暑消林氣薄。涼定水光分。顧影慚行止。虛心理見聞。客堂今夕夢。一半是思君。

蒙正發一首

正發字聖功。崇陽人。永明時舉人。官給事中。有深園放言。龍壁吟。蘆草。欸乃聲等集。

王夫之南窗漫記。蒙聖功給事欸乃聲九十首。曾授予訂之。其警句則有片帆影挂前川月。透枕霜清五夜鐘。藥市藏名嫌溷俗。鷗羣不亂信忘機。荆臺不樂吁先輩。高閣從來束腐儒。高峯影沒寒潭黑。絕壁光生晚照紅。明犀照水中。嫌逼寶劍沈淵免。再探小槩不驚浴鷺穩。回潭時積落花深。可謂句意雙到。

秋風鳥小魚遇秋風而化出惠州

秋風催水族。應候起沈淪。漸有雲霄志。難忘湖海身。招呼仍戀舊。毛羽忽更新。微物猶騰化。何須歎隱淪。

明詩紀事卷二十二

辛籤

張溥一首

溥字天如太倉州人崇禎辛未進士改庶吉士有七錄齋集十五卷

吳偉業復社紀事金沙周介生鍾始以制義甲乙天下吾師張天如先生從婁東往復社之舉自此始崇禎改紀先生以貢入京師縱觀郊廟辟雍之盛喟然太息曰國家以經義取天下士垂三百載宜有以表章微言潤色鴻業今公卿不通六藝後進小生剽耳矚目倖弋獲于有司無怪乎楸人持柄而折枝疵疢半出于誦法孔子之徒無他詩書之道虧而廉恥之塗塞也今上卽位臨雍講學生當其時者庶幾遵遺經矻俗學俾盛明著作比隆三代乃與燕趙魯衛之賢者爲文言悉申要約而後去楚熊魚山先生開元知吳江縣事以文章飭吏治知人下士喜從先生遊吳江大姓吳氏沈氏潔館舍庀飲食於郊以待四方之造請者推先生高第弟子呂石香雲孚爲都講石香好作古文奇字浙東西多聞其聲而湖州有孫孟樸淳銳身爲往來紹介於是臭味翕集遠自楚之蕪黃豫之梁宋上江之宣城甯國浙東之山陰四明輪蹄日至秦晉閩廣間多有以其文郵致者先生丹鉛上下人人各盡其意四年先生選庶吉士天下爭傳其文而艾千子獨出其所爲書相警警千子之學雅自命大家熟于其鄉南豐臨川兩公之言未嘗無依據顧爲人褊狹矜憤不能虛公以求是嘗燕集弇州山園陳臥子年十九詩歌古文傾一世艾旁睨之謂此年少何所知酒酣論文仗氣罵坐臥子不能忍直前駁之乃嘿而逃去先生既篤志五經諸史不復用制藝與千子爭長短當復社未起時吾郡虞山錢蒙叟吳門文湛持姚現聞三君子由忤璫召用虞山以杖卜爲烏程相訐奏

罷歸。其同時奏對稱旨。先烏程大拜者。陽羨周挹齋先生。主辛未會試。在先生及偉業爲座主。自以位尊顯。無所稱於士大夫間。欲介門下士以收物望。尋謝政得請。而烏程竊國柄。陰驚慘覈。思所以剗刃東南諸君子。先生扼腕太息。晝夜呼憤。其門弟子從者嘗來者。具得相溫陰事。名爲廉潔奉法。實縱子弟暴橫鄉里。招權利。通金錢。先生引滿聽之。以爲笑謔。語稍流聞。相溫時盛修邳虞山。思一舉井中之未得間也。會虞山胥吏陳履謙。張漢儒有罪亡命入京師。而政府遣心腹延之東第。密受計告虞山。及其門人瞿公式。相所爲不法。相溫從中下其章。銀鑰逮治。而復社之獄並起。州人陸文聲者。馴僧無行。先生同社張公采執而扶之。知當國方難復社。逸入都。就張漢儒邸舍。措撫兩公事。踵漢儒上章。賴上神聖。疑其太切。當有詐。章下所司。陽溪復出。方敦趨在道。先生已屬疾卒於家。時相調旨責三人。且對虞山奏曰。臣先張溥成進士二十餘年。結社會文。止爲經生。應舉。臣叨癩貳。不應參涉。采奏曰。復社之起。在臣。今臨川日。自此杜門。病廢十年。謂復社是臣事。則臣非其時。謂復社非臣事。則張溥實。臣至友。上覽其詞直。置弗問。用御史劉熙祚言。取先生所纂五經註疏大全及禮書樂書。名臣奏議數百卷。繕寫進覽。先生死而讒口噉噉。追仇其地下之骨。幸蒙上瀚雪。又并其遺書拂拭之。於此見稽古之不容泯滅也。

陳貞慧山陰錄。天如文。豐蔚典瞻。兼家承。庶子之長。崇禎丁丑。余與仲馭。朗三詩酒。裝上。見其賓客輻輳。幃帷如雲。口授吟謠。手校墳典。箏歌賞笑。五官並應。絕歎爲二劉更生。

明詩選。陳臥子曰。天如忠愛。誦孟門行。可見一斑。後而動聖王之思。有以也。

鄒漪啓植野乘。天如爲文。融洽經史。詩皆三唐風格。

靜志居詩話。天如狎主復社。以附東林。聲應氣求。龍集鳳會。一言以爲月旦。四海重其人。倫書畧刻。而函函。賓晝日以三接。由

是青矜胥子。白蠟明經。登李元禮之門。不啻虬戶。爲柳伯鸞所識。勝於筭金。列郡人文。一時風尚。口談朝事。案置漢書。頭包蠶額之中。足著踏跟之履。和歌下里。擁鼻東川。俄而哲人其萎。踐康成之妖夢。天子有詔。求司馬之遺書。黨論日興。清流釀禍。周之髮彈之於始。阮大鹹厄之於終。而邦國因之殄瘁矣。

送侯豫瞻北上

春氣吳山早。風來水國初。社村今日酒。牀笏舊時書。燕子迎新舫。桃花奉板輿。尙持司馬節。珍重佩金魚。

張采一首

采字受先。太倉州人。崇禎戊辰進士。除臨川知縣。遷禮部主事。有知畏堂文存十一卷。詩存四卷。

復社紀事。天如先生同里最親善者曰張受先。海內所目爲婁東兩張者也。受先宦仕臨川。綱維張設。一以古循吏爲師。謝病歸。遇同輩多所磨切。敢爲激發之行。數以古法治鄉黨。聞左銖兩之奸。輒誦言誅之。惟恐其人不聞知者。南都覆。受先爲邑。盡里猾乘亂擄擊。剝幾無完膚。絕而復甦。又兩年而病沒於遯迹之荒野。

靜志居詩話。婁東二張。狎主復社盟書。吉士身後。詔求遺書。通邑大都。家守其學。儀部名雖少遜。然里門作志。留都議禮。考文徵獻。比於吉士功多。

漫興

豈自求仙道。須因避世爭。無官多暇日。有病得長生。不食安期棗。誰吹子晉笙。開簾尋落影。殘月已三更。

楊驥一首

驥字子常。常熟人。諸生。有懷舊詩一卷。

幾峯文鈔。子常先生與同郡顧麟士先生。皆明經。飭行。矜尙氣節。時人並稱楊顧。吳中名士與文社曰應社。兩先生俱在焉。

仙人好樓居

明詩紀事 辛鏡 卷二十二

盈盈淩波機。相遇碧山頭。山深泣路歧。弱水亦可憂。何如王城上。高建百尺樓。日月在其牖。一檻憑九州。行地正絕迹。相率與天游。試問華陽史。洞壑何其幽。

顧夢麟六首

夢麟字麟士。太倉州人。有織簾居詩集四卷。文集四卷。

啓禎兩朝遺詩。麟士詩。深古幽潔。

田按。麟士學人之詩。耐人咀味。

題汲古閣二首

千編蠹走魚。三寫焉成鳥。流傳不足徵。筆削何如無。尋源準之宋。正訛同索逋。旁觀昧所從。或謂正者誣。古今幾紀載。半訖餘已圖。當時兩官書。將恐供樵蘇。何況正史外。百雜如散珠。一閣此貫穿。上下縹緗俱。我來耳目眩。譬海泛一壺。嘗聞蓮華藏。亦假輪藏扶。熏染卽其緣。經言豈欺吾。

鑿井利羣爨。萬情同酌斟。餅壘與黼鍾。各從家所任。得失關軀命。昏莫猶必尋。詎知井有孚。亦取泉資深。汲遙當綆修。先具太古心。君看一閣內。肅肅神明欽。六經文在茲。爲繫甯獨今。煙煤有往聖。一字雙南金。和左太沖招隱詩二首

美人遲不見。俯仰懷山榛。憔悴卽非計。馳驅徒損神。黃髮十餘曹。素心常任真。安知外間事。好爵猶津津。

尺蠖既一屈。願言勿再伸。唐虞與殷周。何者非灰塵。先師垂遺訓。求仁斯得仁。優哉出處意。永矣無參辰。志士重一餓。西山名到今。縑袍不屑恥。帶索坐彈琴。珍禽慕樊籠。野鹿思邱林。各自有本性。非關時陸沈。白社結遺黎。清齋惟梵音。猶餘故習氣。抱膝浩歌吟。得句互咨嗟。笑言開素襟。無煩更招隱。己此盡明簪。次韻追和豈菴自題所作戈莊泛月圖

亂世何人有不將。畫圖自住浣花莊。舟當偶泛樽罍簡。月到方中草樹荒。二客能從疑赤壁。一池常醉似高陽。看君品坐君元在。時挂閒齋供茗香。

湖村晚興

參差雙塔起城頭。一抹峯巒數里愁。誰喚山人黃子久。重來茅屋寫深秋。

朱隗二首

隗字雲子。長洲人。有咫聞齋稿。

錢謙益牧齋集。雲子才情繁富。纏綿絡繹。長歌古詩。才力橫騫。

靜志居詩話。雲子際鍾譚盛行之日。唱酬吳下。遙應南風。然其論詩有云。詩貴淵源風旨。不取蹈襲形模。漢魏未嘗規模三百篇。盛唐未嘗規模漢魏。今且拘拘習其聲音笑貌。何爲者耶。又贈陳玉立長歌云。五十年前不知天下幾人僵。死中原白雪中。後此論爲楚風謨。則於竟陵非中心誠服可知。且盛稱隗子之作。而其已作第留意於中晚。不可與聞修元歎等齒也。田按。雲子富有才華。惜爲楚咻所奪。然終不掩駿邁之氣。

鴛湖主人出家姬演牡丹亭記歌

鴛鴦湖頭颯寒雨。竹戶蘭軒坐容與。主人不慣留俗賓。識曲知音有心許。徐徐邀入翠簾垂。掃地添香亦侍兒。默默悵悵燈欲施。才看聲影出參差。氍毹祇隔紗屏綠。茗鑪相對人如玉。不須粉項與檀妝。謝卻哀絲及豪竹。縈盈澹蕩未能名。歌舞場中別調清。態非作意方成豔。曲別無聲始是情。幽明人鬼皆情宅。作記窮情醒情癖。當筵喚起老臨川。玉茗堂中夜深魄。歸時風露四更初。暗省從前倍起予。尊前此意堪生死。誰似瑯琊王伯輿。

徐鉉本事詩鴛湖主人。禾中某吏部也。吏部家居時。極聲伎歌舞之樂。後以事見法。南湖花柳散作荒煙。東市朝衣變爲蜩螗。故吳祭酒梅村鴛湖曲。有芳草乍疑歌扇綠。落英錯認舞衣鮮之句。余亦賦鴛湖感舊云。曾說荒臺舞柘枝。而今空見柳絲絲。不因重唱鴛湖曲。誰識南朝舊總持。

田按鴛湖主人嘉興吳昌時也。昌時名在復社。頗爲東林效奔走。官吏部郎。通廠衛。賊私狼藉。電發不斥其名。梅村鴛湖曲亦多哀愍之詞。蓋詩人忠厚之遺也。

魏忠賢祠廢基傍爲五人墓歌

長安城西白牝交。連結雄虺興神妖。白鬚兒子解承事。黃門寺獄坑賢豪。蘇州吏部鐵作骨。此人不死奸無魄。金吾忽挾黃紙來。虎闕鴟張恣求索。吳門俠少刑白雞。來看讀詔袖金椎。飽腸踏破腥懸樹。寧眼句殘血作泥。是日風霾四郊暗。官騎殺盡人方厭。吳兒自古仗高情。更離身手專諸劍。中丞狼狽抱頭奔。尙

假餘威殺五人。妻孥潛瘞。不知處。恨鬼吞聲。秋復春。當年雄虺薰天勢。生祠創建人爭媚。梁卑三殿一尺餘。祝曰阿爺九千歲。無何蛟鼉虺伏辜。祠旋毀拆成邱墟。五人身首始得出。卻葬祠旁表路衢。海市冰山只早晚。祠榜今爲溷中版。五人之墓草青青。時有行人爲澆飯。

田按。事詳庚鑑。周公順昌傳後。

張溥七錄齋集。五人之墓碑記。五人者。蓋當鬱洲周公之被逮。激於義而死焉者也。今郡之賢士大夫。請於當道。卽除魏閣廢祠之址以葬之。且立石於其墓之門。以旌其所爲。嗚呼。亦盛矣哉。夫五人之死。去今之墓而葬焉。其爲時止十有一月耳。夫十有一月之中。凡富貴之子。慷慨得志之徒。其疾病而死。死而湮沒不足道者。亦已衆矣。況草野之無聞者歟。獨五人之皎皦。何也。予猶記周公之被逮。在丁卯三月之望。吾社之行爲士先者。爲之聲義。歛資財以送其行。哭聲震動天地。縱騎按劍而前。問誰爲哀者。衆不能堪。扶而仆之。是時撫吳者爲魏之私人。周公之逮所由使也。吳之民方痛心焉。乘其厲聲以呵。則譟然相逐。中丞匿於溷藩以爲免。既而以吳民之亂。請於朝。按誅五人。曰顏佩章。楊念如。馬杰。沈揚。周文元。卽今之傑然在墓者也。五人之當刑也。意氣揚揚。呼中丞之名而詈之。談笑以死。斷頭置城上。顏色不少變。有賢士夫。捐五十金買五人之頭而函之。卒與屍合。故今之墓中。全乎爲五人也。嗟夫。大閹之亂。縉紳不能易其志者。四海之大。有幾人歟。五人生於編伍之間。素不聞詩書之訓。激昂大義。蹈死不顧。亦曷故哉。且矯詔紛出。鉤黨之捕。遍於天下。卒以吾郡之發憤一擊。不敢復有株治。大閹亦遠巡畏懼。非常之謀。難於猝發。待聖人之出。而投環道路。不可謂非五人之力也。由是觀之。則今之高爵顯位。一旦抵罪。或脫身以逃。不能容於遠近。而又有翦髮杜門。佯狂不知所之者。其辱身賤行。視五人之死。輕重何如哉。

顧杲一首

杲字子方無錫人有悟秋草堂集十卷

靜志居詩話崇禎戊寅南國諸生百四十人具防亂公揭請逐閣黨阮大鍼子方實居其首有云杲等謬聖人之書明討賊之義事出公論言與憤俱但知爲國除姦不惜以身買禍大鍼飲恨刺骨而東林復社之讎在必報矣大鍼名在東林點將錄號沒遮欄而閩人周之鑾亦注名復社第一集阮靈刃以殺東林周反戈以攻復社君子擇交不可不慎於始也

蕉扇

動搖生夏涼君非附炎者往來詩客旁高齋勝秋野

陳宗之十八首

宗之字玉立長洲人崇禎癸酉舉人

靜志居詩話啓禎間景陵流派盛行於吳中雖有林若撫力持唐調然而捷敏未免率易玉立矜鍊獨操正始之音八門七堰六十坊可以獨步

極望

朝登崇邱望四野行人稀悲風振林薄紅塵蔽我衣比屋絕青煙窮郊多啼飢陽和雖萌動不救庶物微天高不可問長吏恣疾威念之五衷熱願力與願違閱世莫克拯撫膺一長欸

感秋

膏雨遍山澤禾黍何豐茸天意豈不周下民乃無胸人滿芽蘗生地繁妍宥容大賢不世出珪墨恣昏庸

荆襄方帶甲。燕薊時傳烽。嗟我蒲蛤氓。不思鎬與澧。鞭撻雖云苦。急病理宜共。築圃會有時。秋鐙燎夕春。我亦慎作勞。飯牛幾時逢。

幽栖

窮居非一端。委志在山草。豈無衣食營。高閒以爲寶。茅茨羣峰下。變態日夕討。霞巘邈風期。霜崖聳襟抱。前有寒泉谷。精微自瑩藻。安得長閉關。心期學至道。觸物方悲歌。歎此橫塗潦。

感時

歲月不待人。流光迫通景。竭來青陽臥。忽已冬夕永。羣條結淒籟。衆壑瀉孤井。抱書黃籬下。白燄搖瘦影。繁憂浩無端。弱志怯前猛。本乏邱園賁。懶怠就曠省。時賢非我期。隱軌幾馳騁。浩蕩古皇心。矜促箕與穎。東澗述懷

結廬北郭溪。寓榻東山麓。郊居已杜門。此更混樵牧。高館闕以淒。穹崖峭還復。琴尊選幽勝。萬翠攢雲屋。籊冠不復簪。散髮聽高瀑。道書填座右。戒香薰靜僕。噓吸資清冷。蕭屑任土木。雖復念流亡。彌年安貞獨。子春非賣塞。子真非湛谷。通執各有趨。何必傲邁軸。乾坤委化運。山鬼聽誦讀。此中寓深致。非人亮莫告。思太古

四序如轉轂。谷居已冬春。誅茅無人地。混混忘佳晨。蛟龍已震動。角尾洞淵淪。自非冥寂心。疇敢忘吾人。

大道失綱領。生晚違天民。文字并幽患。棄之復誰親。相期滅聞見。默守氣自神。

雪嶠吟二首

人生苦綆短。進取恨不早。局促百年中。顏鬢幾時好。馳動既失喧。退遜或傷槁。斗酒發清謠。耳熱心如擣。西京多勢家。雷轟長安道。金膏耀圍臺。恩倖及襁褓。子雲方翳如。遺經至今寶。一懶畢吾分。入山謝儔伍。艱虞失怙後。疲薊劬寸武。憶昔壯年時。俊健如猱虎。飛光不待人。短髮被霜縷。東鄰有織聲。西鄰響樵斧。野人獨蒙頭。高臥至日午。

羣盜

信阻黃牛峽。人稀白帝城。干戈包穀鄧。烽火蔓襄荊。天意高難測。人材浪得名。荒雞興夜歎。流淚哭殘氓。

穀閣秋懷

不堪搖落悵深秋。漠漠風煙起暮愁。鄧尉有山頻入夢。向平多累不成游。黃花笑鬢遲佳色。白墮吹香下晚筍。背信吾生鴻鵠舉。高原亦有稻粱謀。

首夏寄徐子能

栖遲蕭寺輓轡床。水木空青湛竹房。几落瓦花桐广碧。檻懸蛸蠹桂均芳。攜尊喜逐忘機友。閉戶粗知省事方。聞道西郊徐處士。突煙晨冷鶴無糧。

銷磨日力倚書牋。客至從教叩不膺。穿戶筍胎舒紫籜。覆床蕉被展青稜。松棚短屋過溪叟。茗粥清齋共
寺僧。最戀雨餘人事絕。夕陽畦草看魚罾。

出山

五岳平生擬向禽。吳山矯首亦棲尋。旅魂獨夜成風雨。大地精蘆閱古今。佛閣清霜凋遠岫。洞門寒日照
深林。不知救世何人事。莫漫銷沈梁父吟。

愁

繩床深碧語殘鶯。回首飛花歲月更。白髮曉梳遲學道。黃金春盡拙謀生。昨非始悟陶元亮。日損終思向
子平。較量行藏無一可。且耐綠蟻百壺清。

家園早春

關子陰陰遶翠重。柳隄香雪任苔封。暫將禮數消人忌。自許雲林息世慵。春汲幾家蘿蔕接。嘯歌千古枕
書供。幽尋擬乞山僧杖。風雨精靈恐作龍。

送盧涓生赴史相國幕時以觀省歸里賦詩壯之

黃河列戍控山東。指盡襟喉抵掌中。白筆軍書推國士。紅旗都統賴裴公。嘗參幕府龍韜略。歸拜高堂鶴
髮翁。立馬短衫仍獨往。從教逢掖勒奇功。

送客之楚幕

中原遍地盡弋鉞。何處依劉豺虎邊。匹馬獨歸燕市月。扁舟仍泝武昌煙。禰衡莫浪題鸚鵡。杜甫應須拜杜鵑。若問野人雲水迹。茫茫澤國一漁筌。

山中歸見壁上懷友詩次天民韻

年來朋侶太參差。出處茫茫各自私。喪我每思南郭隱。逢人多誦北山移。蓬門晝寂無題鳳。柑酒春深有聽鷗。千載賁園同靖節。鹿裘高臥落花時。

葉襄七首

襄字聖野。長洲人。崇禎時諸生。有紅藥堂詩。

蘇州府志。聖野少穎敏。父教授在外。從母張受學。銳志經籍。爲名諸生。楊廷樞領袖復社。聖野執經稱高弟子。甲申後。隱居不出。工詩律。尤工儷語。有六朝風致。

靜志居詩話。吳下詩流。聖野始屏鍾譚餘論。嚴持科律。一以唐人爲師。與姜考功如須往還。酬和。蠶嘗接席臨頓里。談諧宴笑。器局可親。所刊吟稿。考功序之。

田按。聖野近體。風華淒麗。有蘭成哀咽之音。

春詠和曹秋岳二首

阮籍惟埋照。狂歌意匪他。生涯甘隴畝。心事聽關河。碧草條風晚。青尊舊雨多。蕭條憐短髮。何用補蹉跎。

大雅誠寥闊。如君復幾人。九天聞鶴唱。萬里縱鷗馴。老健渾無敵。驍騰信絕塵。春風江總宅。彩筆動星辰。
春詠酬龔芝麓二首

水國春陰重。江潭柳色移。蠻煙沈帝渚。荒雨仆靈旗。白髮年中換。青袍夢裏疑。山深薇蕨長。應傍伍胥祠。
顛頽黃冠客。猶傳補闕名。孤舟范蠡宅。高柳闔閭城。短褐人情薄。崎嶇吾道輕。杜蘅搖落盡。春色爲誰明。

新柳

貽蕩東風促放芽。有情應似惜年華。章臺溼雨追芳草。野郭輕陰待杏花。淺綠未堪遲幕燕。嫩黃何處暗
棲鴉。永豐坊裏承恩早。柳宿光中一縷斜。

禹陵

寂寞塗山會。蒼茫越海東。星辰環斗極。風雨壯幽宮。玉帛當年盛。衣冠萬祀同。守珪嚴郡將。佩玉列羣公。
畫廡莓苔碧。陰廊薜荔紅。岡巒迴日月。棟宇鬪蛟龍。窆石蟲書古。穹碑鳥篆工。泉源留儉德。伊洛想神功。
配極尊河嶽。憑高俯岱嵩。千齡垂廟饗。百谷儼朝宗。

焚書坑

七國煙銷霸業墟。咸陽宮闕總灰餘。蕭何自索關中籍。不向空坑問蠹魚。

張澤一首

澤字草臣吳江諸生

與雲子衍波菴中夜坐

松古徑難暝，悵然山月光。起行棲鳥散，雜坐野橋荒。良友懷中事，寒林夢裏霜。十年蹤迹異，今夕可能量。

周立勳三首

立勳字勒卣松江華亭縣學生

陳子龍幾社六子詩序，周、徐輩六子皆與余同學詩者也。其才情雄駿，用功深微，十倍於余。然覽其詩，可以泐獨立而儷古人者，人不數篇耳。

明詩綜張受先云：勒卣工愁善恨，下語如九曲明珠，耐人尋索。

靜志居詩話：松江舊有十六子社，唐文恪、董文敏及吾鄉馮祭酒與焉。崇禎中，勒卣偕陳、夏諸公倡幾社，首事僅六人，以詩古文辭相砥礪。今所傳王申文選是已。陳、夏皆以名節著，惟勒卣早天，聞其遇社中人意態殊落落，而人自有欲親之誠。時穀城方閣老四長守松江，數與幾社諸子周旋，而尤敬愛勒卣。人或問之，答曰：勒卣一往有雋氣，不屑作酒肉貴人。第其詩文恆以慨歎出之，慮其人不壽耳。歲己卯，就試金陵，質素清羸，寓伎館。伎聞賈院，搗鼓促之趨，勒卣尙堅臥也。未幾，遂客死。臥子哭以詩云：松柏西陸路，菖蒲北里花。春風夜臺路，玉勒向誰家。宋轅文亦有詩：翠羽明珠擁莫愁，君家顧曲舊風流。一時腸斷人何處，風雨蕭條燕子樓。又云：山陽玉笛異時情，天間靈均意不平。縱使未堪軒冕貴，何妨白髮老書生。數日後，忽夢勒卣至，曰：君詩固佳，胡不曰縱使未堪邱壑老，何妨白髮困諸生。轅文覺而異之，爲位佛祠祭焉。

田按：勒卣之論詩曰：士當不得志而寄情篇什，憂悶悲裂，倚詞遙旨，往往有之。又云：予失足敗意，願盼園圃，風物悽悽，求說哲

之遺編。愧時賢之工藝。未嘗不歎悼扼腕。悔其多作。悲哉。何其多幽憂之思也。勒齒與臥子爲素交。臥子選明詩。僅錄其詠懷一首。予廣搜諸集。得詩數篇。俾弔沈淪而哀憔悴者。有以得其厓略也。

舟行效江文通詩

凌晨戒舟楫。斥渚一已深。弱草承芳徑。孤雲冒遙岑。鬱葱起奇樹。歷落飛幽禽。蒲葉薄刺水。香風輕出林。海煙遠樹黑。江光日莫陰。奔濤恣瀉蕩。高墳散崎嶇。獨望成千里。安能知古今。

雨泊富陽江上

驟雨江流急。雲挾蛟龍勢。莽莽不得停。橫帆去搖曳。孤鳥沒還浮。亂石危有制。雲湧山自覆。林遠草同細。連舟若村墟。煙火遙相隸。所歷百里間。風波渺難濟。客行無安途。林深啼蜀帝。

舟次黃州寄懷諸子

攬衣涉沙磧。日落黃州城。魏祖旌旗盡。吾家事業更。薄遊分數子。因別念平生。無限悲秋色。孤鴻向客鳴。

魏沖一首

沖字叔子。一字道用。常熟人。崇禎庚午舉人。有小碎集。

列朝詩集。叔子垂髫卽能詩。濯濯無俗調。

懷舊集。叔子少與兄仲雪齊名。稱二魏。詩亦恆似。久而信余言。遂舍故學。君有詩云。貧知無事足。賤倚閉門尊。先府君以爲名句。

田按。叔子。馮定遠師也。鈍吟雜錄嘗稱之。

三月十三日陳和卿補送春約載酒李家橋顧氏園亭

幾簇茅茨綠樹攢。野薇香酷小梅酸。一春城裏看春色。今日餘春村外看。

許元功四首

元功字無功。一字更生。吳人有靜曜詩集。

湖山靈秀集。明季如許無功。吳不官。足爲蔡九達後勁。

田按。無功詩清肥綿邈。令人留賞。

灌谿夜話

寒城易暮色。倦客鮮歡懷。園林幸接近。時偕樽壘來。兼得兩三友。諧謔無嫌猜。論古有餘思。停卮共徘徊。肅肅前除霜。噉噉鴻雁哀。攬衣發長歎。月白煙初開。

歸元恭同寓郡郊將偕葛瑞五入包山贈別

遊侶適尋至。因知帆不停。前朝好黃葉。林臥聽清冷。煙火白波出。連山寒更清。何心留滯者。愁說贈榛苓。顧與治養疴。半塘余亦病。滯城菴辱先。來至卻寄

此地聞君過。書來枕上看。江湖同旅泊。愁病得秋殘。野寺翻經榻。寒塘放鴨闌。城郊通短夢。劇論舊悲歡。

丙戌秋同李灌谿訪劉公旦野寺公旦有扇頭見贈之作久未答和悵然補之

野寺蕭然古壑秋。哀松激響憶同遊。袈裟得借人間地。麈尾難消客裏愁。手種白楊齋徑改。魂歸青草墓門幽。舊題珍重時開篋。不對西風淚亦流。

潘一桂二首

一桂字無隱。一字木公。吳江人。

列朝詩集無隱年未三十有賦數十篇。卜居京口。覽江山之勝。與友人錢玄密。緯以辭賦相鏃。作東征昌言諸賦。爲時所稱。東游泰山。謁孔林。作東游詩。南陽朱邸好辭賦。延招四方賓客。起高明樓。擬于雁池兔園。幣聘再至。乃往。授簡賦詩。雍容應教。有趙康王禮謝檄。鄭若庸之遺風焉。居留一月。謝不能曳裾王門。稱疾辭歸。

龍潭道中

疊嶂深藏日。連峯共隱天。小舟如雁許。歷歷下江天。

幽人

山色自滿幽人扉。疏窗晴日淨暉暉。避人一鳥踏枝去。遂有落花無數飛。

王潢二首

潢字元倬。上元人。崇禎丙子舉人。有南陔堂集。何莫草。

帝里明代人文略。先生吾鄉忠厚人也。明遺孝廉篤行君子一人而已。

賈徙南王日華沈修能晚過小酌次日華韻

駭鱗潛重淵驚羽棲層枝。達人審物候。舒卷從天時。眷懷二三子。顧我臨前墀。盛夏苦埃鬱。溽暑如蒸炊。赤日忽西馳。皓月窺梁楣。雙桐激清響。拂坐生涼颼。卽境屏餘慕。怡曠良在茲。願言數晨夕。析賞無虛期。

吳門訪徐元歎

何處溪山曳短筇。誤從城郭訊高蹤。埋名或恐同梅福。問字曾聞擬顧雍。人臥荒菴依落木。客停孤舫聽疏鐘。相逢莫語興亡事。耕稼惟應學老農。

梅朗中五首

朗中。字朗三。宣城人。鼎祚孫。崇禎時諸生。有書帶園集十六卷。

侯方域壯悔堂集。朗三采六代之華標。三唐之製。長歌短律。皆臻精妙。

愚山渠。禹金聞孫。復有朗三。蓋庶幾與禹金相望者。朗三善詩古文辭。兼及書畫。又好獎才彥。歛衆美以萃其身。乃年不逮四十而摧折悲夫。

梅氏詩略。朗三性情嗜古。詩文法祖而資才駕之。字效張。王。畫規宋。元。嘗與吳越名士樹幟騷壇。爲四方風雅之宗。論者謂研孫輝映。均足千古。

田按。朗三古詩。仿顏謝而未能穎脫。五律便自瀟灑。

集白雲樓

徑穿叢篠出，樓壓曲崑生。虛爽坐看久，壺觴暑更清。鳥栖千嶂夕，虹飲一川明。最愛秋林晚，丹霞樹樹橫。

同方爾止蔡大美遊響山時余將往新安因送大美之金陵

作客同春水，東西任去留。卽堪臨水送，復此別家愁。白岳開丹卷，青山空謝樓。無須悵分手，雲物帝城秋。

送吳生孟修讀書越中因訪錢諸暨及湖上嚴朱諸子

入東何不速，良友半空函。墊飯沙頭市，春衣馬首嵐。負書誰共賞，斷酒爾能堪。若過山陰道，還先禹穴探。

送大美之金陵寄何次德

纔傾蘭社酒，便買石城艫。旅夢回楓樹，餘霞吟練江。舊知名第五，不獨賦無雙。儻問梅真子，寒吟謝朓窗。

送劉雲遊姑蘇

江館花殘燕子飛，春蒲一幅下蠓磯。五湖煙月知多少，莫學西施去不歸。

蔣臣一首

臣初名姬胤，字子卿，更名後，字一个，桐城人。崇禎中舉賢良方正，授戶部司務，遷主事，有誰菴集。

靜志居詩話，一个見知於太倉二張，注名復社，其柴車北上，爲倪公玉汝所薦，召對平臺，甲申寇變，問道走淮陽，依史公道鄰。

史公留參軍務，一个嘆曰，以一驪虞將五狼，其能久乎，遂辭歸，其詩雖乏渾涵，亦自瀟散。

田按，一个以范大司馬景文薦，建漕屯，行鈔，足國三議，漕屯未知如何，其行鈔法，言歲造三十萬貫，價銀一兩，歲可得銀三千萬兩，此亦書生之見，豈可行於衰亂之世乎。

感遇贈劉伯宗

夙昔秉遐尚。託契依邱樊。炯戒師明哲。息機謝羣援。山月照薜蘿。偶開松下樽。素琴發清籟。宿鳥時高翻。斯際穆懷古。孤緒於焉存。時艱亦念哉。含藏道所尊。感彼華實分。獨寤永弗諼。主上撫卮運。九載未濟屯。絃網遍八埏。翹車賁邱園。是時無留良。與子同見掄。天路苦荆棘。豺虎彌川原。關洛數十郡。戰哭皆新魂。子才陋微管。奮翮必鸞鶩。余方戀南陔。藝黍供晨昏。出處各有適。素節諒自敦。不聞莘渭人。媿效公孫。三復沔彼詩。末俗誰與論。

趙相如二首

相如字又漢。桐城人。天啓諸生。有載園詩集。

桐舊集潘蜀藻曰。崇禎時求直言。又漢上治平十二策。爲權貴所阻。其爲詩憂君憫俗。婉約深摯。有落花之風。

甲申春初感事

羣策勳名在鼎鐘。英籌何日殫元凶。十年議撫煩司馬。五等新頒起臥龍。河伯威能爭豫壤。泥丸隙竟潰函封。荒原萬里春田草。隴上誰明盛世農。

江南曲

樓船簫鼓動江城。長板橋頭夕照橫。少婦不知烽火急。權歌猶唱鳳陽聲。

許振光一首

振光字起文吳人有心耕草堂集

將歸先寄山中諸同社

冬氣先知到布衾。故園蕭散別來心。或爲野步兼橋立。不是茶清卽酒深。向友索文星下讀。懷人有夢水西尋。問余作客因何事。兩月江干日苦吟。

愈南史二首

南史字無殊吳江人山人安期子。

治圃

學圃非吾事。時窮逐汝曹。初知鹿門逸。終覺漢陰勞。業薄資家食。慵多長野蒿。栽培天地意。功力計纖毫。

長門怨

金屋春深早閉門。平陽歌舞動黃昏。君王那得如明鏡。日向妝臺照淚痕。

徐白二首

白字介白吳江人別號笑菴先生有竹嘯菴詩鈔。

愚菴集介白自鍾譚入門能不熏染其流弊。

遂初堂集處士詩幽冷刻深不肯蹈襲前人一字。

靜志居詩話介白初師景陵詩派務以幽深孤峭爲宗後以太湖落日賦見賞於陳臥子晚年持論稍歸和易。

本事詩笑菴清癯峻削性類枯禪築靈巖三十年屏迹城市室內顏白髮前朝士青山半屋雲之句錄其單詞鬢鬢聞天風步虛聲也。

獨遊

雨後垂楊路東風草際喧因尋溪外響不覺盡清源雲傍水心寺花開原上村春光先我待一笑復何言。

月下聽女郎彈琵琶

哀絃淒絕未知名若對清光更有聲總爲姮娥善幽怨人間此夜盡關情。

方文十首

文字爾止桐城人崇禎諸生有爾止集五十卷。

愚山集爾止爲詩雖民謠里諺塗巷瑣事皆可引用與會所屬衝口成篇款曲如話真至渾融自肺腑中流出絕無補綴之痕漁洋詩話爾止瀟灑有天趣每見人誦詩者輒爲竄改其人不樂亦不顧也然退未嘗不稱其長而揜其短余以此重之。

池北偶談方龕山居金陵少有才華晚學白樂天好作淺俚之語爲世口實以己壬子生命畫師作四壬子圖中爲陶淵明次杜子美次白樂天皆高座而已僮僕於前呈其詩卷余爲題罷語座客曰陶坦率白令老嫗可解皆不足慮所慮杜陵老子文峻網密恐龕山不免喫藤條耳一座絕倒。

特觀爾止詩專學長慶僕昔與之論詩蕭寺頗有箴規爾止弗善也要去其俚率存其蒼老斯爾止爲足傳矣。

靜志居詩話。爾止間作可笑詩句。頗爲時論擲揄。然如嘉穀登場。或春或採。稅糧終少於粒米。

送沈治先歸皖

秋江同作客。春水又同歸。何事棲遲久。仍嗟生計微。對床聽夜雨。把酒問漁磯。坐惜沙邊鳥。乘風忽背飛。
旅夜

客舍已凄苦。況聞風雨聲。一杯消永夜。孤燭坐深更。飢鼠分行出。寒雞失次鳴。此時心眼靜。歷歷悟浮生。
留別陸夢文

西子湖花秋正芳。斷橋曾與共相羊。青天鴻雁各千里。白露蒹葭已十霜。阿閣相逢重對酒。榜人無賴復鳴榔。春江細柳垂垂發。逝水何如別恨長。

送曾庭聞遊漢中

秦門自古興王地。楚蜀咽喉在漢中。龍戰且收西極馬。鵬搏應待北溟風。將軍名以先朝重。才子文於露布雄。酒後有時還縱獵。詩人淨與賦彤弓。

立春日何第五招同施愚山夜集兼呈令兄次德

卜築青谿少四鄰。君家兄弟獨相親。每逢好月思良晤。況復寒江來故人。雪酒不辭今夜醉。風花又見一年新。烏衣巷口多芳草。明日重過是早春。

題劉遠公扁舟江上圖

年來江上正橫流。何處輕舸任爾浮。小泊歐陽湖上雨。長懷徐孺宅邊秋。天空倚櫂吟霜葉。客至投竿醉酒樓。我亦無家同放浪。平分汀鷺與沙鷗。

題酒家壁

問我來何數。非關飲興豪。風塵燕市裏。或恐有荆高。

喜遇陳允倩處士兼懷陸麗京梯霞

廬陵自古溪山好。尚有梅花冷煖殊。爭似錢塘陳與陸。枝枝葉葉是林逋。

立秋

郡齋木葉報秋聲。客被單寒夢不成。睡起秋聲無處覓。刺桐花下月微明。

題半山道人畫冊

一著袈裟絕萬緣。獨餘破硯習難捐。江山本是無情物。畫到荒殘亦可憐。

吳德操一首

德操字鑑在。桐城人。諸生。官大理寺丞。有北征草。過江集。

聞劉念臺金天樞兩都憲同日蒙譴

危冠伉直途庭爭。梁下先驚懸鼓聲。獨坐轉慙辛慶忌。同官還累竇營平。人言太尉門牆峻。帝識萊蕪釜
甌清。臺閣一時誰表率。飄然南策蹇驢行。

葛芝二首

芝、字瑞五。崑山人。有臥龍山人集。

短歌行

朝遊太行。暮歸王屋。寶劍在掌。鬼母夜哭。解一士方貧賤。蹋地呼天。一旦雄飛。目無聖賢。解二權勢所在。爭則
害人。哀哉李園。竟殺春申。解三麋鹿在山。饑鳴求食。忽登雕俎。人飽肥澤。解四曲室密語。中懷水火。苟得同心。
一人已可。解五神靈所畏。惟在果敢。匹夫縱橫。山川倒撼。解六促我豐膳。飲酒曲房。援我繁弱。射虎南岡。解七

贈徐日敬

芙蓉未老鱖魚肥。孺子扁舟叩竹扉。感舊十年惟有涕。論交四海竟誰依。瓊瑤請室人猶在。寂寞新亭事
已非。君是黃公門下客。墓前絮酒定沾衣。

趙司直二首

司直字維生。涇人。貢生。有敬閣集。

散步

明詩紀事 辛籤 卷二十二

三一五七

柳色當窗覆。好風吹自東。舊懷隨野鶴。晚興寄孤桐。曉雨半峯綠。夕陽千樹紅。相攜呼解杖。囊盡不知窮。

別墅

幽夢過殘香。遙懷寄墜籜。獨坐校遺編。白雲當戶落。

賀裳四首

裳字黃公。丹陽人。諸生。有少賤齋。紺雪齋二集。

吳喬園爐詩話。黃公載酒園詩話。深得三唐作者之意。

劉會恩曲阿詩綜。黃公與從姪黃序有二黃之目。工樂府古詩。

擬古謠諺

干將雖利。不能析薪。鳳凰雖靈。不能司晨。

詠古

好古遂成癖。蒙訕終不回。馬遷有霸氣。李白真仙才。屈枚雖過之。讀之令人哀。不若二子言。使我胸懷開。平時不敢讀。每以待愁來。

送人之塞下

右筆左韃囊。常披白鬪袍。星下看龍劍。燈前讀豹韜。倚鞍成露布。磨楯試霜毫。絳灌徒能武。勳名未足高。

白塔懷古本宋故宮。楊髡發諸陵。收寶玉。取遺骨。雜牛馬骨。葬於此。上作白塔。鎮之。

鳳凰山上樹蒼蒼。欲訪遺蹤半渺茫。誰向春風澆麥飯。空留夜雨作椒漿。月明飢鹿來荒院。風定棲螢出短牆。野叟遊僧都不見。只憑嘯鳥訴淒涼。

賀燕徵七首

燕徵字元生。丹陽人。諸生。福王時。以薦參贊兵部軍務。告歸。有玉筐集。

田按丹陽賀氏。元生與黃公在復社有名。黃公載酒園詩話。當時盛稱。余謂黃公詩不如元生。玉筐集音節嘹亮。古今體均入格也。

戰城南

戰城南。守城北。城下萬竈炊煙黑。今日不椎牛。包羔饗壯士。焉知明日戰死不爲狐狸食。狐狸腸。可以葬馬革。裹尸非所望。君不見松林鬼火粲如花。孤魂夜夜泣無家。雨洗黃沙出白骨。劍鋒猶向骨間沒。

巫山高

山山出雲雨。朝暮成今古。何必巫山陽。遂爲神女府。楚襄應是獵章臺。曾挾傾宮舞袖來。當時詞臣善諷諫。故將雲雨規荒宴。祈招足以止君心。楚臣每多金玉音。

酬陸直菴社伯

大雅今誰領。君如人有眉。乾坤容鳳隱。雷雨療龍癡。秋水離騷句。春風供奉祠。蘭橈倘北渡。樽酒話江湄。

淮陰侯

奪符猜已甚。躡足禍應胎。鳥盡弓藏後。王孫亦可哀。

留侯

借箸銷金印。休糧茹紫芝。區區終始意。隆準未能知。

虎邱尋貞孃墓不得

片月埋香骨。輕雲度夜魂。當年應化玉。是否碧桃根。

阻風謝司港

三日艤舟坐。何殊鳥處籠。張帆夜半去。老鶴縱秋空。

劉城十五首

城字伯宗。貴池人。諸生以薦考授知州。不拜官歸。有嶧桐集十卷。

陳宏緒士業全集。伯宗國變來自署一私印曰謝髮。鄭心將自比於皋羽之髮。所南之心也。爲文高古。渾成類西漢。於詩尤工樂府暨絕句。

康范生集。劉伯宗徵君詩。具有微情至性。寄託深遠。靜志居詩話。伯宗次尾。足稱貴池二妙。才氣亦相敵。

田按伯宗雄才揮霍英斷前知弘光時史公道鄰以輔臣督師出守儀徵議建四鎮防河而南封左良玉守武昌伯宗遣書史公曰五侯皆盜賊之餘非有恩義聯結知墓節概思樹功名流聲於後世也主弱必叛敵強則降敵主皆弱且欲專制自爲而互相兼併勝者大自封小挾上不勝者則復潰溢散漫而爲流賊今內無老臣宿將勁旅親兵足以彈壓不肖在廷推公防守雖名督師實出公於外根本單薄而欲使此四人者防河是猶使狼守門虎來未必能拒而主人先不得動手搖足矣苟行之公必悔之史公得書果悔之而無及矣此書今嶧桐集不載余見之徐巨源所作伯宗傳中伯宗自序古樂府云余於崇禎丙丁戊午間頗有雜感而分不得言則取古題傳以時事竊比於微而顯怨而不怒亦詩人之意云爾其文則古而其事與義則別余固不爲擬古樂府者也余謂知是斯可以爲古樂府矣

上之回

上之回。祠雍畢。楊翠旗。仗玉珎。升高墉。閱臨衝。羣后擁。百靈降。導瀛澗。賚宮功。昊天悅。人和同。望玉門之外。見青海若帶。休屠祭天。烏孫膜拜。皇帝陛下三萬歲。

巫山高

巫山高。石巖巖。溪水深。流相環。水日嚙山趾。高陵崩以徙。岸谷旣移。洪流斯瀾。昔與爾綢繆。今與爾仇讎。山川之險。使人心憂。欲渡無梁。我涕洟。雲土夢。又待何時。

猛虎行

饑不分盜跖。膾寒不衷夏姬衣。饑寒豈不急。志士微尚非。薄俗多聾瞽。逐臭相因依。祝鮀羣情樂。冉雍物

論譏斑斑白額虎。嚙人常苦肥。啾啾九苞鳳。棲梧常苦饑。虎肥多弃肉。足飽狼與豕。鳳饑無餘粒。野雀別山飛。眷彼披裘翁。逃名得庶幾。

企喻歌

男兒欲作好。結交必有人。蛩蛩與駝虛。相倚始成行。

幽州馬客歌

作客來京洛。本自幽并兒。沙場無死戰。驟駟換蛾眉。

前緩聲歌

籠中之雀。必有海運之鯤。大小相笑。難與較論。世人是非毀譽。以愛惡如虱處禪。當復思人間之苦。必有天上之歡。空清曠蕩。下視殺人報怨無端。勿短歎。復長歎。蒿里聚斂齊觀。

題吳山賓畫屏

松翠可滴。山黛如零。寒水滅沒。遙見長汀。欲問津去。無舟與答。延頸四望。空闊宵冥。

古意與徐九一研

東海有奇樹。鬱鬱干霄姿。下蟠萬仞根。上垂千尺枝。芳香郁廣野。文采光陸離。卿雲繚繞之。惡鳥不敢栖。經年宿鸞鷲。鸞鷲治世儀。有時出雷雨。一雨四方滋。

徽宗畫鷹歌

素翎鉤吻眼愁胡。鐵腳雙閑猛腦軀。意思慄鶩條墜徐。欲颺且立勢可呼。誰其圖者道君無。學士臣京贊且書。戴嵩之牛韓幹馬。挂滿村家酒舍堵。唐寫蘭亭五千本。豈有山陰但定武。意殊神王毛可憐。便是當年良岳主。我思杜甫觀鷹贈楊監。猶且惆悵追憶含元殿。三郎開道雖郎當。翠華返正虜血濺。五國城寒滿朔風。孟婆終不行方便。秋風自高鷹不揚。餓則依人韝上旋。岳家好爪不容飛。西湖一曲攢鴛燕。淚盡冰天寄帛書。此時應不畫鷹獨畫雁。

湖州忽逢孫新齋廷評鼎攜家茗水在此

句曲寒霜月。苕溪盛夏風。遭逢兩意外。飄泊一時中。國事痛何極。吾曹正自同。脫衫纔發語。穆駿問西東。

寄白門余澹心懷

重問當年舊六朝。干戈經處可蕭騷。隱囊麈尾應零落。石闕華林自寂寥。白板屏存知爾在。黑頭公貴有人驕。孝標著論交堪絕。猶向關心說夢蕉。

天啓宮詞二首

蓮漏投籤已幾回。金鋪屈戍鎖難開。火城忽簇仙韶動。奉聖夫人沐沐來。封章連日奏重瞳。鐫德銜恩祀廠公。早見文書房捧進。溫綸已票速批紅。

崇禎宮詞二首

水晶簾照月微明。鴛被回身夢始驚。門外稍聽牌子過。鸞輿警蹕已聞聲。
宸極深嚴兼聽全。刺奸密奏戒傳宣。打來事件朝朝進。短紙牢封到御前。

沈自然四首

自然字君服。吳江人。有來思。閒情二集。

本事詩。君服才藻。粉披集多麗句。纖靡穠豔。架軼西崑。不僅步溫。李後塵也。

明詩綜。君服居母憂。不勝喪而卒。其友私諡孝介先生。

江南樂

初景爛銀浦。溘溘浮鵝鵝。儂情兩搖蕩。持比春江色。江深蓮子齊。水煖鴛鴦飛。不須更相問。家住橫塘西。
橫塘連夾浦。曲曲明如許。誰打白蘋開。前溪夜來雨。雨霽上南樓。天高水影浮。出門郎不見。齊蕩采蓮舟。
舟輕小於蜨。楊柳雙頭檝。咿軋滿中流。桃根復桃葉。蓮花照水紅。那得負情儂。不愁白日暮。但苦西南風。
風吹早帆去。作底情難訴。記取石頭城。門開烏柏樹。樹下卽江流。風多團扇秋。相將板橋上。迴望大堤頭。
堤頭風力軟。綠刺菱香滿。嫩薄粉紅嬌。羅輕衣帶緩。江南望江北。只取屏風隔。折來梅蕊芳。持寄隴頭客。
客夢久踟躕。江南定不如。甯知可憐唱。相近莫愁湖。

四時行樂詞錄二

媛簇歡娛鬪錦營。尙多愁緒戀朝醒。更將何事消芳晝。豈有閒情數落英。桃葉渡頭風濫濫。芙蓉塘外水盈盈。南山發豔臨西苑。方罍文罍漏晚晴。春

清晝沈沈畫閣閒。翠華宮裏見南山。催成織素先裁扇。喚取冰棧試作環。鴛瓦雨來珠跳蕩。鳳溝泉遶玉纖灣。輕衫短袖迎風立。一例新梳學小鬟。夏

金屋

金屋椒成鬪麗華。莫言銀漢隔天涯。水羅罩影沈秋月。蜀錦圍香鎖絳霞。春檻綠鸚歌玉樹。曉牕青鳳拂桐花。誰憐越女江邨裏。旦晚臨溪自浣紗。

吳道新一首

道新字湯日。桐城人。天啓丁卯舉人。除泰興教諭。遷國子助教。改工部主事。有潛德居詩集。

桐舊集。潘蜀藻曰。湯日先生。甲申後隱於桐城東鄉之白雲巖。荷衣芰裳。與耕漁者伍。垂四十年。臺佟鑿穴於武安。袁閔遜迹於土室。不是過也。孫易公有壽湯日詩云。十年夢斷漢明光。尙有朝衣染御香。亂後親朋俱契闊。老來詩酒益疏狂。黍離歌罷。周臣怨。杜若洲寒。楚客傷。一自鼎湖弓墜後。滿陵歲歲哭先皇。

病甚述懷

玉宵峯峙白雲鄉。賸水殘山一草堂。但許狂歌臨廣武。敢言耆舊重襄陽。病知身後埋青草。愁見齋前種白楊。應羨司空能早達。衣冠生壙預先藏。

明詩紀事卷二十三

辛籤

聞啓祥二首

啓祥字子將。錢塘人。萬歷壬子舉人。有自娛齋集。

靜志居詩話。杭州先有讀書社。倡自聞孝廉子將。張文學天生。馮公子千秋暨餘杭三巖。後乃入於復社。而登樓社繼之。文必六朝。詩必三唐。彬彬盛矣。

田按。子將沿襲公安。頗涉俳體。

雲棲晚歸原擬取道十八澗以多虎有戒心不果

禪林歸路晚。逐伴且兼程。殘雪消還在。寒潮落復生。望煙知郭近。畏虎避山行。忽忽辜清景。還家意未平。

過桐君山

訪舊桐江上。扁舟此地過。一山盤古木。夾水送澄波。風息帆檣少。潮平沙渚多。僧幽真可語。其奈夕陽何。

朱一是十七首

一是字近修。海甯人。崇禎壬午舉人。有爲可堂集。

讀畫錄。朱近修以詩文雄視一世。作江上數峯圖。濶遠空闊。怡人心目。是李山顏寄余者。曹子顯曰。余與近修同研席者二十一年。目未見其畫。亂離之餘。遊戲爲之。便自神話。近修有爲可齋集。與古大家爭衡。頗有可傳者。丁未夏過白門。與余論畫。語語當行。其集中諸小記。妙極形容。頗有繪畫不能盡者。顧菴又何疑焉。

明詩綜。陸冰修云。近修文名早擅。遠避地江東。屈志百里。尤以才略見長。歸欲披緇以老。而從遊弟子力強之說。經因主文社。太邱之交。道日廣。州來之縞紵彌多。古今詩不事矜鍊。而詞采斐然。五言如十暑杜陵葛。一寒范叔袍。秋懸遊子夢。日落異鄉山。野火燒山近。寒星照水明。山容初過雨。水氣忽生秋。淚以傷時盡。愁須醉日多。僧廚三度臘。客夢一歸鄉。剪竹開新徑。因溪架小橋。青山寒照日。黃葉晚從風。遠水通溝澗。濃陰接樹平。妻子他鄉淚。文章浩劫灰。七言如牧馬官同張萬歲。進賢賞並鄂千秋。關河秋色三千里。風雨冬青十二陵。代北重關飛白雁。京西古鎮出黃花。笛裏羌歌憐折柳。馬頭關樹但生榆。長江險失韓擒虎。智井春埋張麗華。三楚烽煙新幕府。六朝煙雨舊樓臺。溱布秋風搖練影。石梁新雨慘藤花。苔音響清鏘。猶是歷下四溟敵手。

梅里詩輯。孝廉負經濟。計偕入都。欲上書言事。而時已不可爲矣。國變後。遁逃海上。饑寒顛沛。百折不回。居吾里東偏。蒔桑種竹。顏其門曰十畝之間。時寓僧廬。披繡衣講學。或勸之。初不應。貞固之操。恆於詩篇見之。古今詩才情富麗。氣體雄秀。明人詩鈔續集。近修五七言律。英英欲上。響高而氣華。

田按。近修詩長於近體。七言調雄氣逸。尤爲到格。曾師事梅村。其贈梅村有云。近時高華推四傑。邊徐何李詞源決。山左更數白雲樓。江南莫如王弇州。弇州梅村一梓里。後來者勝投袂起。可知其淵源所自也。

夷門歌

虎狼吞併古所聞。救趙卻秦成大勳。平生結客魏公子。激烈豈爲平原君。朱亥狗屠感意氣。侯嬴老人識

名義臨風列頸捐一軀。赫赫精靈感天地。恥不帝秦亦徒然。蹈海虛傳魯仲連。

采菱曲

儂愛菱花香。蕩槳水中央。那知葉深處。驚出兩鴛鴦。

楊白花

青垂楊柳枝。白吹楊柳花。折枝猶在手。花去落誰家。

還過爲可堂卽事

四壁蕭條外。平蕪卽戰場。殷勤逢父老。涕淚滿衣裳。白日扃荆戶。青燐照草堂。鷓鴣聊可息。慙愧賦靈光。

歸濤溪雜詠

喪亂人從老。間關道已窮。有身慚故舊。無淚哭英雄。投筆心仍苦。登樓賦詎工。歸來唯獨寐。多病畏秋風。

送袁重其歸吳門

詞賦西京起盛名。歸舟到處有逢迎。水平寶帶芙蓉落。山老靈巖橘柚生。娃館月明寒夜色。蘇臺木脫動

秋聲。鹿門亦在空城裏。坐對妻孥不問兵。

維揚同社聽濤吟屬和

湖上邗關水氣雄。重看女市萬燈紅。春風楊柳興亡後。宵月樓臺隱見中。四海弟兄長夜醉。一時詞賦小

山工不堪白首天涯客。年少猶憐我調同。

北塞

居庸高望極龍沙。野戍蕭條對日斜。代北重關飛白雁。京西古鎮出黃花。穿河萬里猶秦塞。絕漠三城自漢家。苦戰當年推衛霍。秋風千載起悲笳。

淮望

憑虛一望幾徘徊。暮色輕煙萬里開。滄海遠帆多北轉。黃河穿塞自南來。雲邊豐沛蟠龍氣。樹裏彭城戲馬臺。澤國關山連二楚。英雄遺略感羣才。

登宣武門雜興

天際高臺越客登。帝鄉極目彩雲興。關河秋色三千里。風雨冬青十二陵。洛口赤眉金鼓動。終南黃髮玉書徵。中原事業需匡濟。誰許蒹蘆慕季鷹。

初入都雜賦

關門纔喜出驕兵。誰問懸軍絕塞營。上聖幾年臨便殿。諸公何日作長城。衣冠南北愁分部。烽火東西逼二京。聞道哥舒新報警。潼關羽檄夜催征。

溪上

溪上茅蘆水抱東。薜蘿徑小少人通。高低白雁秋雲裏。開謝黃花夜雨中。夢友不辭千里遠。著書獨對一庭空。倚門愁望平原樹。萬葉蕭蕭下朔風。

淳化嶺

淳化崗前一度遊。關門咫尺思悠悠。山風山雨隨時變。江草江花向客愁。月暗空城三閣夜。霜寒古木六朝秋。啾啾衆鳥投村宿。汗漫征車苦未休。

當湖登弄珠樓遠眺同陸雯若

萬頃澄波百尺樓。九龍迴繞戲珠遊。地從天目分形秀。水合滄溟積氣浮。挂席夜通三泖月。開襟曉帶五湖秋。眼中浩渺情無極。城市原來近十洲。

春去

春去東風在。何須更惜春。還賴東風力。吹回遠遊人。

金陵送人入楚

秋江流水白紛紛。不解留君但送君。今日一尊吳地酒。明朝千里楚山雲。

端陽

煙淨風微渚水清。龍舟羯鼓動哀聲。祇今楚國無三戶。還有遺民弔屈平。

陸圻四首

圻字麗京一字景宣錢塘人貢生有威鳳堂集

今世說陸麗京度曲四劇瀟遊武塘錢仲芳大集賓客卽令吳伶演唱新聲豔發絲竹轉清四座之間魂搖意深

漁洋詩話陸講山武林耆宿爲西泠十子之冠晚年遠遊不歸或云在嶺南爲僧名今龍或云隱五當爲道士終莫得而詳也

洪昉思詩云君問西泠陸講山飄然一盞竟忘還乘雲或化孤飛鶴來往天台雁宕間

西陵十子詩選景宣經史論敘藻密淹通翰墨之勳先驅首路詩則綺麗爲宗符采昭爛雲津龍蹕不厭才多

靜志居詩話崇禎間文社四起執牛耳者婁江張吉士溥也歲辛巳吉士卒麗京東駕祭酒往會葬賦五言長律一時傳鈔以爲傑作

兵後賣藥長安市上其詩文采組六朝醫方酒令觸口悉成儷語倘飯冷菜捫蝨而談相對者忘其穢也晚因史禍牽連既得釋訪澹公於丹霞精舍轉入武當爲道士不知所終

鮑琦亭集講山先生與弟大行培並有盛名與其友爲登樓社世稱爲西陵體乙酉之難大行里居自經死講山匿海濱尋至

越中復至福州薙髮爲僧母作書趣之歸時尙崎嶇兵甲之間思得一當事去乃返雅善醫藉以養親會莊鏡史事發詞連講

山械繫按察司獄久之事白得出貽書友人封還月旦不知所之或言其在黃山子寅徒步入山長跪號泣請歸講山曰昔者

之歸以汝大母在今大母亡矣何所歸寅請一歸祭墓乃從之旋往廣東丹霞山一夕遁去自是莫能跡迹寅往來萬里負畧

丁求數歲卒不得竟以是恹恹死時稱其孝子於姚江黃公家得見講山所封還月旦之書甚自刻責以爲辱身對簿從此不

敢豫汐社之列嗚乎其亦可哀也夫

田按西陵十子理李何之墜緒矯鍾譚之頽波觀虎臣自序首簡云三百而降厥體屢變根極情性緣以文藻軌因代殊要歸

雅則是故騷詞樂府長句胚胎十九河梁五言堂構隋唐李則律絕禱矜也然祖構相沿折衷論定古風極於元嘉近斷

自大歷人代更始。鄙下無譏。抑何哉。攷鏡五言。氣質爲體。俳儷存古。仰逮猶近。劉亮爲工。失之逾遠。近體務竭情。求諧音節。託興漢魏。選材六朝。意貫語融。靡傷氣格。變調無取。旁門益乖。故武德而降。難爲古。元和而還。難爲近也。又況宋習鄙鈍。元音俚下。藝林阨運者乎。明初四家。掃除不盡。廓清於何。李再振於嘉隆。斯道嗣興。斌乎大雅。然七子頽流。馴趨浮濫。竟陵矯之。枯率猥淺。尤惡斐然。自餘紛紛。無關商較者矣。景宣諸體。勁健不及。祖望藻麗。不如去矜。而當時推爲風雅。領袖。豈不以名德足重。有在言語文字之外者耶。

臨平申包胥廟

申公祠廟俯寒汀。朱戟森森掩翠扃。秋入松杉偏慘淡。夜深燈火自晶熒。山迴石鼓蒼雲斷。水漲東湖草色青。向晚茫茫空雪涕。不知何處是秦庭。

客愁

瘴癘天邊幾度春。長安西望淚沾巾。趙王臺上珠如月。誰復裝金贈漢臣。

河渚春行

十里晴溪芳草斜。梅花落盡見桃花。不知春色來何處。遙指江粧出浣紗。

秋夜聽潘生歌

樽前歌罷總銷魂。把酒空沾涕淚痕。纔向人間聞禁曲。秋風先到故侯門。

卓人月二首

人月字珂月仁和人貢生有蟾臺葉淵等集

池北偶談武林卓珂月崇正初作千字大人頌錯綜成章甚有理致

秦淮竹枝

兩岸高樓倚白榆樓頭人面映蝦鬚雨絲風片有時有雲黛煙鬢無日無

東吳竹枝

光福楊梅血色斑洞庭芡實八珠環天生兩種堪銷夏何必吳王消夏灣

夏緇七首

緇字雪子嘉善人天啓諸生有西冷維摩孤望三集

橋李詩繫雪子詩早務纖豔既悔之漸趨空淡一派至南中夢遊諸作與削蒼涼點染特絕妙句尤多風調有竹枝縹緲之音

夢同錢彥林遊雞足山亦猶盧綸同吉中孚夢桃源也因賦

步步焚香燈百里皆禪寮懸巖縛瘦屋高下隨山椒有如巢林羽一一綴寒條客子脫青笠隨意挂僧瓢
飯宿無前期但望風旛飄松杉響今古蟲鳥號晨宵梵唄出澗壑鐘鼓過亭橋如何繁音曾聽之增寂寥
曹溪一夜雨流沫復如潮

至滇幕寄答扈芷大師

白浪青厓處處愁。無端萬里卻來遊。遠心自欲投雞足。秃筆非真羨虎頭。海際孤萍來澤國。天邊一髮到梁州。歸來還約師同住。閱盡花開共水流。

昆明女兒歌二首

皂笠遮紗覆額雲。猩紅小襖燄如焚。爲嫌鞋齒頻兜襪。高曳蠻花綉蜚裙。鸚鵡新雛不肯籠。但將梳掠鬪春風。朝來粉頰微添白。卻繫雙鬟瑟瑟紅。

南中曲三首

盡說哀牢漢不如。江珠片片碎芙蓉。竹枝近譜蘆笙曲。木夾遙傳貝葉書。不數闕支北地能。女酋騰騎疾於鷹。繡旗閃陣朝擒賊。錦幃遮燈夜供僧。小小螺山亦破鞵。青青草海卻通簿。波燃白火招漁舶。路撲紅塵趁虎街。

趙韓一首

韓、字退之。平湖人。國子監生。有攬言、蠟言、蔗言。

田按。啓禎間。竟陵之說甚行。家矜牛鬼。人詫蛇神。奇奇怪怪。何所不有。海鹽陳則梁。平湖趙退之。挹其流波。余錄則梁詩。了知年命促。姑妄話神仙。猶見解脫。退之詩。孤圭河山如瓦注。羣公門戶自金湯。特自警策。譬拾金於恆河也。

送馮茂遠北遊

知君邱壑意中多。客路風塵奈若何。我是長門愁怨女。慙慙勸爾畫雙蛾。

韓曾駒四首

曾駒字人毅。後更名顯德。烏程人。諸生。有悟雪齋集。

吳興詩存人毅甲申後棄諸生。棲濕庚村以老。

田具詩用王荊公韻

耕牛

春耕雨一犁。蹶潑水滴滴。夏畦病炎歊。早耕日未出。秋穡策元勳。快此萬寶實。相齊而商歌。我耕非汝匹。

耨鋤

勿用曲如鉤。亦勿學劍直。雖以柄授人。利器不可得。田疇閔廢興。斯物無因革。陳涉昔亡秦。以此代鋒鏑。

牧笛

青草煖茸茸。知是牛眠地。牛歸依夕陽。背上生秋吹。吹萬此其一。人牛俱適意。丁男揮汗鋤。輟耕羨童穉。

錢鑄

執器問老農。不辨錢與鑄。鐵官久失職。磨厚使之薄。一治別名象。利用在除惡。悟此艱難中。無逸可無作。

韓繹祖六首

釋祖字茂貽。烏程人。諸生。與總兵金有鑑等起兵復湖州。兵敗。匿僧舍。見伶人衣冠上場。大慟而絕。有詠性堂遺稿。

田按。茂貽與總兵金有鑑。推官戴重。貢生潘國瓚。諸生王光祉。布衣蔡元心。王元震起兵據湖州府城。兵敗。有鑑。國瓚。光祉。元心。元震死之。重中箭。洞腰脅。歸鷹阿山。傷發死。茂貽避匿僧舍。一日。偶見伶人衣冠上場。大痛而絕。

宮怨

獨倚長門望。寒鴟影又斜。何人承雨露。對爾惜年華。薄命霜前葉。新恩鏡裏花。知憐玉階草。無分過香車。

九日病起

策步及新晴。天高野水平。醉餘成小隱。睡足勝長生。林密行無影。雲空過有聲。東籬時在望。誰可對秋英。

揚州哭史督輔老師墓

權臣內擅外強藩。來往江淮一旅屯。馬革空留酬義骨。龍髯追從鑒忠魂。運移諸葛終無效。力盡睢陽又絕援。夢裏旌旗催北渡。孤墳何不葬中原。

客鳩茲沈崑銅

鉤黨餘生賴鬼神。士生斯世正逢辰。誰當魯國眞男子。尙有荆卿舊酒人。老去立章多磊落。亂餘肝膽益輪囷。花前雁後年年侶。鄭重相思切主臣。

寄林確齋

英雄今古亦何憑。廣武城荒孰再登。壯士歌空悲易水。真人氣久望春陵。私將痛哭留天地。恐發狂言累友朋。京國飄零餘落日。青峯江上自層層。

晚秋臥病雪巖寄懷諸同志

十年戎馬脫重圍。霜雪初寒客少衣。患難投人雄氣盡。笑言隨衆苦心違。挽回潰海真無策。流落名山亦當歸。劇孟原嘗皆已盡。西風蕭瑟掩柴扉。

陳梁一首

梁字則梁。海鹽人。有萸園詩。命者菑浣筆池藏稿。个亭集。

樵李詩繫則梁年十八。皈依蓮池大師。法名廣籍。未幾。走長安。上書不用。晚年無意於世。自稱散木子。有萸園詩。人稱萸園公。有命者菑浣筆池藏稿。或稱命者山翁。亦稱浣公。甲申後。造庵居之。稱个亭和尚。自題其墓曰。生無愧怍。去無牽纏。其聯云。與爾同龕杭米汁。至今孤塚有梅花。有个亭集。爲文光怪崛特。奇不可句。而事必準古。言足垂世。詩亦如之。評者謂其如湘川亂雲。蛾眉殘雪。知言哉。

病

人病心尤靜。天晴竹更妍。想唯棋客至。妙得酒方傳。塞竇憂風仄。推窗喜月圓。了知年命促。姑妄話神仙。

錢士馨一首

士馨一名軼。字稚拙。又字稚農。平湖人。貢生。有賡笏集。

靜志居詩話。稚農入燕。遇寇變。著甲申傳信錄十卷。頗不失實。平生賦詩無多。能遠時習。

構李詩繫。士馨入南雍。見知於吳梅村。尋入燕。公劄爭欲客士馨。士馨久而厭薄之。人漸目爲狂生。賊犯京。中允李明睿密請南遷。士馨私謁之。泣曰。賊盡得秦隴。晝夜行四五百里。倘繞出畿南。以犯警蹕。公將何辭以謝天下。李慙懼。又曰。不知死守。以待勤王之兵。先遣太子南行。以繫人望。李難之。及京城陷。士馨匿迹樵林。寬於兵戎禍亂之中。每多憂悵。感憤發爲文章。後常往來河朔間。盡交其豪傑。偶借五人至慶陽。薄暮微雨。五虎踰出。士馨曰。不盡殺。何以見諸君勇力。乃人發一矢。當者立斃。一少年矢貫虎額。尺許。虎入林莽中。追刺其舌以報。至旅店縱飲。獨不與少年酒。責之曰。發矢不中要害。不足多也。後奔走無所成。自彙其騷賦詩文曰寶笏集。別著甲乙圖書一卷。古文易二卷。續越絕書二卷。曹國志二卷。虱略一卷。咸陟外乘一卷。傳信錄十卷。三餘贅事一卷。魯國通表十卷。士馨輕財好客。工古文詞。兼精書畫。每抵掌古今。必縱橫數千言。卒至窮老以死。亦可哀已。

漫興

水落波平菡萏稀。玉河銀溜冷斜暉。幾回雁字來沙漠。每見熊旗出帝畿。冀北梧桐還乍脫。江南鱸膾又空肥。砧聲未聽敲窮巷。早有微風侵葛衣。

李寅二首

寅字寅生。一字曉令。嘉興人。諸生。有視彼亭詩。魚喁草。

明人詩鈔續集。曉令於明詩人嗜大復。昌穀兩家。若太倉。歷下諸公。則曰姑舍是。蓋矯七子之派。變而得其正者。

詠史

炎運既淪頽。海內蕩無紀。讒邪日高張。君子道終否。於時穎川彥。偉哉得元禮。荀、陳互師友。郭、賈實知己。龍門一何峻。模楷天下士。疾惡意若讐。獎賢時借齒。名高怨益深。黨禍從茲起。元黃遞紛爭。黑白誰見理。苟爽諷自全。鄉人亦云爾。剛腸竟不移。抗節心所矢。不惜遲暮年。慷慨輕一死。豈伊喆人亡。所嗟大廈圯。遙遙千載餘。烈烈光遺史。撫卷仰風裁。儼焉當御李。

曹家灘後夜泊平望有感

犬吠寒塘寂。漁歌次第生。遺愁明月好。多難故園輕。野曠林無影。天空雁有聲。風波今夜少。差息旅魂驚。

俞汝言三首

汝言字右吉。秀水人。諸生有大滌山房集。

橋李詩繫右吉身矮善談諺爲諸生不遇國初棄舉子業自稱漸川遺民遊燕趙韓魏宋衛閩粵之鄉越雲中雁門歸而閉戶著述篇帙之富近代學人莫與抗衡者

靜志居詩話右吉早著名於復社其文氣逸格高詩亦文華中有真寶

井徑道中

束馬嶮崎道路艱。馳驅猶是漢家山。懸流苔洗將軍壘。落日煙封娘子關。垂黍秋田辭戰伐。橫碑古澗費追攀。兩看旅雁遠江北。自愧征衫不暫閒。

大名九日

搔首中原去雁號。帝邱景物倍蕭騷。愁歆白帽清霜逼。風捲黃河濁浪高。在野樓臺臨大澤。摩天鷗鷺見秋毫。射熊戲馬何年事。聞道漁陽羽騎勞。

鄴中懷古

漳河清濁太行東。此地曾聞霸業隆。川岳無心悲鼓角。邱原何處問英雄。鬪雞閱馬興亡外。冰井銅臺涕淚中。獨有牽波雲表立。鈴音獨語向西風。

祁鴻孫一首

鴻孫字奕遠。紹興山陰人。

懊儂歌

雙鴛隔雙罩。織縑一百罽。兩月不成匹。

明詩紀事卷二十四

辛籤

萬時華十三首

時華字茂先南昌人崇禎中徵士有既園東湖二集。

黎遂球蓮鬢閣集茂先五言古出入陶謝七言律澹婉清麗如溫飛卿李商隱。

西江詩話崇禎末詔舉堪守令者茂先應徵北上抵邗江病劇粵東黎美周廣陵鄭超宗挈舟徑造茂先喜甚猶賦詩云病逢勛倍藥快聚夜頻觴臨沒口占二截半世殘書裏關門坐小樓虞卿是何物不了著書愁窮通真偶爾來去亦翛然我愛護中令虛空不礙禪從容危坐而卒茂先詩尤工五言其氣深厚其姿淡逸。

徐世溥榆溪逸稿詩人萬茂先其言精美溫潤體備氣醇。

田按茂先田居詩陳士業舒伯言亟稱之集中七律清婉澗亮尤爲獨絕。

歲暮田居有引 錄四

負疴中田歲律云暮時謝賓遊以親妙藥旁視四壁忽忽意動吟咏遂生積五日得二十首詩不云乎獨寐寤言余之謂矣。

幽居念疇昔日月忽已今無論悲與歡事事勞寸心宇宙一泡幻謗譽隨升沈誰識道旁牧慨慷揮黃金。

復思隆中叟。三十逢知音。高臥北堂上。羞同梁父吟。

獨處行易悲。我反甘茲獨。出門語嘿乖。聊此慎榮辱。歷覽貧士傳。幸同古賢躅。薄暮何所懷。凌風倚修竹。陶公有清怨。含意獨不歡。枕席晤千載。耳目皆悲端。衆但慕高節。此意終不傳。古壁照燈影。破爐生暮寒。孤憤託尙友。撫几流長嘆。

張薦隱深竹。仲蔚樂長蒿。風塵昧至性。幽翳良自逃。宅東有高畝。負甃聊周遭。左渠帶長川。蒼然山氣遙。卜築暫云始。綺季徐可招。榆柳前後列。蔬蔓縱橫交。長揖謂園叟。開春護新條。小人學爲圃。飛鳥營其巢。夕佳樓

朝登北城風怒號。沙飛十丈寒雲高。春鴻欲歸呼其曹。樓頭歌管聲嘈嘈。此地管絃朝復夕。父老經過多太息。城中少年那復知。云是當年僕公室。僕公生長自邊塵。百花洲畔吟餘春。秋風五桂散遙馥。兄弟出入皆朱輪。潮陽歸來遍紅巾。翰林樹幟城東門。堞摧櫓折鼓聲死。清池湛湛哀英魂。從者妻子十一人。葬者道士陳白雲。東風花開鎖空宅。狐啼鼠竄無朝昏。僕家之樓夕佳額。滄桑轉眼悲行陌。凭闌風物誰獨存。章流靜照西山色。城邊擊鼓白日低。明月光中烏夜啼。游人醉舞公獨悲。霜天客散颺朱旗。一朝幸遇李夫子。爲汝拂拭揚鬢眉。樓頭歌舞如昔時。樓下木主公安之。南州一片中華土。節義晶晶亘今古。後來孫許氣如虹。日月河山共吞吐。中原寇馬今復馳。江南江北多鼓鼙。公排帝闕叫闐闐。爲我擊賊綏蒸黎。

西江志，侯家樓，元末傑列，箴圍門死難，有司徒其樓於西北城角，以旌忠烈，萬歷間，更名夕佳壩。

春日張玄逸竹雪齋同朱鬱儀張曼胥胡實美戴大圓李雲將各賦

七子林中約，依然竹下盟，疏煙宜弱柳，輕雨澀春鶯，大業千秋社，偏師五字城，杜陵花事好，今日慰平生，
清涼臺懷古

高臺同一望，人照夕陽多，豐鎬餘亭榭，陳隋舊綺羅，美人曾玉樹，衰草失銅駝，怪得當時鳥，城邊喚奈何，
過素園理雲將遺集悽然有作

千遍題詩百舉觴，昔時風雨共閒房，藤陰尙覆攤書屋，樹影空搖看竹床，憶數春花紅在樹，或眠秋簟碧
爲廊，相如狼藉多餘草，寂寞文園泣武皇。

下第送芑孫之蕪江兼訊崑銅諸子

淚盡癩花不自由，與君同恨別孤舟，貧多去國家難問，賤欲嫌身客未休，月照離魂生古岸，霜催寒信入
輕裘，尤憐脫劍逢知己，江南江北處處愁。

與黎美周徐巨源飲喻京孟瑤光昆仲三洲亭夜汎舟于湖有作

共選晴湖泛綠莎，三洲亭向午餘過，詩情入韻多因柳，酒氣分香半雜荷，島嶼斜連疑海近，樓臺深隱覺
山多，知君近訪林逋宅，疏影梅魂近若何，
美周來自西湖

吏隱亭

橋水東西孺子鄰。當年仕隱各全身。龍蛇今古孤亭晚。桃李晴陰萬井春。大漢冰霜留氣韻。重湖煙月照精神。因君敢慢今時尉。簿領趨馳或有人。

孺子祠

舊宅曾聞傍水濱。祠堂古岸照嶙峋。五陵樹已迷狐兔。一榻香猶薦藻蘋。意氣何人傾赤社。英雄滿地兆黃巾。當年龍戰終多事。千古冥鴻屬外臣。

述懷

芙蓉萬樹照晨梳。短髮蕭蕭愧不如。老圃東家堪作伴。苧衫蓬鬢帶花鋤。

觀別

芙蓉無態颭寒波。只爲空江別怨多。欲識滿汀離別意。亂煙絲雨奈卿何。

馬猶龍八首

猶龍字季房。廬陵人。有洛如館集。

蕭士瑋蕭齋日記。馬季房語余云。近人之詩。燕音最多。切響甚少。何也。余謂律細格老。與年俱進。皮毛脫落。乃見其實。虞畜良馬。初不令其跳躑。每夜必繫其銜勒。不容親水草。旬餘。浮腫盡消。筋力怒張。日馳數百里。不覺饑渴。不能爲之困。作詩而多燕。

音累氣皆由浮臃未盡耳。

書影蕭伯玉云。馬季房詩。黃茆白鷺三千嶂。瘦馬單衫十八盤。林陵舊院。繡幕鶯花三月雨。畫梁燕語六朝春。故自佳。

愚山集。季房嘗夢誌公。啖以乾松。香氣猶在口。遂棄制科業。一意談無生。然任達。飲酒輒醉臥。閒遊金陵。吳越及嶺海。皆以詩自娛。清新可誦。

西江詩話。季房洛如館集。宣城施愚山捐俸錢板。毘陵楊太史大鯤詩云。廬陵詩人馬季房。花片游絲落腕長。又云。君看洛館存遺草。待得西湖使者傳。愚山時爲湖西憲副也。

田按。季房詩。清音亮節如豪竹。哀絲聽之令人意爽。

雪夜宿甯國寺

雪深林際寺。蕭瑟動寒松。言尋上方侶。頗諧塵外蹤。暝痕銷霧薄。履跡破苔封。野園鳥雀亂。行人曠未逢。忘言永今夕。僧起叩寒鐘。

過青原清幽谷

山重水複谷名愚。一筇一屐吾與俱。過溪二十四道殊。一一坐石聽笙竽。碧篠黃花生石膚。青青寒蔓水中蒲。深潭皎潔明髭鬚。沁入心脾照骨瓌。且復與君立須臾。摩挲雜樹辨根株。丹林秋燒引崎嶇。空山沙迹走麕麇。清幽僧舍隱如菰。雲竇寒泉瀉入廚。芋魁瑩滑如玉腴。山糞野菌當園蔬。青山白雲道不孤。世人欲覓無其途。誰爲後來繼我乎。林深蘿合鳥相呼。

信州水巖艤舟登飛雲閣

似是桃源道。頻通漁父船。蓮花披石秀。雲錦照川妍。江中有蓮花雲錦石壁合空遺蛻。丹封不記年。瓊田鶴駕杳。故

物爲誰傳。

過寶龍寺

幽蘭香一室。老柏翠當門。春信經年隔。燈花昨夜繁。清池開白曉。新月帶黃昏。猶有營巢燕。銜泥認舊痕。

蘆林菴贈石照師

蘆林雖一宿。已作數年期。泉莫鼓三疊。峯猶憶九奇。茶香通活火。菊老映疏籬。欲析無疑義。支公別有思。

武功山二首

知坐茅菴翠幾層。冷猿遙挂一枝藤。白雲峯頂千秋月。夜夜寒光照定僧。
獨有空林出梵音。愛山不覺住山深。閒來欲問齊雲路。落葉蕭蕭不可尋。

安成石屋觀周日培新構草堂

松堂人靜晚煙稠。樹古雲龍小洞幽。獨倚曲闌看翠滴。不知山色在高樓。

徐世溥十三首

世溥字巨源。新建人。侍郎良彥子。崇禎時諸生。有榆溪詩鈔二卷。逸詩二卷。

方以智淨山集。巨源天姿過人。出以易直。下筆馳驟秦漢唐宋。惟取其氣。任我舒卷。

西陂類稿。余到南州三載。求徐巨源文翰甚渴。自陳伯璣所刻榆溪集外。卽片紙不可得。今春聞羅飯牛誦巨源贈詩云。雲山已是無常主。更寫雲山賣與誰。又云。記得扁舟初過訪。草堂門外水齊天。令人譏嘆不已。

田按。巨源文學昌黎。有酷肖者。詩丰神戾削。有疏竹幽花之致。身遭亂離。憔悴哀吟。中有不堪卒讀者。晚歲遇盜而死。哀哉。

初夏苦雨毛浚明潛夫置酒寓樓

羣峯如主人。日對樓中客。客寓復幾時。又見荒草碧。嵯峨好髻鬢。倚天蒼翠滴。當其雲雷蒸。纓帶迷咫尺。豈不愛奇觀。孤懷難達夕。我心如青山。欲雨使頭白。一觴可晤言。所以資酒德。

丹陵觀

余寓齊源。寓東不數百步。爲丹陵觀址。村巫家其西偏。觀有田及山。並南唐齊王李景遠所施。齊源之爲齊。以此也。朝代漸更。林莊漫滅。齊王像亦移入旁小庵矣。惜其無文采賓客。故編史靡得而詳。作丹陵觀詩。用表源之所由名焉。

初夏

觀廢巫仍宅。黃冠似肯堂。谷雲虛象袞。澗水尙如簧。比屋通雞犬。單籬狎虎狼。淮南有鴻烈。應不忘南唐。不復論時節。閒中候自明。棟花風送袷。瓜蔓水通耕。輦草成趺坐。微泥得緩行。綠陰如夢裏。喚醒有啼鶯。人日送陳元水之金陵

正是東風七日天。草堂薄醉又經年。雪分浦色初知岸。晴破江寒未散煙。鐵騎頻關孤驛夢。金陵好寄遠遊篇。蒼茫詩思斜陽裏。無限離愁付短弦。

萬里長所居

溪上芙蓉照板扉。澄流激瀨濺荷衣。鷓鴣得食排沙睡。翡翠銜魚掠水飛。樵唱不知人在谷。漁歌真令客忘歸。山中明媚看如此。忍令波光趁落暉。

過舒子山山莊賦別

爲愛騷人靜可羣。檐暉涵碧漾苔紋。遙同側帽吟移影。近佐支鐺煮沸雲。山鬼聽琴篔簹際。伏林猿擲果夜深聞。奇峯香竊平分取。留得秋光讓與君。

山莊寄懷石莊博菴

老得山居足自由。晴窗飯罷未梳頭。燕窺簾捲銜泥返。書被風掀帶葉收。小倦課奴尋藥種。乘酣信步似春游。惟嫌離索違同調。每一花開憶獻酬。

三月三日同謝聖虞訪拙公并爲公定菴名

久淹冰雪閉游函。直到花時禮燕龕。春草屐憑康樂引。暮雲心向惠休參。難逢上巳重三會。新得嘉名百一菴。歸路催詩煙柳潤。仙壇斜雨共氍毹。

春詞

不飲已如醉，濛濛況日斜。遠鐘殘夢後，酒氣似梅花。

辛未春中逢晏山人彈陽關操

一別麻源酒幾傾，支離已見二毛生。十年風雨陽關曲，今日重聞第四聲。

書桃源圖

落英芳草閉桑麻，客到驚聞世代賒。津路早知紅樹引，秦人應悔種桃花。

初秋江上聞笛有懷同社諸子

似在天涯似比隣，若爲縹緲訴情親。西風一夜江湖白，處處蘋花惱殺人。

看晚穫值守齋上人經過卻寄香城諸師

又逢秋熟客愁增，爲羨高空萬念冰。三十九峯霜月滿，閉門便是六朝僧。

余正垣一首

正垣，字小星，南昌人。副使曰德孫，貢生授主簿，有昔邪園集。

田按：徐巨源作南州四子傳，四子者，劉斯陸士雲、李奇平叔、鄧履中左之。余正垣小星也。四子皆能詩，余遍搜遺集，僅得小星平叔詩，二子無傳焉。附見名字於此。

豔曲

花氣和香煖。風絲伴帶長。凭欄呼小婢。莫去繡鴛鴦。

王猷定十首

猷定字于一。南昌人。貢生。有四照堂集。

韓程愈集于一。身長八尺。貌魁梧。意氣豁如。議論風發。談天下事。如觀手中菴糜羅果。纖細舉似。不失毛髮。爲文。猖狂恣睢。隨筆所如。無不深合理道。天資善書。臨池之技。可以籠鵝。客場十餘載。所交客滿囊區。而梁公述。史蓮菴。最其所善。時或飲酒。涕泗并下。其亦所感者深也。

靜志居詩話于一。以詩古文詞自負。對客斷斷講論。每舉一事。輒原其本末。聽之。靈心。蓋兼有筆札喉舌之妙者。其行書楷法。亦自通神。

王暉今世說于一。遭亂居淩陵。窮愁著書。力追大雅。海內能文之士。翕然推之。客死西湖。篇帙散失。大梁周司農刻其遺稿行世。

田按于一。詩。騷情古意。跌宕蕭寥。五律一體。尤哀咽動人。

螺川早發

月落秋山曉。城頭鼓角停。長江流剩夢。孤棹撥殘星。露溼鷗衣白。天光雁字青。蒼茫回首望。海岳一孤亭。

泊舟揚子橋

秣幹風濤外。閒心寄沆寥。馬嘶黃葉岸。人急暮江湖。塔影眠寒水。谿聲走斷橋。夢中敲古缶。長憶廣陵簫。

反揚州喜晤孫無言

卻訝秋還在。蕭條滿目非。江山千騎暗。城郭一人歸。見子南冠淚。猶驚楚客衣。庭花何爛漫。寂寞伴伊威。

阜城

莫問祖龍轡。嵇琴亦不聞。智愚千載事。今古一谿雲。寒鴉啼荒井。梟狐嘯野墳。往來多涕淚。幾誦蕪城文。

誕日口號

母逝悲今日。吾衰憶昔年。眼昏雙淚後。髮白五更前。狐嶺橫兵甲。龍塘買墓田。夢回先訓在。嗚咽蓼莪篇。

登燕子磯

來問草堂寺。初鐘已度橋。人煙屯石港。漁火上江潮。野戍重關靜。王畿設險遙。憑高天萬里。僧影共蕭蕭。

贈某上人

僧來方臥病。老去復逢春。養藥妨茶竈。挑燈問海濱。琉璃能悟性。翡翠不謀身。剗卻詩名好。還娛白髮人。

贈王雪樵先生

黃流厭聽莫聽冰。古路隄河細似繩。愁過客邊新蜡臘。淚多家傍舊園陵。夔州以後論工部。凝碧歸來識右丞。誰說渡江東晉事。太原風概自稜稜。

聽柳敬亭說史

英雄頭肯向人低。長把山河當滑稽。一曲景陽岡上事。門前流水夕陽西。

青來爲公狄畫鵲令圖口占絕句

一鳥哀鳴訴九州。斷雲落日動荒邱。知君能寫飛鳴意。難寫無聲地下愁。

李奇一首

奇字平叔新建諸生。

榆溪逸稿。劉士雲有所遊。平叔爲詩送之。不得驚人句。乃作送士雲遊蜀詩。一時傳誦。以爲李賀復生。士雲非遊蜀也。乃故誤。其題以就其佳句耳。平叔爲文。非面如土色不止。卒以瘧死。

夕佳樓晚眺

平楚蒼蒼歸雁驚。葳蕤芳草傍寒生。天隨野色低春岸。雨帶江帆隱暮城。石壁遙將孤影落。遠山微透數峯明。卻開蘿徑遲明月。渺望煙波祇一泓。

舒忠讜一首

忠讜字魯直。進賢人。修撰芬孫。崇禎庚午舉人。

劉挺墓

石馬陰嘶霜葉飛。靈風陣陣捲斜暉。傷心馬革無歸日。萬里招魂葬蟒衣。

湯開先二首

開先字季雲臨川人知縣顯祖子有潭庵集

江西詩話季雲喜爲詩少慕徐文長後嗜鍾譚常因作十燈題舉友夏照殘身益幻看定妄難生之句以爲妙絕季雲詩傳平叔序而傳之稱其哀國篇雄深慷慨似法少陵惜亡其稿而又以乙酉後流離隱約變徵之聲皆不復可得爲惜云

百花塔

塔在百花中花紅塔亦紅欄杆爲報午鈴鐸鳥呼風野火將燒佛天香欲滿空至今洲上草金碧映芳叢

登青雲峯

選勝無如此地登頓令暑思冷於冰閒雲來去常如客亂石縱橫不礙僧寥廓入秋聲每應孤高得我氣相凌祠前古木斯人在任爾頽闌一曲凭

陳畫一首

畫字惟易金谿人諸生有雜言

江西詩徵惟易讀書躬行尤達於易爲艾子子所稱

山泉歌

左泉右泉照山影入山出山聽泉音遠山縹青近山碧大泉鐘鼓細泉琴泉上衣雲天女侍山下冷風仙

明詩紀事 辛籤 卷二十四

梵吟無生鄉在山泉裏。欲問蓮池深更深。

明詩紀事卷二十五

辛籤

于奕正五首

奕正初名繼魯字司直宛平諸生有樸草

詩觀司直詩清真澹雅迥絕塵俗

靜志居詩話司直好古嘗集天下金石志雖未詳核亦足繼東陽王象之書其詩南學於楚然燕趙之風骨尙存

田按司直與劉侗著帝京景物略遊白門將續著南京景物略書未成而卒崇禎丙子元日讀史得陸士衡傳卒年四十三以爲亡讖已而果然年亦四十三也詩學竟陵清韻鏗然蓋彼法之錚錚者

從戒壇至凌碧峯下

一峯聳奇秀數里引人行石碎不受履下步聲鏗鏗路幽境屢換蒼翠難定名深洞限秋陽峭壁挂飛甍
寂不聞衆響萬壑自成聲巖下坐老衲古澹含山情歸去失前徑處處暮雲生

雨宿潭柘

山空不易眠忽聽千峯雨洶湧欲崩屋與山相吞吐百千萬億聲奇詭不可數深慮阻遊屐起坐窺鬻宇

凌晨急啓扉。雨細不溼土。乃省夜來聲。風葉交相舞。

白門初尋無補

別君歲辛未。寒暑今三往。昨歲寄我書。云宅秦淮上。薄竹影草堂。天地此中廣。我來挂秋帆。江梅照兩漿。登堂不暇揖。汲汲話今曩。我游君暫居。各受山水養。拜手告遊情。導我踏空朗。

清明高梁橋同顧孚尹王敬哉遇雨

霽煙護柳陰。茫茫沙塵影。斷聞溪香。沿溪來往人。遊冶人聲齊。向溪中寫歌。不能停酒欲空。弄壘理策心。匆匆。

李卓吾墓

此翁千古在。疑佛又疑魔。未效鴻冥去。其如龍亢何。書焚焚不盡。老苦苦無多。卓吾晚年著書名老苦潞水年年嘯。長留君浩歌。

喜葛震甫歸自固陵

冬聞君始出。意外得君回。鬢滿崧高雪。衣香江上梅。見遲增別緒。遊老健詩才。款款青溪上。古今懷抱開。

王袞七首

袞字補之。一字幼迂。益都人。貢生。有四雖軒、慧業軒二集。

榆墩逸稿。今之能詩者。才人則益都王補之。其言超忽。英麗風起霞變。

田城。衰之名在復社。詩格斬新。不落當時成派。大滴水巖一篇。有玉川子之風。

送家兄北上

青油六尺車。中有千里道。祖席秋風園。清晨自糞埽。豈不念弟兄。團圓睽邇好。出處各有期。振名惡草草。衰門望寵光。窮檐待襤褸。國論在今日。羣谷走秋潦。富貴何足言。竹帛真可寶。

大滴水巖

天公訶鬼鞭。鰐鯨鳩嵐庇。霧爲雄城。上削千仞露。毒鱗旁旋一曲。開掀鑿。君看巖巔上。注水此豈有物相搏攫。乃知東歸及潤下。曲儒之說談何輕。黃琮白琥墮。破碎衝牙雜。珮行敲鏗。茅檐滴溜見。簌簌糟床瀉。酒聞丁丁。千尺下屯油。黝綠一畝不動天。清明賞去徑。須買茗具。汲不悔來攜。瓶罌猶訝鐵。削無寸土。走松攫檜相挈爭。冬卉縱枯香。可認得非射干。與杜蘅。匹臆儔。鷺各喙。素鱸文魴恣逢迎。人間勝絕自卻擲。留與魚鳥爲窟閤。王維鄭虔骨已朽。倩誰頽此歸宗生。嵌巖題句欲紀勝。千塗萬竄終庸平。山川奇麗詩羸拙。山靈定自嘲我僮。以茲俯臨不敢照。正恐塵土黷淨泓。乃聞貴遊將築第。鳴鑼呵道松蘿驚。無論猿鶴解拒客。名朝利市終牽縈。我今不來戀底物。逝將買此開柴荆。村農少械正足友。坂田雖瘠猶堪耕。文杏壓油清可鑿。靈柿醱酒甘難名。松柴半日斫成磔。石屋千錢疊爲臺。若須成名訖婚嫁。何異坐俟河

之清。

午睡

檣床湘竹細。鉤幔越羅輕。枕畔殘書墜。孟邊渴鼠行。堂虛煙正直。心靜夢分明。莫報閒書札。吾方稅赤城。

幽亭

亂葉結幽亭。山當四面青。溪連寒靄汲。門共野雲扃。刺擁書千卷。寧須帶萬釘。匡牀過馴鹿。機事已全冥。

愁

閱盡浮生曲折愁。拚將百念放歸休。虛名與夢觀何異。徂歲如駒挽不留。天上有方期鍊骨。人間無地與埋憂。功名碌碌尋常事。猶恐無兒似鄧攸。

送唐右文留都地官

候吏江邊炬火迎。征帆齊指秣陵城。曉趨畫省踏花去。夜泛清溪載鶴行。燕子磯頭潮未落。謝公墩上月初生。可憐高髻長干女。一曲吳歌惱客情。

遯思

稷卨期身事本賒。休哉歸去理煙霞。倦遊寧復期千里。漸老徒思著一家。人似右軍惟種果。業如鴻漸但名茶。明時隱退誠何有。譬損恆河一粒沙。

嚴首昇四首

首昇字平子。華容人。崇禎中拔貢。鼎革後削髮爲僧。有瀨園集二十卷。

田按平子論明詩推李空同徐青藤湯養仍不許與竟陵而所作乃與竟陵無殊惟七律音節嘹亮嘗入復社與孫孟樸通聲氣集中有上某尙書一書卽楊文弱也詆斥甚力可謂公論而鄧湘皋謂武陵受謗由瀨園一札矯誣無端夫武陵之惡天下共知豈待瀨園一札湘皋之論亦鄉曲阿好之私而已

石頭菴

到岸江河永。朦朧山可登。更乘未落月。去訪旣眠僧。方丈存雞犬。柴門補樹藤。回看舟在下。塵市總崢嶸。

下第

寥落風塵獻策頻。金裘何地不西秦。門垣半圯凝塗炭。兒女相憐似故人。世亂一身歸已足。年豐百指計猶貧。還家下第如登第。親舊填門過一旬。

種菊

墾山芋栗舊盈廊。更插籬間菊數行。萼滿客應知冒雨。苗移人已意重陽。從今賜姓非陶氏。共爾長年到雪堂。家在石門天半裏。不須九日問高岡。

孟倫堵爲子築室山中每至則招故人小集

終慙轍迹與人同。谷口頻來意始同。無幾親知投世外。有緣兒女嫁山中。衲衣久久皆諸俗。竹杖徐徐欲御風。似此行窩便徙宅。不煩迎送娛兒童。

莊祖誼三首

祖誼字宜稗。成都人。

靜志居詩話全蜀入復社者八人。宜稗詩名特著。惜流傳無幾。

岑公洞

詰曲巖前路。欹斜洞口碑。瀑飛千尺雪。雲養萬年芝。虛谷樵相答。危龕月倒垂。到來幽絕地。乍可脫塵羈。

甲午除夕

丙夜平頭近燭光。誦誦苦語訊行藏。花筇雪舫奚生計。翠管銀餅幾拍張。去日已驅丸下坂。來朝更值偶登場。綺疏曲彙紅泥煖。卻拍誰家柏葉觴。

九日雨花臺懷古

雨花臺畔踏秋行。懷古登高雜感生。六代尙餘衰草色。三山猶枕大江聲。祖龍黯黯藏金氣。泥馬虛無化石城。搖落不堪頻悵望。夕陽殘笛總關情。

趙士喆十二首

士喆字伯濬掖人貢生鄉人私諡文潛先生有觀物齋詩東山詩外

澹音集西樵曰文潛詩瀏灑頓挫頗宗少陵古今諸體淵源並遠其放筆坦縱時近蘇陸要是家人本色至遼海大節近振謝鄭遠姚夷齊余挽文潛詩云縱使魂兮化朱鳥也應獨食首山薇蓋執鞭之願於此在矣

漁洋詩話伯濬甲申後避兵登州之松椒山遂不歸與弟子董樵耦耕海上著石室談詩建文年譜遼宮詞若干卷弟士亮士冕皆能詩

靜志居詩話伯濬倡山左大社以應復社捍鄉里之牧園效信國之集旬嘗削稿縱談天下事思上之朝見陳啓新用事恥之不果顛沛終老殆臨江節士扶風豪士之流

詠懷

磨刀苦不利。刀利傷人指。締恩苦不濃。恩濃爲怨始。獨坐悅然嘆。命駕適都里。都里何繽紛。裙屐遊閒子。握手惠若蘭。目笑語以耳。相得詎不歡。達人悲所止。甯知君子心。澹澹如明水。

詠懷五平

陽春風初和。驅車游皇州。平原明朝輝。層城如雲浮。高楊綠長川。丹霞棲瓊樓。驪駒誰家郎。翩翩臨清流。雕弓飛金丸。銀鞍懸吳鉤。從禽平陵東。遠歸倡家游。胡姬顏如花。琅玕爲搔頭。留君調新聲。哀歌彈箏篴。清宵華燈張。輝煌羅衾稠。人生當爲歡。誰能長憂愁。嗟嗟元經儒。窮年無時休。

哭徐行吾

造化如小兒。修短紛相錯。賢人構龍蛇。君子爲猿鶴。里中書信來。使我悲且愕。我知君夙心。化去如解縛。所悲道義交。筆硯從總角。夜來忽夢君。落魄猶如昨。方悟隔幽明。遽然分夢覺。三復少陵詩。神交付冥漠。

擬遼宮詞九首

銀甕交爭忿未平。六龍親駕復西征。安邊自是男兒事。枉卻當年嫁義成。雉尾交輝寶蓋飄。欣瞻御像降丹霄。天王眉宇傾夷夏。北極羣靈夜夜朝。年來南北靖烽煙。西夏高麗各晏然。聞道中朝相司馬。至尊祕敕慎開邊。自解衣冠策晉王。石劉兩主號兒皇。河山不改雄圖盡。白髮宮娥淚萬行。燕京容易便迎降。誤我艱難到海邦。草草束裝如夢裏。賜斂忘卻在西窗。頭魚燕罷醉顏酡。那辨夷歌與漢歌。怪道賽神仍撲馬。洛陽天子卽沙陀。南國知名花見羞。久應無復舊風流。美人自分甘黃土。誰洒徽陵飯一甌。李子纔熟穿杏衫。清和天氣像江南。記得去年今日雪。近臣煖帽侍朝參。大梁清禁隔蓬瀛。仙眷何來五國城。共矢餘年持苦行。漢宮環珮乞來生。

伍瑞隆二首

瑞隆字國開。一字鐵山。香山人。天啓辛酉舉人。除化州學正。累遷河南□□。有懷仙亭草。

漁洋詩話東粵詩自屈程梁陳之外又有王邦畿說作王鳴雷震生陳子升喬生伍瑞隆鐵山數人皆有可傳

懷仙

采石長庚客金門太歲精術甯因授得丹豈爲燒成酒氣開雲日詩情破死生寄書曾不到誰遣鶴相迎

長洲煙雨

煙雨濛濛溪水頭長洲莫卽是瀛洲憑君爲撥羣峯看似有玲瓏十二樓

宋璉一首

璉字林寺萊陽人舉人繼澄子崇禎己卯舉人

在梅溪故舍有感

蘆中窮士泛天涯誰向王孫進白麻孤劍常依江上草故人應傍日南花五年關塞悲春雨一葉鄉山落暮鴉何處漂零獨不見於今幾是魯朱家

劉湘客一首

湘客字客生富平人過日集作宜君人諸生唐王立以薦授汀州推官遷御史桂王時改編修歷中允侍讀侍讀學士少詹事改僉都御史以事下獄尋釋免官大兵下桂林匿賀縣山中死

田按客生名在復社

登虔州望江樓

望迷北極連西極。坐看章臺卽貢臺。隔岸下春燈漸出。傍城古木鳥飛迴。高樓萬里三人醉。叢桂雙江九月開。□□□□□□□□。自知不是漢廷材。

明詩紀事卷二十六

辛籤

吳惟英二首

惟英字國華蒙古人。先世把都帖木兒嚮化來歸。賜姓名吳允誠。以功封恭順伯。允誠子克忠進爵侯。數傳至惟英。襲恭順侯爵。總督京營戎政。有墨響齋集。

靜志居詩話。國華累葉珥貂。風流獨擅。崇禎中與瑩都尉永固並留心圖史。與諸朝士極文酒讌游之樂。家有墨響齋。摹拓金石文字。裝池插架。不減歐薛洪趙之富。孫舍人枚采其詩入燕都游覽志甚多。其後都中大疫。國華死爲冥官。時降於室。嬰尙書孝升。曹侍郎潔躬每述其遺事。以爲可載。鬼董狐。

田按。萬歷中武將能詩者。蕭如薰。杜文煥。鄧子龍。戚繼光。輩皆身歷戎行。若臨淮侯李言恭。則勳臣後裔。如漢之四姓小侯。雅容儒雅。說禮敦詩。國華稍晚出。衡其詩品。可與臨淮抗行。世傳國華死爲冥官。李舒章有詩紀事云。憶昔相逢金市東。當場緩帶萬人中。不知青骨眞如許。已見民間賽火紅。

集宜園

客約鄒枚侶。名園許共攀。早花須著眼。春酒更開顏。鳥語藏深樹。雲痕斷遠山。分題期刻燭。有句倩誰刪。

遊李武清新園泛舟

海澱微嫌道路長，背城特地又新莊。登舟我欲偕元禮，選石君宜學贊皇。環榭依臺渾是水，繞花沿柳半爲廊。莫愁酒盡雙瓶倒，村店青帘帶夕陽。

張怡十首

怡，一作遺，初名鹿徵，字瑤星，上元人，都督可大子。以諸生蔭錦衣衛鎮撫，歷正千戶。甲申後，隱居攝山，自號白雲道者，有古鏡菴詩內外集、玉光劍氣集。

方苞望溪集：甲申流賊陷京師，怡遇賊將不屈，械繫將肆掠，其黨或義而逸之，歸故里，身寄攝山僧舍，不入城市。鄉人稱白雲先生，當是時，三楚吳越耆舊多立名義，以文術相高，惟吳中徐昭法、宣城沈眉生躬耕窮鄉，雖賢士大夫不得見其面，然尚有楮墨流傳人間。先生則躬樵汲，口不言詩書，學士詞人無所求取，四方冠蓋往來，日至茲山，而不知山中有是人也。先君子與余處，士公佩歲時問起居，入其室，架上書數十百卷，皆所著經說及論述史事，請貳之，弗許，曰：吾以盡吾年耳。已而市二壘，下棺則并藏焉。卒年八十有八，或曰：書已入壙，或曰：經說有貳，尙存其家。乾隆三年，詔修三禮，求遺書，其從孫某以書詣郡太守，命學官集諸生繕寫，久之未就。先生之書，余心嚮之，終不得一寓目焉。并著於篇，俾後有感發守藏而傳布之，毋使遂沈沒也。靜志居詩話：山人生時，園中鹿亦產子，因名鹿徵，而以瑤星爲字。崇禎間，曾仕錦衣，故其六十初度詩云：當年執戟侍明光，親見彤雲捧玉皇也。山居鈔書頗多，著述甚富，予所見者，僅玉光劍氣集，謾聞正續筆數種而已。龔造其山居，見案頭有手鈔宋季張炎叔夏詩集一卷，今其遺書不可復問，詩亦流傳寡矣。

金陵諸園詩并序

園中人家好爲園林。雖短檐茅屋，室不數弓，而纔有隙地，便種花竹。當昔太平盛時，六部曹郎於公署外各構一園，皆在長安門東一帶，廣狹或殊，咸極整麗。其他如中常侍之外宅，僧舍之別圃，諸縉紳之會館，非園而園多可遊者。今皆鞠爲茂草矣。其在西南者，亦與蒼海俱變。言之傷心，不堪著足。因憶少時所曾遊者，略述梗概，以誌憑弔，不能盡記也。

半山園

在朝陽門北，有堂三楹，流水一灣，發源鍾山，市繞堂下，前互小山，喬木數十株，二百年物也。凡園中邱壑，多以人力爲之，而此獨真。山真水最爲勝地。

疏籬曲徑隱林泉，邱壑從知出自然。想見當年王介甫，騎驢裹餅到門前。

小東園

先大父榮祿同野公燕居也。從世雅堂右折而南，亭軒三楹，荆川題曰白鶴山居。左曰菘雲閣，先世藏書之所。叔父紫淀老人寢處其下，堂後曲室爲岱輿，仲父丹室。從堂右，牡丹臺旁磴而上，中踞一亭，亦曠亦奧，則季父四廛後老人讀書於內。後紫淀老人盡棄所有，作攜書避亂圃，而出仲父丹室中懸小像來居者，以爲仙翁而頂禮焉。今盡荒地矣。

世雅堂邊舊隱居，竹房丹竈富藏書。自從避亂流離後，白鶴橫空我不如。

韓園

外父襄字韓公，園在翦子巷，過石爲山中一峯，高二丈餘。宋諸名公題跋甚多，漫滅不可辨。公從徐氏東園購之，洵異物也。此園後歸黃岡石公象雲，每過不勝西州之痛。

如公好石真成癖，纔得爲園境已遷。何似中山厓壑好，春光秋草自年年。

裴園

家幼仁六兄裴園在鷲峯寺前，洛錦塘側，荒疏有致。兄善畫能詩，尤留意花木，歲釀好酒數十罇，令童子持至花市上賣花，市魚肉而歸，客至則開家釀，翦園蔬，治所市物，以供杯酌，亦閒居之樂事。文人之佳話也。後易主，避客言念昔遊，何啻太古。

從來勝地須賢主，太息纖兒無上賓。深鎖朱門堅拒客，閒庭辜負十分春。

栝園

在大功坊東巷內初沈生子得之魏國家數易主而歸周櫟園堂三楹敞而受風寬而宜月老栝兩株亭亭直上園之得名以此中多石石亦最奇而皆具玲瓏透露之致池水一泓朱鱗數

百水閣三間
可以忘暑

奇石欲下米顛拜虛館曾披宋玉風焉得從君分半榻翦蒲種藥作園翁

齊宗侯園

齊宗侯卓吾園在南郭西天寺旁樓閣宏敞花竹蕭疏曾歸吾友姚寒玉去予松風閣一里而近每與同人銜杯拈韻嘯傲其中

赤石磯旁榴乍吐德恩寺後杏初肥王孫公子東西去惟有高城戀夕暉

雲乳山房

予性愛園居昔人所云志在兩株樹十莖草之間耳初居海石園在杏花村旁齋公廟後次居寒山園在南郭窰灣內與今佟園衡宇相望也後卜居武定橋東屋內小園曰讀樂

頗可晏坐而素長婦人聲雞犬聲婢僕語評市人喧鬧聲乃於橋之極東迴光寺前得倪園而晨夕焉自滄桑後流離顛沛不得復購園居就雨花山閣為先莊節掃地焚香冀畢餘生而乙亥之夏閣前松竹盡遭斫伐觸目愴懷不堪聞見乃葺攝山之雲乳山房而投老焉此金陵第一大花園也僧徒居其中而日用不知游入涉其境而神情不屬乃以獨享為愧耳

園居興盡卜山居東澗中峯盡不如慚愧徵君開闢後容子高臥理殘書

海石園

海石園所蒸五色相宣文彩爛然先莊節治兵海上見而賞之座客曰是屢經匠石之顧卒不可致

有宋都統某留題深以為憾先莊節笑曰物各有緣石丈人得時則駕豈憚一行耶呼健兒舉之石果移似有神助顧自山巔下視海面可萬丈而巖懸崖絕勢不能下材官應募而出適高麗貢馬船至乃取木於山取緣於船縛木為梯以纜繫石乃忻然就道耶載歸置清嘯堂前未及豎

甚舉酒酌曰予與君固有夙緣耳數十年為梯以纜繫石乃忻然就道耶載歸置清嘯堂前未及豎立值先莊節公殉國事家餘四壁遂鬻此園為伏闕費園中幽房曲室最為雅觀小池迥廊不廢遊覽予讀書其中者五年後歸陳中丞幼白而此石竟沉埋土中不復能位置矣

海上相逢石丈人移來南郭伴松筠祇今院宇淒涼甚誰向仙山再問津

塞山園予內兄韓敬修手開也前臨濼水後枕平岡入門水閣三楹流水周帀清竹萬竿濃陰布護

月正望臨風小泛
覺玄真去人不遠

門前流水枕寒山日日車居山水間況有扁舟堪載月塞洪橋畔赤磯灣

倪園笑峯大師所構也時笑峯尙爲小司農在燕邸予以二百緡得之門前老屋數間右有亭三楹虛敞而遂修竹蔽天左高閣一區前望雨花後眺淮水左環千槩右繞萬竹爽目快心無過於

此仍歸倪氏

野水瀾漫古寺旁四圍老樹間修篁高樓縱目渾無礙遙對城南石子岡

劉文昭一首

文昭字雪舫宛平人新樂忠恪侯文炳弟有攬穗堂偶存

魏禧叔子集余客秦郵劉君雪舫訪余余報謁君出其一門殉難紀略及鞏郡尉城破自刎事示余受而讀之捐膺泣下幾不能終篇方甲申三月之變君年才十有五歲父生長貴戚宜縱心聲色自驕倨不學問乃其所紀殉難本末於天子孝思劉此

先世所以與母若兄捐軀殉國之大節都城所以陷敗雖倉皇急遽中一言一事莫不條理委悉使讀者如目見耳聞而悲憤

感激勃然作其忠義之氣君好學工書其入燕游草悲涼抗壯不忍多讀

阮學棻茶餘客話劉雪舫新樂侯文炳弟侯闔門殉難雪舫年十五逃回海州故里變姓名至淮居珠湖吳喬三珊瑚物色之贈

詩云王孫徒寂寞芳草自萋萋故苑游樂處滄江厭鼓鼙人情隨世變風氣逐年低念子凝神久微陽可共攜

清河夜泊

明詩紀事 辛籤 卷二十六

孤舟離緒又清明。一挂蒲帆千里程。去住向誰商出處。飄零到我負平生。雲連海氣天無色。風鼓河流夜有聲。襪被春寒眠不穩。悽然雙淚落三更。

祁班孫四首

班孫字奕喜。紹興山陰人。都御史彪佳子。祝髮爲僧。有紫芝軒稿二卷。

鷓鴣亭集。祁公子者。忠敏第二子也。初忠敏夫人商氏嘗夢老衲入室。生公子。美姿容。白如瓠。而雙足重趼。頗惡劣。日堪行數百里。忠敏死未二旬。東西兵起。祁氏羣從之。長曰鴻孫者。故嘗與忠敏同講學於蕺山。至是將兵江上。思以申忠敏之志。而公子兄弟。罄家餉之。祁氏自夷。度先生以來。藏書甲於大江以南。其諸子尤豪。喜結客。講求食經。四方饕餮。望以爲膏粱之極選。不脛而集。及公子兄弟。自以故國之喬木。而屠沽市販流。亦兼收並蓄。家居山陰之梅墅。其園亭在寓山。柳車踵至。登其堂。覆壁大隧。莫能詰也。慈谿魏布衣耕者。狂走四方。思得一當。以爲葦社之桑榆。公子兄弟。則與之誓。天稱莫逆。魏耕之談兵也。有奇癖。非酒不甘。非妓不飲。禮法之士。莫許也。公子兄弟。獨以思義。故曲奉之。時其至。則盛陳越酒。呼若耶谿娃。以薦之。又發淡生堂。壬遁劍術之書。以示之。又備約。同里諸遺民。如朱士稚。張宗觀輩。以疏附之。壬寅。或告變於浙之幕府。刊章四道。捕魏耕。有首者曰。菖上。乃其婦家。而山陰之梅墅。乃其死友所嘯聚。大帥亟發兵。果得之。縛公子兄弟去。既獻。兄弟爭承。祁氏之客謀曰。二人并命。不更慘歟。乃納賄而宥其兄。理孫公子遣戍遼左。其後理孫竟以痛弟鬱鬱而死。而祁氏爲之哀破。然君子則曰。是固忠敏之子也。祝髮於吳之堯峯。尋主毗陵馬鞍山寺。所稱呢林明大師者也。

田按。奕喜早矜豪侈。晚遭覆轍。未忘既死之灰。復誓揮戈之勇。君子哀其志焉。其詩哀豔動人。惜不盡合轍。

有懷

春晚愁珠閣。妝成卻翠屏。振珂風寂寂。捲幔瑟泠泠。玉塞憑高望。金鴻入夜聽。迴環依碧月。飄墜感流星。庭北花全落。城南柳半冥。王孫衣欲換。過客馬初停。句驪河邊渡。遼陽郭外經。孰憐三月路。草色未知青。

同楊生聽琵琶女侑酒帳中女故客維揚與楊頗舊

屠蘇帳中留醉客。紅爐炙火霜初白。好聽絃上奏琵琶。莫向風前吹鬢栗。琵琶欲轉夜鴻驚。絃撥涼州指再停。絃愁青海今宵月。指憶紅樓舊日情。紅樓承寵人爭羨。千金每買華堂宴。五夜明珠照不歸。七香寶轎邀曾見。會惜春城春晝長。嗚鶯飛燕斷人腸。葡萄北苑初裁錦。翡翠南洲就點妝。妝罷還曾催上馬。經過更出章臺下。帳底流蘇笑暗窺。枕上珊瑚欣獨把。自信容光不讓人。可憐意氣劇相親。天挑猶煖城邊日。青冢空回冢上春。春日秋風當此夕。羞將玉面逢人出。千古繁華妾已忘。一時歌吹君能憶。曲罷星疏虜酒寒。明朝馬上引人看。已令胡女無顏色。何須更奪燕支山。

送王雙白侯記原渡西陵作

江亭樽酒暫淹留。惆悵行旌促遠遊。三月飛花懷故里。一帆寒雨送歸舟。青山過處同爲客。尺素來時獨倚樓。最是月明無近遠。徘徊搔首望南州。

少年行

素袍逢月白。寶劍入秋寒。近聞灌夫死。不敢上長安。

劉孔和九首

孔和字節之長山人大學士鴻訓子有日損堂詩集

池北偶談。劉孔和王遵坦二人。皆負氣。跡跡相交。善。王居桑谷。劉居長白。皆有林泉之美。崇禎間。見天下將亂。散財結客。甲申歲。孔和殺闖賊。僞令率精騎萬人南赴金陵。至淮陰。以兵圍劉澤清。清與孔和素交好。時爲藩鎮。貴重無比。然好爲詩。一日大會將吏。廣坐朗吟。賓佐交口譽之。孔和仰視獨無語。強問之曰。公誠名將才。然此事定復不急。澤清怒。罷酒。賓客皆惶懼失次。孔和傲然而出。澤清益怒。遣人追及舟中。拉殺之。已而金陵以爲副總兵官。則孔和死數日矣。嘗有贈王詩云。都無殺者黃江夏。豈有食之嚴鄭公。後竟死澤清手。與黃祖事絕類云。

漁洋詩話。劉孔和爲詩。豪邁雄放。有東坡放翁之風。一代奇才也。

靜志居詩話。節之詩。好排硬語。大約以孟郊邵謁爲宗。

田按。節之人奇詩奇。死於悍將之手。傳其遺事。千載猶有生氣。

雜諷三首

少陵詩竭情。右軍書趁媚。譬如今雅琴。乃是古鄭衛。軒燧久不作。紛紛弄文筆。此語固頗高。何以處衰季。多巧傷元化。僞古愈堪畏。強擬皇娥篇。勦取蚬樓字。不如求真至。辛澹皆可味。

世談神仙事。往往慚未安。捫日求盤燭。疑信良皆難。此道貴艱苦。挽舟上急湍。火以藏深遲。冰以埋陰存。但恨庸妄輩。匍匐求崑崙。何物覆筭籍。累累日以繁。吾儒匪相賤。所以尊乾坤。乾坤籊元化。豈開大盜門。

松柏堅而壽。巖石靜而完。熊經能自引。龜息無所餐。方之彼仙人。當作如是觀。松伐石且斲。熊烹龜亦鑽。千秋消盪盡。神氣何棲蟠。淮南叛諸侯。趙高賊宦官。神仙固有此。何足容褒彈。因之謝來學。甚勿食馬肝。送長兄之金陵

豈復雲山意。干戈滿吳會。況予強臥時。空憶天涯外。一別籬菊前。露下浩不收。秋冬難爲懷。何以行扁舟。汴路旣零落。白門復蕭索。欲賦哀江南。遙遙不可得。故宮蔓寒蕪。豆絃想崩壞。惟有孝陵樹。重涕堪再拜。江氣日夜發。暝暝阻春煙。念之何時歸。歲暮當來還。

題凌五雲畫冊

霜翎蠹葉關幽細。十幅秋光意亦遐。蜂抱花鬚驚鳥見。藤牽石骨得苔遮。一枝不奈成淒斷。數點無因想淡嘉。折作屏風剛數曲。自支寒枕看橫斜。

長兄齋中蜀海棠一木姿態甚殊便使同作

金谷園中謬作家。碧雞坊裏厭豪華。魂銷深院霏微雨。光散晴窗旖旎霞。輕翠數描依榦葉。新紅百浣覆枝花。遙知澹思經營際。已許籠詩著絳紗。

過訪幼量書圃二首

塔前修竹綠成林。侍子清朝拊素琴。聽盡明光三十段。碧池涼雨一時深。

石紋苔色上窗紗。綠茗初煎更筍芽。遲日園林花氣合。十分鶯蝶在人家。

題趙吳興調琴啜茗圖

秋宮肅肅古衣裳。靜女無愁黛亦蒼。不點疏螢和月色。絹頭已作百年涼。

茅元儀二首

元儀字止生。歸安人。崇禎初。以薦授翰林待詔。尋參孫承宗軍。改授副總兵官。守覺華島。兵譁論成。有賞心集八卷。淪水集六卷。西崦集三卷。江春集二十卷。橫塘集十卷。又峴集五卷。在禁詩一卷。山草二卷。

茅元儀暇老齋筆記。石室老人以書法畫竹。山谷老人以畫竹法作書。然不闌破三昧。或曰。畫竹如篆。枝如草。葉如真。節如隸。余以爲枝如草。其意向在彰響間。節如隸。不如葉如隸也。我嘗有詩曰。八分爲葉篆爲枝。然恐得其形似。而未得其用筆。又曰。葉如蟹足折斂。枝篆之一語。古人曾云。其三者則余直揭破祕藏矣。

列劄詩集。止生好譚兵。通知古今用兵方略。及九邊阨塞要害。口陳手書。歷歷如指掌。東事急。募古人毀家紓難。慨然欲以有爲。高陽公督師。以書生辟幕僚。與策兵事。皆得要領。嘗出塞相視紅螺山。七日不火食。從人皆無人色。止生自如也。高陽謝事。止生亦罷歸。先帝卽位。經進武備志。命待詔翰林。又以人言罷。已巳之役。高陽再出視師。半夜一紙催出東便門。僅隨二十四騎。止生腰刀匹馬。以從。四城既復。牒授副總兵。治舟師。略東江。旋以兵譁下獄。遣戍漳浦。東事益急。再請募死士。勤王。權臣惡之。勒還不許。蚤夜呼憤。縱酒而卒。止生爲詩文。才氣濶涌。搗筆數千言。倚待立就。而其大志之所存。則在乎籌進取。誅臣復。盡地聚米。決策制勝。集中連篇累牘。西江傾海。皆是物也。

紅心道中

十載驅馳地。戎衣衆駭看。郵人識舊僕。塞馬怯新湍。山遠迎雲易。原平落日難。何時酬聖主。殘卷石牀攤。
潞河與受之侍郎別次見贈韻

崩岸驚濤不可聞。新湍陟處手初分。共聽夜雨還傷我。獨趁秋風卻羨君。東閣祇贏鈔祕本。北山重補未耕雲。明朝淚落蘆溝上。也解隨流逐衛濱。

常延齡一首

延齡字喬若。應天人。開平王遇春裔孫。襲爵懷遠侯。國變後爲僧。號蒼谷。居湖熟村。種菜以老。

帝里明代人文略。喬若娶封懷遠侯。在京奉朝請。遇事敢言。疏凡二十上。洞切時弊。上鑑其忠。深眷注之。嘗清巨瑋王民籍產。命給之。蓋異數也。時科臣姜琛。熊應霖劾首輔。上怒。御門命旗衛縛二臣。詔獄拷訊。喬若疏請開釋。而以文彥博救唐介爲輔。臣勸。朝詞隨之。宏光初。袁相馬士英引起元逆阮大鍼。喬若露章糾劾。未幾。挂冠去爲僧。號蒼谷。灌園自給。其沒無以斂。友人白生。別生釀金葬之。

田按。喬若國變後居金陵城東湖熟村。種菜自給。錢飲光湖熟種菜歌云。金陵城東湖熟村。中有隱者開平孫。通侯甲第今已矣。意氣豪華無復存。開平去今凡幾載。五王之後惟君在。往昔爭言青門瓜。如今獨數湖熟菜。紀其事也。

揚州

傷心幕府夕陽開。往事江南不盡哀。飲羽共憐黃鬪子。空拳猶奮乙邦才。誰知闔禍流無盡。已去天心挽

不來。宰相尙留乾淨土。北風吹裂舊旌臺。

胡長庚一首

長庚。字星卿。應天人。駙馬東川侯胡觀裔孫。

金陵詩徵。星卿以爵讓弟。居馴象門外。守南康公主園寢。寶藥以終。

田按。錢飲光胡星卿茅屋歌云。白鷺洲接大江濱。牧馬兒來勸成羣。先生避世何處去。合家住近公主墳。茅屋三間倚墳脚。門戶欹斜草繩縛。籬外時聞樵婦喧。樹下每有漁船泊。先生田無一石租。糊口祇賴青囊書。春深婦子競鉏菜。水落弟兄公養魚。邢孟貞贈胡處士星卿詩云。榮榮畦中蔬。孺孺門前柳。畦以木槿藩。門用桑樹紐。中有避世人。言是東陵後。多年不入城。一卷常在手。可想見星卿清節也。

揚州

一片陰寒晝不開。笳聲淒絕角聲哀。文山自正千秋氣。諸葛空思十倍才。颯颯朔風吹淚落。沈沈西日送愁來。大招欲賦天難問。瓦礫拋殘上將臺。

陳震一首

震。字東卿。益陽人。崇禎中武舉人。

山居暮春

雨後靡蕪綠漸生。羅衣初試覺身輕。夜來春色撩人思。開盡梨花月正明。

余孟六首

孟字生生號鈍厂青神人崇禎時以蔭官錦衣千戶有增益軒集

歸垣亭集鄞之西湖以賀祕監警游息於此故有小鑑湖之目借檻樓者故錦衣青神余君生生之寓寮也生生爲太保尙書肅敏公之後以尙書恩世襲錦衣其自蜀而徙燕非一世矣生生以明經起思由甲科進取故錦衣之官雖上而未任已而闕亡謀結勳衛子弟兵以殺流賊不克逃至江南參人軍事又不濟始來鄞其時鄞之世家子弟喪職者多乃相與悲歌叱咤更唱迭和無虛日傲居湖上有七子詩社而生生最長社中奉爲祭酒嘗曰吾敢謂此間樂不思蜀耶爰署其居曰借檻樓諸公在湖上陸披雲有觀日堂宗正菴有南軒陸雪樵有歲寒館生生之樓皆與相望詩箋往復听夕旁午蓋居樓中者二十年蜀詩崇禎末張獻忠據蜀鈍厂避亂江東賣古文詩字自給不喜入權貴人門權貴人卽求其片言隻字亦不可得平生一冠破不復補人號三頂折角巾鈍厂與趙民服周蓼恤也康熙時過江卒於瓊花觀時年七十九

獨酌

友人惠我酒竟日延清歡閉戶無人來好鳥伴我閒初旭升竹林小窗明可觀興來聊復酌藉影相盤桓幽寂性所好瓶中香未殘卽此無拘束境靜神亦安

卜居

臥隱仍無定途窮數卜莊有家何日到老病滯瀟湘道遠音書少秋深客夢長桃源今有路恣意樂他鄉

元日遊石鐘山卽事

上日淹留客。登臨興幾長。無人覺來往。半晌對湖光。煙際雲相接。匡廬屬渺茫。浦中帆片片。望裏應春陽。

過吳門客舍爲梅花作主人酒間得三絕句

市上何人識故侯。青鞋卓帽稱心遊。相逢白頭留詩別。細雨孤帆下虎邱。過歸見說爲梅花。鄧尉風光滿眼誇。我夢相逐便東去。一天花壓帽檐斜。花時歸客怕花殘。烽火漫漫道路難。斷送東風多少恨。憑誰留寄一枝首。

官舍

葳蕤瑣下雙青銅。盡日無人官舍中。花落花開春已晚。流鶯嘯過女牆東。

陳斌一首

斌號螻叟。江甯人。明末總兵官。有蘆嶺集。

田按。螻叟以徵兵至滇。沙定洲之變。阻不得歸。流寓蒙化錦溪。築室植蔗。匾曰蘆隱。與雞足山無住禪師遊。結青蘆禪社。有青蘆齋云。我惟非癖愛蘆菽。趣在蒼蒼天一色。螻叟詞筆奇突。胸次瀟灑。嘗著影問云。余素性賞山水。遇危泉峭澗。則窺影自呼云。爾誰氏子。來向水中遊。影不答。相矚久之。風驟響。林木震動。水波疊與影隨動。其間短竹拳松。拂陰翠錯。異之曰。霜棧捲碧。醉墨堆煙。爾影欲索我詩乎。於是倒伏蘆綠。毋論峭石枯苔。儘意縱寫。隨卽乾去。又至蕭寺。敗案積塵。豎壁尾作字曰。淺莎浮白。老檜翻青。鸚鵡不來。芭蕉常寂。可以見其興趣矣。賞荷詩云。荷盤捲露霜棧綠。奇字銷銷灑瓊竹。是昌谷得意語。惜不多見。

贈范泰符

子草樓纏竹木。我來題作古農家。騎牛葉落一身雨。問水風吹滿笠花。

明詩紀事卷二十七上

辛籤

王時敏二首

時敏字遜之。太倉州人。大學士錫爵孫。編修衡子。以蔭官尚寶司丞。進太常少卿。有西廬遺稿。

容臺集。遜之武夷接筆峯圖。追蹠子久。煙雲奔放。林麓深密。實爲畫中之詩。坐收幔亭奇致。歎服歎服。

梅村集。先朝論畫。取元四大家爲宗。繇石田山人後。董宗伯爲集其成。奉常略與相亞。當其搜羅鑒別。得一祕軸。閉閣凝思。瞪目不語。遇有賞會。則遶床狂叫。拊掌跳躍。於黃子久所作。早歲遂窮其奧。晚蒼萃諸家之長。陶冶出之。解衣盤礴。格高神王。力追古人於筆墨畦徑之外。識者知其必傳。玄宰署冊爲古今第一。願以八分推許。語陳徵君眉公曰。此君何所不作。吾當避舍。於尺牘師蘇子瞻。黃山谷。於詩做白香山。陸渭南。固不止絹素流傳。以書畫專門已也。

鸞尾集。太常公風流宏長。巋然爲江左文獻。尤擅場六法。寸縑尺素。流傳海外。世之論者。以比黃公望。而年壽亦如之。此非煙雲供養不能。

惲格臨香館集。婁東王奉常煙客。自習時便游娛繪事。乃祖文肅公屬董文敏隨意作樹石。以爲臨摹粉本。乃輞川、洪谷、北苑、南宮、華原、營邱、樹法石骨。皴擦句染。皆有一二語拈提。根極理要。觀其隨筆率略處。別有一種貴秀逸宕之韻。不可掩者。且體備衆家。服習所珍。昔人最重粉本。有以也夫。

張庚畫徵錄。太原王時敏性資穎異。淹雅博物。工詩文。善書。尤長八分。而於畫。有特慧。嘗擇古蹟之法。備氣至者二十四幅。爲縮本。裝成爲巨冊。載在行笥。出入與俱。以時模楷。故凡布置設施。鉤勒斫拂。水暈墨彰。悉有根柢。平生愛才若渴。四方工畫者。踵接於門。得其指授。無不知名於時。海虞王翬其首也。

山靜居畫論。國朝畫法。廉州石谷爲一宗。奉常祖孫爲一宗。廉州匠心渲染。格無不備。奉常祖孫獨以大癡一派爲法。兩家設教。字內法嗣蕃衍。至今不變宗風。

吳越所見書畫錄。王鑑云。子久畫如天駿騰空。白雲出岫。在元季大家中。有超逸絕倫之譽。近代推太原奉常公。深得其三昧。戴熙習苦齋畫。煙客自謂得大癡之形。以形神俱得。許麓臺。其實煙客得神更勝於得形。不自謂得者。謙詞耳。

田按。煙客續華亭之緒。開虞山之宗。太原瑯琊。一時匹美。石谷馭香。漁山皆親炙西田。得其指授。麓臺之行家傳。又無論矣。入國朝三十餘年。巋然爲畫苑魯靈光。吳梅村西田詩云。到此身世寬。息心事樵牧。可以想其峻節高風矣。

西田感興二首

陰陰梧竹暗漁隈。小徑柴扉向水開。書喜旁行從柄授。畫乘閒興畏人催。殘霞映浦低紅樹。細雨滋花襯綠苔。最愛寒煙疏柳畔。雁行斜逐釣船來。

吳塘北去隔塵囂。老我閒門鎖寂寥。地僻禽魚神自王。境幽雞犬色常驕。猶嫌樹小難遮屋。卻喜船通不礙橋。安得南村素心侶。芋羹豆飯日相招。

李肇亨三首

肇亨字會嘉。嘉興人。太僕日華子。有寫山樓。率圃。夢餘諸草。

大硯齋二筆。亭兒有得雨寒。燕回舊綠被霜衰。柳學新黃之句。陳眉公先生極喜之。然顧大涵玉臚記京口陳從訓有衰柳學新黃語。余少時有雨。檣過。風上。風枝鳥夢搖。後閱春風堂詩話。則宋人已有雨網蛛絲斷。風枝鳥夢搖句矣。

馮李詩繫。珂雪與掃庵同主鶯社。工詩能繪事。所作如秋礪流泉。雖波濤不興。亦自清冷可悅。

靜志居詩話。吾鄉鮮巖壑之勝。然園亭之參錯。水木之明瑟。舟楫之沿洄。縱遊覽所如而不倦。萬歷以來。承平日久。士大夫留意圖書。討論藏弃。以文會友。對酒當歌。鶯社之集。譚梁生借會嘉和之。先後賦詩者三十三人。事未百年。而園閣故老。已莫能舉其姓氏。玉杯錦席之地。化爲宿草荒煙。惟李氏寫山一樓。尙未椒飛粉落。宛然靈光之在魯。錄珂雪作。不禁慨然。

田按。會嘉畫不及乃翁。詩筆灑落略相似。

贈王修微女冠

旖旎溪雲淡蕩煙。水沈香氣暗衝簾。生綃白袷輕籠臂。粉頰青絲半聾肩。清許夜琴同鶴夢。舊分曉黛入詩禪。散花手腕春風裏。自寫蓮經繡佛前。

畫景

霽色石橋流水蒼煙沙。隴人家。誰向曉風吹笛。江寒落盡梅花。

題魯孔孫仿趙松雪墨竹

蟠胸逸氣吐華滋。楚雨湘煙入夢思。秀絕家風誰得似。瀉波亭子興來時。

金俊明六首

明詩紀事 辛篋 卷二十七上

俊明初名袞字九章更名後字孝章吳縣諸生有春草閒房集

汪琬堯峯文鈔有明既亡吳中好事者皆棄去巾服以隱者自命儼然前代之逸民既而苦其饑寒頓路有能初終一節老且死矚下不恨者實無幾人若金先生孝章庶幾樂天知命者與孝章補縣學生數試於鄉不見收以焦氏易篋之得蠶之良孝章愀然太息曰天豈欲我高尙其事乎吾將從此逝矣謝諸生杜門以傭書自給是時明猶未亡也孝章小草師曹娥碑行草師聖教序兼工詩古文辭間喜畫樹石蕭疏有致其墨梅最工年七十偏乞常所往來者賦生輓詩其風流雅趣如此

百城煙水春草閒房在吳縣臥龍街西雙林里金孝章所構宅後書齋也公高蹈不仕擁書萬卷鑪香茗椀日與四方名賢暨二子上震侃詠歌其中姜孩顯春草閒房云春水蛟龍臥芳洲薜荔衣經綸人半老兵甲客仍稀濟世名山大編年信史非行藏須鄭重不是戀漁磯

靜志居詩話鄭虔三絕孝章克兼之兵後隱居塵市介不可易既卒門人私謚貞孝先生平生好錄異書靡問寒暑仲子侃亦陶繼之矮屋數椽藏書滿櫝皆父子手鈔本也

畫徵錄孝章自號不寐道人善書畫長於梅竹

田按孝章畫梅余見數幅皆用乾筆作幹焦墨圈花瓣氣韻生動邵僧綱高澹游輩畫梅均若此孝章詩筆老蒼彌多艱苦之音

和致一韻

若木甯忘拂義和底易傾百年如此日孤抱欲誰明野暮愁風色寒煙斷雁聲有堪良友共衰老慰吾情

暝愁

暝色兼秋集，荒園草路深。雨邊新雁去，風外細蛩吟。客老兵荒夜，秋窮孤憤心。廢書危坐久，疏漏正沈沈。

次韻海序秋日見懷

晚晚誰聞節，概風夕陽荒。草徧吳宮，古人寂寞存微尚。吾道艱難有固窮，龍臥始高宜海澤。鳳棲雖老愛梧桐，論心此日應無負。肯逐驚沙類轉蓬。

題畫二首

率爾清溪泊，聞名輒邀試。客主不交言，寥寥並高致。
長安馬頭塵，滾滾日三斗。笑殺孟襄陽，衝寒爲詩走。

題僧弘小畫寄公白

苦竹陰森石徑寒，齋空宴坐聳高冠。道人讀易無餘事，老鶴一聲秋磬殘。

陳洪綬十三首

洪綬，字章侯，一字老蓮，又字老遲，諸暨人。國子監生。崇禎中，召爲中書舍人。國變後，削髮爲僧，改字悔遲。有寶綸堂集九卷，拾遺一卷。

張岱陶菴夢憶：章侯才足拔天筆，能泣鬼。昌谷道上，婢囊嘔血之詩，蘭渚寺中，僧祕開花之字，力開畫苑，自無古人。既觸邦怨，先之辭，喜周賈耘老之貧，畫水滸四十人，爲周孔嘉八口計，四閱月而成。

畫史會要章侯以明經不仕賦性狂散研心書畫所作古人物世所罕及

讀畫錄章侯畫得之於性非積習所能致昔人云前身應畫師若章侯者前身蓋大覺金仙何畫師之足云乎人但知其工人物不知其山水之精妙人但訝其怪誕不知其筆筆皆有來歷有過平陽水陸社見吳道子真蹟數十幅歸謂人曰人謂章侯杜撰今乃知道子預做章侯豈道子亦杜撰耶章侯兒時學畫便不規規形似渡江揚杭州府學龍眠七十二賢石刻閉戶摹十日畫得之出示人曰何若曰似矣則喜又摹十日出示人曰何若曰勿似也則更喜蓋數摹而變其法易圓以方易整以散人勿得辨也初畫楚辭像刻於山陰再刻水滸牌見世及崇禎間召入爲舍人使臨歷代帝王圖像因得縱觀大內書畫乃益進故晚年畫博古牌略示其意章侯性誕僻好遊於酒人所致金錢隨手盡尤喜爲貧不得志人作畫周其乏凡貧士藉其生者數十百家若豪富有勢力者索之雖千金不爲翳筆也年五十一卒於山陰

毛奇齡西河集洪綬好畫蓮自稱老蓮數歲見李公麟畫孔門弟子勒本能指其誤處十四歲懸其畫市中立致金錢初法傳染時錢瑯藍瑛工寫生蓮請瑛法傳染而輕瑛瑛亦自以不逮蓮終其身不寫生曰此天授也生平好婦人非婦人在坐不飲夕寢非婦人不得寐有搗婦人乞畫輒應蓮嘗模周長史畫至再三猶不欲已人指所模畫謂之曰此畫已過周而猶嫌味何也曰此所以不及者也吾畫易見好則能事未盡也蓮畫以天勝然各有法骨法法吳生用筆法鄭法士墨法荆浩疏渲傳染法管仲姬古皇聖賢孔門弟子法李公麟觀音疏筆法吳生細公麟七佛法衛協烏瑟摩法范瓊諸天羅漢菩薩神鬼魏法張驃騎道經變像法公麟衣冠士法閻右相士女法周長史昉嬰法句龍爽倭墮髻法長史髻髻長史衣帶盤薄法吳生金碧宮壘林泉湍峙長陵豐卉法大小李將軍雲山法浩水法帝羽溜水法河陽郭熙几幃單卣餅舉什器戎衣穹廬番馬駱駝羊犬法趙承旨馬承旨小馬法承旨之子竹石窠木法趙大年鉤勒竹法劉涇墨竹管仲姬折枝桃牡丹梅水仙草花法黃檢校錢選鳥晴花鬢點漆凸厚法宣和蓬蟬蛺蝶蠓蟻蟹法宣和亦雜法崔徐黃父子鸚鵡鳩法閻助教士安畫法雀兒黃蓮法於蓮蒲蘆法母延之

圖繪寶鑑續纂。章侯能書善畫。花鳥人物。無不精妙。中年遂成一家。奇思巧構。變幻合宜。人所不能到也。

漁洋詩話。陳洪綬以畫得名。亦能詩。有憶舊絕句云。楓溪梅雨山樓醉。竹隔茶香佛閣眠。清福都成今日憶。神宗皇帝太平年。靜志居詩話。章侯四齡就婦翁家見新聖壁。登案畫漢前將軍關侯象。長八九尺。翁見下拜。遂以室奉侯。畫繪事本天縱也。崇禎間。與北平崔青蚓齊名。號南陳北崔。有妾吳淨靈。亦善花草。錢塘馮秀才硯祥詩云。吳興公子工花草。待制丹青步絕塵。三百年來陳待詔。調鉛殺粉繼前人。余每觀其真蹟。所畫美女。韶冶絕倫。今則贗本紛紜。多係其徒。戲水子。山子。司馬子。兩輩所傲。率皆濛濛戚施矣。詩頗饒逸致。

陸次雲湖壖雜記。兩堤垂柳。余幼時及見其盛。明鼎移時。皆擢剪伐。陳洪綬曾寫一圖。自題其上。外六橋頭楊柳畫。裏六橋頭樹亦稀。真實湖山今始見。老運行過更依依。若幸之而實惜之也。每放步其間。不勝張緒當年之想。

畫徵錄。洪綬畫人物。軀幹偉岸。衣紋清圓細勁。兼有公麟。子昂之妙。設色學吳生。法其力量。氣局超拔磊落。在仇唐之上。

山靜居畫論。陳章侯。崔子中。皆出翠手筆。落墨賦色。精意毫髮。僻古爭奇。各出幽思。子中人物外。他畫少見。章侯山水花卉。頗有平淡天然之作。點染得元人遺意。僻古是其所能。亦其所短也。

田按。章侯論畫云。今人作家。學宋者失之匠。何也。不帶唐流也。學元者失之野。何也。不遡宋源也。如以唐之韻運宋之板。宋之理行元之格。則大成矣。又云。如倪老數筆。都有部署法律。大小李將軍。營邱。白駒諸公。雖千門萬戶。千山萬水。都有韻致。此論可以通唐宋之畫脈。章侯人物奇古。山水雄秀。七絕瀟灑出塵。前有沈啓南。後有陳章侯。真畫家宗匠。詩家逸派也。

失題

千里別無恨。有懷在醉翁。棹頭楊柳色。驢背落梅風。酒勸揚州女。歌聽吳市童。歸來茶正熟。生活竹溪東。

橋頭曲

歡宿鴛鴦樓。儂宿蘆葦渚。兩夢如一夢。明日何處語。

玫瑰

老來貪識春風面。嬾作徐熙落墨工。誰能添箇鳴春鳥。細雨宮愁十二紅。

書屏

奈有湖山一日緣。藕絲風裏歇紅船。幾時收拾情緣盡。坐得松龕二十年。

春詠

秋冬之際吾得病。雪屋松窗對佛燈。今日勞勞鶯燕日。百花深處臥詩僧。

南旺寄內

饑來驅我上京華。莫道狂夫不憶家。曾記舊年幽事否。酒香梅影話窗紗。

與某僧

當今無處不天涯。猶恨天涯無處家。喜得北山僧帖子。邀儂十日看梅花。

卽日

一百五日春郊行。三十六溪春水生。千秋館裏逢雨急。射的峯前看晚晴。

偶詠

不識如何笑作愁。東阡西陌且閒遊。兒童共道先生醉。亂折黃花插滿頭。

寄黃四林一娘

金樽酌我黃公子。玉管催詩林一娘。遙憶兩人秋思好。月明雙槩住橫塘。

詠陳瓊海棠

阿儂自負王曇首。細按紅牙紫鳳鳴。學得內家新曲子。海棠花下問陳瓊。

紅樹

霜發琥珀莎薑紫。捧出當壚十五兒。恨殺秋山紅樹裏。獨無此事入新詩。

畫長公與恆如

愛寫圓通蘇子瞻。一年幾得兩三緜。老僧乞請伽藍去。溪水山花白布簾。

崔丹二首

丹字道母。更名子忠。字開子。又字青虬。順天府學生。一云山東人。

無聲詩史。崔子忠。號北海。山東人。崇禎癸酉。董宗伯思白應宮詹之召。子忠遊於其門。甚相器重。懸想倪迂高致。以意爲洗桐圖。貌雲林著古衣冠。注視蒼頭鹽樹。具逶迤寬博之概。雙鬟捧古器。隨侍。娟好靜秀。有林下風。文石磊砢。雙桐扶疏。覽之令人神灑。想其磅礴時。真氣吞雲夢矣。子忠不惟善畫。更以文學知名於時。

靜志居詩話。道母以畫見知華亭董尚書。益自重。家最貧。有以金帛請者。概不納。有二女。皆善畫。乘陽宋司臬玉叔曾示予許。

陸陽移居圖。鬼物青紅。備諸詭異之狀。幾與龔聖與爭能。匪近日畫家所及也。甲申寇變。走近郊。匿陶穴中。不出。遂餓而死。復社一二集。道母均與焉。先後名字不同。

畫徵錄。順天崔子忠善人物。與陳洪綬齊名。號南陳北崔。

滴水巖二首

石以當空立。巖如急就成。雨花山廟溼。雷樹羽宮晴。絕壁洪荒在。陰疇晦朔并。古潭龍夜語。徐戛應泉聲。入不知高下。山春水似秋。星河平地看。雞犬半天遊。洞腹藏元氣。山根養沆流。白雲朝出宿。知是繞神州。

龔賢六首

賢又名豈賢。字半千。一字野遺。號柴丈人。崑山人。流寓金陵。有香草堂集。

讀畫錄。半千性孤癖。與人落落難合。其畫掃除。奚獨出幽異。自謂前無古人。程青溪論畫。於近少所許可。獨題半千畫云。畫有繁減。乃論筆墨。北宋人千邱萬壑。無一筆不減。元人枯枝瘦石。無一筆不繁。通此解者。其半千乎。半千早年厭白門雜沓。移家廣陵。已復厭之。仍返而結廬於清涼山下。葺半畝園。栽花種竹。悠然自得。足不履市井。唯與方衲山。湯岩夫諸遺老。過從甚歡。筆墨之暇。賦詩自適。詩又不肯苟作。嘔心抉髓而後成。惟恐一字落人蹊逕。酷嗜中晚唐詩。蒐羅百餘家。中多人未見本。曾刻廿家於廣陵。惜無力全梓。至今珍什笥中。古人慧命所係。半千真中晚之功臣也。

程正揆青溪集。半千用筆。如龍馭風。如雲竹空。隱現變幻。渺乎其不可窮。蓋以韻勝。不以力雄者也。

王暉今世說。龔柴丈隱居清涼山。有園半畝。種名花異卉。過堂下。鳥弄林端。日長無事。讀書寫山水之餘。高枕而已。圖繪寶鑑續纂。半千畫初從北宋築基。一變古法。沈鬱深厚。自成一家。

愚山集。隴半千像讚。人推詩老。自稱柴丈。名不可逃。俗不可尙。尊酒陶然。筆墨天放。投迹箇中。寄情霞上。虛見曾慥舊集注。半千畫愛做梅花道人筆意。嘗自寫小照。作掃落葉僧。因名所居爲掃葉樓。

畫徵錄。半千畫筆得北苑法。沈雄深厚。蒼老矣。惜秀韻不足耳。

秦祖永桐陰論畫。半千與樊圻。高岑。鄒誥。吳宏。葉欣。胡造。謝榛爲金陵八家。

田按。半千畫。濃墨粗筆。揮灑淋漓。冊葉小幅著色者。別饒趣韻。

一 公得法東遊

師去忽經年。書來兩月前。持梅辭蔣廟。帶雪下吳船。道大終難隱。蓬飄未易旋。相思但相念。切莫寄詩篇。

何日山中住

何日山中住。山中廣置田。高原兒課種。精舍我閒眠。二月到八月。鶯天與笏天。總無愁苦法。那得不長年。

扁舟

扁舟當曉發。沙岸杳然空。人語蠻煙外。雞鳴海色中。短衣曾去國。白首尙飄蓬。不讀荊軻傳。羞爲一劍雄。

久不得韓呂消息

平生好遊歷。此別日偏多。嶽寺聽猿住。江鄉傍虎過。衰羸吾自念。疾病爾如何。短榻依然在。空房鎖薜蘿。

胡介再過邗上

相逢知不易。一拜淚潸然。此地又春草。吾生俱暮年。囊空出詩卷。廚冷動炊煙。耆舊今誰在。尊前各自憐。

晚出燕子磯東下

江天忽無際。一舸在中流。遠岫已將沒。夕陽猶未收。自憐爲客久。轉覺到家愁。別酒初醒處。蒼煙下白鷗。

歸昌世二首

昌世字文休。崑山人。崇禎末以待詔徵。不應。有假菴詩草。

列朝詩集。文休風神散朗。有材氣。善畫墨竹。能草書。與李長蘅交好。晚作和陶詩。爲程孟陽所稱。

無聲詩史。文休墨竹。枝葉清洒。逗雨舞風。有渭川淇澳之思。兼工印篆。

靜志居詩話。歸熙甫長於筆。而短於詩。讀季思文休作。覺後來者勝。

田按。文休太僕孫也。與叔父季思俱以節操名。五言有柴桑遺韻。

和陶雜詩二首

宇宙何茫茫。起滅同一塵。胡爲一日間。各營百年身。華堂與崇邱。去疏來者親。我廬非我有。四顧誰爲鄰。有如遠行客。當夕已戒晨。有懷不勝嗟。舉目皆勞人。束髮萬里志。終焉老一經。夕秀復朝華。孺子多早成。老少不相及。時事亦變更。隱几靜焚香。和墨書黃庭。草莽無遠圖。不寐晨雞鳴。兵食仰東南。愴然傷我情。

歸莊一首

莊字元恭。崑山人。太僕丞有光曾孫。諸生。有恆軒集。山游詩。

靜志居詩話。恆軒好奇。世目爲狂生。善行草書。嘗題其齋居柱云。入其室。空空如也。問其人。囂囂然曰。鄉鄙傳之。謂可入啓顏錄。其名字屢更。崇禎中。忽請於學使者。改名祚明。自是以後。或稱歸妹。或稱歸乎來。或稱元功。或稱園公。或稱懸弓。恆軒其別號。亦號普明頭陀。又號鑿鑿鉅山人。沒後。女壻金佩輯其詩文。名字一從其舊焉。侃處士俊明子。能詩畫。亦隱居不出。

董含三閩識略。墨竹一派。自梅道人後。宣正間則推夏昞。論者謂可比肩元鎮。徐渭。王問俱不及也。邇來畫者雖多。鹿城歸太僕孫莊。氣韻蕭疏。頗得古人遺意。莊別號鑿鑿鉅山人。性好奇。醉後揮灑。常畫巨幅。題一絕貽予云。勁節寒姿是性生。颯然筆底作秋聲。吳兒只解稱朱鷺。柳葉蘆苗浪得名。

歸琦亭集外編。世傳萬古愁曲子。瑰瓌恣肆。於古之聖賢君相。無不詆訶。而獨痛哭流涕於桑海之際。蓋離騷。天問一種手筆。但不能定其爲何人所作。近人或以爲讀翁。或以爲道隱。或以爲石霞。皆鮮證據。惟魏勺庭徵君及其事於恆軒壽序。予始取而跋之。沈穉詹事謂世祖章皇帝嘗見此曲。大加稱賞。命樂工每膳歇。以侑食。古之遺民野老。記甲子。哭庚申。大都潛伏於殘山刺水之間。未聞有得播與朝之鐘呂者。是又一異事也。恆軒少入復社。於書無所不窺。嘗同顧推官舉師不克。行遯得免。書淫墨癖。遂以伴狂終身。

落花

枝上黃鶯漸露身。飛英歷亂墮紅塵。將隨薜荔依山鬼。難共蘼蕪待美人。河北名園貪結子。武陵歸棹欲迷津。香車寶馬緣都盡。天與幽人一錦茵。

顧樵三首

樵字樵水。吳江人。

明詩紀事 辛籤 卷二十七上

今世說。顧樵水詩篇秀絕。畫亦屬能品。嘗作秋林圖贈吳梅村。吳歎曰。對此尺幅。使人幽思頓生。
畫徵錄。樵水有詩名。善山水。學石田翁。與族人茂倫。同里。徐松之並稱高人。

元夕後一日集通暉樓

燈火仍看滿禁城。良朋尊酒歲時晴。柳條猶待東風發。月色還同昨夜明。橫笛樓頭離別恨。落梅簾外踏歌聲。山陽舊侶雖無恙。逝水年華百感生。

題吳嶧山儀部讀書堂

門對長河煙水寒。閒鷗日日到沙灘。溪流汎出桃花片。知是山中春已殘。

竹橋池館

巉巖石磴水濼迴。常有溪雲入樹來。行過竹橋通別徑。始知花裏有樓臺。

徐繼恩二首

繼恩字世臣。仁和人。貢生。晚爲僧。名靜挺。字復亭。有十笏齋詩鈔。

今世說。徐繼恩少擢茂才異等。舉明經。遭亂不仕。隱於竺乾山中。天性英爽。不耐憂煩。嘗謂人非金石。立見銷亡。不若逃形全真。肆志方外。

圖繪寶鑑續纂。豁堂詩畫俱優。師仿元四家。

宿皋亭卻憶笠菴道人雪川次韻

空山雲影碧棱棱。極目寒原第幾層。煙樹倚天迷宿草。霜花緣路隔疏藤。鳥嘯古塔皋亭月。雁度虛窗蕭寺燈。惆悵我來君作客。卻尋高詠過吳興。

虎邱

虎邱石上夜嘯鳥。說法生公近有無。山寺鼓鐘還寂寞。吳宮花草半荒蕪。人從鶴市歸帆遠。客夢鷄陂落月孤。最是麻姑閒舞袖。乘風飛過洞庭湖。

文枬一首

枬字端文。長洲人有慨菴詩選。

長洲縣志。端文從簡子。甲申後。奉親隱居寒山。父歿。徙居陸墓。與韓孝廉沐。方文學。夏結茅耕樵以終。畫徵續錄。端文畫山水。一稟祖法。所著有青氈雜志。

合流菴

合流門徑古。數里入松林。室小迎朝旭。牆高載夕陰。梅花臨澗發。竹色傍山深。隔嶺吾家近。還期早晚尋。

楊補二首

補字無補。一字曰補。號古農。先世清江人。移居長洲。

錢謙益有學集。無補壯歲遊長安。詩名藉甚。余賞其警句曰。閑魚食葉如遊樹。高柳眠陰半在池。以爲文外獨絕。書之扇頭。爭相誦誦。歸而與邢昉。顧夢遊。刻意濯磨。爲清新古淡之學。詩道於是大就。善畫。落筆似黃子久。

讀畫錄古農嘗畫小幅大不盈掌自題云永嘉郭外山川點點皆倪黃粉本也金俊明題此幅是龍友令永嘉時古龍遊經其地憶寫所見秀澹潔朗擅元人之勝龍友曾爲古農作小幅轉以相贈筆致亦絕類此可知良友氣味相入也王阮亭一絕云布衣曾說楊無補筆墨風流自一時留得永嘉遺跡在殘山剩水也嗚思

龍友偕遊玉甌峯

舍舟白石村。籃輿遵澗麓。窈窕青翠光。盤旋上空曲。渾渾太古峯。巖巖壓坤軸。赤立起中天。頽然表太樸。我行繞厥趾。仰睇魂魄肅。有泉自顛來。霏霏落珠玉。霑灑溼暑衣。從風散百谷。凌晨眺巖霏。亭午穿巖腹。縹緲開精藍。因崖結爲屋。稍憩登頓勞。還依石牀宿。壑暝雲歸同。夜靜泉喧族。謝公行田處。微月照煙絲。曠哉棲眞士。於此翔高躅。只今峯上頭。痕有雙白足。惆悵區中緣。明朝苦何促。

輕順閣看月和邢孟貞

海城清曠地。夏氣只如秋。此夜生明月。羈人共倚樓。蒼山橫玉笛。烏鵲近簾鈎。晚興坐超忽。鳴琴成獨愁。

周祚新一首

祚新字又新。貴州衛人。崇禎丁丑進士。授戶部主事。

程正揆青溪遺稿題周墨龍畫竹。此君寥寥三百年。雖如石田健拔。停雲超逸。不復見長。蓋以用法易得。筆難也。墨龍獨力追古。不踐不入。一時無輩。梅花復起。必曰似我。

廣陽雜記。周祚新。貴州人。弘光時兵部司官。遂家南京。善畫竹。號墨奴。今其遺跡已貴如拱壁矣。

無聲詩史。又新寫墨竹。得文洋州梅沙彌心印。蓋又新所藏多名蹟。而與可仲圭之礎材。咸萃青箱。故能爲此君傳神也。
黔詩紀略。又新擅詩。畫墨竹尤擅長。李專題墨竹云。琅玕三尺凡五節。節節思化仙。陂龍謂非與。可不能辦。竟是黔人周墨龍。
又新爲楊龍友妹壻。收藏鼎彝書畫。不亞於龍友。惜其集無傳。

詠春水

湘娥細翦鸚哥翎。水仙綃帳鯉魚腥。天池浩瀚蒼溟溟。蔚藍倒映淵泓溟。楊花未飛蒲未長。縠紋蕩漾晴如紡。漪漪曲曲似有情。小小輕舸不用槳。

呂潛十首

潛字孔昭。遂甯人。大學士大器子。崇禎癸未進士。有洞宛。懷歸草堂。守閒堂。課耕樓等集。

漁洋詩話。呂潛字半隱。故明兵部尙書大器之子。亂離後流寓江左。有詩云。橫江閣外數帆檣。立盡西風鬢欲霜。只有鄉心不東去。蚤隨煙月上瞿唐。

畫徵錄。孔昭善花草。用筆放縱。而不越矩矱。神氣清明可貴。性曠達。淡於仕進。入國朝。遂不出。以詩畫娛老。

吳興詩存。半隱甲申後避地吳興。愛山水清遠。遂家焉。春秋佳日。扁舟攬勝。與漁樵爲伍。人不知其貴介也。詩調新穎。書法似董文敏。畫亦有北苑筆意。其亦元真子。太白山人之亞歟。

送友蒼上人住水西

瓢笠歎無定。名山久待公。雪殘春路滑。雲過晚江空。道口馴岩虎。鄉心折塞鴻。還憎多慧業。詩句滿南中。

秋水園卽事

近午過重溪。亭空春草齊。幾家團市小。一寺背山低。花隱漁人路。香留燕子泥。前賢遺澤在。五夜尙聞雞。

邗江夏夜懷史赤豹蕭寺

飛鳥不知處。孤城生暮雲。吟邊誰是苦。鐘畔爾先聞。□□□王閣。風號故相墳。蜀岡有歸路。吾亦戀斜曛。

吳園次罷守吳興感贈

不悔無家計。蕭條傍雪村。經宵焚柏子。向月倚桐孫。楚塞煙波闊。吳船洞壑尊。有時念漁父。短服過柴門。

江陰晤年友張四若志感

二十年前別。重逢白髮生。登堂如有淚。對面各無聲。多難惟存骨。居貧不墮名。天涯兄弟少。悽絕動江城。

石亭寺樓與友人話舊

江濤如雪亂飛鴉。客裏逢人漫憶家。杜宇叫殘巫峽夢。鷓鴣聲斷嶺南花。天涯寄食無耕土。世外藏名有釣車。試看滕王遺跡在。西山空對晚煙斜。

汴梁

魚龍去後息兵爭。萬井依然禹甸清。望裏遺宮春草沒。吟邊古戍夕陽平。遊梁詞賦慚司馬。入洛年華異賈生。欲問夷門棲隱處。荒隄衰柳不勝情。

過蜀府

鐵券金符付劫灰。桐圭零落蜀王臺。誰從輦路鳴鞭過。猶記宣門拜刺來。智井寒泉沈鳳羽。天街白日走龍媒。短牆桃李家家發。畫角聲中杜宇哀。

歸雲菴偶題

竹院煙光合。秋山樹影分。自憐長作客。歸計不如雲。

邱母望桃花

十里桃花岸。無嫌策杖遲。正宜稍遠處。最好未開時。

張觀四首

觀字大風。上元人。諸生有雙鏡齋詩。

讀畫錄。大風家貧。惟容膝地。每天雨淋漓。跣臥書案上。常累日。嚴冬冰雪。與鄰舍生談。裸歷立。或移漏刻。妻亡不再娶。大風畫無所師授。偶以己意爲之。遂臻化境。瀟然淡遠。幾無墨路可尋。疎陵畫家。掉臂孤行者。大風一人而已。貌頗偉。美髭鬣。望之似深山老煉士。工圖章詩賦。少時爲諸生。甲申後。遂焚帖括。衣短後。佩劍。走北口。出盧龍。上谷。覽昌平。天壽諸山。所至公卿爭相迎。大風揮灑應之。有中貴子招飲。遊館孫中。大風起立。瞪目不答。酒罷引去。一日興盡。卽治裝。衣舊衣。騎驢而歸。性幽僻。多寓僧寮道院。不一省其家。所爲詩若詞。皆秀警可誦。與人處。渾渾不露圭角。畫尾畧眞香佛空四字。或稱昇州道士。畫徵錄。大風善畫山水花草。筆墨中之散仙也。

江村晚望

春來無幾日。碧草徧溪灣。爲看水中石。忽逢花外山。江船載酒賣。野老得魚閒。今夕多新月。柴門不用關。

落日

寒煙上邱隴。落日下羊牛。一澗碧泉響。四山紅葉秋。霜茅失樵徑。獵火見漁舟。歲晚罷耕種。商畝纔薄收。

同劉旅皇飲借巢看菊

黃花開石屋。歲晚足摩娑。飲酒亦逃世。哀時恆獨歌。地偏風露冷。江逼雁鴻多。卽此成嘉遯。蒼生奈爾何。

田園卽事

樹底雲生隔淺苔。花間犬吠出危橋。綠林麥熟經晨雨。艤岸船高入夜潮。計拙兒童諳稼穡。時違兄弟老漁樵。田園長更餘風月。村北村南酒滿瓢。

周容一首

容字鄧山鄞人有春酒堂集

徐文駒曰。容以勝國諸生。放之於酒。無日不飲。無飲不醉。其耿耿者不能自釋。或僮察野店。忍泣吞聲。或賸水殘山。章皇勸哭。又以詩洩之。振筆一揮。清詞麗句。風發泉涌。傲岸突兀。獨來獨往。

簡琦亭集。鄧山先生少卽工詩。常熟錢侍郎牧齋稱之。謂如獨鳥呼春。九鐘鳴霜。所見詩人無及之者。錄其詩於吾彙集。國難後。棄諸生。放浪湖山。世多方之徐渭。非其倫也。先生以布衣詩人名。顧其素心。原不肯以山澤臞孱爲什者。卽其救徐御史心。

水一事要非東四京人物不足語此先生未知名時爲御史所識御史一日遊山莊爲士兵縛去眞平四將軍王朝先營囚水牢中先生故常來往海上諸營多相識者挺身往請之朝先握手道故遷釋御史歸部下大譚朝先武人忽發怒下先生獄榜掠之足由是覺警自笑曰吾今且爲半人因別畧覽翁最工書亦喜畫飲酒數斗不亂詆詰問作輒傾一座

畫徵錄鄧山善書工畫疏木枯石自率胸臆蕭然遠俗不拘拘於宗法

丙申閏月晉陽寄懷固菴

朝遵滹沱涯暮宿井陘脊回首指燕關燕關日先沒朝上晉陽樓暮望燕關月作書久莫寄封書還自發
寄書莫寄黃金臺黃金既盡徒蒿萊獵犬追兔雙背赤何處一奠昭王杯寄書莫寄擊筑處沽酒不醉客
易去往事唯留易水寒易水何嘗遶丹墓寄書莫寄西山雪春後作波流勿絕杜鵑止在江南嘯誰護陵
傍花似血寄書莫寄荊州君大篇隻句天下聞結客破家二十載只今瘦馬隨時人報國寺松雙樹亞開
元父老譚閒暇市兒過盡生江風一月幾回步其下嗟嗟去歲入燕關雁叫霜天衣袖單投旅愧人問何
事南裝倉卒多旁看明朝買驢強造謁撲面塵埃路交窄右讓雕鞍猶未過左輪摩膝讓不得下驢呼僕
牽驢行大宅華門多送迎紛紛云是貴長者廷尉丞相將軍名黃色狐裘貂色紫上鐙下鐙竟誰子相逢
垂手點頭偏斜鞭直入明光裏我一見之但惆悵故交茫茫戶南向關者如帝懶作膺張腮挺腹形軀壯
冬陰何短歸路遙獨君倒屣逾久要出酒坐對燭花落下階已白冰花高燕關五十有一日半在松間半
君室尋常減米移蚨錢雨霰市中增炭值臘之六日有晉遊前一夕半猶我留出卷索題并於畫醉深捉

筆同乘舟。次晨馬上經君戶。呼君不出知君臥。蹀躞踏轉蘆溝西。胸中松與君交互。暮宿井陘脊。燕關月如玦。朝上晉陽樓。汾河水決決。三春青草不到塔。夏五燕子空飛來。土沙雜著橫梁粉。辛苦與雀爭虛陴。江南白苧吹新濬。今日披裘寒色滿。只看氣候甚參差。驚覺故鄉程更遠。所慰主人情殷勤。尊前時時說及君。囑君頻上慈仁閣。爲我遙望太行雲。

項聖謨一首

聖謨字孔彰。號易菴。又號胥山樵。秀水人。有朗雲堂集。

容臺別集。項孔彰畫。衆美畢錄。樹石屋宇。花卉人物。皆與宋人血戰。就中山水。又兼元人氣韻。雖其天骨自合。要亦功力深至。所謂士氣作家俱備。項子京有此文孫。不負好古賞鑒百年食報之勝事矣。

畫徵錄。胥山樵畫初學文衡山。後繼於宋。而取韻於元。其花草松竹木石尤精妙。

吳越所見書畫錄。王鴻緒云。項孔彰山水全師北宋。兼擅寫生。尤善畫松。故明時項松之名滿東南。

田拔。孔彰畫長於仿古。余見其冊頁數事。山頭聳峭。怒濤飛立。得力於北宋大家。而別饒氣韻。可稱能手。

自詠松濤散仙圖

偃息松濤一散仙。葛巾挂壁自閒眠。窗前有竹聊醫俗。不到長安已十年。

墨緣案觀。項聖謨松濤散仙圖自跋云。余髫年便喜弄柔翰。夜必篝燈。著意描寫。昆蟲草木。翎毛花卉。無物不備。必至肖形而止。忽一夕夢筆立如柱。直干雲霄。上有層級如梯。長可一二丈許。余登而據其臺巔。鼓掌談笑。嗣後師法古人。往往自得。自丙

寅六月畫成招隱圖後。此第二卷也。命曰松濤散仙圖。偶有自詠詩云。

蕭雲從一首

雲從字尺木。一字默思。太平人。貢生。移家金陵。晚稱鍾山老人。

池北偶談。蕭尺木以畫擅名。江左嘗作杜律細一卷。以爲杜律無拗體者。穿鑿可笑。而援據甚博。

圖繪寶鑑續纂。蕭尺木明經不仕。筆墨娛情。不宋不元。自成一格。

陳瑛曠園雜志。胡瀛季守太平日。慕蕪湖蕭尺木能畫。三訪俱辭不見。胡怒。時新修采石磯太白樓成。遂於棗牘中插入尺木名。攝之。至。遂至樓中。令白壁間若圖成。卽當開釋。尺木年已七十餘。方臥病。不得已畫匡廬峨眉秦岱。衡嶽四大名山。凡七日而就。遂絕筆。至今登樓者。歎賞不置。畫與斯樓俱傳矣。事與沈啓南絕相類。

畫徵錄。蕭尺木號無悶道人。善山水。不專宗法。自成一派。筆亦清快不俗。與孫逸齋名。兼長人物。生平所畫。太平景離。鍾山好事者。鏤板以傳。

郭麐墨餘叢話。蕪湖蕭尺木居士。以畫名一時。詩不多見。近得見其集。蓋谷音。晞髮之流也。詩多七言律。又每作必盡三十韻。縱放自喜。不拘聲律。以自抒其。佻傥無聊之思而已。有惜娉詩三十首。序云。金陵小伎。避亂野處。秉禮自守。不輕從人。問其名。曰惜娉。或如杜詩。不嫁惜娉。娉意歟。蓋寓言以自況也。如欲炙銀筵。嫌氣煖。爲挑蠟炬。戒心歟。幸未折殘。江上柳。若爲卜築水邊村。長話祇因經亂後。避人偏覺此身多。月上莫依人弄笛。春殘不見鳥窺簾。等句可見。又有鍾山梅下詩。如海內有春藏。北斗。雪中無路覓南枝。名花嶺上供千佛。野雪香中閱六朝。皆此意也。

郊居詩

隨意寒塘落釣鉤。青蛉伴立竿頭。浮雲天際歸何處。獨樹溪邊影不留。蹈海魯連龍戰日。還家蘇武雁

聲秋身經遷播皆萍梗。一有吾廬更有愁。

金遠一首

遠字遐生長興人。

吳興詩存。遐生性耽山水。種梅百樹。時吟其下。工畫能詩。自擬在淵明。和靖間。

浦上晚歸看雪

春來頻見六花飛。白屋家家盡掩扉。獨有野人幽興劇。夜深猶載滿船歸。

明詩紀事卷二十七下

辛籤

許友六首

友字有介。又名眉。字介壽。侯官人。有米友堂集。

錢謙益吾奕集。余在南京。爲牛腰詩卷所困。得許生詩。霍然自開。每逢佳處。把盞不已。

讀畫錄。有介畫如其詩。蒼楚有致。無一毫煙火氣。好畫小竹。做管仲姬。柔枝嫩葉。姿態橫生。自鑄許友畫竹章。每作竹卽用之。

因予累至京師。渡河而北。不復畫竹。忽放筆爲枯木寒鴉。蒼涼之態。不可把視。

十五國風高言集。田髡淵曰。有介諸作。有振衣千仞之概。有沿流九曲之情。淡如菊。清如竹。

漁洋詩話。楚人門巷瀟湘色。竟陵胡君信句。野航人遠雁聲低。侯官許有介句。

靜志居詩話。先生才兼三絕。名盛一時。其詩篇章字句。不屑蹈襲前人。正如俊鷗生駒。未可施以韉勒。

畫史彙傳。有介書畫喜臨摹米襄陽。構米友堂。辦香祀之。

晚泊瀛田

片棹以遲勝。風輕波復微。野煙依樹合。沙鳥貼江飛。人語孤鄉近。郊燈岸店稀。記程今夜始。一宿在漁磯。

送鄭一作客

明詩紀事 辛籤 卷二十七下

三二四七

苔繡銀刀佩古囊。雞聲勒馬著衣裳。揮杯滿目皆朋友。亂世逢場卽故鄉。斷岸孤舟千里夢。曉天殘月萬家霜。悲予獨自看花後。春柳深深冷草堂。

畫郊行

乳鳩嗁午初醒夢。蛺蝶雙飛正弄晴。此地不因人世好。滿村花柳自清明。

春日園居

但得幽居草木安。小園數步較能寬。芭蕉葉下閒來往。一卷殘書斷續看。

讀書夜盡聞鐘聲從白月來

石樓隱向白雲封。知在崑嶠第幾重。殘夜讀書人未臥。萬山明月一聲鐘。

山居

落葉蕭蕭正掩門。山僧野客坐松根。水流花謝無人到。煙外板橋又一村。

魯得之一首

得之字孔孫。錢塘人。寓嘉興。有竹史、墨君題語、細香居集。

李日華墨君題語。孔孫天資高亮。神明沈鬱。居恆恬俗自恣。走入竹中。挹其颯爽之氣。興到一呼。墨君登案。疏瀹單複。無不盡意。

李肇亨墨君題語。孔孫竹枝沈酣古法。時出靈心。不縱不隨。亦離亦合。心企手迫。畢臻其妙。畫徵錄。孔孫善書工墨竹。發筆爽勁。堵葉清利。直由仲圭而追蹤文。蘇矣。李太僕日華稱爲翰墨中精猛之將。知言哉。晚年右臂不仁。以左手畫風竹。尤有致。

仿管仲姬竹

小蒸溪水晚風前。天聖曾瞻翰墨仙。剩有筆牀螺黛色。爲君重繪碧湘煙。

徐柏齡一首

柏齡字節之。嘉興人。崇禎庚午舉人。有勗光樓集。

稱李詩鑿節之。受知於黃石齋。石齋贈詩云。節之貽我詩。十章大清脫。酒筆睨古今。鐘鼎如鷓鴣。放浪遺形骸。瞻眺留日月。不作悲離音。不著窮愁筆。不蹈辟支禪。不弄飛騰術。蕭然寄天地。風雨絡膠漆。甲申後。往來閩。越間。歸卒。

大雲菴舫閣

買得浮家不在江。竹梢分綠影漁艖。秋風颯颯三更後。月擁寒潮到紙窗。

朱奪一首

奪故明宗室諸生。世居南昌。國變後爲僧。號雪箇。曰人屋。曰驢屋驢。曰書年。曰瀟漢。最後號八大山人。

邵長蘅青門稿。八大山人明宗室。居南昌。遭變棄家。避奉新山中爲僧。豐拂稱宗師。臨川令胡君聞其名。延之官舍。年餘。意忽

忽不自得發狂疾。忽大笑。忽痛哭。竟日。裂浮屠服焚之。走還曾城。倡伴市肆間。小兒隨觀譁笑。人莫識也。山人工書法。行楷學大令。魯公能自成家。狂草頗怪偉。亦喜畫水墨芭蕉。怪石花竹。及黃雁汀鷺。翛然無畫家町畦。山人有詩數卷。祕不令人見。予見山人題畫及他題跋。皆古雅。間雜以幽澀語。不盡可解。

畫錄。八大山人有仙才。隱於書畫。題跋多奇致。不甚解。書法有晉唐風格。畫擅山水花鳥竹木。筆情縱恣。不泥成法。而蒼勁圓辟。時有逸氣。所謂拙規矩於方圓。鄙精研於彩繪者也。襟懷浩落。慷慨嘯歌。世目以狂。及逢知己。十日五日盡其能。又何事也。

題畫

郭家皴法雲頭小。董老麻皮樹上多。想見詩人解圖畫。一峯還寫宋山河。

汪珂玉二首

珂玉字玉水。徽州人。僑居嘉興。崇禎中。官山東鹽運使判官。有鴛水月社篇。西山品蠟屐音。

四庫總目。汪珂玉珊瑚網法書題跋二十四卷。名畫題跋二十四卷。所載法書。頗有目觀耳聞。據以著錄。不盡其所自藏。考據亦未盡精審。所載名畫。則宋元諸家。銘心絕品。收錄極詳。贗素之富。誠爲罕有。

靜志居詩話。玉水不卑小官。留心著述。所輯珊瑚網一編。與吳下張青父品題並駕。惜乎詩草甚富。泯焉無存。

蘇小墓

無限春風無限情。千年猶想碧油輕。歌殘井畔桃花落。舞剩亭邊柳葉生。漠漠香魂疑月影。茫茫玉質斷雲橫。仙才仙色何曾死。不獨錢塘夢得成。

項氏所藏管仲姬竹卷友人得之已斷後跋忽有得其題語者爲中峯及松雪兩翁手蹟時反疑爲贗作爲賦一絕

露葉煙梢幾幅攤晴窗影落石泓殘堪嗟書畫金湯失一樣河山破後看

張穆一首

穆字穆之東莞人有鐵橋道人稿

遺民詩鐵橋道人少奇挺知劍術壯歲來吳中任俠自喜結交皆名下士兼工詩畫吮毫澀墨橫視無前其意欲有以自見不得遂歸隱羅浮以終

元夜渦魏和公旅邸明發有瓊海之別

睿言同意氣離合便相關良夜不重得遊人難久閒明燈寒共影濁酒煖開顏此地能長聚菰蒲別世間

來蕃三首

蔣字成夫蕭山人諸生有北沙集

西河集成夫貧空敝衣纒裂所儲圖史外惟瓶盎十餘實米鹽紵絮每出行書衣筆裘手自抱持至有挂兩肘纍纍蔽以博袖儼五石匏者避近廣坐端視緘默值君者多卜君語默以示臧否至爲語云言勿言視來蕃甲申以後棄去舉業專詩古文詞始以博大自喜既好爲瑰奇倜儻之語既又力追先秦崇尚奧衍精六書能作古文魚鱗大小篆及隸入神嘗作故明二畿賦雄博頡鶯抵牾前古人以口貽厭讀之惟虞山錢宗伯見之稱曰此馬季長之賦也少游蕪山之門蕪山曰子袁夏甫也吾初

明詩紀事 辛籤 卷二十七下

三二五

以子爲狂。今知獵者也。

板蕩三首

板蕩崇禎末。遺賢尙有人。登朝常掣肘。抗疏敢危身。九廟精靈格。三邊涕淚新。時危不可揅。西北望煙塵。
伏枕蒼江上。貧家獨樹幽。巷留千里駕。客共百年憂。晚秫垂寒水。秋瓜蔓故邱。江山已殊異。徒傍望京樓。
野園秋水曲。村徑窺人情。黃菊開孤嶼。青山遶廢城。老宜驅犢往。貧擬賣魚生。尙識前朝事。垂紳際聖明。

明詩紀事卷二十八

辛籤

張綱孫十三首

綱孫一名丹字祖望錢塘人有秦亭詩集十二卷

四庫總目丹與陸圻柴紹炳陳廷會毛先舒丁澎吳百朋孫治沈謙虞黃吳相倡和稱西泠十子秦亭集晚年所刻原名從野堂集前有自敘一篇述其游歷所經而詩格與之俱變毛先舒稱其悲涼沈遠矯然不羣朱彝尊亦謂其五言古體波瀾老成南北行旅諸篇尤爲奇崛又嘗批其北歸詩云句句學杜句句不襲杜句句做句句不做其傾挹甚至故丹寄彝尊詩有慚我詩詞遵知己思君杖履定登臺之句今觀其全集其七言古體亦宕逸可誦不獨五言特諸體未能悉稱律詩尤不免率易今世說張祖望美鬢髻長尺餘手足胸背皆有毫寸許夏月好坦腹臥樹下視富貴若不介意性恬淡不樂交遊好爲詩古文詞喜山水深溪邃谷不避險阻每得意長嘯忘返毛稚黃言祖望詩蒼澀頓挫如大漠風莽莽無極

西陵十子詩選祖望骨格蒼勁雖其源出於杜陵而法能獨運語有利鈍無妨老境靜志居詩話秦亭詩方之四陵諸子逸倫絕羣

詩觀二集祖望北游五言古可頡頏少陵入蜀諸作

田按祖望早年入西陵十子社望其詩無甚殊絕晚乃蒼渾雄肆人固不可無年

坐安隱寺

明詩紀事 辛籤 卷二十八

三二五三

箕坐青苔石。虛谷聽未了。法堂隱竹暮。古殿敞松曉。澗深生溼雲。藤垂怯隱鳥。回顧白石潭。傍映蘿月小。
贈孫宇台

梧桐生高岡。爰伐爲兩琴。一彈麥秀歌。一彈采薇吟。鼓宮亦宮調。鼓角亦角音。是知相感物。所貴在同心。同心可企古。其利比斷金。哀歌恆不見。彌思商雒岑。

琉璃河

仲冬嚴氣寒。堅冰白似骨。策馬琉璃河。橋滑不可越。從者挽纜繩。兩足尙棹杙。前人戒後徒。那知墮條忽。闌干有鐵棹。半插沙水窟。云昔王將軍。勇氣殊不沒。死難梁晉時。慨慕將鬢捋。

廢園郎季千沈去矜夜坐

微月向荆扉。古樹流螢白。涼風吹懷抱。雜坐感今夕。惜哉芳樹園。零落生薇蕨。海燕始去帷。寒蛩早居壁。歌梁想餘音。舞臺誠遺迹。旣成跼蹐徑。復象萑葦澤。幸藉二三友。秉燭讌良席。何以慰所思。清言庶悅懌。

山居

人生苦不足。趨利無窮年。孰是能居貧。而終寡所牽。入山不必深。且耕南村田。解衣桑樹下。負薪古墓間。古墓多白骨。蕭蕭生寒煙。及時當行遊。恐爲樵牧憐。

贈恆貫上人

尋師萬里外。隨宿古招提。天盡條枝北。河流大夏西。秦關看雁去。蜀道苦猿嘯。應覽名都勝。津梁路不迷。

秋雨

棟雲迷昨夜。簾雨暗來朝。門接黃溪水。樓聽白塔潮。花鷗形泛泛。魚虎羽翹翹。閒問投罟者。前村縱木橈。

湖上

湖山聊自放。天地一高歌。草色秦亭合。松聲伍廟多。微風低白鷺。陰雨叫蒼鵝。欲溯中流去。愁心奈若何。

鞏華城雪望

秣馬荒城暮。霏霏雪滿天。寒雲垂大地。春色散長邊。赤豹藏妖窟。黃熊走獵煙。客心終不遂。頭白此山川。

度泗水

泗水流波闊。千年齊魯間。大魚噴沫起。老馬鬪風還。落日依蕭縣。孤雲出碭山。始皇求鼎處。寂寞一沙灣。

蚤過沿山

已背沿山縣。龍門此界開。高帆帖嶺度。奔溜射潭迴。古壁攢風穴。晴雲洗石臺。幾翻歌嘯起。穩坐興悠哉。

過小孤山

山勢插江出。中流斗壁迴。潮分彭澤大。石裂馬當開。鬼斧龍宮削。神雲鶴觀來。小姑不可見。愁絕望妝臺。

積雨

積雨西湖後。開簾望遠汀。輕舟依獨樹。細草上荒亭。鶴鶴晚風足。魚蝦春水腥。那知蓬戶外。山色盡冥冥。

沈謙十三首

謙字去矜。仁和人。有東江集。

今世說。去矜少穎慧。六歲能辨四聲。長益篤學。嘗自言。著作須手定自刻。庶保垂遠。若以俛子孫。恐故紙斤不足當二分直也。僻處杭之東偏。聲名藉藉。吳越齊楚之士。過鼓村。車轍恆滿。

西陵十子詩選。柴虎臣曰。去矜詩。如秦川佚女。巧弄機杼。心手既調。花鳥欲活。聆其啞軋之聲。皆中矩度。又加金鑿初炙。脆而不裂。

靜志居詩話。西陵十子。多以格調自高。去矜兼采。組於六朝。故特溫麗。田按。去矜樂府。安雅中節。五律高朗。七律雄麗。洵是才人之簡。

引聲歌

外極莽蒼。內保精粹。至人不言。四時咸備。理不出身。道不在智。形體塊然。神明所寄。虛心實腹。抱道守真。大化迴薄。與仙者鄰。運幹圓象。敷而廣輪。陰陽不害。庶得平均。

秋閨曲

寂寂璇閨暮。迢迢玉塞秋。紫苔生古砌。華月映空樓。寄書北雁少。臨鏡翠蛾愁。戍火遠猶見。寒衣擣未休。掩巾時裏淚。挾瑟憶纒頭。長聞銀漢裏。早晚會牽牛。

行路難

美人遙夜開金堂。輕軀緩步搖明璫。含情凝睇如不樂。博山火冷銷都梁。紈扇團團象明月。羅衣肅肅愁嚴霜。人非一身誰不別。攬此盛年情莫當。不見芙蓉猶並蒂。下有比翼雙鴛鴦。

晚眺

川原望不極。孤客自登臺。落日大荒遠。平沙秋雨來。青門生事渺。白石壯心哀。歸思西風後。空憐作賦才。

新霽

曉起積陰散。荒原極望時。雲晴芳草合。日上大江遲。世事獨不見。天涯有所思。山中媿高臥。得有外人知。

人日卽事

去國又人日。風光殊可憐。江鴻迴凍雪。沙竹淡春煙。世事交遊淺。鄉關戰伐偏。病餘聊騁望。無那惜華年。

震澤眺望

湖光千頃對斜曛。隱見三洲望裏紛。朔氣自蒸天目雨。秋風不散洞庭雲。橫琴坐嘯龍應下。岸幘驚看酒半醺。何日扁舟沙草外。可知鷗鷺是吾羣。

同柴虎臣張祖望毛馳黃景明登張氏樓晚眺

張氏樓高暮色深。諸公閒日暫登臨。沙邊雁落依春渚。雨外龍歸帶夕陰。湖海漫窮千里目。干戈難寄百

年心坐中誰是多愁客。苦對東風作楚吟。

九日言懷

九月九日意不愜。杖藜扶病登高臺。盈樽綠酒此時醉。舊國黃花何處開。金管玉簫激霜霰。銅駝鐵鳳生莓苔。望鄉不見遠天盡。蕭瑟江山歸去來。

旅夜

旅館淒淒清夜徂。半生流落愧妻孥。可憐戰伐多新鬼。何處乾坤著腐儒。砧杵萬家明月苦。旌旗千嶂野雲孤。帛書漫託南雲逝。未信衡陽雁有無。

久客

久客西陵道。蕭條愁殺人。梅花昨夜發。山縣又逢春。

復愁

遣愁一何難。復愁一何遽。湘水杜若開。欲采不得去。

遇俠者

將市百金劍。笑脫千金裘。相逢無一語。攜手上青樓。

柴紹炳四首

紹炳字虎臣仁和人諸生有青鳳軒集。

毛際可西陵五君子傳虎臣博聞強記下筆輒數千言華亭陳子龍負重名爲序其青鳳軒集以傳曰東甬奇士也性純孝聞父卒於官號辭欲絕見者隕涕里中兒以父筭出亡虎臣向之流涕曰僕雖欲如受父小杖詎可得哉作遊子遇孤兒行示之其人感悔自責。

張清原罄湖文集康熙己酉詔舉山林隱逸之士范中丞以先生應時已老病力辭乃已又謂刻其所著書則曰身隱焉文范嘆息而止。

西陵十子詩選毛馳黃曰虎臣詩如連雲夏屋亡論榷棟堅壯卽析悅構榷都無細材田按虎臣以行誼重小詩卻自綺麗。

喜陸大景宣歸河渚

征塗幾歲竭歸來。庾信江南重可哀。春雨草連村市沒。曉風花傍戰場開。我思賣藥仍無地。君定垂綸何處臺。總是他鄉成浪迹。故人相見且銜杯。

沈去矜見懷率爾奉酬

舊國離人賦轉工。幾經搖落向秋風。何堪芳草王孫綠。自惜名花簡子紅。去矜近習靈。簡子藥草也。吳越江頭方逐鹿。臨平湖上有冥鴻。於今每發相尋夢。定在蒹葭白露中。

江南絕句

明詩紀事 辛籤 卷二十八

三二五九

春來百種花。百花百樣香。癡小如花女。百樣可憐妝。

哭覺上人

即江子道
開號夢破

彩筆豪吟四十春。誰知布衲老風塵。江南花草渾閒夢。不道文通是恨人。

孫治二首

治字宇台。仁和人。諸生。

西陵十子詩選。毛馳黃曰。宇台筆墨清拔。淳而不疏。去初唐最近。故五言佳境。能挹武德之夷澹。兼垂拱之凝整。靜志居詩話。宇台刻意摹古。常質不佻。

清溪

徙倚清溪側。徘徊高柳間。鳥飛仍帖水。雲吐復歸山。野客荷鋤立。漁人擊楫還。狂歌出塵表。興盡掩柴關。

酬去矜十六韻

諸賢盛越絕。才子本吳興。大雅於斯振。風流夙所稱。賦成梁苑雪。詩詠玉壺冰。上客從鉛槧。佳人擁罷甃。雄辭奪鮑照。宮體駕徐陵。警枕盤龍錯。玄亭白鳳升。中原孰長弟。下走豈曹滕。似子才無敵。翛然帶不勝。關河愁極望。風雨夢相仍。菊戀陶彭澤。鱸思張季鷹。九歌虞太乙。雙樹問高僧。野徑尋芳草。扁舟賦采菱。蒹葭唯一劍。孤館對殘燈。白玉誰爲剖。青雲自可凌。賈生哀鵬鳥。莊叟說飛鵬。都是煙霞侶。幽棲共百層。

朱鶴齡四首

鶴齡字長孺，吳江人。諸生。有愚菴小集十五卷。

四庫總目：鶴齡始專力於詞賦，自顧炎武勸以本原之學，始研思經義，於漢、唐注疏，皆能爬梳抉摘，獨出心裁，故所作之章，亦悉能典雅醇寔，不蹈剽竊摹擬之習。其邨、鄒、衛三國，禹貢三江震澤太湖，嗜家漢源諸辨，多有裨於考證。嘗箋注杜甫、李商隱詩集，故所作韻語，頗出入二家之間，而寄興清遠，能不自掩其神韻。與錢謙益爲同郡，初亦以其詞場宿老，頗與倡酬，既而見其首鼠兩端，居心反覆，薄其爲人，遂與之絕。所作元裕之集後一篇，稱裕之舉金進士，歷官左司員外郎，及金亡不仕，隱居秀容。詩文無一語指斥者，裕之於元，既足踐其土，口茹其毛，卽無反嘗之理，非獨免咎，亦誼當然。乃今之訕辭詆語，曾不少避，若欲掩其失身之事，以誑國人者，非徒悖也，其愚亦甚云云。蓋隱指謙益輩而發，尤可謂能知大義者矣。

靜志居詩話：長孺說經，聲長於箋疏之學，所撰毛詩通義，尙書埤傳，禹貢箋注，左傳日鈔，發明宋儒集注，集傳所未及，顧不甚傳。惟杜甫、李商隱集注盛行於時，松陵文獻稱其遺落世事，晨夕一編，行不識路塗，坐不知寒暑，人或謂之愚，因以愚菴自號。蓋寔錄也。

春望

草色亂青縞，春歸綺陌斜。野煙生不斷，古樹禿還花。白鳥依漁艇，青山帶酒家。杖藜風日好，憑底答韶華。

過周安期山中故居

霜葉重重合翠微，石苔行迹尙依稀。身逃谷口名仍在，賦就甘泉世已非。書帶漫隨寒燒盡，薜帷俄逐水雲飛。白蓮蒼舊多凋謝，更與何人共釣磯。

柳枝詞

十里紅亭嫋嫋春。任他輕拂陌頭塵。如今世路輕離別。誰倩長條綰去人。

秦淮花燭詩爲江右蕭孟昉作

合歡雲錦爛花蹊。月扇銀燈隊隊齊。今夕蘭房佳氣滿。催晨不用汝南雞。

顧夢游五首

夢游字與治江甯人。副使瓌曾孫。崇禎壬午歲貢生。有綠茂軒詩集八卷。

四庫總目。夢游與葛一龍。邢昉諸人相倡和。詩格皆近中晚。施閩章序稱昉詩學勝才。夢游詩才勝學。亦二人之定評也。有學集。與治筆墨妍雅。晚年屢陷坎坷。無子。窮老以死。施愚山經紀其喪。又屬其友方爾止。網羅放失舊稿。手自排纂。刻而傳之。

今世說。姜子翥被難繫獄。與治力營救不能出。除夕。遣甥梁爾疇同囚守歲。久始得雪。莆田宋比玉與與治善。比玉沒。與治走閩哭。伐石表墓。南州蘇武子工古文。歿。與治鐫板行世。武子以有聞。北平于司直好奇結客。遊秦淮死。無恤者。與治含殮埋喪。又板其文傳司直。石阡費考功筆山罷官貧。分宅居之。歿。顧氏榮旁。始筆山令福清。稿佚。遠求得之行世。又周旋釋剝公難。幾株。及剝公寂。蒐其遼左雜詠存之。其高致類此。

愚山集。曹公學佺選十二代詩。士爭附以立名。夢游獨屬故舊遺草。而不及已詩。曹強發其笥。得一帙刻之。曰。真詩也。善行諸書。如靜女高士。閒逸可喜。

周亮工賴古堂集。與治詩。清真絕俗。別成一家。讀者望而爲高人介士之詩也。

田按：與治任俠有東漢人風，好刻故人遺集，其卒也。愚山爲之刻集，施報不爽，豈不信哉。

歲暮寄慧公

寒山無客到，破寺有僧存。數折入松徑，一籬開竹門。耕牛閒旱土，野雀噪飢村。託鉢應空返，霜天煮蕨根。

送邢孟貞還石臼

月當分手夜，分外冷高秋。蟲響坐來歇，林風相與幽。到家收晚稻，攜子上湖舟。莫戀衡門好，遲君上酒樓。

徐昭法山房同姜如須楊明遠賦

未免塵中去，其如惜別真。得朋能愈疾，留客不知貧。天地存諸子，兼葭老此人。相逢惟痛飲，往事莫沾巾。

吳門別友二首

未是還家客，船開亦當歸。可憐衰柳路，猶作斷蓬飛。勝地宜遊屐，良朋待款扉。霜天扶病去，山水兩依依。

臨發更移寓，多時住半塘。清秋閒竹杖，白日臥藤床。茶費老僧供，餐分高士糧。累人非一事，方晤久空囊。

董說十三首

說字若雨，烏程人。詩人遐周子，崇禎諸生。晚爲僧，名南潛，字寶雲。有人間可哀，采杉落葉西臺病。孔雀紅蕉登峯，臨蘭亭，雒陽洞庭雨，鬪韻牌，畫石西荒洗藥，積雨夕香，挂瓢拂煙等集。

董氏詩粹，豐葦菴集十一編，篇體驚奇，後依靈巖繼起和尚弘儲出家，詩亦脫落凡近，變奇麗爲清峻。

靜志居詩話。若兩腹笥便使。未免有才多之恨。至其硬語澀體。絕不猶人。方諸涪翁不足。比於饒德操有餘。

田按。若雨遜迹空門。未黜綺語。觀其自序云。我不能如世之詩。珠聯漢魏。璧合三唐也。又不能如世之詩。鬼言無帶。沈墮秋煙也。耽情於方外。合社於漁樵。遊夢於山經。孤癖於香法。可以得其意境矣。

諸葛菜

玉壘愁雲鵑血紫。花落幾迴桐鳳死。惠陵草沒石麒麟。昭烈陵名惠陵九陣圖空咽江水。蕪菁一握雁門秋。葛山打鼓祠武侯。

西田謠壽王太常煙客

西田老人雙頰朱。西田秀野天下無。爲督西田看雲約。十年不寄西田圖。花連鹿柴辛夷香。輞川流傳圖卷長。古今相望詩畫絕。輞川整暇西田荒。山水由來貴荒逸。高人雅會從真率。西園對話挂西窗。霜葉聲中看點筆。

漫興

衣借空階葉葉縫。杜鵑國裏買孤筇。未能逸俗朝評帖。一事如僧夜打鐘。眼底三千年舊蹟。夢中七十二青峯。人間難著支離叟。只合天台對古松。

客有和竟字斜韻詩余用其韻

醉漁曬網豎竿斜。鳧鴨聲中暫寄家。秋晚每租鄰舍艇。日斜去看別村花。沙瓶未賣留燒筍。樵笠新縫備採茶。碎石種成蒲九節。好題齋榜作青霞。

感懷

茅屋三間亂篠灘。繡苔石落燕泥乾。蠶眠初起桑園鬧。茶價新高瓦鼎寒。樵艇許分叉畫杖。竹籊喚揀釣魚竿。摘來姊妹花偏豔。白髮愁看獨倚闌。

菴居雜事

僮約新頒種樹科。擬鐫花歷石新磨。空堂鍊墨搗茶臼。細雨借書披釣蓑。書帶乍驚啣藥燕。卦錢移買放生螺。竹枝拗作池邊柵。爲怕兒童摘早荷。

書屋初成

九曲籬成自往還。亂藤遮屋不須刪。愁來草閣四窗雨。夢裏江南萬疊山。買艇劣容琴鶴共。種松兼辦子孫閒。一丸泥斷東偏路。只遣清風夜扣關。

住靈巖峯頂

家在松陵西復西。樵船春放鷓鴣溪。更生昔日元名向。中散先人舊姓奚。峯繞石樓遊是夢。眼空雲海物真齊。藥爐茗椀生涯冷。又盡禪房一甕齋。

舟居遙和石樹上人

一任人猜米老舟。莫教藤杖閉船頭。筆從白鷺飛時點。畫向青山影裏收。小住不嫌尋釣侶。移家明日換蘋洲。臥遊寂寂終輸與。落葉吟寒客未酬。

咏香煙

秦樓曲斷夜偏長。愁殺寒衣空自香。最是篆煙知妾恨。盤旋畫出九迴腸。

題昭君圖

天寒抱馬出邊頭。袖拂胡霜雲正愁。空有幽魂託明月。年年長照漢宮秋。

西村雨來

大幅東絹著水墨。雨在陽山箭缺西。陣雲未到桔槔卸。冷綠一堆雛鳥噉。

糊窗

幅幅凝霜照格裁。樵堂飛不到塵埃。白雲莫訝苦相拒。清曉看山我自開。

魏學洵四首

學洵字子敬嘉善人。贈太常卿大中子。鄉人私謚孝烈先生。有茆簷集八卷。

四庫總目。學洵給事中大中長子。大中忤關被逮。學洵微服變姓名。匿定興鹿善繼家。萬計營救不得。柩歸之後。竟以毀卒。世

稱忠臣孝子萃於一門。然學洵尙有老母而爲無益之死。或頗疑其過中。今觀集中與潘茂莊書曰。追比方始。洵將就浙獄矣。又辭里中父老書曰。日今公差來捉。且夕將死。家門傾覆。無復可言。然則大中沒後。所謂坐受楊錫。熊廷弼賄三千三百兩者。所司仍追呼於家。學洵積憂積瘁於前。積痛於後。又重以閹黨之威虐。數者交迫。乃無生理。非真以一冥不視。蹈滅性之戒。故學洵之孝。在於大中被禍之日。竭力殫心。蹈危履險。出萬死以冀一生。今誦其與人諸書。至性惻怛。足以感天地而動鬼神。而錢士升等作序。惟欲以隕身殉父稱之。遂諱其追逮之事。淺之乎知學洵矣。

靜志居詩話。魏忠節公被逮日。天大雷電。子敬獨跣攀號。請隨行。公語之曰。覆巢豈有完卵。父子並死無益也。子敬乃微服緹騎後探起居。抵國門。邏卒四布。乃變姓名匿都市。營救不可得。公既繫獄。扶欄歸。朝夕躑躅。未嘗一入寢室。淚盡聲焦。家人捧水漿以進。卻之曰。吾父詔獄中。執夜半而進之疑者。病且革。進以藥。則又卻之曰。吾父詔獄中。執診視而進之藥者。歷數旬而莫毀死矣。思陵卽降。朝士上聞於朝。以是海內稱爲孝子。大學士同里錢公士升序其集云。子敬之志。父存則不獨死。父死則不獨生。是誠孝子之知己矣。當甲子秋。忠節掌吏垣。以激濁揚清爲己任。天下仰望太平。子敬獨私憂之。歎曰。無根之草。其能久乎。物不可以終通。天始蘊隆正人之毒而速之感也。未莽而禍作。人服其識。

楠李詩繫。子敬詩近古淡一派。時而詭異。又似錦囊中物。

錢佳魏塘詩陳。子敬有至性。八歲就外傳。墮橋折足瀕死。不作呻吟聲。猶臥吟陶詩。以慰親意。弱冠才氣風發。詩文落紙。爲名流所推。

龐德公

龐翁襄陽人。不識襄陽縣。躬耕有餘暇。支頤玩時變。鹿門漾春風。吹落桃花片。區區一角天。兒輩已足辦。

茅檐雜詩二首

明詩紀事 辛籤 卷二十八

三二六七

獨坐不知夕。時聞棲鳥鳴。閒情懷應物。淡語憶淵明。近借鄰家棹。前移柳下罾。道逢田父返。相話荳花棚。孰謂貧多暇。箋詩更解玄。業隨當代後。癡到古人前。瓶滿陶潛粟。囊餘杜甫錢。願奢誰過此。老我只丹鉛。

秋興

一夕西風到畫欄。芙蓉消瘦不禁寒。身無同調人應笑。坐有新詩眼倦看。逐伴未能忘袒裼。閉門聊自愛衣冠。晚來斗酒長吟處。月下天高白露溥。

湯傳楹四首

傳楹字子輔。更字卿謀。吳人。諸生。有湘中草六卷。

田按。卿謀早擅才華。詩多綺語。亦有雋語。惜年僅二十五而夭。未見其止。

臥雨有懷次展成韻

遠漏沈於夢。溼螢墜不流。氣涼初著枕。光澹卽生秋。竹雨彈虛壁。溪雲照小樓。客心無可寐。清思上簾鉤。

曉望

光景雜然出。因知人境閒。初煙濛獨樹。宿雨互前山。搔首愁無際。吟魂澹不還。江南清曉處。幾疊畫屏間。

荒寺

蕭條畫堵閉寒塘。寺額模糊失漢唐。廡曲山魃時弔月。歲凶野老不焚香。蒿萊蔓引談經坐。烏鼠縱橫選

佛場金梵已隨煙火盡。一僧捫蝨立斜陽。

新婚

日影和煙上畫廊。雙鬟悄立整羅裳。傳來絮語欺鸚鵡。睡足脂痕暈海棠。扣領含羞留待束。褰帷匿笑不成粧。守宮的的爭衾豔。未許人前理繡床。

繆永謀十二首

永謀字天白。更名泳。字于野。又字潛初。亦曰一潛。嘉興人。諸生。有荇谿集。

靜志居詩話。天自詔年深懲公安。景陵流派。一以肅統。徐陵所選及左克明。郭茂倩之書。規模傳習。及周覽四方。風氣雖殊。終不改度。可謂有君子之守者。

梅里詩輯。天自詩。寓感慨於和平。寄高華於激壯。風格與雲間陳臥子相近。

田按。天自諸體俱工。七絕尤有丰韻。

築隄謠

朝築隄。暮築隄。築隄何辛苦。天雨三月。漂我田廬。什四五。縣官徵役夫。役夫無家室。但宿隄下土。朝行荷鍤。暮行乞食。乞食路傍人。飢來不得力。前年築隄未立。今年塞河河更急。洪園竹木下已盡。柳條無枝。伐不息。明年隄成多種樹。爲作官家騎馬路。

芳樹

芳樹不知名。婆娑樹下行。應憐美人意。爲傍玉階生。綺戶春風滿。高樓日暮情。年華猶未晚。搖落使心驚。

擬古詩

盛年不再得。志氣無窮期。今日不爲樂。來日安可知。爲樂將奈何。去日常苦多。中流載簫鼓。一醉朱顏酡。僂人如不死。何不來相過。

金陵篇奉寄外舅王翁

四坐皆清聽。聽我歌金陵。金陵天府國。都邑自相承。龍盤虎踞雄。江左畫閣連。雲接青瑣。重門大道七香車。桂楫蘭窗九微火。渡江名族舊繁華。共羨王家勝謝家。十二珠樓萬年樹。三千繡戶滿庭花。當年尙憶曾遊處。幾歲移家洞庭去。今年復事金陵遊。南鄰北里相淹留。秋風不識烏衣巷。明月斜臨白鷺洲。雄心慷慨應如昨。擊筑高歌重然諾。囊中不惜沾酒錢。天涯且就金陵約。平生自媿郗公親。吳苑棲遲三十春。窮途意氣無所惜。寸心感激誰能陳。卽今搖落江村暮。舊恩遠憶金陵樹。一望金陵思渺然。石頭城北五湖邊。何時滿酌金陵酒。更醉高堂紅燭前。

上巳前一日遊支硎山

地迴羣山接。支硎入望來。昔人今不見。遺迹自荒苔。曲水迴香閣。長松拂講臺。更貪風日美。花下早流杯。

諸將

大將仍兼五等崇，橫戈躍馬舊稱雄。風塵關塞三千里，倚仗安危六七公。西楚包茅今不貢，東方杼柚久應空。山河帶礪虛盟誓，麟閣何人第一功。

越中感懷

會稽南幸越王宮，舊國山川尚禹功。千里旌旗橫海上，一時豪傑數江東。龍沙日下荒城閉，雉尾雲移玉殿空。遙想巡遊多歲月，樓船寂寞起秋風。

鴛鴦湖

南浦秋風長綠蘋，湖光一色淨無塵。鴛鴦驚入荷花去，唱徹菱歌不見人。

傾脂湖

紅粉青娥夜洗妝，臙脂落盡御溝香。于今流水空宮裏，猶送飛花出苑牆。

見月

北風吹後海雲寒，城上棲烏繞樹難。今夜關山有明月，一時秋思滿長安。

春思

樓前楊柳數行斜，樓上美人愁落花。燕子不知春已暮，銜花將去入誰家。

登舟

石城春色過江灘。七里洲前夜未闌。一笑登舟望明月。回頭不見小長干。

胡山十一首

山初名日新。字天岫。宜興人。諸生。僑居海鹽。徙嘉興。有葑汀、寓廬、東武諸稿。

梅里詩輯。葑汀詩。超邁清空。激昂蕭瑟。五律尤勝。

田按。天岫賣藥梅里。隱處市園。古詩雄快。煙雨樓一篇。聲情綿邈。有猿吟鶴唳之音。五律亦自清婉。

秦山懷古

秦皇奮咸陽。六合縱虎視。雄若萬馬馳。羣英直犬豕。滄海何足夷。猛氣壓倫比。嵯峨海上山。蠡峙波濤裏。左輦宮中人。前驅挾飛矢。東望卻蓬萊。西顧渺弱水。白雲自去來。仙草紛若芷。徐福招未歸。沙邱腐天子。

古詩

長生希大藥。入山炊丹霞。呼吸龍與虎。黃金化泥沙。服之壽天地。顏色如舜華。燭火易以滅。遠行易以歇。上士澹無爲。珠光抱明月。

咏懷二首

雲從西山來。宿我崖下屋。高松夾修篁。絕壁瀉飛瀑。抱膝謠鳳凰。清音激空谷。抗手招仙人。雲中下白鹿。秦王尙狙詐。策士紛闖東。時無龍虎士。遂令雞狗雄。朝橫暮復縱。嬉戲如兒童。淳酒死信陵。六國生蒿蓬。

萬古一片月。清光流絲桐。

烟雨樓

烟雨樓頭夕照多。烟雨樓空可奈何。烟消雨歇樓何處。只有鴛鴦泛碧波。鴛鴦湖水波千尺。鴛鴦湖上曾相識。綺羅城郭錦江山。桃李容華玉顏色。惟將歌舞送東風。若個妖嬈冠南國。憶昨承平隆萬年。滄海無波弓絕絃。奇琛四出中貂使。仙鹿時騰幕府棧。十里滌湖通笠澤。幾灣語水下由拳。裴住宅畔塞芳芷。陸贄橋南鬪采蓮。水上軒窗微隔雨。波心欄楯巧疏烟。太守便爲游狎長。豪家不惜粉脂錢。當湖公子藏輕俠。不逞探丸聚肘篋。風角妖人指異星。重瞳秀士驕長鬣。盡道封侯骨相成。那知滅族門誅涉。酒後狂圖隱語書。幾乎血濺南湖楫。春草春花春復秋。湖上女兒紅黛愁。金陵薛五茸城柳。洗盡臙脂此地遊。名士傾城爭一笑。詞人公讎滿高樓。聯吟共宿芙蓉艦。灑酒重臨杜若洲。片紙初題嗟妙手。千金立贈當纏頭。花枝不炤買臣墓。螺子偏迎范蠡舟。獨有賢豪負時彥。七省五侯交託徧。遙持啓事致山公。共羨人倫歸水鑑。白馬橫馱輦下金。黃蛇暗掣空中線。轉向回天咳唾間。翻雲覆雨須臾變。卿相趨朝盡過門。監司候宅稀留燕。當樓選勝闢名園。隔水開林起歌院。妖童委首似鴉頭。小婢教歌皆粉面。舞衫歌扇滿房櫳。子弟梨園侍羞饌。畫橈齊放水中央。湖舫留賓百戲張。冠玉參軍低綠幘。明珠角伎賽紅妝。目成色授潛留佩。怨粉愁香悵隔牆。勢去朱門惟墜吻。邸封青岸有垂楊。孤兒亡命移名氏。藁葬歸魂送夕陽。乾坤龍戰

烽烟起。萬騎南征渡江水。俄頃降幡上石頭。忽見義旗橫櫓李。詞臣珥筆說孫吳。省郎仗劍開營壘。鶴湖鵝湖同濟師。平江吳江各傳矢。可憐一夕響鳴笳。十萬義師血剝豕。繡旗半折冷仙祠。雕戈虛插桃花里。烈燹高燒萬井空。雨散烟飛巨礮中。迴廊曲檻祗聚礫。畫棟重檐付祝融。當時倚闌人誰在。唯見荒臺月色同。

酬朱人遠

城樓高望極。萬騎蹴雲來。愁易驅人老。懷難逐凍開。庭梅看欲動。戍鼓聽仍哀。拌醉今宵酒。爐中火未灰。

月夜憶舍弟

萬里同明月。離人只獨看。故園烏鵲樹。吟望不知寒。坐使芳草滿。孰憐遊子單。夢魂頻見汝。努力勸加餐。

登山

野水兼天闊。浮雲共鳥飛。連峯七十二。何處是漁磯。深樹聞清磬。孤帆帶落暉。寒塘秋草外。不見一人歸。

暮春卽事

春暮過橫塘。風吹桃李香。明霞浮曲水。小艇下斜陽。樓上聞歌罷。罇頭索酒嘗。胡姬年十五。織手理新妝。

聞笛

夜半客欹枕。月明人倚樓。梅花吹數弄。野戍迴含愁。曲豔知紅袖。音淒易白頭。深閨有盧女。應自不禁秋。

得舍妹手書

寒流孤嶼外。夜雨一燈深。不寐渾無計。開書淚滿襟。浮雲江上意。游子故園心。戀戀真傷汝。淒然起越吟。

韓洽十首

洽字君望。長洲人。有寄菴詩存。

靜志居詩話。崇禎之際。言詩於吳下。吾必以君望爲巨擘焉。匪特高節軼羣也。所撰篆學測解。釋訓考源。足證說文。長箋之誤。田按。君望詩。質慤而有真意。乃知高蹈之士。不尙浮藻。

言懷

梁鴻古高士。賃舂復牧豕。馬援大將才。田畜就邊鄙。管甯鋤菜畦。遺金曾不視。龐公隴畝間。釋耕對妻子。遐哉漢人風。去古似猶邇。不知澆訛俗。乃自何代始。或曰自晉朝。清談廢實理。勤恪謂俗人。虛無則名士。廉恥日益喪。爭奪日益起。于今千百年。斯風將何底。信矣王何罪。桀紂不足比。

雜詩

海水爲平陸。泥沙困巨鯨。世無堯舜主。稷契老躬耕。嘆彼秋蓬弱。隨風萬里征。西施何必美。亡國乃傳名。

揖山樓

高樓三面青山立。山人愛山揖山入。一時相對忘主賓。佳樹佳花成翕集。青山斷處是湖光。風濤萬頃送

相望高帆白鳥互明沒。別作平臺對秋月。山人愛山兼愛文。壁間題詠紛煙雲。我來一揖不相拒。知余亦是青山侶。

岳墳

斧斤日出錢塘門。冢上松楸無復存。馬鬣荒涼燭髓泣。子孫飲恨徒聲吞。栖霞嶺畔南枝墓。犯者倉皇輒僵仆。健兒相戒莫敢窺。蒼翠森然獨如故。武穆英靈性自殊。嗟哉所見太區區。趙家社稷今安在。卻愛墳前樹數株。

題李龍眠諸夷職貢圖

有唐貞觀萬國甯。殊方異域皆來庭。立本爲圖擬王會。詭形怪狀流丹青。龍眠居士生有宋。未必諸蕃真入貢。得毋舊本重臨摹。左食貫胸聊玩弄。元豐天子承平日。君臣競講強兵術。不知中國正凋殘。馳想海邦兼日出。貢糒西旅四夷賓。作訓猶煩保傅臣。爲問伯時圖作貢。何如鄭俠繪流民。

贈沖上人

已悟三生幻。因于萬事慵。遙聞傳法處。空翠隔雲松。洗鉢緣清澗。開門揖遠峯。孤蹤自林壑。未許俗人逢。

箭關

一望秦餘頂。天然箭筈形。卻疑渾翠壁。誰與鑿青冥。帝力營雙闕。神功役五丁。憶曾盤鳥道。捫蘚立雲屏。

關山月

曉角數聲哀，邊風捲地來。十年征戍客，不上望鄉臺。

昭君

漢主何煩責畫師，畫師曾可定妍媸。深宮多少如花女，不嫁單于君不知。

野泊

溪上人家水鳥飛，桃花一簇近漁磯。長年打酒纜船去，獨坐篷窗看澣衣。

吳騏十首

騏字日千，松江華亭人。崇禎諸生，有頗頌集。

靜志居詩話：日千方崇正始，其詩沈厚不佻。

明三十家詩選：日千幼有神童之目，讀書過目成誦，以詩文受知於陳忠裕、夏忠節兩公。父遇兵，傷左臂，創甚，杜門奉侍，明亡，絕意進取，自號九峯遺黎。康熙中，同里某分修明史，日千貽之書，略曰：知執事撰先朝景帝本紀，景帝功在社稷，當時實錄，取媚英廟，極其諛飾。夫景帝雖藩支，然以高帝視之，此安我宗廟者也。仰維濬發幽光，不勝翹企。又先達張慎齋名祚，以侍御外轉廣西僉憲，佐韓襄毅轉餉盡瘁，襄毅果於殺戮，而慎齋多方營解，全活甚衆，今縱不得立傳，或於襄毅傳中略附數語，幸爲留意。督師袁崇煥坐叛逆受極刑，當時不知其說所從來，後讀范文肅公行狀，始知崇煥之死，乃文肅之反間也。陳平之勳，已彰於六出，亞父之枉，宜白於九京，相國錢機山以逆案一書成於其手，好薰衡之刺骨，坐與崇煥同叛，擬大辟，愚陵云：謂龍錫

爲叛必不其然。思陵之明不可沒也。其表揚潛德如此。顧頌集詩於蒼涼古直之中。極沈鬱頓挫之致。蓋親炙大樽而不盡沿其派者。

田按：日千詩音節抗亮。與陳黃門李舒章結社。厥後黃門殉國。舒章仕本朝。日千悼黃門詩云：寒食東風草樹稠。宮林夙昔想同遊。銜杯晝永花臨戶。論易宵分月上樓。四海無人藏竈壁。千秋遺恨託江流。生芻麥飯俱寥寂。落日荒原哭太邱。又書李舒章詩後云：胡笳曲就聲多怨。破鏡詩成意自慙。庾信文章真健筆。可憐江北翠江南。可稱詩史。

烏棲曲

丹霞初散明蟾吐。採蘭歌發芙蓉浦。羅衣玉腕自操舟。那能相遇不同遊。

釣竿

濁水魚肥。清水魚鮮。淺水釣易。深水釣難。義不向濁水。古人曾有言。理我百丈絲。持我青琅玕。釣得潭中魚。停綸起長嘆。得魚誠本懷。釜魚心悲酸。縱爾江湖去。騰雲上九天。

戽水歌

東南風急大麥枯。秧田夜夜鳴螭蛄。鄰農相約共戽水。未及四鼓來喧呼。河港淺隘潮信小。待得天曉水已無。披衣躡屨急趨出。咿啞遠近聞轆轤。明星滿天爭唱歌。腳根騰踏忘勤劬。東方漸明日欲出。白榆樹上嘯慈烏。歸來饑倦汗濡縷。瓦壺麥粥甜如乳。埽場曬麥日欲午。旋割蘆芽餵童牯。本綿衫著不得。無錢買褐空嘆息。

輓呂驪仙母吳氏二首

早歲失君子。冰霜三十年。寒燈背風雨。塵土滿釵鈿。九廟今安在。餘生敢自憐。殷勤囑陶侃。努力向幽燕。社稷有今日。諸公將謂何。自慙弱女子。無力障狂波。窺窳歸何恨。衣冠事尚多。淮南四大帥。幾日渡黃河。

春感二首

自有東風動暮寒。更無遲日到欄干。震雷朔雪相兼至。岸柳江梅次第殘。慟哭虛傳河右表。謳吟猶望鄗南壇。山川風景今何似。獨上高樓極目看。漢皇陵寢鍾山上。珪瓚年年事祝釐。永夜羣靈朝虎帳。有時陰晦見龍旗。青桐溜雨千章木。碧瓦含風百尺基。七載不窺松柏路。夢中瞻拜重淒其。

漢昭烈

名儒虛鄭久周旋。正值黃星受命年。蛇劍已移三統歷。蠶叢還闕半隅天。金甌付託耕莘佐。玉几彌留顧命篇。一代英雄生死際。銅臺遺令最堪憐。

寄懷金天石

故人落窳依江海。遠賦新詩慰寂寥。天下幾人能隱遯。漢家九鼎賴漁樵。煙疏檜柏停春雨。水黑蛟龍起暮潮。憶爾臨風空佇立。綠楊飛絮滿河橋。

題畫蘭

幽蘭雖芬芳，靈均自憔悴。三戶寂無人，託根在何地。

毛晉二首

晉，初名鳳苞，字子晉，常熟人。

吳儂業梅村集。丁亥季秋，因訪楓林，扁舟過子晉齋，留宿汲古閣。牙籤萬軸，較勘精良，又多趙宋舊本，使人讀之如桃源衣冠，非復今製。顧麟士同坐，相與嘆息，以爲子晉嗜古篤學，結習編纂，雖歐公之於金石刻，王弼之於書畫，不是過也。馮班鈍吟文稿，吾友毛君子晉多聞而好事，藏書數萬卷，詩人之至虞邑者，以隱湖爲歸。詩筒織寄，遠屆巖微，車馬過從，文酒之讌，未嘗曠旬虛日。座間擘箋，長篇險韻，四應不疲。

陳瑚確菴集。子晉家隱湖之上，績學多聞，性好客，客至則翦韭烹葵，欣然命酌，出其藏書數萬，與客賞奇文，析疑義，傲古人月泉吟社，玉山草堂之遺風，酒酣耳熱，分韻賦詩，家有剞劂良匠，朝落紙而夕上版矣。

田按：子晉嘗輯明詩紀事，未見傳本。汲古閣刻書甚夥，此後如道志堂、士禮居，知不足齋、借月山房、守山閣，別下齋，皆聞風繼起者也。

十八日曉霽登塔

快雪交春燈，午夜光了了。登陟興方劇，未旦神光曉。竦身上浮屠，輕疾如飛鳥。插江碧玉城，一朵芙蓉小。

看梅和高季迪韻

一入香林便隔塵。峯頭升眺更撩人。波光嵐翠無餘地。冷韻孤標別有春。日煖若教開漸漸。風微那忍落頻頻。華光今日知誰繼。聊借題詩當寫真。

曾燦十一首

燦初名傳燦。字青藜。甯都人。有止山集六卷。

有學集。青藜詩。晤言十之。永嘆五之。其思則黍離夢秀也。其志則天問卜居也。

魏叔子集。止山爲人。愿樸沈摯。少負才華。以風流相尙。爲詩工美多豔。及遭世變。詩日趨於老樸。

詩觀初集。青藜躬耕讀書。際期高邈。

田按。國初選家。王阮亭有感舊集。陳其年有篋衍集。錢牧齋有吾炙集。葉訥菴有獨賞集。鄧孝威有詩觀。陳伯璣有詩慰。曾青藜有過日集。過日雖不及感舊。篋衍之精。然摛採宏博。余此集勝朝逸民詩。實得之過日爲多。

長沙雜興

賦鵬憂賈生。懷沙沈屈子。古來放逐臣。傷心在湘水。我獨何爲者。崎嶇亦到此。朝看落葉飛。暮聽秋風起。離憂日日生。不知何所始。昔人曾有言。山水多窮士。

靈巖喜遇三輪上人

天地皆殘夢。江湖少故人。十年家國淚。萬死水雲身。三輪昔曾與楊藉草聊爲坐。看山可當鄰。還將瓢笠意。辛苦問靈均。

同姜奉世舟次送春各成二律

綠樹千村暗。清谿一水長。孤舟從此去。十里卽橫塘。山鷓催寒雨。林鴉噪夕陽。與君歸秉燭。共坐惜春光。但覺花飛了。安知又送春。百年三萬日。四海一孤身。閱世憑憂患。全生愛賤貧。歲華流水去。催盡白頭人。

西竺寺苦雨

何代黃金寺。人來地覺偏。苔霑高礎溼。花委小池鮮。古屋生雲霧。春江走歲年。似從巴峽住。日日聽嘯鶻。將立春同李咸齋彭中叔散步眺望

羣動各有息。茲遊成我閒。草知深淺處。春到有無間。寒石自流水。夕陽多遠山。離離林下屋。時見鳥飛還。

恭謁金龍王廟

王姓謝名緒宋末以諸生死難。誓曰黃河倒流卽吾報仇之日。

下拜遺宮此布袍。觚稜斜日動旌旄。山川何事多新壘。舟楫依然轉舊漕。萬里魚龍南去盡。初秋星斗北來高。茫茫千尺黃河水。不見當年起怒濤。

送劉毅可歸江南

芳草萋萋已暮春。相逢喜在贛江濱。吾生只合烏鄉老。世事還同白髮新。鳥路千山縈落照。鶯花三月送歸人。故交相見如相問。爲道曾生今更貧。

甲寅夏五雨中懷吳伯成明府

榴花初放綠陰齊。宿雨沈綿沒路蹊。溪水亂流城郭裏。雲峯時擁縣樓西。遙知愛客嘗投轄。每借看山一命題。幾度欲來尋舊侶。闔閭城上亂烏啼。

平山堂弔古二首

爽氣四來積翠寒。金陵千幃見龍蟠。君王只愛聽歌舞。碧水丹山不肯看。
荒堆古路散斜陽。見說宮人葬蜀岡。芳草不知春去久。西風猶帶綺羅香。

胡介七首

介、初名士登。字彥遠。錢塘人。諸生。有旅堂詩集。

梅村集。余遇詩人胡彥遠於長安。每酒酣詔客曰。吾家在武林之河渚。僻澗覆。人迹罕至。煙汀霧樹。視之既盡。杳若萬里。彥遠自以居山久。一旦來京師。策斧尾驢。郵便面。行泥淖中。鬱鬱不得意。發病思歸。他日有棄家變名橫山河渚之間。莫知其處者。其必彥遠也夫。

漁洋詩話。胡彥遠布衣食貧。而妻與女皆能詩。順治中遊京師。送人南歸云。帆檣楚國翠鳥晚。桡櫂吳天一雁晴。

靜志居詩話。彥遠與室人翁少君門內唱酬。晚逃于禪。年未五十而卒。其詩不屑效西陵派。謂吾盡吾意。免俗而可矣。

今世說。胡彥遠高自樓託。神理雋邁。嘗隱河渚。近止城北。芳樹池塘。環接戶外。諸駿男過談。彌日。歸語人曰。嘗謂永興南穴。汲郡北山。緬邈。不謂近咫尺。

田按。彥遠以詩遊長安貴人間。吳梅村有詩贈之云。雖入王侯門。不受公卿舉。萬年少贈詩云。河渚經營把釣綸。乾坤草莽一

閒身南陽高臥眞名士。東漢餘生舊蹟人。十載空齋同入夢。三冬冰雪獨傷神。荷鋤歸去田廬閉。莫向人間學問津。紀伯紫有贈彥遠南歸詩云。灣比松下禪。堅類柏舟婦。一家河清樓。梅花帶左右。入林恐不密。數峯當戶守。內子亦苦吟。研山問井臼。置君神仙中。無迴圖畫醜。此語今十年。夢魂未嘗負。莫帶長安塵。輕點溪頭酒。皆有招隱之意。彥遠既歸。晚逃於禪。蓋已爲竹垞所許矣。故錄入此集。

感懷

庭鶴不自得。步影心悠悠。本是雲霄姿。馴人耳目求。餉我一握粟。令我失滄洲。斂翮發清嘯。寄聲謝同儔。清苦有餘樂。行矣毋自讐。

發邗上寄邱四宋丈兼傷萬年少之逝

二月下蕪城。桃花春水明。新楊喧浴馬。廢苑寂啼鶯。郊外無軍壘。人間賴友生。存亡兼契闊。悲喜總傷情。寄龔野遺

一葉落高木。草堂秋自生。故人已千里。明月欲三更。憂患存終古。饑寒見老成。霜清憐永夜。回首望蕪城。吳梅村被徵入都

幕府徵書日夜催。宮開謁石待君來。歸心更度桑乾水。仗櫪重登郭隗臺。花萼春迴新侍從。風雲氣隱舊蓬萊。暮年詩賦江關重。輸卻城南十里梅。

訪陸冰修不遇宿接濟寺明日題壁而去

鹿門人遠枉招尋。還宿谿南祇樹林。暫與僧間初定夜。自傷我負舊來心。長河日落魚龍晚。古殿燈昏風雨深。雞唱可憐衝曉去。參橫月沒一長吟。

建州酬龔中丞芝麓

薄遊戰地歸何晚。此日初還南建州。兩外孤帆傷久客。月中雙笛憶前遊。浮沈雅合金門隱。偃息偏逢鐵甕秋。傳得新詩盈瘴海。一時風雅盛曹劉。

康山謁忠臣廟

康山無恙太湖濱。廟貌忠臣廡食新。官渡夜濤驚隔代。老松古殿暗經春。支離天地常爲客。慘澹風雲各有。人躑躅荒庭銅狄恨。羣公應有淚霑巾。

邱世望十首

世望字當世。武陵人。諸生。有江籬館詩三卷。

沅湘耆舊集。龍太常稱當世詩。力挽波靡。根柢性靈。

田按。楚詩多爲竟陵所染。彌望榛棘刺目。當世詩特清俊。如亭亭新荷。不染污泥。

夏日池上作

幽居傍城僻。環宅美漣漪。高柳垂長條。深夏益離披。小屋跨池上。坐與清輝宜。涉境意已佳。稍深情轉怡。

息機遊渾沌。把卷搜神奇。隱几忽嗒然。此樂心獨知。彭澤千載遙。高風邈難期。吾亦慕寥廓。斯人良足師。
輓鍾伯敬

負才不在大。精詣乃成家。君詩貴清冷。往往棄春葩。叔寶妙玄言。惠施徒五車。仕宦豈不達。所悲生有涯。
千秋名士籍。展卷動咨嗟。

春初雨後看梅花

春煙散朝綠。石溜洗蒼苔。徑僻鳥逾寂。林疏梅正開。壓牆殘雪映。趁雨冷香來。恍泛瓊漿飲。何須更舉杯。
暮雨

暮雨一何急。殘花風更摧。病餘思斷酒。愁至轉銜杯。羽檄飛城郭。徵求罄草萊。那堪聞野哭。慘慘暗雲隈。

夏日德山

性與空山狎。來偏深夏宜。幽蹤尋壑遠。孤賞戀松遲。竹露晴猶滴。曇香靜自知。坐沈煙外磬。新月照來欹。
陳衡靈自欽海還攜酒過集

小隊衡門枉。芳尊海國移。故情添酒洽。老興發春遲。保障饒公等。江湖足鬢絲。不嫌疏簡慣。頻許細論詩。
得伯孔書聞將過大梁有寄

秋深彌憶子。搖落更何之。俗薄無交道。書來有夢思。關雲寒自溼。江月晚相宜。欲問狂夫態。青編坐日遲。

送汪遺民南歸

執手河干客緒紛，綈袍霜冷悵離羣。
天風吹下衡陽雁，鄉思先飛海國雲。
入里詞人驚盛藻，過湖龍女乞靈文。
桃花遲爾春來棹，預唱離蕪爲憶君。

九月八日

茅堂寂歷瑣秋陰，涼吹蕭蕭動夕林。
綠酒偏於時節好，黃花難向雨中尋。
登臺何客同明日，搔首高天且獨吟。
世事驚心凋短髮，不教狂態費朋簪。

輓龍灑公先生

二十登壇四海聞，新都吳郡許空羣。
方瞻帝幄咨元老，忽悼詞林失冠軍。
瞑入荒村棲定鳥，霜寒野水澹斜曛。
平生一掬西州淚，灑向南天并作雲。

蔣之葵六首

之葵，字天植，湘陰人。有江聲二集、四如小草。

沅江耆舊集：天植幼善屬文，有羅江才子之目。蔡江門先生尤重之，與同郡趙友沂、郭幼隗齊名。性豪邁，喜結納，與遊皆當世賢豪。處亂世，汲汲以澄清天下爲己任。甲申後，崎嶇戎馬，以勞卒於粵。

田按：天植詩，豪宕自喜，有拔劍悲歌之氣。

善哉行

去日莫論來日大難。憂心可藏。髮白難刪。解一河大多水。山大多雲。周王多道。列戟射君。解二柳季掩戶。爨出中堂。福來千里。禍起蕭牆。解三斗有美酒。盎有肥羊。君子豫悅。小人猖狂。解四黃鸝知春。鴻雁知秋。時過不返。水去難收。解五蜀犬吠日。吳牛喘月。少見多怪。嵇公眼白。解六食梅苦酸。衣葛苦寒。不可告人。徒傷肺肝。解七

懷王山長

記得尊前約。重門深數過。每逢落葉處。無奈斷腸何。山意隨松古。秋聲入雨多。衡陽雁迹杳。回首趁蒼波。

飲郭幼隗山莊

春水盈盈起綠蘋。一尊移話共南鄰。人間欲殺狂爲累。世外相知貧是因。野叟密談分菽粟。素心閒伴數昏晨。銜杯張目看天地。判與連觴浹十旬。

送青原無可和尚

萬緣收拾上蒲團。春夢如今興半殘。清淨莫留文字障。頑空悔冒宰官餐。容僧便覺天恩大。出頂方知佛法寬。嶺表煙深難住錫。好攜明月到湘干。

江南行二首

江南年少酒家過。下馬傾尊索酒多。實劍脫來隨意贈。揮鞭長嘯指天河。

江南女兒貌如花，手勻輕黛新月斜。千乘萬騎盡回首，不知心事託誰家。

韓純玉三首

純玉，字子蘧，歸安人。修撰敬子，有蘧廬詩集。

四庫總目：純玉父敬以黨附湯蜜尹見擯於時，純玉以是抱摠終身，不求仕進。其行蹤略具所作蘧廬詩自序。及集中癸丑五十一生朝示兒詩中。

靜志居詩話：中吳韓君望、西吳韓子蘧皆輯明一代之詩。君望曰：詩存，子蘧曰：詩兼。惜其書均未布通都。二子先後奄逝，其家人故友不復肯出，恐終歸覆醬而已。

卮按：子蘧明詩筆序云：有明一代之詩，比美三唐，俯視宋、元、洪、永景運初開，犁眉遠邁，燕許海叟，追蹤少陵，高、楊、盧、駱、林、藍、曾、許、可、希、王、孟、高、岑、景、泰、流而爲纖麗，成化疏而爲清越，北地、信陽、合七子以前，歷下、婁東、合七子以後，踵事增華，守而勿化，竟陵陶汰過當，而溺於幽涼，雲間欲還正始，而近乎郭廓，各殊其趣，各持其見，學者又各師其說，瑛一格以繩天下，必欲人而如我面，強我樂爲子樂，語言歌獻，異口同聲，而始稱入彀，是則優孟衣冠，長存千古，新豐宮室，徧列九垓矣。他如石倉濫登庸冗，莫辨淄澠，虞山廣肆譏評，徧揭曹鄴一失之寬，一傷於忤，其爲病也。又與固執等，余博蒐約採，或繁或簡，或平或奇，或莊或逸，或淡或濃，要皆各因其質，各達其情，各極其趣，而後愉快。從前諸家之徧心局識，悉舉而銷鎔之。子蘧之論如此，惜不得其選本而覈之也。

過姚十四莊居

路從芳草入，門向遠山開。種樹交青鷲，攜尊藉碧苔。河魚逆水上，海燕掠風回。更欲留深坐，重闌暮色催。

鄧尉山遇徐昭法卽別愴然有懷

吳趨間隔宿百里，離亂相兼十二年。此日弟兄仍一面，曩時師友半重泉。同依慧日爲禪侶，忽遣樵風送客還。無限斷魂收不盡，長松習習寺門前。

乙酉秋日同獻兒寓慧雲寺

先人題額依然在，彈指於今六十年。攜子重來我又老，逢僧暫住客如前。參天竹樹沿階長，滿地菘菹入饌鮮。圓澤不須頻問訊，三生好話舊因緣。

周篋九首

篋，初名筠，字青士，別字篋谷，嘉興人。有采山堂集二十四卷。

靜志居詩話：青士遭亂棄舉子業，受陳寶來，有括故家遺書連船鬻於市者，買得一船積樓下，每日交易，篋當斗斛權衡堆滿肆，讀之糠粒中，其爲詩句敦字琢，不輕襲前人片語，胸無柴棘，急人患難，視朋友如一身，人或忘大德而思小怨者，不以眞語懷也。晚年詩趨率易，好與浮屠道士遊，題詠極多，嘗醉書云：似士不游岸，似農曾讀書，似工不操作，似商謝奔趨，立言頗突兀，應事還拘疏，飢凍不少顧，吟詩作歡娛，可當一幅寫照也。

梅里詩輯：青士詩篇，清超樸淡，五言尤勝。

田按：青士與竹垞爲素交，竹垞表其墓，仿柳子厚獨孤申叔墓碣書故友姓名於後者九人，王翊、介人、范路、遵甫、朱一是近修，王汾子明、沈進山子、李麟友、振公、朱彝鑿千里、褚標、震建、周篋林於九人者，皆能詩，以介人爲最。

秋夜懷李天穀

夜半落寒露。微風颯然起。湖光不知夜。秋明荻苗水。河漢繁星飛。一月靜如止。煙樹傷遠懷。伊人渺千里。

夜眺

中夜松徑黑。不知山月高。淒風動林木。萬竅皆怒號。宛如泛孤舟。危坐驚波濤。溼螢墮遠水。野鶴鳴寒皋。人生亦何常。哀樂隨所遭。長歌望河漢。何以解鬱陶。

渡漢塘

孤舟出新豐。初涉漢塘水。日落秋氣生。水曠寒煙起。返照漾菰蒲。微風蕩蘅芷。征帆去悠悠。我心渺何已。

宿揖山樓

偶爲寂寞遊。遂得高寒境。天浮長泖闊。雲落橫峯冷。出林鐘磬聲。繞檻星河影。弱喪未知歸。吾衰當猛省。

舟行

紫藤纏樹懸野香。清溪歷歷澄幽光。櫂聲初撥裂雲色。菱絲苕帶吹煙長。遠山微茫銜半影。溼嵐不落空濛冷。枯篷短楫憑空行。一葉虛浮去俄頃。高林飄杳雨滴衣。天驚石泣鳥不飛。櫻人突兀老松怒。山精窳率相因依。寒陰初散孤蟾起。鄉園擁隔悲千里。驚湍汨沒魚龍哀。風吹露下如秋水。

西溪夜歸簡一潛

黃昏過虎溪。相逢石門西。風磬隔林斷。漁燈入浦迷。天空月皎皎。草白霜淒淒。不見巾車客。行歌空杖藜。

庚子春吳門陳漢公過五里追哭王山人翊時山人沒八年矣爲感

河流渡口渾。有客自吳門。言訪山陽舊。重過栗里村。琴臺春草合。隴樹夕陰昏。旅舍應無寐。何由感夢魂。

指月精舍夜坐有懷吳四讓木

落日精廬過客稀。涼風祇樹暝煙微。檐端星自雲中出。竹裏禽從水面歸。自愛清談揮麈尾。不妨狂醉解絺衣。牆東便是吳筠宅。欲刺扁舟夜叩扉。

送別

蒼江日落晚風清。送子南雲萬里征。待唱陽關舊時曲。河橋柳色不勝情。

魏允枏三首

允枏字交讓。嘉善人。忠節公大中孫。孝子學淨子。廩生。有維風集。

橋李詩繫。交讓甲申後高蹈不出。柳洲詩學之盛。奉爲主盟。

田按。忠節被逮過吳門。周忠介慰之舟中。以女許字其孫。卽交讓也。

吳仲珪墓下

咸淳之末宋事非。諸陵毀塌魂無依。玉匣珠襦啓幽寢。古人白骨將安歸。橡林處士有遺墓。自署沙門植

梅樹虛塚不像祁連山。殘碑尙立青松路。蹂躪曾無樵牧過。斧斤自遠匠石顧。閱歷滄桑三百年。慕君高節愛逃禪。已傳繪事冠當代。還將易數推先天。君臣大義委草莽。子孫中落無墓田。胥塘東繞菖蒲浦。丙舍荒涼屬誰主。桃李春飛寒食煙。梧桐秋落重陽雨。君不見六陵鬼哭蔓草生。此地猶存一抔土。

少年行

紫駟蹀躞玉鞭垂。半醉新豐日暮時。生長河湟人不識。獨身曾得射雕兒。

題法螺精舍

絕頂峯開祇樹林。翠微俯瞰碧沈沈。數聲清磬落山下。門外日斜春草深。

爻丹生四首

丹生字彤寶。一字山夫。嘉善人。

三閩識略詩人爻山夫垂老落魄往來吳越間晚寓家楓橋受知於錫山令吳公興祚後以貧死公時開府七閩聞之惻然遣人葬之寒山寺側予偶過其居題詩壁間云老死寒山古寺東詩人飄泊嘆途窮故交萬里收遺骨薄俗猶存挂劍風

乙將軍歌題劉公餓所作傳後

乙將軍真天人。烈如南霽雲。又如雷萬春。冒重圍入孤城。出孤城。部領二百騎。出入風雨旋雷霆。誰能從之曰張衡。將軍起列校。主將陷陣單騎拔之。推主帥上馬。短兵接戰身步行。乙將軍真天人。初隸黃得功。

後隸史道鄰。面中飛矢。屹不動。揚州化作睢陽城。將軍戰死舊城下。誰能傳之昌黎文。

劉體仁七頌堂文集。明季。潁州李將軍。擢挺身入劇賊袁時中營。招之降。賊殺。忽聞有乙將軍者。追破其衆於細陽舊城。縛二賊將。酌酒於李將軍位前。跪而斬之。予於是識乙將軍。將軍名邦才。字奇山。山東人。初從禁旅爲隊長。大將黃得功與流賊戰於霍山。單騎陷水田中。賊圍之。數重射死。所乘馬得功射賊。輒胸貫甲。相持會暮。餘二矢耳。而邦才從高望見之。識其背。曰。黃將軍也。大呼馳之。賊散走。得功乃自拔上。邦才授馬。分籠中矢。步從得功走。時轉射其追騎。殺十餘人。始及其大軍。邦才自是名動軍中。邦才善治軍。器甲必精美。卒服敝惡者。輒罵之爲乞兒。務使與己等。實以耗其財。不使有贏。鹵獲皆歸有功。已無所問。自兵興。邦才常在軍所。號爲南五營者。往來豫楚。其餘名稱雜沓。不可勝紀。穎壽六霍歲被兵。將軍解圍陷陣。邀擊追奔。大小十餘戰。功皆冠軍。或上其功。或移其功他人者。數矣。每飲至。同列憤。喉使言。輒謝曰。此我衆不惜死。故破敵。我一人何能爲。終不自白。形貌僅中人。皙顏塲準。援背而蜂營。善投壺。居常激矢百變爲笑樂。愛敬士大夫。進退安雅。初不知其不知書也。其休兵濼上也。予道過之。方獵還。爲予置酒割鮮。自彈琵琶。侍姬歌秦聲。相和歡甚。覆琵琶於膝。注視予曰。邦才出行間。致偏將。數論功。拜尙方銀幣。賜以大帥籙者。膺且滿。邦才非其人也。所可報國家者。此身耳。願不見敵。但當調曼容。茲歌娛心意。一朝上馬去。且判此肝腦矣。予心異其言。後史公可法請願得邦才自隨。遂以總兵官駐揚州。未幾。竟戰死。

贈鹿野菴主人

達師靜者流。神氣周八表。寒林無冬春。澄湖照昏曉。倚杖立蒼苔。長空過飛鳥。

倪彤文齋頭喜逢嘉生卽事

九龍山隴別。相遇郭西偏。詩律看來細。狂名老去傳。雨晴江上路。櫻筍暮春天。共酌尊中酒。藜牀一醉眠。

秦淮曲

青溪祠畔彩雲停。舊院樓臺入杳冥。惟有巴童吹北曲。夜深獨自倚牀聽。

徐開任三首

開任字季重。崑山人。有愚谷詩稿。

明詩綜。朱長孺云。季重詩。原本少陵。深情至性。激發而出。使讀之者留連往復而不能自己。

詠史

吾愛張處虛。卓犖有深見。時危不應辟。誰知非獨善。帶索說張溫。掉舌如流電。宦豎得早除。甯召羌戎變。一人計不行。遂使羣雄戰。誤國有餘辜。殺身何足怨。

陸賈善因時。神閒識亦慎。樂生似韜光。獻策非謀進。誅呂不居功。安劉無後釁。置身將相間。安危可靜鎮。天下有心人。社稷彈指定。堪笑樓君卿。侯鯖徒自潤。

送仲兄司理邵陵

麥秋四月南風起。送兄迢迢渡澧水。此地新經烽火來。萬井蕭條生荆杞。憶昔邵陵全盛時。桐封愛子萬年枝。宮中爭唱銅鞮曲。陌上時吟估客詞。一朝物換人亦改。珉王宮闕無復在。北渚新愁落照中。蒼梧舊恨秋雲外。執手相看杯酒前。離魂常傍洞庭船。驚猿帶雨颯寒夜。征馬追風踏暮天。丈夫不灑離別淚。天

涯知己若同氣。此行莫負桃源心。洞中雞犬與時異。

張彥之二首

彥之一名慤。字洮侯。松江華亭人。

明詩綜朱朗詣云。洮侯爲人寬博無同異。其詩莽蒼不事繩尺。質本景純。而臻於嗣宗。

今世說彥之卓犖知大節。深沈好書。詩歌與董黃齊名。尤喜自負。使酒善使人。然實無他腸。人以是原之。

詩觀南京兵尙闕操。衣百鶴繡袍。洮侯詩云。金甲銀鞍戰士豪。六軍承詔著功高。而今攻守江南靜。百鶴空思賜戰袍。百官燈

白祭酒燈紫。洮侯詩云。御柳低垂曉色開。天壇香繞淨蒼苔。陪京國學當年事。紫色燈稀祭酒來。二詩足飾故實。

寄錢開少滇南

淵明感晉亡。幼安憫漢促。自古無全人。安能致明淑。一身情有餘。萬里行不足。衡山窮荆陰。零陵踐南服。

巖壑鬱嶽崎。山川縈重複。詞賦非務閒。棲遲同豎牧。人事悲沈淪。天道哀倚伏。千秋竟何人。曷以守幽獨。

送林武武宣遊豫州

九月微霜欲渡河。送君千里奈愁何。華林秋落遊人遠。少室風高木葉多。樽酒自憐江外別。菊花仍是客

中過。懸知白雪梁園在。此日平臺好放歌。

吳懋謙十三首

懋謙字六益。松江華亭人。別號華萃山人。有亭菴集。

汪琬說鈴。吳憐謙訪余邸舍。每被酒。自誦其所作遊五岳詩。音響琅琅。若出金石。覺爾時意致適上。不可復及。

三岡識略。華萃山人喜吟咏。遨遊僧紳間。詩名甚著。年屆古稀。纔喪妾。復買一姬。胥面染髭。以博如舉一笑。予戲貽一詩云。騷人春晚愛幽居。老去風情尚未除。舊賦白頭憐薄倖。新題紅葉怕生疏。爐薰翠被迎歡夜。髻擁寒燈見面初。莫倚巫山行雨慣。襄王今是病相如。

明詩綜。魏楚白云。六益五言。未盡本於建安。而筋力出諸作者之上。

田按。六益才情爛漫。讀其詩。有肅愜幽成之感。

烏棲曲

沙棠爲檝。桂爲舟。采菱唱罷。吹笙篴。送歡板橋。望江路。風波無情。郎莫渡。

聞舟中吹笛

空江微微月東出。何人舟中吹鐵笛。傳呼隔水不知名。寂寞滄江迴夜色。吳音越調聲悽愴。遠遊客子思故鄉。燕子梨花春已暮。欲歸不歸空斷腸。

長至旅懷寄龔芝麓先生

冉冉歲將晏。百卉腓以殘。葭灰動晨夕。蒼霧浩漫漫。白日凍高阜。玄陰翳層巒。流睇鮮故物。遊矚盛憂嘆。小人備鄙志。烈士存苦顏。堂上展琴瑟。哀激已無端。

長安咏懷

驅馬過燕市。春陰黯不開。沙昏北平壘。日下黃金臺。地勢臨關闕。山形入殿來。傳聞昔年事。惆悵有餘哀。

仲冬同慈谿王白民儲潭送周計百司李之南昌

惜別此潭醉。相逢又幾時。一江木葉下。萬嶺夕陽遲。野店維官舫。村巫走廢祠。不堪重回首。霜露正淒其。

南康道中

連山睥睨齊。萬里過江西。索米勞妻子。擔簦聽鼓鞮。江黃龍母渡。風黑虎佺嗥。辛苦南康道。蕭蕭倚杖藜。

嶺南

辭家便典鷓鴣裘。司馬淒其已倦遊。路指番禺蠻雨夕。帆迴潁水瘴煙秋。降王舊築蓮花寨。洞女新開椰酒樓。此日孤身憑眺望。短歌清笛不勝愁。

崑山懷二陸

斷碣荒苔鬼夜號。蕭蕭木落下亭皋。三吳曉日聞秋雁。萬里長江送暮濤。祠廟衣冠衰草合。山城笳鼓朔風高。登臨莫問當年事。寂寞書臺空野蒿。

春日雜感

吳子栖遲大海濱。東風落日自逡巡。陶潛漉酒元無伴。王粲登樓或有人。老去江湖生白髮。愁來天地失青春。東南十載空遺恨。夜夜憑高望北辰。

吳閩夏感

霏霧夏雨滯吳城。深夜猶聞鼓角聲。薊北頻年還重斂。淮南今日又徵兵。千門涕泗瘡痍盡。萬國關山太白明。莫上靈巖更西望。溪雲江樹不勝情。

戊戌春日有感

三月春殘御柳斜。高城雪盡隱悲笳。黃旗南苑馳征騎。曉漏西清待翠華。寢殿棠梨飛野蝶。漢陵風雨泣棲鴉。可憐一片昆池水。依舊東風泛落花。

暮春咏懷

小築茅齋蘆荻邊。萬方風雨哭春天。東吳杼軸空三戶。南粵烽煙已二年。張儉無家貧尚在。虞卿多難病誰憐。依人終信謀生拙。短鬢江湖夕照前。

春閨

玉釵寂寞暗生塵。細草微香壓錦茵。燕子尙啣花片舞。憐君何事不知春。

徐崧五首

崧字松之吳江人。

宿楓江法華禪院

萍蹤原不定。夙昔聽清緣。庵水知平日。楓江別幾年。客船驚犬吠。市鼓報魚鮮。夢醒寒衾短。披衣坐曉天。

寶林寺

金闔多擾擾。至此定心清。一寺石橋過。兩涯春水生。白雲天倒映。北斗夜空明。自有神魚化。應將法雨行。
仲春六日客寶林。李灌溪侍御惠我酒資。

憶昔頻招隱。漁樵得並遊。人間無白社。舍北有丹邱。鶴下迎仙館。花開禮佛樓。猶龍身正健。我道見風流。
同朱望子過福濟觀贈姚玉緯鍊師

友鶴餐霞玄思通。碧桃花隴有神宮。笙吹斗閣三天上。藥搗丹臺四月中。雲水誰如王省幹。塵埃難辨呂仙翁。看君好客嫺風雅。竹杖紗巾自不同。

過包朗威孝廉靈巖山居

卜得幽居傍硯山。晚年學佛世情刪。茗談不異精藍靜。梵課仍如老衲閒。松葉陰中雲冉冉。杏花風裏澗潺潺。自從絕上公車意。一過江城即便還。

李煒六首

煒字赤茂。嘉善人。有物外軒稿。

詩觀二集。格齋詩。高視闊步。近太原公子氣概。仙裳稱五古在阮陶之間。洵不誣也。

雜興

我愛漢陰叟。棄機灌園蔬。我愛河上公。緯蕭鍛明珠。優悠可卒歲。取起不求餘。圍圍泰山雲。觸石合卷舒。猗猗蘭蕙花。因時成榮枯。養志百年內。身名同晏如。

日余不師訓。少小好奇計。結交湖海賓。抵掌天下事。愁如糜糲鷹。矯若悲踈驥。外強而中乾。道不足御氣。懷思古至人。神明獨無累。彈琴蓬戶中。緬然發高視。龍蛇守道真。毀譽棄若屣。甯能人世間。懷憂獨長喟。北渚河渺渺。秋風生洞庭。夫君來夷猶。芙蓉愁殺人。寄顏雲霄間。揮袂當層城。曠矣恩不接。懷哉時載陰。臨川望河鮪。緬邈若飛沈。登高遡歸雁。反對豺狼吟。同衾戀膠漆。遠道怨商參。側身隴坂長。離懷誰能任。烈如齊聶政。怒若燕荆卿。我無雲雨資。小勇安足矜。老子執謙退。清淨垂鴻名。莊周處不材。後世稱達生。灰心滅恩怨。劍術同飛塵。

有所思

賤妾依吳地。夫君滯楚湘。荆蠻雲樹遠。彭蠡雁鴻長。別怨生瑤瑟。相思滿玉床。當年阿母畔。空學繡鴛鴦。贈墨菴

問君何感慨。削迹竟曇摩。舊事觀空盡。餘情埋照多。長卿工慢世。楊惲善悲歌。突兀疏狂意。空憐日月過。錢光繡二首

光繡字聖月。鄞人有歸來閣集。

巖臺寺

抱膝巖前坐。巉岼勢欲崩。泉飛天半雪。門掩隔溪藤。鶴洞迷丹竈。仙墳罷漆燈。寄聲劉子驥。孤棹興堪乘。

田家

一株紅樹恰當門。古澗橋欹斷水痕。日暮牛羊收拾早。昨宵虎迹大於盆。

錢謙貞五首

謙貞字履之常熟人。

列朝詩集履之生而韶令。有儁才。起於孤童。能自懋竊。讀書求志。闢懷古堂。以奉母。簾戶靚深。書籤錯列。所與游惟魏冲叔子。馮舒已蒼。相與論詩度曲。移日永夕。下鍵謝客。意泊如也。中歲攻詩。不屑應酬俗調。友人程孟陽精於論詩。少所許可。猶稱履之之詩。以爲鮮妍和雅。妙得近體之法。

懷舊集履之清姿玉立。好讀書。工書法。詩歌南曲。皆不學而能。與人交似落落。久而不衰。彌見其篤。

田按履之牧齋從弟。其歲暮雜詩云。句偶類浣花。體或擬長慶。自然近中晚。非敢薄初盛。可謂善於自道矣。

雪晴小飲北山茅三間卽事

雪壓雲菴晝獨眠。偶憑雙屐試晴天。窮檐晚日懸冰柱。野服春寒著水田。臧是穀非從過耳。濁賢清聖且隨緣。報慈橋畔何人墓。宿草淒淒起夕煙。過亡友陸九來墓

懷古堂夏日漫興

三間五架草堂新。數卷圖書一病身。靜似放參居士室。閒如墜戶輟耕民。澆花杜叟曾題字。垂柳陶家舊卜鄰。不爲薄今偏愛古。南村已少素人心。

舟過梅李弔族祖心閑翁墓

輕舟漫趁落潮東。爲弔孤墳半畝中。荒草斷邊人種麥。浮圖高處鳥呼風。生多寄迹眠僧院。死合招魂傍梵宮。一束生芻一杯酒。幾人曾酌若敖翁。

莊樂與余數年同病久失過從風雨中忽擎舟見訪因宿兒子書樓夜話追昔撫今悵然有作

杖策招尋久未能。扁舟忽有興堪乘。參商一別看兒女。風雨來過見友朋。算老漸如將去客。論心同是在家僧。南菴若遂比鄰約。瓢柄連床夜夜燈。

歲暮書齋卽事次夕公韻

罨栗風高北榭關。卷中丘壑畫中山。衰顏向日薰如醉。弱足凌寒凍欲頑。翻覆炎涼隨歲改。凋零花木逐年刪。黃麻紫誥非吾志。十賚新同處士頒。

東蔭商二首

蔭商字雲雛。華陰人。□□舉人。

新嫁娘

十五爲新婦。梳頭學冶粧。畫眉猶未慣。不敢輒呼郎。

閒居述懷

狂夫家在麗農山。俯視三峯似小鬟。只爲高吟驚帝座。孤蹤遠謫在人間。

姜廷梧二首

廷梧字桐音。紹興山陰人。有芳樹齋詩草。

今世說。桐音行文不起草。口所誦卽成句。論者謂其詩類何景明。

渡江

句踐吞吳日。斯江卽戰場。泛舟秋水闊。繞岸海雲長。浪靜鯨鯢沒。天高鶴鶴翔。至今沙草渡。有客弔夷光。

少年行

金鞍蹀躞紫騮驕。火浣裁衣窄過腰。白日城頭秋草盡。彎弓原上射飛鷗。

陸繁昭二首

繁昭字儼胡。一字拒石。錢塘人。

今世說。陸麗京云。西陵麗語。家有靈蛇。若儼胡秀如春采。仲昭絢若朝霞。故當並推。

過包氏山莊聞簫

樹杪縣飛閣，雲深結小亭。秋花入夜白，曉月到山青。人影飄羅帶，簫聲隔畫屏。不知樓上女，度曲與誰聽。

南屏

上人蒙難後，而我亦餘生。不爲浮名誤，焉知出世情。晴嵐開曉色，寒鳥變春聲。若許陶潛醉，相隨入化城。

王啓茂四首

啓茂字天庚，石首人，貢生，有渚宮集。

湖北詩徵傳略：天根崇禎末以明經薦不就，兄啓京、啓遵、弟啓崇、啓芬皆有才名，人稱五鳳。天庚性獨淡素，工詩詞，避兵湖南山中，年七十卒。

陳伯機詩慰續集：石首王天庚，門有車馬客，見余多怒噴，非爲禮數簡，亦知肝膽真。祇慙餽贈少，未能療客貧。余貧客所見，徒免輒中塵，結交二十載，與嚮奉嘉賓。西隣豈不富，叩戶何曾應。願客早富貴，爲余作主人。輕財若埃沫，致賄如邱陵。門下三千客，各賜千黃金。人人無惡聲，薄俗庶乃敦。詩有古意，然未免如翟公翼門，識者或議其淺也。世間殘客亦正不可少。

送道人入山採藥

去去雲山遠，餐霞不裹糧。荷鋤千嶂曉，洗藥一溪香。夜月閒丹竈，春風暖藥房。何時還市肆，吾已識韓康。

過袁中郎捲雪樓感舊

庚信羅含宅尚垂，小樓回首更淒其。澄江曾入驚人句，華屋堪增過客悲。千載後知聞笛處，十年前記倚

闡時文章不盡風流盡。盼盼於今屬阿誰。

同王子荆民部曹樞之叔方謁張文忠純忠堂同賦

袍笏巍然故宅殘。入門人自肅衣冠。半生憂國眉猶瑣。一詔旌忠骨已寒。恩怨盡時方論定。邊疆危日見才難。眼前國事君知否。拜起還疑拭目看。

考田詩話。張江陵救時之相。功過原不相掩。恩怨盡時方論定。邊疆危日見才難二語。竹垞稱爲詩史。不知乃王啓茂謁文忠公詞句也。

舟中卽事

武陵溪水碧如天。幽興狂來自扣舷。海岳囊裝無俗物。元真奴婢有仙緣。深防好事傳爲畫。定被凡人喚作顛。把臂使應從此遠。只今南北甚烽煙。

鄭階四首

階字晉之。吳人。有慎獨居詩存。

湖山靈秀集。晉之嗜酒耽吟。齋中常設一木主。題杜拾遺名。或得醇醪佳茗。必先以奠焉。其癖於詩可知。

毛公壇

包山路茫昧。委蛇履艱澀。塢窮絕人語。計里將二十。雞犬隱桃花。松蘿透原隰。巖雲白襪襪。谷風清習習。

振衣躡危磴。見石先拜揖。仙遊二千載。寂寞壇猶立。苔蘚漢時青。碑題唐世緝。傳聞紺毛叟。養真羅浮岌。木食龍虎馴。道尊山鬼泣。宇宙元一粟。往來待呼吸。夜靜湖月高。鶴馭常來集。攀竹仰清風。曠哉天如笠。

醉步南村過允謙復酌

南垞多逸地。獨往聽秋聲。行野杖橫把。出村船倒撐。碧雲寒弄影。紅樹晚含情。恰有幽人過。重沽爲解醒。

韜光庵

下方擾攘上方幽。磴道縈紆古木稠。剝竹引泉分入寺。鑿雲開徑就登樓。青蔬白飯僧緣好。蒼鬢紅塵客夢休。徒倚北高峯畔立。浙江如鍊抱湖流。

湖上

點點春山小。片片春帆渡。帆去忽天涯。青山自朝暮。

陸嘉淑二首

嘉淑字冰修。海甯人。有辛齋遺稿。

靜志居詩話。冰修崇情遠迹。高酣長論。晚雖藏身人海。而青蓮在泥。心終不染。

阮元兩浙輶軒錄。查編修慎行。冰修增也。少從學詩。得其指授。

采桑曲

明詩紀事 辛籤 卷二十八

江南三月青陽天。桃花匝市楊花顛。流鶯自語玄鳥斜。陌上誰家雙鬢鴉。繡箔柔筐臨碧甌。百帖春蠶眠不起。素腕迢迢倚夕陽。清曠的的回秋水。別有梅花洞房妾。永日盈盈淚凝睫。織成錦字寄別離。結成同心鎖。篋篋偶向城隅恨自滋。長憐春暮心尤怯。使君五馬莫踟蹰。兒家夫婿關西俠。

蕪城感舊

花影鶯聲句。隅傳無端真得玉人憐。劉郎前度身猶在。杜牧三生事惘然。銀燭夜闌分險韻。畫欄春半響么絃。玉鉤斜外傷魂處。落盡桃花叫杜鵑。

陳祚明三首

祚明字胤倩。仁和人。有稽留山人集。

北征

百年多攘攘。跋涉意何如。京口歸潮大。丹陽落日孤。轉漕千舸擁。過閘萬人呼。泛水扁舟影。蕭條短髮疏。香山

香山

夾道青峯似畫中。先朝列帝敞行宮。鶯花仍度三春日。松柏長吟萬壑風。錦石親承鑾輅轉。玄猿猶說翠華東。小軒御榜留宸翰。行客徒悲古木空。

燕市

長安古狹邪。道隘不容車。溝水春泥擁。愁君白鼻騮。

黎祖功二首

祖功字耆爾。新建人有不已集。

西江詩話。耆爾早慧。能爲有韻之言。劉恂於海上羣峯。破涕於一江春水。意有所觸。語輒隨之。頗奇詭不凡。頗類李長吉。使壯且壽。稍加以理。真可奴僕命騷。年未二十。慘死於盜。惜哉。所著詩自序云。戊子歲。始學嘲咏。紀義熙之五年。存長城於數字。其大指如此。陳士業評其詩。如張邃被甲持戟。大呼衝孫權之壘。當者人馬辟易。如李愬率山南銳士。冒風雪。絕澗曲道。夜半入懸瓠城。如禰衡著羊衿單綬。過漁陽而前。蹶駸腳足。容態不常。

吁嗟行

山何不攢峯爲刃。以絕我脰。天何不降玉爲棺。以封我尸。區區姓氏人不知。面目塵土何所爲。魯連好個儻。曹公無威儀。肯如小儒舉舉衣裳。學仲尼。齧我筆。燔我詩。手中提攜三尺兒。誰博白兔兩丸泥。荒雞驚起夜亂嘯。神鬼駭駭得志天地悲。

田按。少年才人。負奇天折。有雲間夏完淳存古。故吏部瑗公允彝之子。十七歲著大哀賦。不減庾子山。世多傳之。豫章黎耆爾。前浙江提學博菴元寬之子。詩甚奇嘯。不可一世。亦十七歲江行死於盜。先是賦吁嗟行一篇。不數日遂死。若讖然。

讀賢書

白日閒羈旅。青雲點友朋。千金新得贖。六翮老如鷹。天地雪霜笠。江湖風雨燈。蕭條君不問。潦倒我猶能。

明詩紀事卷二十九

辛籤

王屋一首

屋字孝峙。初名晚。字蘭九。嘉善人。有學可齋詩箋。

靜志居詩話。孝峙以詩受知魏忠節。因與忠節一門羣從和酬。詩類劉改之。詞學辛功安。嘗過同里曹學士齋。學士曰。先生尙能著履遠步耶。應曰。有太史公不可無牛馬走。鄉里傳爲新語。

魏塘詩陳。孝峙孤貧無家。託身於郡大姓。好爲詩。顧艾見而賞之。載與俱歸。爲延譽。爲人修髯美丰神。工草隸。善滑稽。邑薦紳皆樂與之交。

子夜歌

阿翁將嫁女。問女願誰歸。富室多爭寵。貧家常苦饑。

顧艾一首

艾字病已。一字匏青。嘉善人。有勸影齋。自淺齋二集。

魏塘詩陳。病已與魏忠節父子比鄰友善。持論未嘗苟合。忠節稱其端士。工詩歌。家貧郭。被褐藜藿。日中往往不舉火。然門外多長者車轍。遊郡城。見王屋詩。愛其才。召與同居。至共衣食。廣爲延譽。屋遂得與邑士大夫交。其論詩。不必摹擬。摹擬合則神。

情離。如建章千門萬戶。不與阿房故址。新豐締造。徒欺田舍翁耳。持論甚精。既引王屋交於邑士夫。邑士夫憚病已剛。樂與屋交。屋晚起家爲富翁。而病已家益貧。苦吟歲餘詩以百計。未嘗有所干於人。曹宗伯勳作贈王屋詩云。猶勝桐村顧病已。纖腸空煮蠹魚羹。

秋葉

秋葉離披飲淚痕。青紅間色映柴門。吹殘將次孤巢影。落盡無由庇本根。詎怨霜風今已甚。反嫌雨露昔多恩。天涯何處容憔悴。敢託寒爐此夜溫。

陳衍二首

衍字磐生。閩人。有大江集。

靜志居詩話。磐生與徐與公同入曹能始閣風樓詩社。而賦才孱鈍。光焰鬱而不舒。其自序比於春草蔓生。秋蟲孤響。良亦自得之言。

十五國風高言集。田鬻淵曰。磐生詩。風姿搖曳。意態芊緜。有落花依草之致。

題邵大行薰亭

一片蒼山落案前。亭亭孤塔影嬋娟。林花乍落猶含露。池水新生卽有煙。蜨趁侍兒登佛閣。鶴隨門客上漁船。清光盡貯軒庭內。獨榻拋書抱石眠。

上報國寺毘盧閣

十丈青蓮朵朵開。昆盧高閣獨崔嵬。欲看山勢連天遠。已見河流帶雨來。宮樹陰濃秋未落。塞鴻聲斷晚猶哀。烽煙直北何時息。處處關門鼓角催。

王履和二首

履和字仲美。邢臺人。諸生。

香山寺

金繩經百轉。咫尺近清涼。老樹經秋醉。馴禽與客忘。雲來千澗沒。雨過一山香。每到無生地。翻愁返故鄉。

懊恨歌

情多易起惱。歡久自生悲。棄妾不恨恨。恨郎愛妾時。

麻三雍一首

三雍字仲雍。宣城諸生。

怨王孫

灼灼嬌花解媚人。萋萋芳草獨傷神。那因芳草偏成恨。自是嬋娟不奈春。

吳一元一首

一元字堯開。宣城諸生。

贈顧二娘

問酒青樓繫玉驄。梅花春伴小橋東。縱來歷亂猶堪惜。不學山蹊桃杏紅。

何絳三首

絳字不借。一字孟門。廣東順德人。有不去廬稿。

廣東詩粹。不借與陶璜、梁榑、陳恭尹暨其兄衡、讀書西樵山中。世稱北田五子。續表詩傳。孟門於古體不喜李杜。故卒少變化。惟五律最工起手。

送黎雨亭再之惠州

非余偏惜別。君去亦淒然。霜葉臨江樹。秋風下瀨船。書期長至後。歸訂未行先。草戀西湖柳。依依婀娜前。

十四夜與吳山帶任肇楚蒼葡樓看月

涼風起中夜。爲客動高吟。與子詠明月。誰人知賞心。佳辰驚節序。方外散幽襟。轉惜分攜後。寒江白露深。

郊居

郊西日將夕。鳥雀何嘒嘒。好月來平野。微風過暮鐘。草衰寬石路。木落出寒峯。觀此芳菲盡。悠然思嶺松。

梁榑一首

榑字器圃。廣東順德人。諸生。

陳恭尹獨澆堂集。器園弱冠補諸生。有聲。逕會遷移。盛年自廢。結茅池西。扁曰寒塘。懸板橋以限往來。非其人不得入也。好讀書。晝夜不釋卷。興之所至。扁舟獨往。旬月忘返。近郡名山羅浮。西樵。歲必一再登。天性高潔。然不能獨居。無朋友則不樂。偶不至。則輕裝就之高談雄論。觸緒英發。遇世俗人。終日不作一語。人初以爲傲。久而親之。知其無他也。爲詩力追中唐。沖澹有自得之致。

送何不偕之潮州

擾擾不得志。客心安可論。古關羸馬路。窮海惡魚津。驛葉行邊落。離花到日新。遨遊無不可。天地一閒人。

岑徵二首

徵字金紀。一字霍山。南海人。諸生。有選選樓集。

蒼梧

日月開虞代。風聲變五絃。牂牁流不返。南狩是何年。瘴雨摧離芷。東風怨杜鵑。容華銷旅食。淚盡百蠻天。

湖南秋興

一雁下平蕪。天空楚月孤。西風吹落葉。秋色在南湖。欲學長沙傅。投書屈大夫。三湘哀怨地。懷古獨躊躇。

易訓一首

訓字宣人。新會人。有東樵遺稿。

廣東詩粹。宣人性狷介。嘗往匡山。倚哀歌亭。放聲大哭。後適蒼梧。得瘴疾卒。

送一公還山

師今何處去。相送出林間。一路隨芳草。尋鐘歸舊山。猿聲深澗冷。雲影上方閒。後夜遙相憶。松門且莫關。

英上一首

上字卓今。新會人。諸生。

谿上作

清谿一來往。石上自潺湲。鷺立芰荷際。蟬鳴槐柳間。微風當近水。殘雨不歸山。停棹待漁父。相隨沾酒還。

梁可瀾一首

可瀾字元叔。廣州順德人。有狂仙遺草。

蓮鬢閣集。元叔博學能詩。性厭山水。隱居羅浮。慕葛稚川修煉故事。自號三十二峯太狂長嘯仙。

夜泊西灣

野水泠泠浸碧天。西灣深處泊漁船。千山月色孤篷外。半夜潮聲一枕邊。春夢覺來傷往事。鄉心老去憶行年。白頭不是忘歸客。獨對蘆花思悄然。

庾樓一首

樓字本叔。歸善人。

次答張伯洪

白髮催遲暮。高峯伴寂寥。十年成底事。一別又今朝。但可花經眼。何當米折腰。子山詞賦好。遺恨向誰銷。

趙煇夫二首

煇夫字裕子。番禺布衣。有草亭稿。

過梅花村

乍識羅浮路。梅花尚有村。二三家映雪。清淺水臨門。古夢銷香寂。寒梢挂樹痕。仙家歌舞罷。山色幾黃昏。

倚杖

莫上溪橋望。斜陽背晚鴉。衰年仍作客。亂世已無家。斷雁煙迷影。寒梅雪作花。片心搖欲折。淒切聽鳴笳。

梁觀一首

觀字顯若。南海人。

廣東詩粹。顯若詩有晚唐佳致。

經亂泛舟甘溪作呈同侶

久無閒興到溪村。舊友同遊不半存。山色幾曾離釣艇。潮聲空自過僧門。路經兵後橋梁斷。林有人來鳥雀喧。身外問誰歸計得。樵漁相笑未開言。

凌象八首

象字水木一字木道南通州人諸生有冰雪攜竹灰愁課等集

一經堂詩話水木遭世險巖沒身坎壈困窘詬辱胸臆鬱鬱不得吐盡發之於詩其自序云奔林之援聲愈蹙經霜之葉響愈
棲又云性多感慨不能自同木石支離荒忽莫識所之喜不期笑而笑怒不期置而置幽緒無端弗可強已讀其全集大旨專
主性靈有竟陵之清機而不墮其魔障

田按水木詩幽咽似寒蛩令人留聽

諸弟姪見過

見人遙擬是今果到江干帶露一身溼放筇詢我寒燃松持茗坐分石與雲看燭影分求宿江鷗暫避灘

狼山晚步

亦是春遊客日西山自幽巖花逐水落谷鳥喚人留江靜欲生月松深不待秋同心閒躡步汗漫更何求

夜過山寺

秋色冷一天此中人已眠白雲獨來去黃葉寺門前凭閣得山半依櫺見月全冥探思悄悄鈴鐸數聲圓

再過楊氏隱居

亦一居止見遐心曲徑經過尙費尋門欲向山兼得水屋因在野遂成林桔槔方舉雨來疾機杼微聞雲
隔深好結數椽君左右記予此志已從今

獨吟

坐久黃葉落。開閉竹扉聲。忽問何人至。石邊鶴影橫。

投宿北山蘭若

帶霜披積莽。逐月繞梧桐。不厭幽人住。山空一徑通。

贈融上人

手闢荒山身欲老。還將禪定對空江。松榛寂聽皆成悟。一任雲來自打窗。

送張子歸陽羨

花落愁兼海燕飛。家山此日筍初肥。獨憐不及舟前柳。一路青青相伴歸。

楊時暹二首

時暹字赤文。南通州人。諸生。

重題雪竇

小閣出岑蔚。何因清話同。半窗月影上。一枕水聲中。涉趣無拘礙。觀心得妙空。穎師扶我醉。深媿酒顏紅。

贈仁風上人

古廟香爐好作家。客來拈果復拈茶。芒鞋信踏村中草。竹杖閒挑陌上花。一滴曹溪分雪乳。六時香雨步

金沙相逢不識僧伽句。壓手楊枝拂面斜。

凌潞庚四首

潞庚字季元南通州人諸生有鄭圃草。

山茨社詩品鄭圃草如市中賈客無物不有不必皆希世之珍。

小除夕雨得書字

相驚寒較甚。茲夕亦云除。雨雪天涯暮。兵戈歲月虛。村醅期共醉。短髮不禁梳。入夜檐聲急。移床約舊書。

范汝申邸中夜飲

歸期擬卜轉迢迢。賸得閒情付濁醪。竹葉於人差有意。燈花向客太無聊。江鄉歲晚愁無雁。旅邸風高感
敵貂。近得南枝春信至。相將長耳策溪橋。

登雨花臺望鍾阜諸山志感

霜林簇簇護丹梯。日照江門萬樹低。六代風流杯底盡。五雲宮闕望中迷。山應似我經秋老。鳥亦多情著
意颺。金粉銷歸何處是。瀟瀟木葉下前溪。

宿蒲上口占

亂竹蕭蕭壓短垣。寒侵破壁一燈昏。莫愁風雪明朝惡。聞說梅花發遠村。

陳宏裔七首

宏裔字文起，南通州人。諸生。有蒼雨詩集四卷。

一經堂詩話：蒼雨集。我用我法，深悟剽賊比擬之繆，卓卓可傳。

田按：文起詩殊爽健。

宿雙溝道間題壁

暝色催涼雨，投身荒圃間。迹疏孤客窘，人定百蟲閒。遠望若可卽，舊山殊未還。明朝須早起，聒耳怪潺湲。

留客

涼風生戶牖，急雨下庭柯。我正欲飲酒，公今無渡河。及時山果熟，隨意野蔬多。莫畏前溪暝，煙中有綠蓑。

亂定出山晚歸有作

爲戀嵩陽寺，遲遲到郭門。北山新有檄，南國舊招魂。孤鳥投殘照，歸雲擁暮村。漁樵皆絕迹，兵甲畏黃昏。

落日

關河百戰後，落日迴含愁。古戍人煙斷，空山草木秋。生涯傷米價，國稅及漁舟。野哭何時息，諸軍正逗留。

憶昔

輪臺下詔悔從前，哀痛中原戰鬪年。博士尙陳鹽鐵論，上方時減水衡錢。新亭一夕悲禾黍，故國三春泣

杜鵑回首興亡成俯仰。廣陵城北斷炊煙。

送笠澤之大梁應聘

一樽祖道唱驪歌。驢耳批風指汴河。海嶠白雲親舍遠。天涯紫氣舊京多。逢人是處心堪寫。揖客從來禮不苛。若過夷門應悵望。大梁公子近如何。

過吳小髯新居

槐影初斜聽午雞。呼兒翦韭婦蒸藜。故人治具留花下。高士移家近竹西。肯使姓名通狗監。可聞比舍有牛醫。藥欄莫怪頻相過。坐惜春光入鼓鼙。

季良眉一首

良眉字子常。泰興布衣。有北村詩鈔。

感興

萬物悲秋氣。漪塘日半斜。孤清憐浴鷺。疏放對溪花。鬼火青依草。漁舟白近沙。閒愁輕易起。觸目已成嗟。

楊麓一首

麓字戶雲。南通州人。諸生。有竹柳堂、西林社、自怡等集。

一經堂詩話。戶雲與里中范十山、孫皆山、胡麟分結社山茨。其詩鉤棘索隱。沾染鍾、譚習氣。其流利清越者。如水亭云。客意方

獨成流鶯乃相顧。閒居云。有情夜月邀詩友。無那春風戀酒人。集中佳句也。

薄暮歸舟抵塔山乘興登眺

嵐氣暮未落。攜筇上遠岑。潮來山欲去。天盡水深深。對月發吟興。因風揚梵音。征塗吾倦役。久動故鄉心。

孫模二首

模字楷人。南通州人。諸生。有悲煙草。

于一水亭

年來歧路歎紛紛。偶問風塵一識君。沙漠誰人悲雁字。邗江有客乞鵝羣。相逢旅鬢皆秋色。對酒鄉心隔楚雲。我亦攜琴訪同調。一泓流水靜中分。

酒醒夜起

重剔銀缸暗起看。北斗斜。忽驚清影併。殘月在梅花。

明詩紀事卷三十

辛籤

李標一首

標字子建嘉善人自號東山遺民有東山遺稿

靜志居詩話子建精於戎機戰略壬通諸書史閣部道鄰辟爲記室事不可爲返里與魏吉士子一深契吉士公車北上執手
河干謂子建曰子夢斜塘見茫茫一片土無復雞犬桑麻行後得無有變乎子建戲曰君且富貴宜目中無人耳甲申吉士喪
車北還經斜塘子建撫棺曰子一子一果妖夢是踐耶慟哭失聲繼聞史公殉節揚州渡江會葬其衣冠於梅花嶺歸而繞屋
皆種梅賦詩三十首蓋託於西臺慟哭之謝參軍云

病起園梅已殘有感

病裏看梅也療饑春光依舊帶園非有情花片無情雨攪起春愁歷亂飛

葉珍一首

珍字重君嘉善人諸生有潛夫集

魏塘詩陳重君廉大司馬張公國維辟爲記室倚馬草檄讀者汗浹髮豎已杖策入閩嶠歷東粵聞父喪跣足過歸旣葬復憫
柩出門瞻河登岱感物愴懷一寄之詩歸里棄故廬別構茅屋數椽壘土成阜曰果山黃冠布衲矻矻著書以終

明詩紀事 辛籤 卷三十

三三二五

體上人開講鐵佛寺賦贈

攜杖湖山側。相看白髮新。烽煙存古寺。冰雪見完人。交遠情偏密。機空語自真。虎溪何必遠。撫掌悟前因。

孫纘祖二首

纘祖字昭令。嘉善人。諸生。有隆略堂詩二卷。

和顧偉南九日

令節當風雨。繁雲鬱未開。凌秋一雁過。落木萬山哀。短髮還扶帽。長歌數舉杯。東籬泛菊者。應望白衣來。

傷春

舊苑荒荒長綠蒲。衣冠無復想雄圖。孝陵紫氣春蕭索。少海前星事有無。帝子夢寒春草碧。野人愁絕海雲孤。可憐此日空翹首。猿鳥遙天淚欲枯。

蔣國榮一首

國榮字功夏。嘉善人。

棹歸榮川

蟣帆江海寇。青溇阻去槎。坐悲寒食雨。吟望古魚沙。改徧新林火。凋殘舊塚花。淒淒櫻筍餉。誰過野人家。

蔣平階一首

平階初名雯階字馭閱一字大鴻華亭人僑寓嘉善有集
黃觀只述就獄始末爲誌悲感

何事輻車客棲遲感歲華范滂甯就吏張儉竟還家二月秦淮柳三秋句曲花
圓扉真不惡慰爾莫長嗟

計孺一首

孺字元孺一字古民常熟人僑寓嘉善

魏塘詩陳元孺工詩清真洒洒晚唐中之清弱者

移居

北山曾竊吹南郭且潛身松菊本無主雲泉任卜鄰著書強自喜乞食肯言貧
便是柴桑里深居數夕晨

黃輔一首

輔字弃公如皋人諸生有恕菴詩稿四卷

移竹

幽居愛結水雲傍曲徑方塘卉木香添得琅玕三十箇一庭秋色似瀟湘

叢一蘭一首

一蘭字栖枳如皋布衣

東逸上人索茶

庭槐風雨午泠泠。一枕羲皇夢自醒。莫道書生無箇事。焚香拂几著茶經。

范廷瓚一首

廷瓚字獻重。如皋人。諸生。有吳吟、竹西咏、漚莊集。

玉鉤斜

吳公臺下墳。玉貌化爲土。誰慰六朝魂。悲風作寒雨。

馬鑾二首

鑾字伯和。貴陽人。

田按。伯和。馬士英子。華亭顧在觀爲楊龍友所引。入士英幕。嘗言阮大鍼不可用。大鍼欲起鉤黨之獄。在觀說伯和泣諫。賴以稍止。是亦能幹蠱者也。國亡後。垂簾金陵。賣卜以死。士英又有子名錫。爲禁軍提督。大兵渡江。梟其首於市。見廣陽雜記。

追和亡友鮑曼殊見贈

贈言能幾日。君已倦人間。到死事方畢。有生誰得閒。夜臺仍貰酒。遺草欲藏山。幽感元無隔。招魂自可刪。

聞蛩

秋夜已淒清。空階爾復鳴。故催砧響亂。如與客愁爭。酒淺夢難續。家貧心易驚。燈前兒女笑。同聽各爲情。

吳道約一首

道約字博之一字亞侯桐城人諸生有大安山房集

秦淮雜詠

油壁車前納晚風。單衫杏子溼微紅。何當素手攀珠箔。秋水橫波一笑中。

楊焯二首

焯字俊三吳人僑寓金陵。

秣陵雜詠二首

城南臨眺處。傳爲雨花臺。野曠層陰合。山空積翠開。吳雲連海動。朔雁暗江來。坐覺煙霄外。風聲戰角哀。
正學祠邊路。沈吟木末亭。雨飛垂薜荔。臺古落丹青。夜火歸遊騎。寒城沒曉星。蒼蒼空霧裏。應見哭青冥。

黃世康一首

世康字元幹莆田布衣。

蘭陔詩話。元幹負不羈之才。壯遊四方。嘗出山海關周覽形勢。察沙塲堡塞屯牧戰守之宜。渡遼水入燕。將上書言邊事。時士大夫譁言兵。咸以爲狂。無所遇而歸。後客顧小侯所建家。爲草顧襄恪平靈露布。援筆立就。辭義瓌璋。所建大喜。酬以金百斤。縑十疋。元幹分贈貧交立盡。

重陽前一日從家給諫茶讌同吳元翰韻

蕭颯寒氣肅。登高孰擬賦。蠟屐遲明朝。瓊筵啓茲暮。石泉響試茶。庭菊香墜露。昔聞林下風。今見塵外度。志以澹泊明。道以塞默悟。願往淪芳途。撫茲愜幽趣。雲影流方塘。風聲寂高樹。

周蕙卿一首

蕙卿字爾修。莆田人。國子監生。有章林岩閨草。

春日雜興

翹首看黃鵠。高飛不可攀。幽心依白社。託興在青山。草閣溪聲細。松門鶴夢閒。微吟向林薄。妨損石苔斑。

林璟一首

璟字台正。莆田人。諸生。有簡園詩集。

蘭陔詩話。台正同遊諸君。皆感楚昧。獨能不墮時趨。取材於漢魏六朝。亦磊落之士也。

門有車馬客

門有車馬客。車馬何軒軒。問是故鄉人。披衣不及殮。延客登我堂。稍稍敍寒溫。客心乃自悲。對我淚傾盆。云當出門時。辛苦猶宵奔。故族已凋喪。親戚無一存。巍巍舊第宅。蓬蒿翳其門。昔時歌舞地。今日聆清猿。君家有邱隴。狐兔遊其原。還憶平生親。跡往惟孤魂。聽此未及終。氣促聲已吞。勸客飲此酒。感慨涕盈樽。

方沂一首

沂字宏祐江甯人有天隨堂集且漁集

金陵詩徵宏祐自號江上野漁結茅江上得魚輒以易酒醉則高吟與僧克明巨顛剖石罔瞻與周等倡和皆隱於方外

魯兩生

繼聖如有作百年始勝殘漢初承秦敝禮壞樂不完卓哉魯兩生欲以責君難奈何叔孫通因陋成苟安遂令一代制王霸雜申韓堯禹治天下澄源在其端土階三尺餘豈直奉崇觀

王之梁一首

之梁字雲峽嘉興人僑寓金陵有讀史廬稿

金陵詩徵雲峽仗劍遠遊福王南渡慨然上書陳策爲馬阮所忌幾被害南都失守遂頽然自放生平好結客每遇豪士攜酒對大江痛飲嘉興周質憫其流離以詩招之歸云咫尺傳烽隔往還故園流水自潺湲寒煙豈限重湖雨春樹能深二月山結客徒然閉竹徑避人應復閉柴關他鄉縱有憐君者何似歸來十畝間雲峽竟不歸伴狂以終

蘇臺頌

蘇臺高高不極臺高望見臺兵入當時吳漢爭江汜虎鬪龍爭勢未已偏師一旅控臺城更出一軍援唇齒批亢擣虛斷中堅左支右梧應莫抵天下事未可知何爲乎飲河之鷄怡堂之雀徒然守此彈丸之黑子堪憐踟躕無良策但取蘇臺作京國既無島中五百人空結堂下三千客雞坡狗塘競吳子狗盜雞鳴

無一士。祇有田橫倔強心。昂首漢皇呼我爾。檻車肯乞隆準憐。怨魂夜哭龍江水。噫吁嘻。蘇臺高高已夷。吳民猶問張王基。

覃獻錄一首

獻錄字公烈。荊州人。明末官中書。國亡後。走日本。暹羅。晚居鍾山。

東粵舟中與故人話舊

離亂移家西復東。故人相見已成翁。旅窗記別十年外。前夕論心三月中。按劍風塵驚老大。聚沙庭院與兒童。蹉跎莫話文章事。聲價於今總不同。

鄧右符一首

右符字台卿。南豐人。有龍城隱集。

遊崇覺寺有感曾文定公墓

駐馬寒塘聽晚鐘。平安竹下走青童。松杉異代秋風裏。巖窟荒碑落照中。客爲白雲添悵望。禪從黃葉悟真空。斯文今日誰爲主。莽莽寒山感慨同。

黃文星一首

文星字子威。南昌人。僑寓孝感。貢生。有望楚堂集。

春湖曉釣

半湖春雨一蓑煙。盡日蕭蕭漾碧天。隔岸桃花茅屋底。斷無人處有漁船。

璩一麟二首

一麟字逸仲。建昌新城人。諸生。

同涂山公夜渡江門

看山不覺晚。乘月到江門。野寺橋邊路。漁家竹裏村。長林通古渡。遠燒隔寒原。獨夜偕君去。幽懷未可言。

溪上

小徑入松林。寒流爭斷岸。漁歌送響來。時與溪聲亂。

盧傳來一首

傳來字復郎。一字念聲。甯鄉人。崇禎貢生。

高歌

孤憤誰堪語。高歌自寫哀。世人幾欲殺。吾黨亦相猜。短髮秋霜點。寒衣薜荔裁。坐看三徑裏。晚菊傲霜開。

李振聲一首

振聲字元公。東陽人。有石艇子詩。

金華詩錄振聲自號石艇子勝國遺民自題墓石守志以終

草堂

築石面郊垌。清光滿戶庭。水方嚴瀨碧。山學灞陵青。我意懷肥遯。人情忌獨醒。夜窗松月白。坐獨楚騷經。

戴于庭一首

于庭字子薦。金華人。貢生。官沙縣教諭。

閒居

解帶有餘閒。玩此一拳石。讀罷黃庭經。松蔭墮秋碧。

略雲程二首

雲程字天游。一名雨禾。字釋孫。嘉興人。有素券堂集。

魏塘詩陳天游饒瞻略知兵事。中丞岳和聲出鎮榆林。延堂書記。時乘駿馬走塞上。與宿將貰酒悲歌。縱觀亭障。詢各邊形勢。凡阨塞要害。如指諸掌。年九十餘。談及馬阮。輒髮植齒擊。以不能奮臂其間爲恨。嘗與蔣之翹選橋李詩乘。未及梓。

送弘與上人探茶埭山

飛錫躡芙蓉。穿蘿摘紫茸。香煩三等判。色借一谿濃。雲乳擎甌泛。雲芽裹箬封。師還結湯社。參破趙州宗。

暮春

愁中忘却春歸去。綠暗蘼蕪燕子飛。還憶月明攜手處。半庭花影上人衣。

張玉成一首

玉成字成倩。如皋人。諸生。

田按。成倩輯七言律準四十七卷。自敘云。樂有準。六律之節以達。詩有準。五十六言之法以昭。度有準。萬器之愷以得。得準之義。可以言詩。成倩所著不多見。未知於準之義果何如也。

雪中懷冒伯廉王翰卿

萬木蕭條入暮煙。繽紛飛雪壓籬邊。爲慚仲蔚平陵宅。翻憶王猷剡水船。歲事淒涼愁共劇。風塵搖落病相憐。那堪更滯三閩地。讀罷招魂思惘然。

朱文心一首

文心字瓊龍。南通州人。貢生。有惺園集。

金陵江口夜泊

孤舟江下泊。秋夢耿難成。片月中流影。千帆半夜聲。地鄰桃葉渡。山近石頭城。倚舵聞吳詠。偏令旅思生。

天爲霖一首

爲霖字景傳。無錫人。有白賁集。

客自澄江歸有贈

浮遠堂前路。微風穩放舟。江昏茶磨雨。煙暝弩臺秋。入饌花雞肥。開樽綠蟻浮。西塘十八里。來往候潮頭。

明詩紀事卷三十一

辛籤

潘陸二首

陸字江如吳江人僑居鎮江有穆溪集

明詩綜魏楚白云江如四壁蕭然而北海之塵常滿其論詩慷慨謂鍾譚興而國亡是亦法家定案

生米鎮

古鎮風帆落天涯倦客回白雲生鵲嶺真氣挹蛟臺瘴海軍書警殘黎野哭哀青青霜岸樹記取豫章材

劍津

城下三溪合當時七較齊會聞朱鷺出復見杜鵑啼碧草年頻換蒼梧路總迷向來消息斷淚盡浙江西

湯燕生三首

燕生字玄翼一字巖夫甯國太平人有商歌集

新治荆思舊錄嚴夫自太平遷蕪湖所居地甚僻屋兩楹內外皆農具恬然一農人也恆苦人過訪人亦罕有造者詩皆唐音篆書古淡入妙不在伯奇子行下

赭山二首

赤鑄山頭鳥不飛。上皇曾此易青衣。無多待從爭投甲。有限生靈但掩扉。五國城西邊月苦。景陽樓下暮鐘微。傷心莫唱淋鈴曲。未得生從蜀道歸。
淚逐天風向北揮。山僧指點舊重圍。軹車東駐泉偏咽。代馬南來草不肥。野老久知今日事。先臣猶護昔年非。延秋門外王孫盡。司馬元戎自錦衣。

梅村詩話。玄翼赭山懷古二首。於乙酉五月事極切。哀婉淒涼。使人不忍卒讀。武塘夏雪子極稱之。

訪漸江大師朔園

松響山堂水自波。晚知清淨寄雲柯。橫流江海牽舟去。失路煙霞引杖過。獨歎蘭亭離玉匣。深悲書院記宣和。藥欄秋興開今古。留客聽泉蔓草坡。

范路七首

路一名澱。字貞甫。蘭谿人。流寓嘉興。私諡貞簡先生。有靈蘭館集。

明詩綜。周青士云。遵甫潛心性命之學。不關佛氏。偶然作云。青青江岸山。活活江流水。夫豈不高深。有象終必毀。又云。我嘗夜分坐。仰天見北斗。風吹百草頭。月出萬山口。牧雲和尙愛之。欲付以巾拂。不受。海鹽張處士瑛。白方講學硤石山。遵甫謂其嘖明德格物意有未安。別爲講義示學者。人或以其未盡合乎朱子非之。遵甫不顧也。其詩不費鍛鍊而出。誦之妍雅和平。晚開靈蘭館寶藥長水市。乍愚乍智。人莫測其所詣云。

靜志居詩話。遵甫舍貞履信。博通古今。賣藥市門。行歌帶索。由其見深。故於憂淺。譏遠斯視。患浮。昔人謂太邱道廣。廣則不周。仲舉性峻。峻則少納。遵甫廣不混俗。峻不污物。發爲詩文。多見道之言。裴子野之稱劉居士也。所修孔氏之學。則儒者師之所明。釋氏之教。則淨行傳之。所著文集。則詞人錄之。斯言也。遵甫庶足當之矣。

許燦晦堂詩話。遵甫隱君。貧等黔婁。和同柳下。學侔茂叔。節類伯鸞。常歲除大雪。王布衣介人伺之。方懸破席蔽風。夫婦暖糠守歲。遺以米五升。不受。族弟思攜妻子鬻身求活。留之同飯糠粒。不以爲嫌。遭亂流離海上。志不少挫。遷於理學。多從方外游。不爲所惑。嘗曰。釋氏之學。一了卽爲百了。吾儒之學。百了方爲一了。其詩旨意懇惻。精光炯然。

田按。遵甫彌節既高。吐屬自遠埃壙。

感懷

夜定燈燼落。孤生邁遙想。歷物鮮所愜。心形逝成兩。蕙草日以摧。榛莽日以長。風雲道何窮。羽翮悲失養。擾擾泥塗中。誰能事軼掌。

久雨

我心正悽惻。淫雨在此時。累旬不見天。局蹐無所之。沿苔上危墻。中庭竟成池。萍藻忽已生。青青向檐楣。鳴蛙從何來。公然在床帷。但得天氣晴。東郊望耘耔。

夜坐懷唐上玉繆天自林邱聯句

獨坐燦清繁。華光照纖悉。翬訶旣云斂。四壁起蕭瑟。孤情渺難控。良契隔遐室。慧吟殊未忘。矐靈迺奔軼。

芳軌信所希。佳辰逝何疾。良哉古人言。寸陰抵兼鎰。

自傷

上有紅桃花。下有碧流水。一朝風相吹。桃花忽相委。嗟我飄泊人。所傷亦如此。

晚步

氣侵林木晚。歸步自原田。舊業愁中盡。餘生亂後全。人煙孤壘斷。衰草夕陽連。何處悲笳動。依然似去年。

一邱山院得主人吳君佐夜邀從山塗暗行二十里

山院黃昏政寂寥。感君仗劍獨相邀。荒煙暗盡來時路。漁火明隨去後潮。林下時時逢石虎。樹頭隱隱出山魈。柴門冥漠知何處。約略曾過舊竹橋。

遙經郡城作

愁雲黑霧壓城頭。丁令重來隔幾秋。折戟尚沈沙底鐵。殘陽空照水邊樓。風吹牧馬千羣出。浪打寒塘百道流。未到新亭腸已絕。何須極目望神州。

湯濩二首

濩字聖弘。吳人。有香草堂遺稿。

清涼山

風景故依依。孤亭出翠微。雨中同客至。月上望僧歸。山合衆樵響。風高一雁飛。胭脂井尚在。冷碧蝕苔衣。

懷顧甯人

虎頭應復讓君痴。儒俠僧樵事事宜。千百國風存野記。十三陵樹補新詩。音聲小悟殊堪喜。姓字頻更莫浪疑。懷友句成反自愧。半函煙雨隔秋思。

陳確一首

確、初名道永。字乾初。海甯人。

訪蔡來老

東海尋高隱。翛然屢空餘。衰年千里客。茅屋一床書。傲骨支天地。清風動里閭。日斜攜手出。恰是晚潮初。

吳時德三首

時德、字明之。一字不官。吳人。有蘆中草。

湖山靈秀集。不官苦心學詩。清汜孤起。不隨時人徵逐。

田按。不官曾與錢宗伯倡和。錄其詩入吾炙集。

暮春述懷呈顧與治

江城孤客若爲鄰。相對黃花卽故人。仗酒撥愁餅易罄。開編臨牖月常親。好閒未遂翻爲病。得句能工始

愛貧漂泊異鄉還自幸，十年猶剩亂離身。

過張文寺隱居

苔逕逶迤破翠痕，蕭然南郭似荒村。滿畦野菜初生葉，近水垂楊半露根。著述可消閒歲月，香光偏到小柴門。幽棲自是吾儕事，秦後桃花且莫論。

答林茂之問予山中近況

日日蕭閒閉草廬，莫將蹤迹問樵漁。山中自是無他供，一樹梅花一卷書。

張光啓一首

光啓字元明，章邱諸生。

居易錄：元明世居白雲湖上，少爲諸生，有名。爲梅長公、朱未孩二公所知。崇禎庚辰年四十，棄諸生，闢園種樹藝花自樂。亂後，足不履城市，年八十餘卒。有張仲子詩，往往可傳。

對菊

種菊叢叢傍石根，凌晨坐臥近黃昏。沾來新釀經秋醉，開盡寒花未出門。

張致中一首

致中，字性符，淮安山陽人。以經明行修舉，未授官卒。其友私謚恭孝先生。有眉尹文集。

靜志居詩話。復社初。君與白受藻素先。方能權濬若。同郡諸子應之。而君爲之領袖。以尊經博古是尙。家雖貧。儲藏鼎彝。碑板之文頗富。有子弢。字力臣。棄諸生不試。工六書。

感懷

虎猛亦可搏。龍神亦可馴。咄哉不可下。無如壯士心。揚之秋雲高。抑之秋淵沈。哀樂詎有定。感物成斷斷。世路塞冠蓋。得意驕黃金。未逢尼父嘆。安知爲麒麟。

陸啓滋一首

啓滋字叔度。平湖人。貢生。有賁趾山房集。

橋李詩繫。叔度博極經史。不事章句。偶儻負奇。通輕俠。類河朔壯士。好談論古今成敗。知邊塞事。扣之纒纒不可窮。嘗遊建業。命酒泛舟。召舊院名姬。大會詞人於秦淮。酒半。一姬倚檻。微嘆曰。惜無兩岸紅蕖。佐此勝集。明日復讞。比客至。則晚風拂席。荷香襲人。舉座莫測其故。蓋於是夕懸金購數百盆荷。碎而沈之。自是十四樓中。皆目爲樊川。復出。後走京師。垂二十年不遇。而貧甚。值喪亂。更名遜。字山翁。與酒人奇士邂逅。短歌軟歎。聲淚俱下。及沒。趙退之以文祭之曰。總君一身。顧殊今昔。翩翩五陵。瀟瀟四壁。金散名成。人完代革。

次酬黃平立喜余遠歸

易水悲歌萬里風。五湖煙雨一舟中。長安大道驅流馬。古戍寒秋斷晚鴻。醉酒漫勞王處仲。抱琴不學李元忠。移文正恐君先我。十載徒然草送窮。

張杉二首

杉字南士。蕭山人。有集。

毛奇齡西河集。康熙二年。海上大獄起。歸安魏耕走蕭山。復走梅市。大將軍刊章。遮捕之。獲耕。兼逮蕭山。梅市之賊耕者。以銀鑄鑲李達。楊遷并祁思敏。公次子班孫。家人莫敢問。道路離立。南士挺身走三家。爲經紀其事。及耕伏法。班孫與達輿遷。並徙塞外。點解多一人。則南士也。解官斥之曰。汝欲偕往耶。南士曰。當魏耕逃時。亦思至某家。徒以舟楫未便。故幸免。今不忍三人者。獨行。欲送之過河。而執事以爲欲偕往。吾豈畏往者耶。解官義之。勸之返。乃嚔眦牽衣而別。

靜志居詩話。南士周見洽間。賦才獨步。詩篤和雅。無傲志之音。

九日

江楓吹葉滿江皋。淇淇江流雁正號。病起孤懷愁望遠。節逢九日罷登高。茱萸香憶仙人佩。白苧寒生處士袍。手攬黃花還強酒。壯心倚醉轉蕭騷。

蒲坂道中作

峻坂長驅匹馬過。春風吹客奈愁何。重華不返蒼梧駕。孤竹空傳採薇歌。北望雲中連紫塞。西來天上瀉黃河。幽懷故國歸何處。此日征衣淚更多。

史玄六首

玄字弱翁。吳江人。有弱翁詩文集。

徐巖百城煙水北林在吳江縣北門外俗名新浜崇禎間史玄隱居之地玄所著有詩集文集河行注甌東倡和集鹽法志吳江書舊傳梅西雜志舊京遺事

中秋攜新姬今宵出都

俄然出樊籠再遊江海天
灩灩白露秋我行已三年
京華貴束溼龍沙事烽煙
黃金養末士此輩無高賢
怪汝蘭蕙姿識我思歸田
相從願同行梳頭鞍馬前
我家住江南采菱復采蓮
自從遠行役湖渚空潺湲
今日果何如與汝相周旋
大婦織流黃小婦隨機邊
三日下午絹匹匹絲纏綿
其中我讀書文史聲相宣
陰陽事殊用教化達以專
念此洽幽趣豈計囊空錢
汝車我馬行明珠雙炤懸

本事詩崇禎時弱翁在都門娶燕姬明慧善曲字曰今宵德州盧侍御世灌賦傾城悅名士詩贈之一時和者甚衆乙酉後弱翁沒于西濠姬亦嫁爲廝養婦矣

秋霽題北林敝廬

郊野秋陰後平橋路未通
寒林經晚翠早稻出香紅
歲祲依殘帙年侵愧轉蓬
雙峰門外對野興似村翁
春感

秀色江城舊今來瓦礫平
春風吹綠浦芳草不能生
甲第青蘿透空林黃鳥鳴
若逢明月夜橫笛作邊聲
庚辰冬同松之文將掌文虎邱訪道開扁公

步屨尋開士探幽及小春
琴鳴流水靜花放衲衣新
黃葉千年樹青山半醉人
還家無底事蘭棹且逡巡

祇園寺

絕壑長林古寺開。石門殘日滿蒼苔。嵐光雲影千尋落。帆色湖陰萬里來。池上白蓮堪結社。院邊叢竹且銜杯。不緣病減登山力。待月遙從縹緲回。

當塗縣

晚泊當塗縣。青山在縣門。仙人今亡去。愁殺謝家村。

趙渙一首

渙字少文。吳江人。

田按。少文與吳日生、史弱翁倡和。號東湖三子。

楊龍友

夫子天南秀。文星動夜郎。攜詞飛赤電。拂劍倚青霜。鸞翮離荆棘。龍韜傳玉璜。羣公正推轂。佇望搢殘疆。

顧有孝一首

有孝字茂倫。吳江人。諸生。有雪灘釣叟集。

徐鉉南州草堂集。茂倫爲詩。每矜慎不苟作。遇有分題擊鉢者。恆終日不成一字。而間出片言。必雋永。傾其座人。吾邑自啟禎以後。如周安期、徐介白、俞無殊、張九臨、朱長孺、暨茂倫。皆所謂前朝之遺老。盛世之逸民也。

靜志居詩話。處士甄綜百家之詩。開雕分授。盛行於時。賓至輒留。江左有齋菜。孟嘗君之目。由其胸無柴棘。故月旦同辭。晚自

稱雪灘釣叟。松陵女子沈關刺繡作雪灘濯足圖。一經裝池。過江人士。以不與題辭爲恨。

寄贈沈留侯借小阮北上

春風楊柳拂行舟。有美聯翩共遠游。入洛陸機新作賦。依劉王粲故多愁。舊京朱履三千士。荒塚冬青一十秋。湖上好山無恙在。獨持卮酒對羣鷗。

周安一首

安字安節。吳江人。有草閣集。

顧有孝雪灘釣叟集。安節泊懷幽詣。躡武宗雷。清音琅琅。不減魚山仙梵。

月夜懷此山禪師兼寄張文通

憶昨投蓮社。相攜出虎溪。雲山忽間阻。月落雪川西。露下花逾白。松高鶴共棲。還驚臨照內。江海有征羣。

雷士俊四首

士俊字伯籲。涇陽人。諸生。僑居江都。有艾陵詩鈔。

揚州府志。士俊棄諸生。專力經史百家。熟悉古今治亂得失之政。辨別君子小人消長進退之幾。爲文鉢心剴切。既脫稿。必琢磨再四。始出以示人。貧老負氣。悲憤得疾以卒。

田按。伯籲詩古直老蒼。有唐人格調。時學魏晉。此秦風之壯激者。

送河間司理李岷瞻赴任

明詩紀事 辛鏡 卷三十一

三三四七

去歲纔識面。君尋作南遊。至此無幾日。一官之瀛州。憶昔論文飲。客舍成獻酬。門外車馬喧。君行不可留。築夫吾老友。嘯傲臥山邱。今又隨君往。索居誰與儔。蕭條北風厲。冰雪滿道周。握手難爲別。濁醪盡更籌。河間近京畿。動輒罹愆尤。虎狼恣窺噬。彷徨使人愁。何以垂令名。勞民庶小休。誦彼小宛詩。懷古悵悠悠。

送王幼華歸秦

故人西歸去。五月天方熱。中途多險艱。單車向嶸嶮。火雲照烈日。遊子正飢渴。庭樹綠陰濃。執手難爲別。近詩推秦風。高古比駟鐵。我友有新篇。字字皆白雪。

春日詠懷二首

青青道旁柳。潺潺澗中水。柳枯春復榮。水逝來如駛。人生百年間。一死無活理。佇立臨岐路。悠然念君子。焉能乘雲翔。阻絕動盈咫。登高望邱墓。前後長荆杞。聖愚固皆然。鮮民悲天圯。孤鳥蹲寒樹。向夕鳴不已。步登蜀岡上。遙望廣陵城。獨立衣縹緲。颯洒起風聲。大道何盤盤。匹馬自孤征。荒徑埋瓦礫。山寺空崢嶸。日光乍有無。白雲樹杪生。回首睇吾廬。兩眼淚縱橫。

李沂四首

沂字子化。一字艾山。號壺菴。揚州興化人。諸生。有鸞嘯堂集。

靜志居詩話。啟顧問。詩家多惑於竟陵流派。中州張瓠客覽弟。竟客避寇僑居昭陽。每於賓坐論詩。有左袒竟陵者。至張日批。

其頰是時艾山特欣然相接。故昭陽詩派。不墮姦聲。皆艾山導之也。
田按。子化詩。清真絕俗。晚好學仙。蓋有託而逃也。

玉壺吟

子夜夢一男子持扇見示。題曰玉壺澄澈。冷貯本色。覺而爲此吟也。

堯之聖兮舜爲弼。皇紀張兮定八極。八極定兮二曜光。端子軌兮由周行。由周行兮靈之綏。遵無爲兮樂安居。道之喪兮繩墨旣多。紛總總兮王化訛。流之濁兮源弗清。法令章兮亂日生。亂日生兮巨盜起。攘神器兮劫天子。海水淘兮山之椒。天關其日兮民爲妖。民爲妖兮心爲鬼。絕陽光兮毒生理。淬子劍兮張子弓。貫魍魎兮磔三彭。三彭磔兮六合清。驂兩龍兮遊赤城。幹元化兮紐虛無。返子初兮歸玉壺。

劉薪歌

今年水大薪難取。蘆花水面蘆水底。尺五鎌刀丈二柄。竟日一人十束止。辛勤餬口豈能長。尙憂妻子飢凍死。黑雲滿天鳥亂飛。屋西望船船未歸。

聽楊懷玉彈琴歌

楊君善彈思皇操。自言崇禎末年作。強之再三始肯鼓。拂絃沈吟淚先落。引商振角時扣宮。八荒蕭槭回悲風。天地愁慘白日凍。啾啾鬼哭空庭中。絃鳴指咽絕復生。黍離麥秀傷人情。感時述事語不明。四座慄

慨誰能平。楊君本是西蜀豪。幼精馬槊兼弓刀。三巴健兒好顏色。立功好著團花袍。是年天子郊穹蒼。還宮三嘆古樂亡。爰命廷臣定樂章。侍臣聞詔俱徬徨。或薦楊君通律呂。徑來天上調宮商。便殿侍坐近玉牀。賜食得比中書堂。鼃翻蛟躍乾坤改。垂老飄飄適東海。千金囊橐散無餘。惟有先皇賜琴在。陽山客舍長莓苔。重門小苑碧桃開。靜簡道書春寂歷。細爇柏子雲徘徊。滄浪之水何清清。波底墜雪白鷺明。布帽青鞵又西去。日暮相思空復情。

田按楊懷玉事詳見李確詩後。

避亂舟中作

避地家何處。飄然更出門。艱難攜十口。風雨向孤村。遠浦殘荷立。寒沙急浪吞。偷生任飄泊。時事不堪論。

王廷璧一首

廷璧字雙白武進人。

聞雁

雁聲何處至。明月照西樓。寂寞青楓樹。蒼茫白露洲。雲中呼侶去。天外入邊愁。我亦窮途客。悽然驚暮秋。

談允謙四首

允謙字長益丹徒人有樹蔭草堂集。

靜志居詩話崇禎初大官庖開應支物價簿帝詰內侍謂太浮且曰炙鷄醃鱗肉酢在某肆市之錢半百耳內侍驚愕錄長益
聞內臣述往事詩云潛邸曾親到市國民間物價每留連西華鷄炙前門鮮一箸纔消半百錢足以徵思陵留心民事之一端
也。

臨江柑園

臨晚蕭灘上柑園向水開黃從入霜後香自過江來日望湘雲至今疑破雨回徘徊不能去誰識楚臣哀
東湖

南浦積雲何日起西山積雨未能晴春波近已浸城半秋水年來與路平下榻有誰留孺子樹蔬無地訪
雲卿歌樓燒盡多新鬼夜靜猶聞絃管聲

滕王閣故址

高閣臨流付劫灰重游難問舊歌臺鋤蘭日見佳人去芳草何年帝子回南浦鸞鷗隨浪沒西山風雨過
城來多情今夜章江水吹盡殘雲月又開

邊關春晚曲

胡姬隊隊弄胡琴酒滴醺酥取次斟花柳旣無鶯燕少總然春去不關心

蔣人一首

人字公凡一字昭道嘉興人

梅里詩輯布衣泉石盟心潛蹤村僻自畧桃花里人

歲除前五日送金子還白下

衰柳不堪折寒梅聊贈行春風知幾日還到石頭城

王巖二首

巖字築夫寶應人有異香集白田布衣集

靜志居詩話築夫肆力爲古文辭要以醜機勝若惟恐其文之工者頗有類於穆伯長柳仲塗尹師魯石守道諸家賦詩不多
原本杜曲

孫無言之虎墩贈別

又欲歸何處飄零問海涯山前多虎迹世外有人家曠野悲風動孤舟落日斜誰能臨積水容易臥煙霞

尋春

尋春在何處惆悵落花前淮海仍寒食江山老杜鵑全生惟縱飲養拙只高眠日落飛飛燕歸巢意可憐

孫爽一首

爽字子度崇德人有甲申以前詩容菴集

秋懷

疏寮映山帶。竹瀼怒泉落。鬱氣集松杉。漸知林影薄。殘英泥輕寒。側側護羅幕。結志獨徬徨。發憤以著作。愴悼雅云厚。冥觀還自樂。

蔡仲光三首

仲光字大敬。蕭山人。

采蓴

鱸魚膾水鄉。維客動歸腸。一夜秋風起。滿湖蓴菜香。布帆飛裊裊。花嶼鬱蒼蒼。小摘隨人意。幽棲好不忘。

飛星

薄暮愁相向。西風人迹稀。天星大如椀。冉冉渡江飛。海水秋聽壯。吳山夕望微。十年戎馬地。回首一霑衣。

題姜廷榦畫

巖高秋氣深。臨岸幾茅屋。此徑鮮人行。何由知路曲。

錢肅潤四首

肅潤字季沐。一字礎日。無錫人。諸生。有文澱。十峯等集。

感舊集。震滄云。礎日明諸生。甲申後棄去。縣令以事夾其足脛。至折。礎日笑云。藥一足。庸何傷。遂爲跛足生。自號東林遺老。

采蓮曲

采蓮女。雙槳逢江潯。吳姬越豔誇眉嫵。兩地新妝一色裁。玉釵羅袖嫋嫋來。荷花欲語卻不語。誰人解語爭徘徊。爭徘徊。弄舟搖碧水。水中驚起雙鴛鴦。作浪迴風飛不止。

過平原懷平原君

人生莫結客。結客須及千與百。千人百人縱美好。亦有瘖聾與跛躄。自來傾士推田文。滿堂食客何紛紛。同時肝膽更誰向。共說應向平原君。此行正在平原里。卻憐未見佳公子。衣冠零落野草中。土田委棄荒煙裏。齊之封疆趙食邑。昔年結客如雲集。當今覽者是何人。公子在焉呼或出。

客從婁東來述陳言夏近況賦詩嘆之

販樵鬻苧出江邊。十里桃花五里煙。唐市湖林常一過。兒童爭道孝廉船。

過汨羅追和韓昌黎

湖水遙通江水波。南流爲汨北爲羅。舟行不識懷沙處。相向何方唱九歌。

丁之賢三首

之賢字德舉。漳浦人。

何梅綬安二布衣詩。明崇禎中。流寇起西北。德舉挾策入都門。客司空邸第。欲獻書闕。下言兵事。會司空罷官歸秦中。挾德

舉與俱書不果上德舉請司空厚爲資裝資十日糧短衣疋馬循賀蘭山出長城訪求古戰陣營壘日與朔方豪傑畫沙聚米爲搗賊巢計謀甫合而李自成陷西安破潼關明社遂亡德舉念家有老母脫身南下有王將軍者建牙汀州聞德舉名招致幕下贈以一婢小字海蠻未幾王將軍別調去德舉偕海蠻歸窮老無所聊賴做屋城東桃花溪上客至樵蘇不爨清談而已子猶及見其白髮鬢鬢垂額上楮冠袍袍整市廛中沒之日邑令秋浦檀光燭爲之書其碑曰詩人丁布衣之墓德舉在秦時所刻詩止百餘首里居家貧不能具紙筆所爲詩多草書歷日背上字漫漶不可識認予以意釋之統爲鈔撮合朱布衣詩刻之爲綬安兩布衣集

榕城詩話之賢詩五言若林豁秋摧葉江喧夜聚航平沙含月迴遠火雜星明河流管晉曲山勢出秦平七言若潼關東抱成金陡灞水西來作御溝皆清峭刻露

淮安署中和別李以理司理

戀戀惜明發其如游子何天涯纔挂席海內尙橫戈江轉鄉思近春歸別恨多懸知孤館夢帶月繞淮河
夏夜澣墅關送張鍾石歸燕沈季聯歸越

越國南連海幽州北到天挂帆梅雨過驅馬火雲懸戀別還謀夜相逢未卜年卻教羈雁羨俱向故鄉旋
留郎曲

向曉候天色江雲罩日紅囑郎休解纜亭午石尤風

朱國漢七首

國漢字爲章漳浦人

明詩紀事 辛籤 卷三十一

榕城詩話。朱爲章晚號獨醒居士。少孤。事母以孝聞。崇禎甲申。變開。狂走登越王臺址。北向號慟。累日夜不休。悉焚棄其素業。託於賈人以自晦。歷吳越。涉荆豫。往來燕趙。齊魯。郊與僮僕備僧共甘苦。所至遇古忠臣名賢祠廟墟墓。擲石泉。摘山花。俯伏拜奠。歌詩憑弔。有騷人之遺意。五言若烽火夷陵道。冰霜息壤城。綠浦番客飯。紅葉女郎樵。鋤芝沿鹿去。拾橡伴狙歸。七言如無情漳水清。何極垂死奸雄意。可憐烟霞滅沒三山外。江海蒼茫一氣中。皆極鍛鍊。

田按。綬安二布衣。爲章爲勝。

感懷雜詩

生嫌雞蟲爭。死信鳶蟻食。鳶蟻何親疏。雞蟲互失得。乾餼成愆尤。耨鋤有德色。鼎鼎百年內。偈次復偈次。買山山不深。擇林林可卽。側身望冥冥。羨彼飛鴻翼。

旅宿杭川

唧唧復唧唧。床頭蟋蟀吟。關山孤枕夢。溝壑百年心。不雨暮寒薄。微霜秋氣深。更聞明月下。力盡擣衣砧。丙辰楚中旅懷

故國飛鴻絕。關河仗劍行。秋風吹塞馬。殺氣凜嚴城。嶺徼猶擐甲。衡湘未洗兵。紛紛傳卜式。已拜漢公卿。獅子菴茶話

疏鐘散林樾。秋意滿禪關。龍象諸天幻。茶瓜半日閒。生天須是慧。作佛不妨頑。坐久涼飈起。歸禽自往還。吳城登望湖亭

金鏡回首夕陽邊。客裏年光感逝川。千里書來湖口縣。片帆人上秣陵船。長風捲浪花如雪。極浦連天草似煙。何處笙歌江水沸。令公祠下響神絃。

皖城

新開幕府控巖關。南北舟車判此間。落日淒涼余闕墓。浮雲斷續皖公山。蕭蕭木葉吹難定。渺渺秋鴻去不還。江上幾年銷戰伐。石苔堤草自斑斑。

武林懷古

趙家宮殿莽寒煙。鎮海樓空夕照邊。石鏡雲橫州十四。水犀潮落弩三千。疏鐘細雨湖頭寺。短槳輕橈閘口船。欲向孤山尋處士。梅花香雪落紛然。

徐晟二首

晟字禎起。一字損之。長洲人。諸生。有陶菴詩冊。

靜志居詩話。禎起交情真摯。惻惻無華。雖以陶菴自稱。不盡規撫栗里。

除夜寄家舅客鴛水

草草摧殘臘。沈沈接早春。屠蘇今夕酒。客夢各鄉人。望斷吳江樹。身疑谷口津。隔年風物好。別見柳條新。

送友之越

月照吳江冷。春從越地開。孤雲一雁下。匹馬萬峯來。意氣銷兵革。英雄半草萊。異鄉朋舊好。不放故人盃。

陳三島二首

三島字鶴客。長洲人。有雪圃遺稿。

靜志居詩話。鶴客志士。所居蓬戶席門。而求友若不及。中懷孤憤。恆露于眉宇之間。其詩華整之中。間以清商變徵之調。惜乎早逝。未盡其才。

送友人之楚

此去巴陵路。秋風傳鼓鼙。長江舟上下。落日鳥東西。野狄窺人面。山雲信馬蹏。祖生長自往。旅夜聽鳴雞。

贈朱錫鬯

採藥吳門市。逢君已暮秋。涼風吹錦纜。明月照芳洲。叢桂王孫樹。幽蘭帝子邱。小山如可賦。紉佩共淹留。

盛斯唐二首

斯唐字集陶。桐城人。僑寓金陵。

金陵詩徵集。陶居金陵十廟西門。毀垣敗屋。蓬蒿滿徑。與林古度唱和。晚以目眇。屏居不干一人。

落葉

空齋樹晚儘。風乾搖曳聲。頻不忍看。斷柳枯桐無意緒。清笳夜月總荒殘。吳江信是裁詩冷。南浦其如送

別難。一自青楓凋玉露。巫山巫峽至今寒。

懷林茂之

幾度思君輒賦詩。羽飄鱗蟄每差池。舊栽柳色曾無恙。新買帆風未有期。千里夢回秋雨細。一燈愁擁夜涼遲。病中添病人無那。老眼聞知應淚垂。

譚雅一首

雅、字岑止。茶陵州人。

沅湘書舊集。岑止早歲常從瞿稼軒先生軍。亦殷頑也。劉杜三聞譚岑止又移寓石盤山。卻寄詩。有舉家真耐白雲寒之句。可想其風味也。

海上立秋

匡山往事易驚秋。忍對西風賦壯遊。擁衆田橫猶伏島。依人王粲且登樓。飄零家國生何益。莽浪乾坤死便休。盡說窮愁詩易好。慙無好句答窮愁。

方祖兆一首

祖兆、字昌祚。莆田人。諸生。

蘭陔詩話。昌祚工書法。亞於宋比玉。

明詩紀事 辛籤 卷三十一

宮詞

紈扇已經秋。紅顏欲銷歇。夜深下玉階。獨拜梧桐月。

王萬禩一首

萬禩字日華。一字魯甫。上元人。貢生。有香醉山房存稿。

新亭

話到新亭不忍登。六朝遺夢剩孤僧。永嘉人物知餘幾。依舊江光一片澄。

楊炤一首

炤字明遠。先世清江人。移居長洲。處士補子。有懷古堂詩五十卷。

有學集。明遠高才盛年。遁迹自引。疏布不厭。妻子凍餒。長篇短詠。矢詩遂歇。響振林木。

徐柯□□潛夫在鬢髻。能誦陶杜詩。爲五言有警句。交友上元顧興治。高澹邢孟貞。咸嘆異之。甲申乙酉之際。潛夫歸鄧尉山。爲終隱計。肆力於詩。規模少陵。字櫛句比。不失尺寸。故其所得。真率渾成。絕去雕飾。虞山錢宗伯故善其父古農。見潛夫詩。益喜。且高其志。爲序而刻之。有魯兩生漢四老之目。虞山沒。婁東吳司成。王奉常亦稱焉。而尤爲甯都會燦。益都孫賓侗。萊陽宋琬所激賞。潛夫專摩少陵。爲詩史之學。五十年中。市朝改易。陵谷變遷。寓其感憤。皆於詩乎發之。至二千餘首。都爲五十卷。有爲之言爲多。

靜志居詩話。明遠詩評者比之雪山醜醜。吾嫌其太滑。

田按。明遠父子借隱陸墓。邢石白贈日補詩云。尙憶南徐別。春風五六年。生涯牛口下。衰齒雁行先。羨爾移耕具。將家稅野田。

相過憑一葉。已到鹿門前。又酬明遠詩云。亦是衡門士。寸心有所期。郊扉常獨掩。樂與州府辭。可以想其高致。

寄徐昭法

卜宅聞君在上沙。共言此地最清嘉。山田秋斂家藏米。園戶春深人採茶。杯蟻綠時浮竹葉。樹雞黃處落松花。逃名鹿豕爲羣久。過客休題高士家。

車以遵一首

以遵字孝思。一字孝則。邵陽人。參議大任子。諸生有聲香閣草。高霞堂正續集。

陶汝龔。揭玉堂集。孝思生於閩。長於吳。越老於楚南。其文與人俱翩翩。有凌雲氣。

楚風補。高霞居士著述甚富。早年與鍾譚齊名。屢經辟舉不就。亦玩世逸民也。

田按。孝思楚人。知有鍾譚而已。古詩亦有真氣。

日復一日行

一日復一日。牽絲不盈疋。三萬六千場。眼見有時畢。蒼海爲桑田。此度已非一。老子念孫子。孫子復見憶。古之大聖賢。各自有苗裔。叶及乎千百年。莫知所自出。朝兮如是朝。夕兮如是夕。此日未足多。此日已可惜。勞勞百年心。宛轉爲誰役。

蔣之翹三首

之翹字楚稷秀水布衣。

靜志居詩話。楚樞輯李詩乘四十卷。搜錄鄉黨先正詩無遺。兼能備舉軼事。使聽者忘倦。晚年無子。書籍散佚無餘。詩乘亦亡。可嘆也。

始春日送陸韋公之淮西

乍逢旋別正初春。冷落梅花解笑人。千里江關謀食計。十年烽火苦吟身。交當歧路尤堪重。文至窮時自有神。漫爾離尊何所指。黃雲甲馬故酸辛。

詠陸鈿故居

感慨黃公墟。況從聞笛處。羈魂渺難招。日墮淮西樹。

忠孝堂有序

南宋有陶姓將仕郎。扈從南來。卜居於王江涇三世矣。宋末嘗輸粟集鄉兵禦元。宋亡戒子孫無得仕。作忠孝堂以見志。藝菊千本。五色粲然。自號菊隱。

錢塘王氣已銷沈。草野猶存報國心。不負柴桑老孫子。冷香秋色一堂深。

路澤農一首

澤農字吾徵。一字安卿。曲周人。

遊西山

削壁懸空外，孤筇入斷雲。峯垂紅樹接，石亂碧流分。衰足行多歇，天風定亦聞。幾時攜素侶，終日坐秋雯。

程奎一首

奎，徽州人。

卽事

歌舞叢中度歲華，一朝忽去抱琵琶。前身定是烏衣燕，不入王家入謝家。

靜志居詩話：崇禎癸未，湖廣巡撫宋一鶴敗，家屬沒官，有妾金陵陳氏，以色藝聞，門客王屋聘焉。謝參政上選先期娶之，奎因作詩嘲笑，一時爭傳誦云。

屠爨一首

爨，字關伯，嘉興人，諸生，有大經堂集。

靜志居詩話：關伯言無枝葉，行有規矩，詩亦雅正，不以風華見長。

梅里詩輯：關伯鼎革後絕意進取，張考夫題其所居云：霍原六聘山，焦兔三詔洞。漁子定迷津，遮莫桃花種。高致可想。

過嚴先生祠

江水日夜流，揚舲漸迴遠。丹扉阻層巒，高墳隱深阪。灌木繁行雲，凝睇何繾綣。抗手發長謠，髣髴見遺範。

策吾鹽車足。豈嗟年歲晚。

李麟友一首

麟友字振公。一字于苑。嘉興布衣。有醒齋詩草。

春暮有懷朱十彝尊客越

飛花三月暮。春色滿江關。芳草天涯路。王孫去不還。

李生乾一首

生乾字梓甫。鄞人。

送朱廣文

夙有蘭蓀契。仍同汗漫遊。相看俱短髮。不繫是孤舟。道直傷如砥。途窮只敝裘。莫須悲去住。吾道在滄洲。

楊連吉一首

連吉字彙征。卽墨人。諸生。有悠然廬集。

村居

寂寂山村僻。居鄰不數家。柴門終日閉。生事任年華。細雨滋秋草。緒風開野花。邇來從吾懶。常是對煙霞。

徐篤一首

篤字行之曹州人諸生有墨莊詩草

春日懷邱子星

把酒不成醉。物華空眼前。向來同意氣。別去廢詩篇。芳杜愁無賴。垂楊春可憐。美人竟何許。望斷楚雲天。

葉有馨一首

有馨字子聞吳人有咸悅堂集

登靈巖山

吳王宮館空山曲。西施洞口春草綠。昔日雕闌凭翠娥。今日招提散金粟。古藤離纜覆井床。轆轤素綆動寒光。山前一片五湖水。琉璃萬頃空蒼茫。點點羣峰噴白霧。隱隱漁舟間煙樹。青楓碧柳越來溪。平沙欲石鷗夷慕。江南二月花如茵。江南三月花撲人。嬌歌豔舞可長樂。吳王宮館無黃塵。

何蔚文一首

蔚文字穉元浪穹人

田按穉元有句云夕陽僧影淡一笑菊花秋繞有別趣

偶爾

偶爾看秋色。茶鐺借石支。吟詩翻白俗。學畫愛黃癡。南畝禾將刈。東籬菊弄姿。何妨留雅客。是我不窮時。

徐濟忠一首

濟忠字良夫。又字子公。常熟人。有綴閒集。

田按子公馮蒼已師也。有碧戶二十八韻。輕豔之作。已導二馮先路。

聽吳澹如歌

避暑當清夜。邀歌宴上才。美人殊自愛。坐客敢頻催。發口芳蘭襲。滿天涼露來。簫聲追不得。餘韻月徘徊。

何大成一首

大成字君立。晚自稱慈公。常熟人。

寒雨

檐溜似人語。催愁攪夢魂。村雞曉不曙。野火燎仍昏。有病欺貧老。無家活子孫。明晨羞攬鏡。有雪入髭根。

邵濂二首

濂字茂齊。一字齊周。常熟人。諸生。

養疴

造物藏吾拙。山林合養疴。依雲攤枕席。過雨坐松蘿。自識三心淨。無妨八苦多。蕭然方丈室。應似老維摩。

梳髮

髮白真堪惜。蕭蕭可奈何。西風吹病樹。殘葉苦無多。

陸來三首

來字陶孺吳人。

題招隱園賦贈席獻臣朝宗昆季

傍岩倚樹結檐楹。憑仗高人得隱名。最喜風流承內史。

園爲王中翰延陵所構。

卻防徵召出承明。短垣常放青山入。

曲檻頻留野鶴行。竹戶松關行徑絕。野猿攜石置碁枰。

半塘樓小飲

酒旆高懸七里隄。登樓頻喚酒家奚。燕知社日歸來早。花爲春寒不放齊。佳節屢過人漸老。名山相對日

初西。人生那得常如此。莫惜樽前醉似泥。

玄妙觀贈陶鍊師

杖藜何處覓仙桃。玉洞飛花近市橋。絳簡書傳開石室。步虛聲響接雲霄。香生寶鼎丹初轉。名列蓬壺路不遙。讀罷黃庭佳客至。星壇可使挂詩瓢。

明詩紀事卷三十二

辛籤

華淑二首

淑字聞修無錫人。

列朝詩集聞修讀書惠山之下。肆力古學。取古人詩。與本朝作者。下上揚挖。其詩以清新深婉爲宗。雖問津於時人。而能不墮其鬼趣。嘗自敘其詩曰。吾不取一時之好。冀千百年後有一人知我。千百帙中存其一帙。千百篇中存其一篇。而吾二十餘年心血。或藉此一帙一篇以傳。噫。聞修已矣。其所謂一帙一篇者。庶其在是乎。

草臣心甫聽雲晚過斷園次心甫韻

殘暉如月尙招尋。同侶夷猶興易淫。荒徑但容逋客往。閒門一任綠煙深。流鶯入竹移雙影。鄰樹過牆落半陰。剩有微情委空觀。共君吟眺亦無心。

隄月聽蘇姬樓上理曲

高樓銀燭夜歡殘。一曲琵琶月下彈。拍遍閒聲人莫會。自將紅袖障春寒。

陳鴻五首

明詩紀事 辛籤 卷三十二

三三六九

鴻字叔度侯官人有秋室篇

書影侯官陳叔度家貧無人物色之曹能始石倉園在洪塘中有森閣集諸同人爲詩叔度有一山在水次終日有泉聲句能始嘆賞爲之延譽因即以石倉爲居停名其詩曰秋室篇取李長吉秋室之中無俗聲也丙戌之變能始殉節叔度年七十二不能自存以貧病死無子不能葬戊子予入閩時客以其詩來予悲其蒿露謂客曰予任其葬子任其詩因助以金浼諸生徐存永董其事先是莆田布衣趙十五名璧亦工詩善畫枯木竹石閩人珍之然性孤僻不多爲人作惟山房寺壁則淋漓灑墨與叔度先後死亦不能葬存永因舉十五之棺與叔度合葬於小西湖之側予爲書碑曰明詩人陳叔度趙十五合墓客刻叔度集予爲之序板式精好傳之南中莫不知閩有陳叔度矣十五不多爲詩無傳者

十五國風高言集田髯淵曰叔度詩神理既清丰神復秀記貞心於妍貌隱擊念於雋言董倉水曰叔度詩清思泉湧麗句綺合風調流利蘊藉有餘

燒香詞

玉爐桂火微不煖雲母屏開月華滿永夜銀床怨合歡襪羅起踏秋空寒珠簾半捲桐陰綠卻恨明璫聲斷續心事悠悠寶鴨知涼風綉帶輕相吹

九日懷興公

遠別又重陽依依劍水長客魂消此日秋色過他鄉野店寒多雨山城夜欲霜一尊花下酒誰對紫萸香

聽泉閣

風露臨虛閣。應涵秋氣清。一山在水次。終日有泉聲。響逐僧鐘落。寒隨客枕生。中宵滿欄月。都作玉琴鳴。

衰柳

依依芳質怨年華。卻憶深藏小小家。委地誰憐嗷露葉。隔江偏妬拒霜花。淒涼舊巷空嘶馬。搖落長隄尙聚鴉。不似漢宮寒食候。東風輕送萬條斜。

淮陰旅懷

一帶淮聲繞郭流。黃昏人上水邊樓。經時尺素稀閩甸。此夜孤燈隔楚州。楊柳已凋終綰恨。蘼蕪雖死亦關愁。客心處處驚搖落。古壁西風蟋蟀秋。

王彥泓二首

彥泓字次回。金壇人。以歲貢爲華亭訓導。有疑雨集。

列朝詩集。次回恭簡公樵諸孫。博學好古。詩多豔體。格調似韓致光。

靜志居詩話。風懷之作。段柯古紅樓集不可得見矣。存者玉溪生最擅場。韓冬郎次之。由其絃情不露。用事豔逸。造語新柔。所以擅絕也。後之爲此體者。言之惟恐不盡。詩焉得工。故必琴瑟鐘鼓之樂少。而寤寐反側之情多。然後可以追韓軼李。金沙王次回結撰深得唐人遺意。誦之感心。嬌目迴腸蕩氣。

田按。錄詩不廢桑中。可以爲戒也。後之爲豔詩者。幾於勤矣。余錄次回詩。以備一格。嘗鼎者知一鬻足矣。

爐節江邊讌集

喚得秋孃渡口船。竹西歌吹傍江煙。欹斜帽影調鸚夜。清脆鈴聲放鴿天。香餅煖烘桃葉袖。墨花狂污薛濤箋。青舟莫負開爐節。繡被濃熏一夕眠。

對花雜働

瓊香一片委輕埃。猶憶春時傍砌開。腸斷江南陳叔寶。麗華身後卻歸來。

張維二首

維字叔維。常熟人。

懷舊集。叔維習畫。善吹洞簫。度南曲。極要眇之致。爲人孤介。少不會意。輒傲然獨往。遺詩落落清泚。如其人。

吳江道中

荒村烟白遠連天。依約人家葦荻邊。忽聽榜歌何處發。前溪深柳出漁船。

訪萍踪師卽事

石轉溪迴澗幾重。門前一徑度深松。老僧獨立斜陽裏。閒撥藤花認鶴蹤。

何述臬一首

述臬字公邁。常熟人。

懷舊集。何君公邁娶於秦。名淑。季公之孫女也。君之王父名鎔。與季公俱讀書。善草隸。故夫婦俱知書。君亦善八分。秦綱雅婉。

麗。夫婦有秦徐之好。家蓄古鏡可愛玩。君與婦嘗指鏡爲誓。約同生死。壬午年。邑中大疫。君遭應。劉之戚。秦遂破鏡。半貯棺。半繫臂。裂帛自縊。家人持之不得決。乃笑曰。吾志不負昔。若能強我飯乎。以遺孤。託其夫之兄弟。不食十二日而卒。臨歿。盡毀其贈答諸篇。故秦詩不存。嗚呼。徐媛傷生。不載苑史。劉子玄以爲讖。以秦較之。烈殆過焉。埋沒草野。逢此世難。表章何年。予故識之。以俟後世。

田按。秦淑事。明史未採。已蒼懷舊集亦不甚傳。余錄於此集。以待後來之編史者。

秋原晚望

如何脈脈此心中。四望迷離路轉窮。曉夢但隨歸燕遠。秋思難寄逝波東。愁和烟靄山山紫。淚染枝頭葉葉紅。想得宵來眉黛淺。莫教纖月度簾櫳。

錢孫艾一首

孫艾字頤仲。常熟人。處士謙貞子。

甲申夏月飲集張氏池亭次伯兄韻

臨水亭臺觸處涼。芰荷香裏趁殘陽。山川入目都成恨。風景驚心更斷腸。瘦骨未堪波影照。閒情聊逐酒杯忙。不知歡會還多少。珍重銀蟾欲到牆。

徐錫祚二首

錫祚一名于。字于王。常熟人。

列朝詩集于酷愛晚唐宋元詩多所採輯嘗集唐人句爲百絕效李驪翦縮集以悼歌伎王桂好事者猶傳之

春日漫興追和唐伯虎二首

不學尋真不坐禪。烏藤白袷且隨緣。有時貰酒呼鄰叟。排日尋花買釣船。鼠迹共依塵榻住。鶯聲欣傍小窗圓。阮生何事窮途哭。但坐茆茨便得仙。
少不如人不近名。臣今老矣一無能。長生敢慕金莖露。消渴寧思玉井冰。水榭看花春載妓。地爐煨芋夜留僧。往年舊侶崢嶸甚。片紙寒暄愧不曾。

秦徵蘭十二首

徵蘭字楚芳常熟人諸生。

靜志居詩話德陵寔錄爲黑頭爰立者所擢天啟四年七年事遂爾遭伏秦秀才宮詞措撫禁庭瑣語頗稱詳核第合而觀之嫌其述客魏居多而事關德陵者寡不無微憾耳
田按楚芳宮詞傳爲陳稼所擢今據詩綜更正

天啓宮詞十二首

寶冠隨蠶競相誇。雲擁雙龍雉尾斜。衆裏閒評誰最稱。玉人含笑看高家。
內臣所戴金絲束髮冠。舊有此式。至當時而加修焉。蟒龍蟠繞下加翠額。插雉尾。前捧朱纓。傍纓寶玉。王體乾輩侍駕圍獵多戴之。兼衣窄袖戎衣。束小玉帶。蒼顏豐軀。最不雅觀。相當者惟高水壽一人而已。

秋風拂而獵場開。匹馬橫飛去復來。玉腕控絃親射殺。山呼未畢廠公回。上獵于寶善門。魏忠賢馳馬過。御前上悉而射之。馬中額立斃。

星君次第列銀光。丹陽記。齊高帝造。點將標題當飲章。蔡邕傳注。隱告人性。名無可對口。曰飲章。聖主青年方好武。卷頭先問。

李天王。或有用水滂傳。星名配東林諸人。以供談話之資。同付塔。塔天王則李三才也。及時雨則葉向。塔天王為何語。忠賢詳述。溪東西移塔事。意欲上知東林強暴。有如此。徒所當翦也。上傾聽噴噴。若恨不同時者。忠賢計阻。匿其書。逸巡而退。

無限春光轉眼空。尋思翻欲悔鋪宮。花容占斷君前豔。摧向雕檐細雨中。張俗妃被寵。客魏嫉之。既而有。日妃餒甚。餽匄雨中。伏地啜雷。水斗許。未及上階而卒。

二奸遂力譖於上。盡逐侍從。閉妃空宮。屏去水火者數。

萬幾餘畧建長廊。聖主經營食不遑。粉牆未乾宣十作。庀材重築蹴圓堂。聖性好營建。迴廊曲室。皆手操。斧鋸為之。然喜厭不恒。成而毀。

毀而復成。以是累歲卒。未竣功。宮中舊有蹴圓亭。上又手造蹴圓堂。五間。高水壽。

好蹴圓。故憇忠造堂。以習此戲。十作。內官監所轄。以給宮中營建之材料者。

異卉傳來自粵中。內官宣索種離宮。春風香豔知多少。一樹番蘭分外紅。當時部下植異種花草。相傳自。通裁於聖駕常幸之處。有映蝶菊。紅水仙。番蘭。柿等名。

番蘭。紅花碧葉。上愛而玩之。移供案間。或云。即美人焦。

貼裏三欄夾裏花。中官應節鬪豪華。因逢廟忌更青素。瑟瑟波紋襯海霞。紅。貼裏。貴近臣內衣也。諸。璫皆衣之色。之淺深。隨時異宜。

又於御欄下加一欄。名曰三欄。又瓶為雙。裏。綉衣。兩袖各加一。璫。舊制。遇大忌辰。及修省。中官衣青素。

祧廟忌辰。衣青綠花樣。所謂青素者。夏則屯絹。冬則元色。紵也。當時用天青竹綠花紗羅當青素。襯海天。霞色。淺紅裏衣。內外掩。映望之。如波紋。木理焉。

封事連章奏至尊。宮前暫罷選龍孫。青海之外馬多龍種名曰龍孫角羊斑鹿分收過。千騎雲屯北上門。內官有陞騎馬

進馬一匹。駕御乾清宮門。覽畢付御馬監。本官給賞。馬不堪用。該監不收。換補。大內官賞過。祿米者。亦於是日進一羊一鹿。鹿必大白。斑羊必四角六角。鹿付南海子。羊付牲口房。此舊例也。魏忠賢囚各邊缺馬。

上門。盛服危坐。按職名牽馬。魚貫而進。不堪用者。重加責處。於是馬價倍昔。

玉兔迎霜秋宴開。花城侍宴暫徘徊。蕙蘭香細鶯聲軟。報到高家小姐來。重陽前後。內官設宴相邀。謂之迎霜。免。

好事者繞屋列菊花數十餘層。後者軒前者。輕望之若山坡。五色燦爛無隙。名曰花城。御前牌子。高永壽年未弱冠。丹脣鮮眸。皎好若處子。宮中稱高小姐。宴飲之際。高或不與合座。為之不歡。

坤寧花落砌痕斑。書卷爐香伴玉顏。鏡裏尋思燈伴語。承恩端不為幽閒。張后既失寵。絕不露怨望之色。惟以文史自娛。或清座絮絮。獨語。

畫裏明妃絕代無。琵琶千騎擁雲茶。君王不愛傾城色。只看猙獰揭盃圖。李伯時畫昭君出塞八幅。趙子昂畫鬼子母揭盃圖。皆累朝珍

藏。舊物也。兩種並陳。上恆棄此。取彼。聖性樂觀。險怪之狀。而厭近窳窳。略見於此。

分明角勝厭棋枰。井字蘭旁鬪棹城。十五燕姬偏慧黠。雙拋常占上中營。神廟中葉御意。規為棹。成之戲。用神廟中葉。御意。規為棹。成之戲。

中一營。為上營。四方四營。為中營。四角四營。為下營。命宮人持銀錢。或小銀。毬。擲之。落井字界。作九兩中營。六兩下營。三兩落營外。或落井字上。罰如中營所賞之數。雙擲賞罰皆倍。由是諸宮爭效之。至戊午。邊

事大壞。說者謂棹城者。掠城也。哈先徵云。天啟時。猶沿之。烈皇帝登極。禁止。

林雲鳳二首

雲鳳字若撫。長洲人。

書影吳門林若樵老而工詩滄桑後。匿影田間。雖甚貧。不一謁顯貴。庚午秋。吳衆香開星社於高座寺。時社惟予與餘姚黃太冲。桐城吳子遠。年皆十九。若撫賦詩贈予輩曰。白社初開士景從。同年同調更難逢。誰家得種三珠樹。老我如登羣玉峯。書寄西池非匹鳥。席分東漢有全龍。慈憇他日題名處。十九人中肯見容。

靜志居詩話。若撫當鐘。譚談張之日。守正不回。詩篇極其繁富。惜知者寥寥。困阨終老。相如遺草。已不可問矣。

暮秋同姜如須林衡者顧茂倫登虎邱

虎邱名勝虎谿同。載酒重來問遠公。草木正逢黃落後。樓臺多在翠微中。池深暗受三秋雨。塔迴虛含萬里風。此日登臨須盡醉。莫教搔首嘆飛蓬。

送春

香隨燕子入春泥。忍向尊前唱大隄。暗水尚流花徑曲。斜陽不盡草亭西。烏如惜別聲偏澀。山亦含顰黛欲低。老我將歸仍戀戀。醉中得句醉中題。

王邦畿三首

邦畿字說作番。禹人貢生。有耳鳴集。

有學集。王君詩學殖富。意匠深。雲浮脚流。殆將別出於諸君子之間。

偏行堂集。說作詩諸體皆工。其五七言律。真是奪王孟之席。

漁洋詩話。東粵詩。自屈梁程陳之外。又有王說作。王震生。陳喬生。伍鐵山。數人。皆有可傳。說作句如雲低滄海樹。潮上夕陽城。

曙色寒山外。秋風古渡前。殊近錢劉。又有絕句云。昨冬歸去今春信。言是端陽入楚山。吟取荊州舊時事。洞庭秋盡客應還。

留別

落日荒郊遠。高天古渡寒。未潮先候信。有酒且同歡。水白漁燈溼。霜黃海氣乾。鄉心與朋好。去住兩情難。

出門

昨日方還里。今朝又出門。飢寒能迫我。辛苦復何言。疲馬斜陽路。深煙遠樹村。不勞人重問。芳草識王孫。

江城三月曲

江天漠漠雁鴻飛。草色青青麥葉稀。猶憶溪邊舊時節。杏花三月鯉魚肥。

薛始亨二首

始亨字剛生。廣州順德人。諸生。有南枝堂集。

廣東詩粹。剛生博學好奇節。遭亂匿迹山林。自號二樵山人。

詠懷

促織助貧女。方寒憂授衣。杼軸有時歇。中宵鳴更悲。借問裁縫成。爾寧預寸絲。舍緯恤宗周。嘗聞有婦嫠。賦性各有異。何必俱懷私。

晚出尋梁海曲

江上初有月，獨行尋故人。蟲聲出露草，漁火隔煙津。門有歸農過，家爲廢圃鄰。夫君顏色好，長嘯倚松筠。

吳淹一首

淹，字德亨，歙人。

田雀

黍田早歸來，卑棲在荆棘。莫啄秋紅子，留作寒冬食。

吳濡三首

濡，字德裕，歙人。

題畫三首

雨晴春又晚，纔試踏青鞋。野碓雲舂石，山溪水放簾。歲豐饒地利，城遠少官差。彷彿武陵境，桃花放兩涯。

楊花如雪落，風色轉南薰。野店雲埋徑，山家竹護門。晚行嫌虎迹，倦憩喜禽言。驛舍曾經過，題詩壁尙存。

草堂新卜築，渾似杜陵莊。溪涸秋無雨，林疏夜有霜。杖藜隨鶴步，坐石看雲翔。心迹天遊契，風清兩鬢霜。

劉元祥一首

元祥，字瑞圃，丹陽人。國子生，有待圃集。

春日遊蕙山

明詩紀事 辛籤 卷三十二

三三七九

招隄萬松裏。春日此幽探。雲氣流孤壑。湖光帶遠嵐。僧從花底出。禪向靜中參。醉倚紅亭望。漁歌落暮潭。

劉永滋一首

永滋字潤之寶應人。

過吳曰南故宅

南華山人去不回。茅龍誰復翦蒿萊。卻金亭上青青草。二月春風燕子來。

楊誌一首

誌字石甫當陽人諸生。

遊玉泉寺

鐘磬門初啓。松蘿道半遮。泉清堪洗耳。地勝欲移家。客指前朝鼎。僧傳乳鉢茶。未須求證果。生滅在聞鴉。

王璉一首

璉字崇樸黃巖人有一笑軒稿。

毘陵驛

三冬雨絕河水乾。毘陵驛前舟可憐。越客琴書懷遠道。吳門冰雪傍殘年。幾家砧杵寒城外。何處漁歌夕照邊。濁酒可沽須盡醉。旅愁今夜正紛然。

周書一首

書字一中臨海人。

答裘慕山

雨過邱園花事稀。深春猶自滯歸期。秋風匹馬兩年別。清夜月明千里思。芳草欲迷南浦路。白雲旋長北山薇。盛朝公論應長在。不信高才尙忤時。

楊靜一首

靜字定夫常熟人。知縣麟子。

田按定夫年二十二而卒。能詩文。父彝將之令都昌。以定夫歿罷往。踰年都昌陷。顧麟士有詩云。罷令人猶歎未行。旋聞賊已陷孤城。臣忠敢不爲君死。子方知代父生。一室餘魂開涕淚。萬邦多難望昇平。由來倚伏皆無定。豈但應寬抵憤情。定夫有遠識。嘗曰。邊鄙日蹙。國勢日危。社稷已爲虛器。而儒生猶持干祿之文。日吟哦之。至於時政兵謀。一切不省。一旦賊人渡河。士無選鋒。城無堅壘。將與造化者遊於無何有之鄉。君父且不可得。而況名與富貴乎。定夫死之三年。乃當甲申。卒一一如其言云。

懷人

閒來託思在天涯。落落河山重可嗟。留客未懸徐孺榻。憂時終望范滂車。寒雲晚送機峰翠。春雨晨催蔣徑花。四海只今戎馬隔。故人才筆自風華。

程梧一首

梧字來鳳。休寧人。

莊居初夏

山扉寂寂竹籬短。榴花枳花相映開。低枝巢鳥人不取。日日將雛自去來。

程廷橈一首

廷橈字用達。休寧人。

閨情

落花時節雨霏微。翦翦輕寒透縠衣。燕子不知離別恨。雙雙常透繡簾飛。

程九皋二首

九皋字子方。休寧人。有潭西樓稿。

橫山北築

幾入山中去。幽偏好避名。谷空嘯鳥寂。風靜落花輕。一水斜通澗。千峰曲抱城。應忘去與住。世事不關情。

山居吟

青嶂高不極。白雲深更深。牽蘿堪補屋。種樹已成林。午夢鳥能喚。秋懷蛩解吟。此中有真趣。誰識出塵心。

錢秉鐔一首

秉鐔字幼安桐城人

山中看桂喜友人見過時舍弟滯嶺外

山中無故友。叢桂足相知。人老兵戈裏。花殘杯酒時。淮南消息好。嶺外雁鴻稀。明月猶堪賞。還期一扣扉。

齊程一首

程初名維程字子安更名後改字遜元桐城人

望南畿

鍾陵淮水海門通。吳楚煙波一望中。鐵鎖夜銷寒浸月。戈船朝駛浪迴風。禱禱戰士歌江北。刺繡明珠怨大東。漢使節符曾不至。逍遙河上立奇功。

方穀一首

穀字子桓桐城人諸生

白帝子歌

四維茫茫渺難極。載方舟兮沿水入。神女璇宮當夜織。倚瑟鳴絃聲清歷。知音娛樂恣歡翕。遊放滄溟何所息。

明詩紀事卷三十三

辛籤

吳用鈇一首

用鈇字士衡桐城人以蔭除內閣中書

金陵懷古

一曲歌殘王氣銷。臨春春盡草蕭蕭。軍書床下函仍閉。鐵騎城中檠已調。玉璽驟驚歸北國。美人猶自說南朝。賞心亭畔孤魂在。寒雨淒風自寂寥。

彭堯諭一首

堯諭字君宣夏邑人官南昌通判有西園公子集

書影彭堯諭余鄉夏邑人工爲詩多讀書有氣調常遊京師遇竟陵鍾惺與談不合奮拳毆之可一笑也

鏤金老人行

鏤金匠作口無食。泣向街頭賣弱息。自言少時侍先皇。金珠日費千萬億。宮內大璫貢獻多。盤龍結鳳人巧極。通明鱗甲儼生成。飛動天吳絕雕刻。製成獻入未央宮。未必至尊迴顏色。當時酬價比黃金。眼前顧

盼生羽翼。今上御極聖且仁。諸璫斂手皆潛匿。我輩技窮饑欲死。奇珍不獻君王側。老人賣兒將買犢。明日城南親稼穡。我聞此語感聖恩。不將翫好窮民力。黃金土賤埋人間。此老力耕計良得。

鄧祥麟一首

祥麟字玉書。一字子與。武岡州人。

一作新寧人。官岷府長史。一作官審理。

沅湘耆舊集。玉書工詩善畫。書法絕類二王。鼎革後。結廬新寧之石田鵝峰山下。時釋一念以上元將家子祝髮南岳。寓新寧獅蹲閣。玉書與爲方外交。一念死。哭以詩。并編其集。

輓一念和尚

相逢廿載不言家。頗道鄉園近雨花。老向金城常賣藥。閒依石鼎獨烹茶。窗櫺尙放江光入。几榻猶邀竹影遮。滿室香燈歸幻寂。春風一塔繞嘯鴉。

陳濟生一首

濟生字皇士。長洲人。祭酒仁錫子。官太僕寺丞。

三岡識略。吳門陳濟生。陳公仁錫之子也。懷宗沒年。曾刊啟禎詩選。序吳相國銜所作。中有二祖列宗語。奸人沈天甫。呂中夏。麟奇以爲奇貨。挾詩索多金。不遂。令僕葉大出首刻造逆書。詆誣本朝。詩册列名七百餘人。宜遣官提訊。旋奉上傳。天甫等所。指事絕無憑據。編詩之陳濟生。久經物故。帶詩之施明。又經逃遁。顯係奸徒扛扶挾詐。俱斬東市。是舉也。一則解文字之禍。一以杜告訐之門。衆共快之。麟奇我郡明經。不知何苦而爲此也。

諱志居詩話。皇土經亂歸田。緝散積兩朝遺詩。又命工傳寫。明三百年來忠臣義士像。裝以爲冊。可稱好事矣。惜其詩鏤板未終。而像亦爲蠹魚所蝕。覽者惜焉。

遊仙詩

枕上廬山枕下江。經年高臥碧淙淙。黃羊叱起成千隊。青鳥飛來更一雙。髮鬢眞仙能送酒。玲瓏玉女解開窗。只嫌李白多豪氣。一點雄心未肯降。

劉昌運一首

昌運字明卿。如皋人。貢生。除寧國教授。有味古堂集。

渡江

舟下江流急。望中日已斜。入雲惟鳥道。傍水少人家。隱見看山色。浮沈逐浪花。片帆吳地近。到岸卽天涯。

黃翼聖四首

翼聖字子羽。太倉州人。以薦授新都知縣。遷安吉知州。有蓮蕊居士詩選。

有學集。子羽爲人孝友。順祥。自牧若處女。居官。雖書事。以廉辦聞。晚而修香光之業。爲詩清新有雅思。序而定之者。徐元歎也。

壽家奉倩初度二首

看看竹馬事嬉遊。此日樽前共白頭。兄健轉嫌增弟老。國亡何忍爲家謀。譜成節烈平生事。賣剩田園數

畝秋一任時人笑癡絕。五更頻夢復神州。

吟鴛雙肩骨帶仙。亂離贏得一身全。郊增新鬼多吾友。籍入遺民亦信天。蕭散別裁方外服。團圓常說在家禪。不須更覓長生訣。學得饑飧與困眠。

和范石湖田園雜興

谿鳥谿雲莫浪猜。更無名利到胸懷。倦腰每仗藤扶起。還恨當年五斗來。暮雪如簷雨半兼。石坡荒澹竹廉纖。小窗自愛雲林畫。冷逼匡床不下簾。

閃知愿一首

知愿江寧人。桂王時官待詔。

天涯

天涯萬里病如僧。棘舞蠻歌醉未能。獨向點蒼山上望。浮雲何處是金陵。

談亮一首

亮字晉若。富順人。桂王時授義寧知縣。邊麻哈知州。入國朝。削髮爲僧。居遵義臺山寺。有賣開愁錄。

書瀝膽將軍遺事後

銅鑼木柁荷神船。奔走離奇過四年。一片御衣歸不得。孤臣何處哭殘天。

陳啟相平水集。黎維祚字名遠。江津人。幼不肯竟學。惟卜算形家是就。遭亂轉徙。家遵義。會永歷狩緬。時諸爵鎮將各擁衆拒守。維祚憤惋號泣。徧走告以大義。皆忻幸。各密草迎鑾奏付達。維祚乃合諸奏。竅木柁三尺許。藏其中。用荷蓀藎等物。挾衛以行。時庚子正月二十二日也。至辛丑九月十八日。抵孟良府。說晉藩李定國。晉藩色動。維祚破柁出。諸奏相示。晉藩義之。十月六日。給以令諭一道。轉奏。時駕在阿瓦城。城左右夾河。洪波浩渺。相距五六日程。祇聲息通。主臣不得見。隨奉勅云。皇帝密勅。瀝膽將軍黎維祚。據晉藩奏。爾忠肝貫日。義膽渾身。穿虎豹。趨宸極。烈風勁草。殊軫朕懷。茲授爾瀝膽將軍。督理滇黔楚蜀。徧勵諸勛將士。山林隱逸等。謹慎固防。枕戈以俟。候晉鞏兩藩舉師。四路策應。旦夕是圖。勿遲勿忽。十月十五日拜受訖。並收空旨百道。印三顆。造覆底小舟。密藏之。木刊諸神像。擊小鈺鑼。肩唱以行。晉藩大喜。以旌甲擁至通界。始改裝反報諸營。冬十一月。復入緬復命。比至騰越。時晉藩馳約鞏藩白文選。共攻阿瓦。阿瓦木城七里。已破其三。夷曰。汝不過欲見乃皇帝耳。幾年和好。一朝背棄。何益。姑止攻三日。當送出。否則我亦有變計。一任汝爲。不得已從之。閱二日。右河船密如木葉。內外夾攻。兩藩覆沒幾盡。自是兩藩分散。晉徙他夷所。鞏謀恢復。據騰越。馬寶與鞏素善。詣白營遙呼曰。我隻身來說好話者。諸軍勿動。遂入相見。告以密謀。言吳願與白合。白受所給。有艾將軍者。滿洲人。亦懂約附從。相與鑽刀歃血。會上由別道亦爲緬夷送出。居草殿三間。曰兵環其外。吳兵又環之。維祚至艾道入見。上見維祚。大哭。維祚泣曰。事今至此。臣維急奔告諸營。整兵於要道。接駕上。曰。兒子爾可致意十五家等。若能救我出。我只願修行去。哽咽不能言。手翦御衣一片。密寫敕付卽行。晝夜兼行。抵荆侯營。共於偏橋接駕。復入滇偵探。駕已崩於壬寅三月矣。維祚呼天搶地。恨不卽剗刃吳逆之胸。狎狂遜去。不知所終。

陳啟相一首

啓相、字枚庵。富順人。僑寓遵義。貢生。桂王時。授河南道御史。入國朝。削髮爲僧。更名聖符。號大友。居掌臺山寺。自稱掌山老人。有平水集。

黔詩紀略。枚庵康熙壬寅來遵義。隱縣南平水里掌臺山寺。足不越戶者將三十年。有時饑寒。嘯歌自得。一編一鉢。蕭然人外。

九日

黑雲如甕箐光寒。一盞醪唇醉不堪。報道蟹肥新釀熟。雨中清夢足江南。

明詩紀事卷三十四

辛籤

傅爾元一首

爾元字澹方桐梓人崇禎中拔貢有居易堂集

黔詩紀略澹方少年英異四川提學錢邦邑目爲蜀才第二邦邑隱餘慶之蒲村復負笈從之遊居易堂詩涉筆生硬情味消乏而陵陵風骨亦自不凡

樹

花發老枝不醜。選巢多宿名禽。山人根底閒坐。綠葉棲煙自清。

王承之五首

承之字季安華陰人有澗辭十卷

東陰商□□集王子詩凡夫纖膏淫曼之詞刻薄爾弱之格皆其所荷受而逐之者。田按季安詩音調渾雅具有唐格關中詩人之秀

姑蘇懷古

明詩紀事 辛籤 卷三十四

雲迷雪沒百花洲。響屨新粧乍可留。館娃煙靄還日夜。錦帆風雨空山邱。自來自去月如駛。那照吳王與西子。萬點殘鴉春殿飛。請君試聽宮前水。

七夕

河漢杳無際。涼風吹素秋。不知牛女恨。幾許別離愁。明月光初下。寒雲澹欲流。人間與天上。浩蕩總難酬。同元昌兄尋山贈玄上人

尋幽千仞上。獨喜揖高僧。吳越經遊遍。湖山勝覽曾。長松分妙偈。明月澹秋燈。暫話浮生罷。天風散鬱蒸。家兄僕北歸先寄

一自河橋別。鄉園夢裏看。天寒爲客苦。地僻寄書難。遠樹分行直。嘯鳴落照殘。望中紛意緒。憑汝報平安。銅雀臺

寶鬢隨流水。春風斷綺羅。蛾眉今不見。鳳輦昔曾過。廢苑留山月。深宮半薜蘿。西陵松柏樹。猶挂暮雲多。

侯涵二首

涵初名泓。字研德。號掌亭。嘉定人。太學生岐曾子。諸生。門人私謚貞憲先生。有掌亭集。

堯峰文鈔。研德受經陶菴黃先生之門。爲陶菴所引重。王師下江南。侯氏禍患踵至。從弟瀨亡命。有司捕瀨不獲。執研德應命。久然後得釋。性尤友愛。析產一切多寡肥瘠不較。字仲兄。遺腹子。恩勝於己出。自少博覽強記。無所不通。討論天下大事。每豫

搗成敗亦無所不合。論詩則欲別裁僞體而極之自得。以爲苟自得之師心可也。法古可也。苟無自得法古非也。師心亦非也。於詩絕不苟作。或一日數篇。或經月不得一篇。所著掌亭集凡若干卷。蓋自陶菴沒而研德繼之。諸儒稱能得師傳者。必首推研德云。

寄智舍弟

目斷秦庭馬角生。家山雲水各吞聲。三年一見無餘話。千里孤筇又獨行。未卜相逢空有約。莫輕此別遂無情。江潮海日題詩在。莫遣紅塵識姓名。

春感

江左君臣讌笑同。軍烽俄照石頭紅。金縢事秘河山改。玉樹歌殘禁苑空。九陌已沈青海日。六宮猶望錦帆風。祇今寒食鍾陵道。石馬何人指鬱葱。

顧在觀一首

在觀字觀生。松江華亭人。諸生。

王昶青浦詩傳。在觀博覽羣籍。教諭楊文聰重其才。命二子愛生、貞生師之。文聰薦置馬士英幕府。時寇盜充斥。士英裨將黃得功、劉澤清力戰淮淝間。常有克捷。而論者抨擊不休。士英患之。在觀曰。公素懷坦白。無所附麗。近昵懷甯。衆情不免致疑耳。大鍼知之深。以爲恨。福王初。士英入相。在觀首以起用老成。分別邪正爲言。一時若嘉興徐石麒、會稽劉宗周、長洲徐汧、華亭許譽卿、夏允彜、陳子龍並登啟事。而大鍼以名列瑣案。久爲士林不齒。思誣東林諸人。謀立他藩。以一網盡之。噉安遠侯柳某。

上疏。又預詣士英第。屬以嚴切票擬。士英笑不應。大鍼怒曰。東林間諜坐在汝家。我固知無能爲也。在觀嘗語士英。大鍼得志。爲所欲爲。此事關公門戶。且以告士英。子鑾鑾幾諫。至於挽鬢抱項。涕泣隨之。諸君子得以從容引退。未出亦各高臥里門。不致起同文黨綱之獄。在觀力也。

金陵懷古

十年不見石城秋。萬事皆隨江水流。晉代五龍空往識。謝家雙燕有新愁。千門衰柳懸殘月。一劍清霜感敵裘。滿目相逢無限恨。那堪重上仲宣樓。

蔣易一首

易字前民。江都人。有石閭集。

遺民詩。前民與杜濬。王猷定友善。工五言律詩兼畫。

清涼山頂留別于皇

招提上夕陽。別酒置崇岡。秋老孤帆色。人輕百戰場。江雲平楚岸。風葉減吳霜。來日空回首。思君獨渺茫。

沈祖孝二首

祖孝。初名果。字因生。一字雪樵。烏程人。有湖千。硯庸。當泣。陶年。吟安。下簾等集。

靜志居詩話。雪樵至性之士。詩皆從肺腑流出。

白下懷顧茂倫湖上

白下孤筇亦浪遊。西湖有客共誰留。江山到處聊青眼。詩酒驅人愧白頭。弔古何須悲叔寶。乘時猶得數錢鏐。景陽煙滅寒潮斷。笳鼓年年滿越州。

九日同東籬登王老露臺

望裏雙峯夕照懸。一泓如鏡見湖天。風流老去應人後。雲物他鄉轉自憐。佳日有臺聊復爾。古人無酒亦淒然。白頭破帽垂垂立。憶得閒居陶令篇。

石可璽七首

可璽字石丈山陽人諸生。

養一齋詩話。吾鄉石石丈論詩云。今之作者。不附于瑯琊。北地。則附於公安。景陵。詩以位置性情。攘取他人之性情而私爲己。有尙得謂之有廉恥乎。昔鍾嶸司空圖皆作詩品二字。都排向外面去。石丈說到無廉恥上。方足爲詩品的解耳。

讀曲歌

人皆樂歡笑。郎獨無言語。非郎無言語。窺儂眉未許。

立秋前一日偕劉七成諸子飲黃居擬邸中喜春郎度曲

檐鈴風響亂松聲。涼月照人襟袖明。冷燭畫屏紅粉意。澹雲河漢故人情。潯陽舊淚弦中落。楚客新愁笛裏生。一夜清歌催木葉。明朝秋色滿江城。

湖居

暮色湖上來。遠天東漸小。一榻坐林中。停目數歸鳥。

舞陽令潘若稚同男孟觀死節三首。若稚名宏孟。觀名澄淵。

舌斷常山落日斜。空教明月冷齋衙。燕臺六月猶飛雪。春到河陽不敢花。
司農有印佩軍門。城社雖墟氣已吞。到處血腥迷夜火。萬家風雨哭黃昏。
雪埋烽火角聲殘。魂魄猶依洛水寒。月落千山夜臺冷。家山有夢不曾還。

養一齋詩話。石丈弔潘若稚詩云云。蓋石丈明季諸生。闖賊入京。北向痛哭。鬱鬱遂卒。宜吐詞激烈如此。

閱鼎一首

鼎。字渭潢。歙人。有清話堂詩稿。

遺民詩。渭潢隱居江都。性喜讀書。常於廣庭設几席。樹以紙屏。人往來其側。目不一顧。兼精內典。

懷南嶽遠菴和尚

迎師數千里。葉落洞庭湖。攜鉢猶爲累。居山誰與徒。詩懷秋月淡。禪性野雲孤。愧我淹塵世。終年此故吾。

沈叔竑一首

叔竑。字宏度。錢塘人。

于忠肅祠

于公遺廟南山下。旌旆蕭森極望中。野老逢春常薦醴。石鼃向晚自嘶風。人磨斷碣青霜冷。鳥啄荒苔碧瓦空。知倚遙天長劍動。暮雲殘照欲成虹。

李景福一首

景福原名澹。字梅隱。揚州興化人。諸生。

遺民詩。梅隱甲申後學使者嚴檄促試。以死辭。隱居教授。

暮春遣意

三春看又盡。身世一飄萍。草識王孫意。花傷遊子情。殘燈和夢斷。濁酒帶愁傾。日月年將逝。悲歌送此生。

徐象婁一首

象婁字仲丙。榆林人。

秋興

江上何年別故人。臨流相憶淚沾巾。滄桑漫問當時事。湖海難容此日身。明月空林驚落葉。秋風短棹覓花津。自憐野性耽泉壑。豈有桃源可避秦。

邵似歐二首

似歐字之文一字漢功鄞人貢生。

結綺亭集。邵尙書輔忠有子二。似歐字之文。明經。似雍字之堯。諸生。同產七人。中稱最秀。時吾鄉於附奄諸家。相疏斥之。並其子弟弗與還往。尙書尤爲清議所惡。而之文兄弟別具志節。不以家門見外。丙戌之文兄弟侍尙書大雷山中。微言勸尙書殉國。以蓋前過。不能得。已而故王栖泊潯州。石浦之間。兄弟竭力資其扉屨。其後求周公羹雲銘尙書墓。羹雲直筆無所借之文。兄弟一慟而已。嗣是故國遺民。至較關者。必登邵氏之堂。兄弟皆有集傳於後。

讀史二首

甘蹈東海死。恥尊秦爲帝。仲連一布衣。片言抉大義。當時諸侯王。奄奄無生氣。

子房圖報韓。破產交俠客。椎秦中副車。十日索不得。奇人作快事。千古稱豪傑。圯橋一卷書。藉以興漢業。究竟非素懷。功成遂辟穀。此心誰得知。赤松與黃石。

顧超八首

超字子超吳人。

靜志居詩話。韓高士洽有明詩存選本。其最心折者。子超之長歌。大約兼仿溫飛卿。李長吉而神明之。惜其全棄求之不得。當崇禎之際。吳俗談詩者。多惑於楚吟。以空疏蕭寂相尙。子超出入經籍。卓然羣雅之遺。

龍渚

紫海珠作宮。方壺玉爲牒。不有金鐵舟。安能遂長往。蛟龍走如絲。雷電縮于盎。高掇翡翠巢。俯襄珊瑚網。

馮夷仰面噉瀟足不敢上。我欲呼巨靈玲瓏納諸掌。

鍊墩

黃鶴委羽處。雲浪高千尺。聞說香采人。時逢弄珠客。磯頭燕麥青。鷗背漁天白。陰火然積砂。迴風響秋碧。一棹尙可浮。三返殊未昔。

張祐別業

寂寂巖前花香散。春無奈。當年作賦人。遺宅生秋籟。抱犢溪澗中。尋僧水雲外。天子不見收。名交竟何賴。留得草青青。相傳作書帶。

寒夜曲

霜月皎皎睡未能。醉眼莫辨光峻嶒。紫梅吹破繭窗雪。翠竹戛斷風檐冰。琉璃凍碎膽瓶裂。漏水膠殘銀箭折。簾鉤多事鶴無聊。四壁清香幾曾絕。西鄰美人閒金屋。繡被錦纏半牀玉。金爐火滅難再溫。不畏天寒畏獨宿。兩心相隔無路通。一夜相思空熱中。安得東風早吹拂。先傳煖氣入房櫳。

柳毅井

仙郎怨別龍閨曉。肉麟騎出星潭早。唳穿水母秋一泓。世上餅鼻逐雲擾。高天露滴桐陰密。碧氣吹香湖上橘。玉壘牽斷九秋絲。古鏡照寒千歲漆。瀟湘帝子洞庭君。朝來出雨暮出雲。我有尺素不可將。還家且

放青溪羊。

寺夜有懷二首

團扇初涼怨未休。尺書裁就獨緘愁。青蟲飛散綠窗雨。白雁叫殘紅蓼秋。病裏看山惟落葉。夢中尋客亦登樓。離騷久不輕開卷。今日張燈讀遠遊。

水滴蓮花夜未央。篆香銷盡九迴腸。僧於寂寞翻殘課。我以相思怨夕陽。零雨敗蕉淒暗壁。荒鷄疏磬隔橫塘。林風乍息高窗白。十里蒼山一片霜。

哭吳生

玉藕銀塘映綺疏。鴛鴦樓上畫眉圖。無端擲碎遊仙枕。從此人間好夢無。

潘問奇五首

問奇字雪帆。錢塘布衣。有拜鵲堂集。

遺民詩。雪帆一生孤寂如僧。詩與田梅岑合刻。又著拜鵲堂草。客死揚州。太守傅澤洪重其人。葬之平山堂側。

夾山寺

窈窕來深谷。千峯繞寺平。墓田耕石骨。樵徑入松聲。地古春難到。山寒水自生。上方茶碗罷。塵夢此時清。

穎橋晚泊

黃昏到新息。此地古來荒。店小門臨樹。茅穿月射牀。青芻喧櫪馬。黑水度山狼。燭盡時聞柝。征人苦夜長。
自磁州趨邯鄲途中卽事

中宵聞鷓發。日出走黃沙。風力能飛石。河冰不陷車。郊寒騰俊鶻。樹老立飢鴉。傍午停征轡。炊煙得幾家。
讀史

昆池夜火失金川。望帝歸時化杜鵑。家譜縱編洪武紀。史書難革建文年。禍由蟲錯雖無及。事續周公恐不然。誰向長陵求木石。西山老佛起新阡。

肅寧

縣有故瑤魏忠賢第宅遺址尙存

肅寧池館舊連阡。過客追思鹿馬年。齊國豎刁呼尙父。漢時朝士拜中涓。北司計就書難上。元祐碑成事可憐。獨喜春來吳楚地。左楊祠火正喧闐。

李潛一首

潛字啓美。揚州興化人。有葉聞齋稿。

宿清涼寺

人靜僧初定。山孤月半銜。石苔侵曲几。松雪點危巖。座上花宜散。塔前草莫芟。興來登北阜。目送大江帆。

張養重二首

養重字虞山山陽人

遺民詩虞山俠骨文心蚤有合響晚年詩愈豪中愈潔

雨中重過釣臺

再訪先生遇見難空江風雨逼人寒白雲中斷千峯樹碧漲新添七里灘只有陰晴隨箬笠從無興廢到漁竿回頭前日登臨地烟滿雙臺何處看

竹枝詞

蘄州竹簟涼于水黃陂葛巾細于紗晚來更挽高高髻喚買街頭水桂花

魏應星一首

應星字弁山揚州興化人

促織行

促織驚嫵婦婦歎無所織倚樓望明月門戶生荆棘今年絲雖貴筐箱盈萬億買絲忙上軸軋軋無停息豈不畏苦辛將以謀生殖秋風颯颯生租吏相催逼怒目坐我牀懷中取官勅攫去忍無言禍至恐不測爾蟲顧何知夜夜鳴我側嗚咽入空房月暗風沙黑

韋人鳳一首

人鳳，字六象，武康人。

遺民詩：六象有盛名，詩以蒼健爲骨，秀美爲澤。

南山

家住南山下，荒村只敝廬。春風三徑草，夜雨半牀書。石戶藤花合，茅檐竹影疏。溪邊堪泛棹，欲傍五湖漁。

李瀚二首

瀚，字士翔，揚州興化人。

遺民詩：士翔有才名，爲文奇拔，詩亦超越。甲申後逃於禪，具老人欲授以杖拂，辭不受。

雨夜

積雨侵階滿，茅堂可浴鷗。妻孥十口聚，燈燭五更愁。隴麥春苗偃，溪田水荇流。野人思見日，偶語立沙頭。

送顧叔向之湖南

七月揚舲去，淒淒荆楚游。江山仍接漢，辭賦且依劉。旅興桃源路，鄉心明月樓。雁書衡嶺盡，目斷九嶷秋。

王貴一二首

貴一，字象山，揚州興化人。

三月三十日

亭樹蒼茫綠。牆花歷亂紅。開樽聊細酌。今日對春風。

送吳甥夢祥入都

古驛風沙送馬蹄。川原極目夕陽迷。搖鞭莫向天山去。望帝經春滿路啼。

苗君稷一首

君稷字焦冥。一字有邵。永平人。

立秋前二日懷剩公

坐惜秋將至。思君在翠微。山空花自落。林靜鳥還飛。策杖尋溪水。牽蘿挂衲衣。涼風送殘暑。吾欲叩禪扉。

程岫一首

岫字雲家。歙人有江村詩話。

遺民詩。雲家父懋衡。甲申之變。不食死。博學篤行。守先人之志。與孫豹人。陸懸圃。吳騷人。交善。吟詠終老。

贈徐鳳麓

積雨消春日。羈人歎暮年。淮流寒照樹。鄉夢夜聞鶻。舊業浮雲外。遊裝短棹前。親知零落盡。去住總淒然。